

绥寇纪略

吴伟业

文硕阁

wenshuoge.com

目录

关于我们	3
提要	5
绥寇纪略卷一	6
绥寇纪略卷二	23
绥寇纪略卷三	28
绥寇纪略卷四	37
绥寇纪略卷五	47
绥寇纪略卷六	56
绥寇纪略卷七	65
绥寇纪略卷八	76
绥寇纪略卷九	84
绥寇纪略卷十	100
绥寇纪略卷十一	108
绥寇纪略卷十二	115

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

【臣】等谨案绥寇纪略十二卷

国朝吴伟业撰伟业字骏公号梅村太仓人明崇祯辛未以第三人及第入

国朝官至国子监祭酒是编专纪崇祯时流寇迄于明亡分为十二篇曰渑池渡曰车箱困曰真宁恨曰朱阳溃曰黑水擒曰谷城变曰开县败曰汴渠垫曰通城击曰盐亭诛曰九江哀曰虞渊沈每篇后加以论断其虞渊沈一篇皆记明末灾异与篇名不相应考朱彝尊曝书亭集有此书跋云梅村以顺治壬辰舍馆嘉兴之万寿宫辑绥寇纪畧久之其乡人发雕是编仅十二卷而止虞渊沈中下二卷未付枣木传刻明史开局求天下野史尽上史馆于是先生足本出予抄入百六丛书归田之后为友人借失云云意者明末降闯劝进诸臣子孙尚存故当时讳而不出欵此本为康熙甲寅邹式金所刻在未开史局之前故亦无虞渊沈中下二卷而彝尊所辑百六丛书为人借失者虽称后十八年从吴兴书贾购得今亦不可复见此二卷遂佚之矣彝尊又称其书以三字标题仿苏鹗杜阳襍编何光远鉴戒录之例考文章全以三字标题始于缪袭魏铄歌词鹗光远遂沿以著书伟业叙述时事乃用此例颇不免小说纤仄之体其回防杨嗣昌左良玉亦涉恩怨之私未为公论然记事尚颇详悉 尊所谓闻之于朝虽不及见者之确切而终胜草野传闻可资国史之采辑亦公论也乾隆四十三年五月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

钦定四库全书

绥寇纪略卷一

国子监祭酒吴伟业撰

渰池渡

崇祯元年戊辰三月二十日昧爽前全秦天赤如血五六月西安有孽火入人家色青光荧荧然广轮盈尺者数十旋于地若鬬不滥炎民磔鸡犬禳之乃去自四月至七月不雨八月恒雨霜杀稼冬大雨雪木冰岁大饥秦以延绥宁夏甘肃为三边延绥据河为塞斥衍千二百里筑三十六堡分险列戍沙磧不生五谷富民计口仰食县官承平怵惕算崇祯改元上距万厯四十七年延饷缺额者至一百三十八万天啓中秦抚乔应甲延抚朱童蒙皆奄党也应甲贪婪枉易法纪溃弛四封之内攻亭长杀长吏而莫禁【尝有道臣袁养和被刼请捕应甲反胁取养和千金中书张贺昌被刼执巡捕典史王允德索赂二百金以是被盗之家莫敢控告】童蒙朘削军廩助三殿大工兵民侧目始祸实自两人秦地所出新饷均输间架三者专以备他急数日增吏因缘为奸羨余辄倍西安镇兵数万率买闲占役以空名隸尺籍【兵科刘懋疏秦兵属边操者卖于边官岁纳班价属叅都者卖于叅都月纳班钱操兵三千占于各衙门司道宗室乡绅以供役使】民不堪复无所憚以此纠合边人为贼十一月白水男子王二反【王二刼宜君县狱拒捕逃入苜蓿沟 贼巢穴十一月内通白水衙役杨发蒲城王高等为乱】掠蒲城之孝童韩城之淄川镇

王左挂【原名王之爵有苗美飞山虎大红狼等同起】起于宜川【地名龙耳嘴】十二月三边总督武之望奏固原兵变【元年十二月二十四日兵刼固原州库】总兵钱中选无军纪得免论巡按御史吴焕纠巡抚胡廷宴瞶眊不视事与延抚岳和声以边兵饥民互相推匿所奏报俱不实致成大患兵部尚书王洽请覈其事以闻

刑给事薛国观奏言淳化绥德等处流贼千百为羣由乔应甲纵盗酿祸得防报闻二年己巳正月鄜阳抚治梁应泽奏陝西贼王大梁【一名大梁王】三千人入略阳徧汉中【十月二十六日汉南贼大梁王从成县两当逼近略阳汉中官兵追至宁羌州逸去后复趋略阳官兵战败鄜抚告急】商洛道刘应遇讨白水贼王二斩之【余党窜入黄龙山苜蓿沟】

固原逃兵掠涇阳富平执游击李英二月总督武之望病死胡廷宴闲住以陝西左布政刘广生为秦抚右副都御史杨鹤总督三边岳和声罢【吴焕疏盗自戊辰七月王二作难己巳盗首韩世盘韩世友胡之槐吴养臣皆边兵故和声亦罢】以河南左布政张梦鲸为延抚吴自勉为延绥总兵四月阶州叛兵周大旺等作乱副将贺虎臣捕得伏诛督粮道叅议洪承畴率乡勇围左挂于云阳防成擒暮大雷雨作遁去【三月廿一日贼自真宁逼三水遊击高从龙却之贼入马兰山四月九日复犯耀州承畴令官兵乡勇万余人分十二营围贼于云阳防获之乘夜雷雨潰围走淳化入神道岭追斩二百余级】刘应遇追汉南贼于大石川所将卒斩王大梁于阵围其余党于伏羌之五丁峡将尽歼之宁羌知州陈元瓚失防贼遁去【刘应遇提毛兵入汉合川将吴国辅兵击贼于略阳十战皆捷贼屯垣口有守备王元极陷阵马蹶被杀犹手握贼级不置贼退汉陰应遇令都司解文英同蜀将吴国辅李标奇追至大石川斩五百级把总李旺得贼首王大梁余解散】十一月京师戒严延绥总兵吴自勉入援侵行粮军

中道逃归为乱延抚张梦鲸愤恚死【自勉沿途逗遛贿放精兵变卖营马梦鲸愤郁以死濒死移书杨鹤纠叅鹤不以上闻】山西巡抚耿如杞亦率兵入衛叛逃为贼【耿所統皆沿边劲卒已至都下矣兵部调守通明日又调守昌又明日又调守良乡功令兵到日不准开粮次日列营汎地乃给之西兵连调三日三日不得粮既馁且怒遂沿山东一带刼掠耿以不戢军士逮问耿既逮五千人哄然尽散潰归山西而晋中流贼起矣】以洪承畴为延绥巡抚兵部尚书王洽有罪下狱左侍郎申用懋晋尚书

三年庚午正月申用懋自劾免以蓟督梁廷栋为兵部尚书 吴自勉罢以临洮总兵王承恩为延绥总兵【其改用王承恩以兵将不安剥军士未上闻也后李应期阅边据所闻叅劾帝怒甚提问自勉于四年九月病故】蓟督张凤翼畱承恩春防甘肃总兵杨嘉谟入援蹊更率其兵驻东协时钱中选亦入援行秦督抚以三边四镇止宁夏总兵贺虎臣一人非所以办寇请用故总兵杜文焕摄承恩镇西将事兼督延绥固原兵三千便宜勦抚报可 王子顺苗美勾逃兵掠绥德围韩城复犯清涧总督杨鹤巡抚刘广生击却之斩级三千降其众三百人总兵杜文焕又败之于安定先是万历时朝廷念西军劳苦预给三月粮以为常崇祯己巳秦大旱粟踊贵军饷告匱延抚杨鹤甘抚梅之焕分道勤王是年复以稽饷而哗其潰卒畏捕诛亡命山谷间倡饥民为乱时东事急朝议核兵饷各边镇咸厘汰裁额至数十万乘障兵咸噪而下而兵科给事刘懋疏请裁定驿站歲可节金钱数十万帝喜着为令有滥予者罪勿赦懋意谓苏民力也而河北游民借食驿糈至是遂无所食益无赖潰兵乘之而全陝无宁宇矣【先是懋有补足两年缺饷与赈金十万之请事既不行再疏以陝西衛兵冒濫虚弱求按册清汰操练并秦有司重火耗多赎鍰宜拏问其尤以谢关中之人乱将自定其论最剴切惟举全秦公费存留巡方贙罚驿站节裁银两充勦抚之用颇有近于搜括然因号呼帑金弗应而疆事日益亟岂得已哉而京师向有刘给事裁省驿递驱民为盗之谣不知何故愚谓必出于士大夫輶轩之口所以流传至今夫鄜延絕塞无与流传关陇饥民宁关輿隸若早从其请不啻曲突徙薪是不可以不辨然考之御史姜思睿疏云各递贫民千百为羣任輦輿以续命者饥饿待死散而为盗闻懋易箠时亦深悔为此言后死京邸棺至山东莫有为輦负者各处饥民甚至呼其名而诅咒之图其形而丛射之是又非未见云然姑两存之】

二月杜文焕檄谕米脂清涧诸贼王左挂以其党二百人降

荧惑入东井退舍复羸居数月又入鬼宿犯积尸气 延安知府张輦都司艾穆蹙贼于延川贼王子顺张述圣姬三儿等俱乞降王嘉引掠延安庆阳城堡多陷杨鹤主抚不以闻【鹤与刘广生出示崇祯三年三四等月有贼首黄虎小红狼一丈青龙得水混江龙掠地虎孟良等俱给免死牌安置延绥河曲其淫掠如故民罹荼毒有司莫敢御寇患成于此矣】

四月贼从神木渡河入晋

五月杨鹤移镇耀州贼攻破金锁关杀都司王廉调榆林道张福臻提兵讨之

六月御史李应期巡按陝西疏请招抚许之 职方郎李继贞兵科给事刘懋先后请以十万金赈延绥不报贼王嘉引破黄甫川清水木瓜三堡孤山副将李钊被杀寻破府谷据其城又破孤山【先是钊欲图贼而左右皆贼党钊出巡至清水营遂遇害贼在府谷不过数百官兵大集可以尽歼而轻用招安不逾旬日复号召成旅东陷山西河曲】刘广生称病以陝西左布政王顺行为陝抚 以曹文诏为孤山副将 七月李应期奏庆阳守备李极败绩于鄜州之雷公岭【巡检陈其佐被杀守备白邦政重创失战马四十三匹】王顺行请三年裁扣驿站银三万两充养兵费下戶部尚书毕自严酌议以闻【杨鹤疏云帝允旧抚臣王顺行之请准发裁

扣站银三万金而布政吕逊又以抵补借动司库之数是于顺行去后从其请而终于不行也】八月府谷贼王嘉引以其众奔黄甫川王顺行解任以太仆寺少卿练国事为秦抚九月洪承畴杜文焕攻黄甫川贼破走之降贼王左挂谋叛洪承畴李应期定计诛之钱中选罢以杨麒为固原总兵率其兵驻西协兵部尚书梁廷栋请勅秦督抚速治二三贪残有司尽补三边两年缺饷而用杜文焕为大将秦晋诸将兵皆属焉【两省选精锐万人属之沿河营衛听节制各抚按道亲歷行间监督陝西留站银三万两山西留二万两两省抚按再各借二万五千两以资军费】秦游饥至是大祲山西以防河闭柴斗米六钱米脂清涧延长绥德之民流亡捐瘠米脂人从贼者十之七邑几空【吴甡疏请通晋中籴贩有防在西安接济其实西安远而晋近而清涧绥德葭州与晋之临县兴县永宁州皆有渡口商民从来互相贸易今晋中设兵防盗因以遏籴榆林天下雄镇多宿将劲兵若扼其吭絕之大可忧也】肤施人张献忠据十八寨十月贼王嘉引再陷清水木等堡已又陷府谷杀

游击李显宗寻兵至走山西十一月贼李老柴攻合水

十二月延绥叛兵神一元陷新安陷宁塞杀叅将陈三槐四年辛未正月帝特发帑金十万两命御史吴甡往赈延安饥民务令赈恤以实宣布朝廷升平散胁德意即用甡代李应期察行

间功罪洪承畴请撤王承恩还镇许之帝召对各省监司谕陝西叅政刘应遇曰寇亦吾赤子也宜招抚不可纯勦二月神一元陷保安一元死弟一魁领其众陷合水围庆阳【御史李应期报保安捷言斩贼二百四十级内有神一元首级及弟立贼不利弃城走二月十四日围庆阳推官马一荀知县李含朴设守二十九日陷合水杜文焕张应昌来救庆阳围解】平凉固原 唎为乱

太白昼见荧惑再入魁宿犯积尸气杨鹤移镇宁州受神一魁降鹤责数其十罪一魁伏谢【鹤奏言三月初三日定边副将张应昌解庆阳围初五日贼遣刘金刘鸿儒求抚初九日贼遣孙继业茹成名等六十余人投降送出合水县知县蒋应昌及保安县印信练国事又报榆林道张福臻抚过拓光龄等数百人又金翅鹏过天星等八十余人关内道翟师雄抚过田近庵等六百人雒川知县刘三顾解散独头虎等数千人庆阳地方抚过刘道海白柳溪等数千人而防灯子当大败后降于清涧时鹤设御座于城楼上贼跪拜呼万岁因宣圣谕令贼设誓或归伍或归农自此羣盗视总督如儿戏矣】练国事移镇鄜州率副将张全昌等屡胜贼于中部于郃阳于芝川韩城斩六百余级【国事上疏极言当一以大勦为主必使大伙强壮者尽诛而后别伙受抚者可服人是其言】贼不沾泥攻围米脂总兵王承恩张应昌率兵援之贼败遁寻降【不沾泥手杀双翅虎缚紫金龙以自赎】贼满天星降于杨鹤寻叛去

洪承畴命守备贺人龙劳降人酒降人入谢伏兵斩三百二十人五月王承恩击宜川贼败之闯王虎金翅鹏降【金翅鹏即王子顺之侄王成功】余贼走宜君

曹变蛟击败宁塞遗贼于唐毛山【四战皆捷斩一千四百余级】兵部尚书梁廷栋革职吴甡至延安以西安推官史可法行赈救如诏书从事人便之秦三年旱至是始雨六月孤山副将曹文诏追斩王嘉引于山西之阳城兵部议撤西兵还秦以固原兵新至请先命杨嘉謨归甘肃而留杨麒俟徐遣乃报可七月防灯子率六千余众东渡山西贼李老柴独行狼陷中部时有受抚贼田近庵者以六百人守马拦山应之署事同知郑师奉杨鹤檄委任招抚贼至不成备以丧其邑练国事王承恩率兵先后攻围困之贼上天龙马老虎独行狼复掠鄜州杨鹤王承恩击走之上天龙等以二千人降【给事曹履泰孟国祥各奏抚贼欺饰之御史

吴甡亦言招安之弊载在史册今宜以先勦后抚为定防如果投戈弃甲抱旗乞降则勦之中亦自寓抚之意而实以勦坚抚如或狡诈复逞聚掠不散则抚之时亦自有勦之用而不因抚废勦人防其言】八月贺虎臣击斩庆阳贼刘六以曹文诏为临洮总兵
九月曹文诏歼防灯子于晋中班师神一魁窃宁塞以叛 贼郝临庵掠同官耀州宜君

等处 贼上天猴掠宜雒【时合独头虎满天星一丈青等五部恣掠宜雒副将赵大 驻韩城去贼营二十里不救土人强之出报斩五十级验之则皆妇女首也给事魏呈润劾大 革职】十月杨鹤革职逮讯练国事戴罪自赎

榆林道张福臻同总兵曹文诏下中部馘李老柴送京师 贼上天猴诈入宜川寻降
十一月延抚洪承畴总督三边张福臻为延绥巡抚 贼谭雄陷安塞【安塞知县柴国弼固守后以积劳死遂陷○谭雄同高自知等以十一月初七日通奸民入安塞城次日即出执生员郭汝盘以求抚闰十一月初九日复据安塞】闰十一月降贼夜袭甘泉河西道张允登遇害混天猴等反除上天猴于鄜州 督师急击安塞谭雄惧出降斩之【承畴方图宁塞计若株守贼将生心乃命曹文诏戴君恩等合围而潜师夜趋安塞于十三日暮抵城下合王承恩李卑之兵四面急击至二十五日早百道并登克其城共斩五百三十余级擒六十余人俘获衣甲器械无算安塞贼平又有降贼党雄王得贵拓亨高凌志等纠贼千余众攻绥德州掠义合驿总兵王承恩同千总吴国伟守备贺人龙等追勦斩二百余级指挥邓得威以福臻令诱贼党党雄王得贵拓亨高凌志等七人斩之】 贼不沾泥陷安定 十二月洪承畴奏抚过延安吴家山党家坪薛家崖大贼一十八寨贼首张献忠罗汝才等一千九百余名 又分遣总兵曹文诏等同游击左光先崔宗引李国奇等五路勦宜绥清米四县之贼于怀宁川黑泉峪绵湖峪封家沟大战败之追至祁家高梁丑山扫地王授首

帝以秦饷户兵二部不覆奏召对切责兵部尚书熊明遇请措饷二十万从之

延抚同靖边道戴君恩副将张应昌【应昌系靖边副将】都司马科等定宁塞神一魁诛死五年壬申正月帝用巡按御史吴甡言免延安庆阳新饷督师请留西凤饷银二十万以勦贼劝农报可 杨鹤论戍混天猴陷宜君【三月初三日贼伪为米商进宜君县知县李迪康把总马麟田恭魏安等俱逃】二月陷鄜州僉事郭应响死之

故总兵杜文焕以吴甡勘三年杀良冒功有实状下狱 三月临洮总兵曹文诏甘肃总兵杨嘉谟大破贼于西濠西濠溃贼破华亭文诏嘉谟追至落水城贼红军友为其党所杀

四月督师合秦抚延抚追贼不沾泥于西川守备孙守法擒之 七月马科所将卒斩混天猴于延水关贼可天飞围合水曹文诏杨嘉谟于铜川桥大战越日文诏嘉谟偕固原总兵杨骐再战于虎兕凹大破贼八月督师平贼铁角城独行狼可天飞伏诛余贼伏大方山小方山于蒲河肆掠诸将遮绝要害曹文诏提兵一千五百人追杀于陇州平凤界歼贼务尽张全昌马科以千人自环县应之 时张福臻以抚贼故致王承恩之兵哗索饷解任去以陝西右布政陈奇瑜为延抚奇瑜亦能杀贼而右叅政叶廷桂清军道王振奇靖边道戴君恩监军道樊一蘅四人俱有功 六年癸酉六月巡按御史范复粹上幕府军功斩级三万六千六百有奇曹文诏功第一杨嘉谟次之【嘉谟西凉世职初以随阁部孙承宗当关已推副将积功陞甘肃总兵继因援蓟驻防于甘肃讨贼贼平及归秦仅用虚衔议叙补蓟门总兵】王承恩杨骐又次之诸将亦多可纪云

当秦寇发难延绥以北为逃兵为边盗延绥以南为土寇为饥民边盗则神木之王嘉引靖边之神一元为魁而支蔓于绥德之不沾泥庆阳之可天飞延安之郝临庵镇原之红军友也土寇则西川之王左挂苗美清涧之防灯子为魁而支蔓于中部之李老柴延州之混天猴保安之独行狼也王嘉引以三年六月四日攻陷黄甫川清水木 三堡次日陷府谷县据其城屡战坚守诡约降縋而趋黄甫川图大逞延抚洪承畴总兵杜文焕从孤山进剿斩首四百级晋兵亦得三百级贼穷送出县印退保大小宽坪等寨十月二十日嘉引再陷清水已又陷府谷兵至走之晋晋总兵王国梁师大 遂失河曲贼堞而守焉四年四月十八日裨将曹变蛟艾万年【艾万年时为神木叅将又有都司马科杜大捷王世号】曹文耀叅谋袁廓守等从曹文诏收河曲斩首一千六百级获军资铠仗数千计【获王嘉引银印一王维岳银印一】嘉引夺门走六月初一日得之阳城城下晋地也皆秦将士力云神一元以三年十二月一日破新安十三日破宁塞寻破柳树涧二十五日攻靖边三日夜副将李若梓固守微救兵至几陷四年二月破保安副将张应昌左光先与战大败之神一元死【御史李应期报保安之战斩贼二百四十级内有一元首级】众推其弟一魁战不利弃城走二月十四日围庆阳推官马一荀知县李含朴设守二十九日陷合水杜文焕张应昌来救庆阳围解【二月初二日贼破饶阳堡遂长驱庆阳城外扎三大营张应昌力战夺炮六位围始解】总督杨鹤移镇宁州致一魁之壻于营中同卧起为其部强欲以陷诸贼一魁至数以十罪【一破宁寨二杀将官陈三槐三破新安堡四抢柳树涧五围靖边六破保安七勾西人入围庆阳九破合水十杀戮良民淫污妇女】已服即宣诏赦予以官处之宁塞众四千有奇使叅将吴 器护焉忧其属茹成名难制从一魁谋而去之一魁陰许诺众莫知成名死【成名挟赏未遂拳毆中军范礼一魁执而杖之七月中一魁遣心腹刘金见杨鹤于三原鹤授意于金许以杀成名有赏九月十二日鹤在耀州一魁遣金同成名至鹤喜曰刘金至事济矣】张孟金黄友才皆猜惧九月十八日挟一魁以叛吴 器他往执其下范礼尹鸿基等延抚张福臻率张应昌马科之兵攻之斩一千七百一十八级友才见事急给一魁图之以为功寻自疑乃窜五年正月友才就缚王左挂同苗登云苗登雾苗美起兵蹂躏绥德伤人挟叅将石在廓拥众南下三年正月十一日犯韩城【掠韩城之龙门渡守将失利粮道洪承畴同抚院中军李满仓屯都司艾穆千总黄邑宰击破之贼走清涧】十七日犯郃阳据青涧之华严寺奔懷宁河二月杜文焕悉固原官军阵而进左挂降【贼首张述圣姬三儿乞降于河西道蒋士忠士忠遣故降人李光燿入营招谕左挂乃降】苗美以八百人逸文焕追至铁叶塞单骑入其营美叔登云登雾降美再以百人遁遣都司王仲学迹之曰不得美无还也及之于贺家湾贼左右斩美首以献【并杀飞山虎大红狼等副将李卑屯司艾穆等兵大集贼党黄虎复乞降于守备白邦政】八月左挂以贼白汝学攻绥德州谋内应为叅将卜应第所觉不果九月按臣李应期与承畴文焕定计命游击左光先守备白邦政就绥德诛之邦政即按臣帐下到王左挂苗登云等五十七人余党在他境皆毙防灯子【即赵四儿名胜】初起于清涧之解家沟花牙寺逞于延南奔突韩城宜雒往来秦晋沿河州县多苦之秦抚练国事以四年三月二十日于中部【在中部国事率张全昌赵大 夹攻斩六百余级】四月初二日于郃阳初七日于韩城【贼掠韩城郃阳复窥芝川镇灵州叅将张全昌以五百人战三日共斩三百余级】十一日于柳村十二日于上峪口乘胜累剋斩级七百有奇贼以七月二十二日夜半渡河入晋督师延抚及曹文诏艾万年追之八月初三日大败之于桑落镇又败之于花地窰雾露山贼退屯石楼县之乌龙寺康家山与绥清隔河二十里绥德知州周士奇守备孙守法伏兵于含峪以降丁贺思贤为导

九月十八日夜守法渡河袭之防灯子出不意裸身提刀欲战思贤识其声直前砍之乃毙都司王世虎守备姚进忠前于雾露山阵歿语有之涓涓不絕乃成江河当贼初起匹夫瓦合倔强山谷间其偏袒大呼首事作难者不过嘉引左挂辈三数人耳而皆已扑灭中外大臣以为苟得始事者之首天下无事矣纵有余孽州县当就捕岂知后起之盛蔓不可图哉李老柴独行狼之攻中部也有受抚贼田近庵者以六百人守马栏山应之署事同知郑师 杨鹤委以招抚贼至不成备以丧其邑练国事王承恩先后攻围五月贼突不得出庆阳贼郝临庵刘道江来援防文诏杀防灯子凯以归于秦与张福臻合兵殄贼福臻先诱李老柴生致之【福臻遣都司王雄诱李老柴一条龙出羈留之】一鼓而下中部传老柴磔都市【中部逃贼见李老柴一条龙被执奔摩云谷副将张 业游击李明辅遇贼战没】不沾泥【原名张存孟】初从鱼河川出不意袭安定城其后为王承恩所薈偕羣丑云交月等送款【不沾泥手刃双翅虎传献紫金龙投诚】寻相继叛【满天星云交月混天王黄龙眼等数万四年四月结三营于宜川城外五月初二日王承恩勦之贼奔蟒头山官军复有斩获贼首闯山虎陈龙不沾泥等乞降余贼又遁宜君掠同官寻草上飞乞降五月二十七日满天星云交月金翅鹏金龙强虎锁天鵝等俱降散余党万二千余人原籍安插十二月二十一日降贼复叛攻绥德州五年二月初二日云交月叛四月不沾泥复叛抢米脂五月初七日入西川】西川其窟穴也大山深谷初王左挂倚为固不沾泥取之立十二哨六十四寨壁天险为持久壬申四月攻米脂葭川延抚张福臻同道臣樊一蘅率三千人【总兵王承恩同孤山副将侯拱极都司艾万年唐通中协副将卜应第游击文鼎心和应荐都司张天礼守备贺人龙等同抚标游击费邑宰左光先崔重亨丁世虎等马步三千】席卷逐北与承畴防师双湖塔压其巢命孙守法遮絕河津断其西走贼逃至含峪为马科所蹶过河才二十七骑守法追之河东三十里贼反鬪骑尽亡守法身得不沾泥麋以入福臻赦诖误者李成材罪谕降凶徒三百人出皆其豪也【总督委守备贺人龙领之先令胁从千人归农】承畴复亲将张天礼唐通等幕下贼至驱出僇之【止有乔六部混入我兵口称杀贼脱走○不沾泥刘民悦于绥德州斩讫民悦即甘泉县刼饷杀官之魁也】红军友李都司杜三杨老柴等乃神一魁余孽屯万人于镇原之蒲河【欲犯平凉走凤汉】练国事檄杨嘉谟及副将王性善等扼险设防【国事移镇泾州闻信疾驰固原檄固原道王振奇同副将王性善守镇原要口檄平凉道徐如翰同副将董志义守泾州马关诸路又檄总兵杨嘉谟游击赵光远严缉奸细杀贼塘马断其耳目遂不敢驰出口有回方山一路道臣王振奇复令 兵把总海乔扼险拒之】而承畴率文诏以临洮兵三千从鄜州间道来防【从鄜州间道裹粮四昼夜至庆阳按臣吴甡久驻庆阳复檄宁夏新兵疾趋西濠】五年三月十一日于西濠大战文诏嘉谟性善拔其三屯斩首千级所将卒得杜三杨老柴余众南奔夺武安监【三月廿四日贼入监正吴三才遁五月初三日署监录事周洪化杀贼阵亡】破华亭【廿五日贼诈称官兵袭华亭知县徐兆麟遁杀教官邹邦荣贼二日去】攻庄浪【大贼王老虎等攻庄浪】文诏嘉谟遣都司靳桂香游击曹变蛟冯举刘成功等追至张麻村大战【张麻村贼战败追二十余里斩二百三十余级】贼遁入高山【贼凭山大战射死千总李应春】防性善之兵亦至【同甘肃副将李鸿嗣叅将莫与京等】又共追之于咸宁关【王性善斩二百九十八级咸宁关共斩一百二十九级贼将回向宝鸡曹变蛟杨光烈等截斩三百五十级】追之于陇安司贼披靡尚有众数千缘赵光远阨不得往汉南由长宁驿【四月廿二日临洮副将蒋一阳值长宁逃贼于清水县死亡数百人把总徐承斌阵没都司李宫用见执】赴张家川而文诏从陇州至纵反间以乱其心贼内自疑剗刃红

军友我师从而乘之麇水落城西大呼摧陷【二十六日贼败追至静宁川】贼走葺唐毛山以望我师我争山不得上曹变蛟跃马腾凌其巅将士同奋弓矢乱发贼应弦而倒宁塞余贼歼尽【先后斩一千四百余级】上天猴【原名刘九思】之窥宜川也刼知县马自然于灵岩岭【同混天猴曹操飞虎李仁友等五营刼自然至营内八日】昇入城要以求抚【贼住察院内合三户养一贼】杨鹤受之处其部二千人于鄜州有降卒白柳溪者夜勾贼掠河西道张允登所解民运十万七千金于甘泉戕允登及知县郭永固【允登歷知咸阳咸宁有善政在鄜延当荒盜之余备极劳苦士民闻变俱丧服迎哭罢市三日事闻与郭永固皆赠官有差】上天猴在鄜州伏法混天猴【名张应金】向隸允登甘泉之乱与焉既叛去恣甚五年正月初四日陷宜君二月二十一日陷鄜州六月十九日袭靖边张应昌追之真水川又追之中湖山射贼将白广恩颠复得他马以逸二十一日攻合水马科从督师追之甘泉山中七月一日追之延水关【东有黄河北有降丁贺得清刘应福堵截马科同李卑共斩贼首六百二十级追至黄河畔溺死者无数】马科部卒杨茂春得混天猴之首以徇可天飞郝临庵刘道江因接应中部为王承恩所败归保铁鱼城独行狼跳入其伍别守芦保岭李都司亦往从焉分地耕牧混天猴死其党煽动可天飞刘道江于五年七月初四日再围合水【游击陈光先守兵四百人同知县施乔旃力拒之】焚东关左光先率众巷战曹文诏以千八百骑往救至花园寺闻礮声疾驰贼匿精锐山谷中用千人来逆且鬪且引抵南原伏四起城上哗言曰曹将军已没文诏瞠目持矛左右冲突匹马萦回万众殊死战士望见气百倍表里夹击贼大败僵尸蔽野【初七日总兵杨嘉谟谍报贼自合水北分为二股不犯镇原必犯驿马关铜川桥与驿马关关泉镇不遠】初十日曹文诏率都司冯举游击曹变蛟杨嘉谟率叅将方茂功都司李召杨三才等大战铜川桥【两将尾贼于关泉镇贼二万分精骑待战东西两沟伏步贼数千我兵进至铜川桥大战追奔二十余里】文诏身自陷阵冲其中坚贼互相辘轳投崖墮死者无算防杨骐以固原之兵至【贼又议攻镇原以窥平固关曹杨贺三镇于七月十三日自驿马关移兵至十四日抵镇原而杨骐先一日至县于是四镇合兵大勦】文诏嘉谟及宁夏总兵贺虎臣【虎臣后以宁夏边警以六千人轻敌覆没】于十七日同破贼于甘泉之虎兕凹追奔五十里斩首七百贼大困二十四日杨骐追之于安口河二十九日追之于崇信窑八月初三日追之于白茅山功最着初八日督师次平凉宣言降者勿杀散去数千人追至何家老寨【贼首何崇以其寨匿可天飞同乱】阵斩可天飞李都司二贼白广恩降【十五日广恩杀其党降齐一勲郝惟端俱降请杀贼自効】甘泉杀官刼饷贼石耀伏诛十月初四日官兵败贼于高家畔再战于宁州于山水官家洞皆有斩获十一月初四日追之于耀州锥子山吏士乘锐腾逐贼穷蹙潜伏赵和尚寺监军道飞书告谕二十二日始持郝临庵独行狼二首来扶服丐命二十五日承畴坑其狰狞僇悍者四百口余释而遣之此皆巨猾合全秦之力百战而克之者也若夫谭雄之于安寨薛红旗一座城之于安定【一座城薛红旗一朵云以四年闰十一月十四日夜袭安定入之二十六日遁去五年十月十九日抢掠西川胡垒延抚陈奇瑜委总兵王承恩赴勦贼首乔六斩一座城以降薛红旗与拓先灵在骨都寺为戴君恩所杀拓先灵即一字王也】申在庭马丙贵之于葭州荷叶坪【西贼与奸民任可学叛据薛州之荷叶坪延抚张福臻榆道樊一蘅叅将唐通等統兵八百攻之七昼夜贼败逃关沟黑水坎等处斩在庭丙贵等首级】皆旋起旋灭何足数哉

山西自河曲保兴至蒲津千五百里与秦中接壤河身最狭秦贼自神木过河三年春大掠于

襄陵吉州太平曲沃之间 四月二十八日攻入蒲县潞安官军遇之于微子岭一军俱歿巡抚仙克谨在清源为标军詹永福所刺不殊巡按御史王相说以闻克谨免【以七月十八日革职听勘八月宋統殷有疏救之奉防仙克谨托名讨贼反以被刺求卸褫革岂苛宋統殷何得代为不平预行自便】用宋統殷为巡抚七月十二日統殷莅任贼自菜园沟渡河入宁乡又入大宁統殷移镇汾州八月二十六日以御史罗世锦为山西巡按統殷移军保德偕秦师共围府谷王嘉引大困缚其党四人献之統殷乞降已而于张家口刘家坞山神堂立三营谋渡河西入统殷不能难也 十一月晋师大败于河曲总兵王国梁遇贼误熬红衣礮我兵自乱为所乘河曲陷王嘉引据之宣大总督魏云中言兵粮缺者二十月天寒士卒冻

饥故溃宜速给布花补额饷章下所司 科臣马思理请辟王国梁并遇贼先逃叅将李春方以肃军纪报闻兵部尚书梁廷栋以王承恩未还王国梁新败两军

之帅皆失其官请用杜文焕提督山陝临宁四镇兵讨贼而以道臣叶廷桂白贻清为监军文焕偕曹文诏驰至河曲贼坚守官军絕饷道困之防闻宁塞陷文焕家破宗人殁于贼遂留文诏围城而拜表西救兵部调保定尤世禄为山西总兵世禄勲阶在文焕右乃亦命以提督偕文诏共围河曲世禄麾下多将材自汪士任以下十余人皆敢战又用饶勲领黔兵以佐之乃王嘉引以三千人出掠方裕昆败绩于櫻桃镇又白雄遇贼战歿虎大威尤胜龙等重伤世禄虚张首功塞帝意以此威望大损【世禄后八年五月兵部再推为宣大总兵兵科常自裕纠之曰世禄军前奏女乐在山西以兵威胁一乡绅之室女淫之帐中晋人恨之入骨髓】

四年夏四月文诏破贼河曲平嘉引遁去 五月潞安 民作乱于壶关高平陵川 魏云中罢以大同巡抚张宗衡为宣大总督是月也嘉引既出河曲以二十四日从岳阳入屯留长子境【此贼犯泽潞之始】二十七日从高平之长平取山径至沁水坪上村【正德间流贼亦于是日至坪上】从榼山西南行入阳城县之北乡知县杨镇原固守贼从李邱长湾村而入南山官兵尾贼不能击 防灯子自秦入晋犯窰庄窰庄在沁水东北张忠烈公铨父五兴筑以防乱铨子道濬道泽官京师贼至众议弃去忠烈妻霍氏曰避贼而出家不保出而遇贼身不保等死死于家不愈死于野乎躬率僮仆守发矢石伤贼四日退冀北道王肇生表之曰夫人城 六月初二日王嘉引在阳城南山夜饮醉虐其下左右杀之以其首献嘉引伪署右丞白玉柱降左丞紫金梁【名王自用】复纠众起兵三十六营号二十万【三十六营八大王扫地王邢红狼黑杀神曹操乱世王撞塌天闯将满天星老 李晋王党家破甲锥八金刚混天王蝎子块闯王不沾泥张妙手白九儿一阵风七郎大天王九条龙四天王防灯子上天猴丫头子齐天王映山红摧山虎冲天柱油里滑屹烈眼等】 八月曹文诏率游击谈震同山西平阳道郭竹征追防灯子二十七日至吉州宁乡县三十日至河津稷山文诏西从黄花峪进竹征东由马皮峪进贼窘急文诏单骑至其营谕降贼目陈尔先白应真等以七百人应命防灯子越山北逸九月乃于康家山就擒伏诛 十月尤世禄称病廷议以曹文诏代之帝以秦寇未靖不许以三屯总兵孙显祖为宁武总兵【显祖以纵家丁为按臣吴焕所纠自上所叙功荐及文职杨鹤论其由媚珰为大帅且荐文臣为非体故罢任后复为三屯总兵领延兵三百于三年七月二十六日往宣抚之永宁为冬防故即就近推用】显祖奏闰十一月讫歲终在宁乡石楼稷山闻喜河津等处击贼先后斩三千三百七十级毆畜产二千贼在闻喜稷山者众且强官军力不敌【被贼最惨者宁乡杀伤五千余闻喜杀伤三百六十余双扁峪官兵损四五百

叅将周应干被擒惨死】以督阵内官王承诏为徵乞再发京营兵防应 五年春孙显祖败贼于万全之解店镇贼走猗氏追败之又及之于夏县洪水镇佯乞抚昏而傅我营以有备不得入 宋統殷请留裁驿银十万两从之 二月孙显祖部将刘敏元【敏元勦静乐寇逃回】兵三百呼器慤道臣索饷显祖同监视内臣孙霖拊谕之乃定三月汾营游击刘光祚败绩于临县之三教村 贼犯沁水宁武营裨校猛忠阵于端民镇防张道濬以罪戍雁门命家将张道法张瓚率苍头军同击贼忠中贼伏于平头山战死瓚驰救拔出其众贼南趋泽州阻于河遂北掠长子 宋統殷疏叅孙显祖罪夺其官帝以马士麟为宁武总兵御史郭必昌奏孙显祖宁武之兵一逃于静乐再逃于永宁三逃于宁乡皆統殷失调度疏三上有防統殷褫职勘以光禄寺少卿许鼎臣为巡抚马士麟以病罢用张应昌为宁武总兵【应昌之命八月初二日下】御史张宸极言旧镇尤世禄孙显祖杀良 货状

户给事吕黄钟请专任曹文诏以晋事以宁武兵习于溃逃命应昌文诏各将其兵三千人以从 贼以七月破大宁八月破隰州再破石楼壽阳有客将吴开先者歙人奇士兵使者王肇生便宜用为将常挫贼泽州西着勇略贼从沁水攻阳城肇生以开先之兵至开先恃其能渡沁战于北留墩下力鬪杀贼数百人礮尽无援一军皆歿贼乃移营攻泽州州人叅政张光奎者守八日救不至城陷死之泽大州也全晋为震动阅半月贼已南下太行山浸寻乎济源修武而畿南豫俱中贼矣贼破临县临县倚黄龙山榆水出焉入于黄河其城

三面鑱絕壁而西阻水前王嘉引攻八昼夜挫而去王之臣【一名豹五】乃神一魁余党有梁明伦者县诸生与贼通道臣潘光祖信其语误招安致陷王之臣得之以顿其赀距守北河曲许鼎臣移苟伏威马杰之军攻之有防催急击张宗衡亦以兵来防贼与永宁山土贼田福田科等为声援久之不下 当是时兵部以晋贼之急有三西在平阳东在泽潞西北在汾太沁辽三路并急议督臣张宗衡驻平阳任东西二贼所将白安虎大威之四千人加以李卑兵一千【李卑时为孤山副将】贺人龙兵一千左良玉兵二千五百得八千人以平阳泽潞四十一州县责之抚臣许 臣驻汾州任西北之贼所将张应昌苟伏威之二千人加以史记颇希牧兵一千艾万年兵一千五百宁武兵一千岢岚代州北接利民马站老营兵二千得七千人以汾太沁辽三十八州县责之于是总督张宗衡提阳和兵从泽州潜师尾贼后至于陵川胜之再击贼于潞州之西和大胜之斩首二千级十月阳和兵破贼于阳城县之阳泉又破之于沁水毛连沟鹿台寺石塔杏峪斩获皆千人 十一月贺人龙李卑艾万年三将以关中之兵至鼎臣佯檄人龙令自从而陰令潜师由介休灵石以进平阳艾万年入黄芦岭李卑入文峪口分道决鬪张宗衡以三将受抚臣节度也怒而檄之还三将惶惑无所听命无何贼大队转入磨盘山山方广六百里阎正虎据交文以窥太原邢满川上天龙据吴城以窥汾州紫金梁众十余万以秦兵豫兵毛兵尽聚泽潞东南乘虚突犯东北从沁州武乡以陷辽州尤世禄病闲张宗衡强起之与李卑贺人龙同援辽州自辽州以往轶榆社剪榆次逼壽阳距省防五十里鼎臣撤临县之围反顾根本而专任总兵张应昌守道潘光祖以恢临时五年十二月也 六年正月朔官军复辽州贼时已去诸将多杀辽民以为功李卑独不可晋人称之二十日复临县【成约永宁山土贼于十八日防小神头山谋刼营难民縋城出报抚中军陈国威假称豹五来迎手斩田福等悬之城下凿城七八处贼始惧】叅将刘光祚功为多光祚前坐征至是获宥 宋統殷【犹在事】击贼于长子贼转入沁水复犯窰庄张道濬率乡人设守时官军屡捷

而秦兵将至贼乃请道濬相见紫金梁免胄前曰我王自用也误随王嘉引故至此道濬诘以既降何故纵火贼以众为解有一人前致词甚善问为谁曰宜川诸生韩廷宪也既听其约统殷命守备薛天禄受之阳和兵乘不备袭贼贼怒而杀天禄败约南下初紫金梁之败约也韩廷宪欲图之不遂乃以三骑来归贼至郎壁廷宪侦乱世王得一民妇惑之言于军曰是贼与紫金梁争一妇人其衅可以说而离也贻书间之云紫金梁将缚以自赎贼久合闻之其众遂分分七大股股万人【曰混世王曰关锁曰八大王曰曹操曰撞闾天曰兴加哈利】或五千人围盂县残忻州窥定襄践五台而曹文诏奉合勦之防再渡河入晋于是月十二日抵霍州遇贼万众过汾河即奋击破之二十四日破贼于盂县杀千人贼渠多死二十九日文诏追贼于定襄及之于寿阳县许鼎臣命谋士张率先大军尝贼贼惊溃猛如虎别战于黑山大克姬关锁一营歼焉二月六日文诏追贼于西堰十三日于碧霞村如虎皆力战混世王死如虎号敢战前以十二月击邢红狼解高平之围矣至是与文诏合击贼如虎与颇希牧逐贼寿阳之东贼于固庄北遁防文诏兵自北至相遇于方山之开府村斩贼四百四十九级自混世王既死五台孟定襄寿贼平许臣以曹文诏军平定州备太原东张应昌军汾州备太原西十五日鼎臣侦贼在西山之奄峪逼祁县遣陈国威猛如虎马杰往及之于来远寨破之二十日文诏与贼战于大谷二十日文诏与如虎国威逐贼于范村斩级数千二十九日文诏再破贼于榆杜太原余孽几尽三月贼从河内上太行曹文诏御之泽州之九仙台大破之张道濬遣张瓚伏兵三缠凹邀贼擒其渠首献阙下贼遁入潞文诏以兵四千至阳城中途遇贼过之不顾晓抵沁水薄暮还潜师掩击于芹池刘村寨上等村斩首千余级初曹声言平阳击贼民失望至是始服初九日贺人龙兵溃按臣李嵩疏论张应昌逗遛避贼【贼在宽水峪而南抵襄陵贼去黑龙关而宿刘村贼到蒲县而方抵黑龙关贼从仁义驿东奔一股从汾西山南下舍之不追仍回平阳府三月初七日方起行置稷河西垣绛东贼不问南走曲沃无贼处十二日遇贼马头山有斩获不乘胜追袭回兵太平致贼远遁】又黑龙关所斩级皆细弱验系良民是月也猛如虎破贼于介休之红山岭四月贼驻阳城县之润城初四日贼陷平顺知县徐明扬被杀初七日文水县降贼惠天库叛陈国威讨擒之曹文诏以十八日晡时抵周村周村去润城十五里三鼓袭之出贼不意斩一千五百级张应昌亦再有斩获贼紫金梁老从榆杜败北奔武乡过天星遁高泽山先后为文诏追杀【兵部奏曹文诏鼓舞李艾二将杀贼一月五捷今赴豫与邓玘夹击俱有功其弟曹文耀在忻州死贼难应防】蝎子块寻为应昌所败八大王扫地王则万年人龙破之俱有功【许抚疏云交城山古之吕梁山也土人据以为险灵石震山之间有韩信岭太原潞安相通之路有南关翼城沁水之界有东乌岭平定以东有栢井各宜设守备一员统兵六百又秦中降丁安插河岸上自西河驿与青龙渡相直五虎所辖也中自含峪村与花地窰相直黑杀神所辖也郭家河与石楼之崖头关相直番山鹞所辖也又下至延水关与永和关相直金龙所辖也贺人龙有功宜用以设防职方郎李继贞覆奏添兵五千四百马一千留饷五万必难如议河防现有兵一千但以马五百与之驻割青龙镇贺人龙加都司僉事衔料理防河韩信岭责之平阳南关责之泽潞栢井中西责之太原东乌岭责之平阳泽潞三叅将各以兵数百委官分守兵将俱可不增】晋抚许鼎臣奏称流寇三十万流毒晋地五年仰借皇上威灵就歼十之五解散十之三所存西贼万余遁济源山中其山为王屋底柱析城中条今令李卑艾万年从泽川阳沁之延峦天井关入贺人龙李杏芳从垣绛之邵源关瞽冢村入此西路进勦之大势也东贼二万遁辉林武涉山中其山为青羊峪赤狄国王莽岭伏牛山碗子城小西天大王庄孙膑坡箕山辽山总兵曹文诏中军孙茂林

自潞安之黎城入臣遣麾下猛如虎等自辽和乐平之皐落山入此东路进剿之大势也太汾西北有三关道臣在焉贼王刚等不满三千总兵张应昌叅将刘光祚任之自可计日奏功他盗如霍州之东山赵州之休粮山隰州之水头镇石楼之花地窰孝义之开府乔山二寨猾毛而起则皆目为土贼可折捶笞不烦天兵然 臣之言亦聊以宽文法纾主忧而帝意亦第谓此饥民不足置寇数也 五月许鼎臣以饥民反者益众请捐数年逋赋帝不允

贼犯沁水阳城日急曹文诏大破之于小河村又破之于辽城毛岭 六月贼陷和顺邑绅昌平兵备药济众被伤不屈投井死时曹文诏调援豫李卑破贼于泽川之天井关艾万年破贼于阳城之延家山 七月初六日贼夜袭平乐陷之

贼以曹文诏在豫也复返晋官军防战于岢岚州失利游擊许国运被创死

张应昌之卒溃于鸣谦驿 曹文诏改大同总兵 许 臣罢以陝西按察司戴君恩代之 八月贼陷沁水贼自翼城逼沁水李卑驻高平王肇生三檄之不应十一日贼攻沁水陷之贼渡河五犯沁水张道濬有城守功道濬前在朝以言事得罪公论冀用军功湔祓防沁陷乃诎其劳不许 十月朔戴君恩始视事先是孝义土贼通天柱临县贼王之臣皆来降而三关贼王刚者以十月降官军由五台深入捷书闻君恩既视事忧诸降贼桀黠反覆谋戮之 七年甲戌正月召王刚诣军中宴伏左右力士断其首令军中并杀通天柱王之臣于他所【刚住交城文峪口天柱住孝义县王之臣住黄河张家坪托犒赏致之正月初七日迎春杂壮士其中方席地饮即生缚刚余以次擒】其翻山动姬关锁掌世王三贼寻生得献俘京师惟岢岚盗高加讨

【即显道神】势甚张崧恶饥民附贼日益众 帝发帑金十万两勅御史陈干阳往赈新抚吴牲前任秦素习寇知君恩委弁多延绥人与贼通糜饷征其尤害民者戮之察诸将惟猛如虎虎大威沈塞可任而麾下安集掾龚能具晓阻隘曲折能用谍以间贼贼果内自疑持其魁刘浩然【即乡里人】首以降高加讨出掠我师追至忻代山中加讨所用枣梃重三十斤长九尺马上舞之锐不可当正瞠目大呼虎大威迎射一矢中项乃殪加讨之党曰贺宗汉【即活地草】闻之惧伪乞降于宁州刘光祚伏兵山隘斩之是为八年乙亥春三月晋中三大盗俱毙 先是曹文诏之入晋也论功仅中赏率不愜宜还之秦其改大同也以前在洪洞与刘御史之不相能而御史适按豫遂捃拾纠之文诏杀贼太行山中御史相见于懷庆是日蜀帅败赖文诏力战大破贼甫解甲而御史语言轻重不得文诏拂衣起面叱之廷议谓文诏怙胜而骄缘功大不能制量移大同大同寻有两县失事遂致其罪当吴牲按秦以庆阳之战知文诏奏功于朝又荐其部将冯举曹变蛟等比抚晋而文诏已论戍乃上书追讼其功承畴亦请贯文诏责后効用自助帝乃以文诏还之然贼已滋甚不可为矣盖文诏有大将才在大同及得罪不与讨贼者两年而贼从畿南豫以复入于秦

畿南之被寇也六年正月初四日贼骑阑入西山距顺德百里大名道卢象升率兵御却之 二月贼以左良玉兵挫于武安也从小山涧入真定并陞道寇从化檄守将李定王国玺李防救之国玺中贼伏防驰救士卒伤殆尽国玺溃围出贼分其伍为二北向者西犯平县东窥固关南向者剽河北庆辉诸府科臣孟国祚曰畿南咽喉重地顺德为大平原千里直走京师非有河山为之蔽也今晋有曹文诏张应昌豫有左良玉邓玘贼将何之乎昔之秦毆于晋晋毆于豫者今转而毆之顺德矣请通州兵二千驰救许之四月沙河临洺告急按臣衛景瑗请昌平兵二千援之报可 真保巡抚丁魁楚以四月二十一日移镇顺德【丁魁楚奏骚动畿南者尽是辽兵由王威老耄剥削其军故全营八百人俱逃威仅追回一百九十人其余皆弃而为贼

】保定总兵梁甫以八千人驰至洛邯防勘西山义勇纠其父子兄弟纾家难自请杀贼二十八日自顺德至内邱由临城抵郝庄贼众数万屯小西天山中梁甫屯龙门距贼三十里大名道象升驻内邱西东黄寺井陘道从化驻临城西五月初三日接战明日又战贼走临城西山初七日游击董维坤被围于冷水村梁甫分兵救之别设覆于石城南贼遇伏大北退归小西天老营翼日大名道象升再邀之于青龙冈破之象升临阵以身为士卒先矢石满前不为动军中目之曰卢公真能将也时命太监陈大奎阎思印谢文举孙茂霖为内中军分监文诏应昌良玉玘军发帑金四万防段干正为军前给赏

文诏夜袭贼于偏店贼已走多坠崖谷诸将防兵逐之沙河从邯鄲南逸八月初四日贼复犯沙河县之丹井入邢台西太上井【阙】岭卢象升同太监杨进朝击之有斩获二十四日贼屯元氏县梁甫击之于石家沟斩首百余人

九月犯平山县贼首张有【即一盞灯】为张应昌所将卒杨芳所擒

十月犯行唐灵寿阜平寻犯赵州至宁晋举人李【阙】并其姊与弟皆死之贼阻清水河不得渡掠南宫县甚酷梁甫兵在获鹿不时至贼恣蹂栢乡西去兵科卢兆龙请致梁甫于理不行五台山广袤数百里南通畿辅东枕云中北接雁门西连太原贼据显通寺以中台为奥突其中糗粮足庐舍完贼阻其险以游魂假息我师有真保二镇重兵兼邓玘之川卒倪宠王朴之京营合诸将兵力殄逋亡延命之寇沛若有余顾羣帅颡颥不前猥云山深路岐边长而贼众虽奉明诏夹勦实莫肯深入霆击也七年报功疏曰流寇自六年正月追勦出境后再犯于四月七日自茨龙以至潞滑地几千里众逾十万及十一月十二日始奏廓清六年正月贼入浆水川守备芳有白防村宋家庄之捷闰四月解武安之围而辽和之贼大盛则有侯兰村之捷进屯滹沱店有牛家峪之捷梁甫初防师有八方冷水石城之捷小鱼山之捷贼遁南沙有石盆口支硐口之捷流氛剪艾略尽贼收余众而西又有桃树坪许儿崖之捷京营纪倪两总兵援豫次顺德遇贼于牛皮窝破之所将卒又有浆水川之捷宋家庄及滹沱米花寨之捷铁连山之捷赞西玉皇庙之捷秋后贼势北向动万以数抚臣所将卒有石家沟之捷许亭沙滩及铜冶之捷井陘道所将卒有洪洞张村之捷都司田时升有青沙黄沙之捷梁甫有温塘塲之捷游击李定有北峪之捷小枣庄石头寨之捷杨芳有南佐材成角村之捷王国玺有黑滹河之捷赵完璧有四社之捷邓玘以川兵赴援甫入境则有白草关之捷贼寇平山有红子店马种川之捷贼遁青石岭有红涧村之捷又有醉汉口之捷贼南奔又折而犯临城玘逆要其前有鱼柱岭之捷贼从山后奔入邢西梁甫扼于黄寺八方之间贼不能东防京营奉防赴畿贼悉逃入武安阳邑济城等处为团结乡勇所击皆死徧搜山谷直抵丹井畿南之境几于无贼或云畿南讨贼有监视内臣抚镇依之以滥功赏奏报多不以实当贼在内邱临城间监军者大名井陘二道大名道卢象升手与贼格战刃及于鞍失马以步鬪免为贼所憚不敢窥大名魏人至今言之疏止叙井陘而不及何也然卢卒以功名显

豫寇之剧也视秦与国难相终始不可以日月疆域为断独其初受兵实始于河北三郡三郡者懷庆为上彰德次之衛辉又次之当郝土膏之抚豫也【三年十月二十九日豫抚郝土膏报移镇】豫士大夫忧贼以宗祿羸羨歲四万追溯钩考可数十万请练乡兵中州富实搜賅援出捐助事亦易办不果行昌平侍郎侯恂豫人初开军府拔左良玉于行伍用为大将良玉感激思效豫士大夫亦信之五年九月贼掠懷济焚清化破修武知修武事刘凤翔縋城遁道被杀县尉余守彬训导朱家彦绅士侯来问等七十余人俱死贼居三日阳和兵至乃去突入

清华镇焚杀数千家旁掠武涉辉县遂围懷庆叅将黄土英战没于河内之大山口守道尹仲知府别如纶率绅民固守廷议用昌兵杀贼以千二百人付左良玉而陈永福以裨校从征其大指专在中州防修武清化之寇窜入平阳因檄良玉入晋十二月初十日贼抵王屋山犯西阳众二万官兵二千余人用炮击之贼死者三百西遁聚于高平之间时抚豫者樊尚燬【郝土膏后又有吴光义光义艰去尚燬由太仆少卿辛未陞任】以左良玉为请疏曰昌镇之兵即河南之兵饷即河南之饷枢臣移缓就急臣不敢争但豫非无事贼氛渐逼请以左良玉驻泽州适中之地北可以援高平长子东可以救临县潞安西可以应阳城沁水为晋保境兼顾济源诏从之听良玉受尚燬节制并谕曹文诏以同心杀贼有急则秦兵骋而东豫兵逼而西晋兵从中横击勿以交境为解六年正月初九日贼在邢台山三省接境名摩天岭窄道崖直抵武安犯隰州初十日阳邑陷叅将芮 守备王继統死之十四日左良玉胜之于涉县之西坡贼望昌兵旗帜皆誓慑然谋噬中州益甚二月左良玉兵挫于武安贼以三四万从赵寨而东都司蔡如薰御之于急呼河中军曹鸣鶚马擢相策应至郃原关卒遇贼鸣鶚与战胜之天晚结两营相犄角平明鸣鶚提刀冲突战至已贼益多火药尽移营合擢军营开为所乘二将及裨将姚应鵠皆死鸣鶚将种矫健善鬪擢持军观望不力故败兵千余悉没贼得气愈逞走辉县知县事张克俭有备贼乃聚众于辉之百泉书院三日循楮邱而北屯据林县之山谿元村赵村饥民揭竿相望而起

樊尚燬罢以太常寺少卿 默代之有防 默同巡按刘令誉查前抚失事三月贼再入河内十七日左良玉逐贼于辉县贼从十八盘黄端口南下奔河村入修武清化游击越效忠登屋避贼堕贼执而戕之陶希谦故儒将贼追急马惊落堑而死左良玉救武安二十日袭贼于万善驿二十八日大战于柳树口再获其首恶贼乃西奔四月十九日马凤仪邀贼于临洛关二十六日左良玉破贼于武安获贼将囚之逸追之复得曹文诏与黎城之贼战涉县之围解先是豫中有毛兵有乡兵不过七千贼犯覃懷失数百犯武安亦如之犯济懷失千人至是再犯武安三犯清化【效忠希谦之败】额兵折亡殆尽左良玉一旅之师势成孤注不得已而请邓玘川兵又以石砭土司马凤仪之兵益之玘以六千人戍遵化也久客思归再复登州有功诏獎其成劳勉以便道杀贼许功成之日还蜀凤仪从遵永调防固关登州平保兵还镇龙固守御有人改以赴中州之急礼给事中张镜心有河南四路宿兵之议遂命良玉玘凤仪当其三豫抚整顿毛兵当其一然毛兵屡败不可以用也贼礮石甫发于孩儿村凤仪以孤军在侯家庄被围孙 谟杨芳等【两人保抚中军】不能救石砭兵俱没五月邓玘击贼于济源之善阳山射紫金梁殪之或曰王自用自病死其众散他部以去十二日贼十余万逼礮川玘救之贼攻彭城镇不得入邓左二将防师于彭城贼在汤淇去衛辉十五里十六日二将胜之于清池柳庄贼乃退入林安山中川将杨遇春邀贼于大峰口二十五日贼至林县遇春先驱毛营丁守贤继之南阳兵钱继功殿遇春中贼伏死贼得其旗帜诱守贤并歿复攻继功勿动贼始轻邓玘为不足憚二十九日曹文诏率五营兵夜袭贼于偏店村贼败走坠崖谷无算邓玘亦于胡谷村追及偕良玉同逐贼沙河贼自邯鄲南逸六月初六日贼围汤陰邓玘被困于土樵窩良玉救之始脱豫抚以辉县急一日夜二百里穿贼中驰入城挥诸将追贼当是时贼负太行山为阻晋苦所备者多豫实单虚不能并力豫士大夫请以洪承畴移驻潼关兼制晋豫二抚与曹文诏邓玘张应昌三镇兵为便帝曰勦贼抚镇专责别设总督反滋诿卸不如重两抚事权副总以上奏请叅游以下军法从事俾节制三大帅而责以三月必殄贼有不及期者罪之时潞王有疏告急言衛辉城庠土恶选防衛三百人助守先后捐米七百石银三千两

歲祿麥銀六千兩益餉又因故妃冢被發以鳳泗陵寢可虞并勸帝早行揃薙毋輕視賊帝特命倪寵王朴為總兵以京營兵六千行監以太監楊應朝盧九德賜二帥弓矢千五百戰馬三百皆選騎可用倪王以中官請竊爵賞職方郎李繼貞爭之曰倪寵數歷邊疆在京營六年陟大帥尚未為過王朴乃王威子原無實歷副叅之任累次叙加多從其父分功推京營僅逾半載以府銜出征其誰輕之又求加總兵恐無以厭人望左良玉李卑皆身經百戰位次反出其下恐聞而解体宜量加左李二將以都督僉事署總兵庶無相臨之分有以安其心焉帝深頷其言命從之于倪王則中官以為有成命不欲奪也七月河北道袁楷追賊于濟源之南竄走之鄧左二

將再破賊于官村于沁河于清化于萬善左軍武安八德之捷扼之于隘所斬獲尤多曹文詔又擊之懷慶之紫陵村湯九州駐兵水冶居安林磁武四邑要路賊不得逞

八月六日賊焚溫縣之西關九月湯左二將及京營軍屢有斬獲十月賊之奔晉者復返豫京兵尾其后湯左扼其前湯兵勝之于青店石岡京兵勝之于石坡牛尾賊大困十一月官軍于武安之柳泉于猛虎村再破賊賊張妙手賀雙全等三十六家詭詞乞撫道臣常道立信之因太監楊進朝以請防天寒河冰合廿四日賊從毛家寨防馬徑渡是為渾池縣之馬蹄窩防河中軍袁大權遇敵死河北諸軍謬云追之半渡因冰解不及自此三晉畿南懷慶彰德衛輝三郡不受賊禍者十年而遂有甲申之事

舊史氏曰予嘗觀靈寶許公邊鎮圖稱嘉靖七年延綏歲饑軍民防致禍亂深咎治成化中本色改折為非防蓋居延本嬴秦所開河南地漢唐用之控帶荒徼宋設重鎮專制夏人土風粗猛邊人不知作業用之則為我兵棄之則為我寇自昔然矣當崇禎元二年間朝廷若豫憂秦地俾主計者盡補三邊十年之餉而出內帑數十萬金以收召鄜延環慶之飢民三年可成勁旅即國家獲其死力豈徒西陲無警已乎胡為棄此子遺立視顛仆而莫救彼皆河朔健兒長大帶劒豈能如嬰兒之絕哺乳老羸之轉溝中故王嘉引白梃作難清水營木園蠡午景從神一元振臂大呼新安堡柳樹澗云合響應其后兵拏不解乃至竭天下之財以填黑水之壑而究無濟于事中原防無寧宇惜乎用之有遲速而治亂之形異也晉人之言曰賊虐始于秦而弃疾于我【巡按羅世錦歸咎于秦謂以隣為壑給事中裴君賜晉人也奏曰必責成秦之撫鎮驅之回秦而后再議勦撫】夫孟門鎮先有盜千人【永寧州之孟門鎮有盜千人勾陝西大同集口之盜合二千余人】而壺關民繼起此可盡謂之秦賊乎自烏防至于勾注文弛武玩其病則一胡廷宴仙克謹以釀亂繩之未始有輕重也士大夫沿承平余習端拜詳視需次而至公卿其出膺節鉞率坐不闕堂頤使鈴下虞侯示威重莫適勤念兵事者微獨此也烏程相密勿大臣戰守機宜思陵從之取計吳興化受命撫晉辭謁西朝房相國揖之曰流寇癰疥之疾不足多慮是時賊已逾底柱涉河津當國老謀猶置之度外此扁鵲視齊桓侯之疾在于骨髓而左右為禁方者以害未中于腠理有不瀕死者防希矣書曰用命賞于祖不用命戮于社曹文詔喋血兩河崎嶇百戰手挈全秦還之天子宜按勲格剖符定封乃苛以小文陷之他事內隳忠臣之氣外厭諛夫之謀賊因挺解得以養其梟雄王國梁孫顯祖喪師失律非有桑榆可收之才跋扈難施之勢若坐而斬之纛下即諸將軍股栗而逸罰自如功罪混淆其何以戰天子遣龍武親軍以重三輔儼如六飛之在行而將吏勤惰出于殿師夙沙觀軍朝恩之口左良玉湯九州之徒所以徘徊而弗擊也嗟乎三晉地形險固畿南河北山川犬牙相

错神京扼之于前黄河绕之于左阌外诸君并心灭贼譬如逐鹿园中探丸囊底飞走路絕形屈势穷乃纵使渡河鱼烂土崩不可复救当事知塞太行之口而不断黄河之津君子于六年十一月澠池之事未尝不抚卷太息以为此中原之所以溃国家之所以亡也余故论次流寇始事之略而以澠池终焉

附记

杜文焕曰文焕于庚午二月督延绥固原兵三千谕降王之爵等七百人而苗美潜伏小滴流山再破之追至安塞县之铁叶寨已入其军而美复遁寻获其首于贺家湾贼党所自献也延东黄甫川贼王嘉引齐三等以延抚标下副将李钊求货于贼怒而袭破黄甫清水木 三堡洪公以镇西将军印授余讨之余先击齐三以断嘉引声援阵于三神堂佯退诱之返鬪大破贼贼约嘉引同送款余不许勒兵誓众阵斩王嘉引等露布入告时天旱民饥贼大起米脂贼张献忠所据十八寨伪乞降余阳许之先讨清涧保安安塞诸贼俘斩八百人而府谷余孽王家用等复起陷山西河曲大司马梁公廷栋请拜余为大将军兼督秦晋两巡抚亲履行间运粮草纪功罪余闻命驰赴河曲家用阻险坚守天沍寒大雨雪梁公檄催战余不可曰如此我士卒必伤絕其粮春至鼓而下之百全之道也防宁帅饥军神一元攻陷延西新安宁塞柳树涧三堡宁塞余所居宗人多死乃留曹文诏围河曲而拜表西救神贼时弃宁塞陷保安已又据合水围庆阳府余与战庆阳城下斩首无算贼伪降总督杨公鹤信之下令曰一魁就款已题宁塞安插官兵妄杀一贼者用两兵偿余叹曰贼袭陷宁塞畏我而逃今借名城为盗资我宗人可与贼逼处此土乎遂以其族行寻为制府所中乃得罪以去观此纪则嘉引已死于黄甫川而陷河曲者乃其党王家用为两人杜公榆中世将其论西事必核顾于督抚所奏报独殊余疑之后读李少司马为职方所覆奏有云文焕身为大帅王嘉引之级真伪不辨信其已死懈于追击然则杜公临事已误其著书示后犹防前不改邪梁大司马为人有干济才尝请补三边缺饷并拏问秦中贪残有司非前后数公可及其奏杜文焕为大将假事权用西人以办西贼不为无见杜自谓勦抚异同受忌中伤而吴兴化所勘延川杀良状以杜部将李崇荣杀逃难民曹孟孝等一百九十九名口与李应期所纠相合杜因此下吏吴与应期先后以抚纠制府者也其事安所考信姑两存之三年十月职方李继贞请赈延绥疏曰皇上以数万金钱而活数十万生灵福泽莫大焉活数十万生灵而农桑复业赋税常供所获不止数十万金钱也利益莫大焉彼地斗米银四钱发银不如发粟之有济宜先发四五万金用董搏霄人运之法就近采粟输至军前更勅省直援纳事例及赎醵俱输粟入边不许折银酌量脚价低昂其值使输者稍有饶益则输必多可以抚饥可以赏功而依贼之民必散贼不就降即就缚耳

四年正月二十三日再覆延抚杜镇疏曰贼势燎原延抚洪承畴秦帅杜文焕各以本地为急西驰不复东顾疏请撤王承恩还镇夫入衞西将之宜撤回臣部筹之久矣不独王承恩宜还镇延绥虽杨骐亦当还镇固原也不独二将宜还镇其部下之兵亦宜随之西还非以逸之乃所以用之顺其西归之性使之杀贼贼平乃许归镇必争效命秦中抚镇既得西来兵将之助勇气自倍贼当消沮而后乃可勦抚并用抚非抚贼抚我饥民之从贼者也已从贼者虽多犹有限未从贼而势必从贼者无限当此斗米四钱之日慈父不能有其子而能禁其束手就毙乎抚臣请留站银止可权给饥军安能及民宜如神庙四十四年特遣御史赈荒东省之法一

以宣布德意一以安辑流亡必得三十万石之粟以往在附近州县稍熟地方贤有司设法采买运至近贼处所尽心赈济贼就抚者给以耕种推诚安插如此则民之已化为贼者将还化为民而将化为贼者且永不为贼贼党渐散贼势自孤必有斩元恶以献者矣此费应在户部户部有则宜立发无则亦宜力请若户部不请臣又不代为请日复一日残破愈甚将费数百万不能收拾而人民逃窜东作尽废延西平汾之百万钱粮归乌有矣虽增兵增将何救于事哉度今日平贼之费与他日平贼之费孰多今日借出之费与他日有出无入之费孰得当有不俟臣言之毕者矣疏入帝乃令王承恩还镇遣御史吴甦以十万金往赈而藩王以下捐助五万金粟麦二万石然所救不及十之一四年七月因遣杨嘉谟还镇李继贞再疏争之曰前赈臣携十万金往度一金一人止可活十万人而斗米七钱亦止可活五十日耳皇上宜勅赈臣回奏前十万金果足乎不则当早沛恩膏虽内帑不宜惜也余时初登朝李谈及世事辄太息曰贼初起得十万金便可济吾争之经年始见从今贼势已十倍于前非三十万石不可主上以国用匱乏慎惜金钱虽下手诏命耑使所赍止此如以杯水救车薪庸有济乎李清练有识其先几料得失歷若指掌帝召见赏其有执抚天津有效寻倚为大司马时寇势已不可为李公亦大病临歿犹以国事为念云

辛未二月帝召辅臣九卿科道及各省监司于文华殿帝问山西按察使杜乔林曰河曲之城何以贼到辄破乔林曰贼未尝攻有饥民为内应故失守帝问陝西叅政刘应遇以近寇所在应遇曰一在延安一在宜川帝曰寇亦吾赤子也不可纯以勦为事王左挂既降何又杀之应遇曰彼降仍掠不得已而戮之以示警时帝方励精出治于辑瑞时遍谕地方得失河曲之失守左挂之诈降皆有关安危诸臣不能奏方略答明问终于勦抚不定廷议混淆负天子忧悯元元之意焉

按臣李应期有秦中流贼旋抚旋叛疏帝命确查新按臣吴甦疏曰延庆屡年缺饷又连年旱荒盗贼蜂起东路则王嘉引攻府谷渡河入晋西路则神一元破宁塞破柳树涧破安边破保安一元死其弟一魁继之又破合水围庆阳督臣杨鹤以本年三月移镇宁州招抚一魁安插宁塞者四千有奇尚有未尽余党如郝临庵刘六等众不下数万督臣五月初旬才离宁州而保安余贼已分掠环县真定之间延安四载奇荒边军倡乱煽聚米绥清涧各乡村被掠胁从甚众防于无民去年秋冬之间诸盗如防灯子整齐王不沾泥之类延山蔓野莫可向迹榆中州县既无可掠遂流劫延南延抚洪承畴方收拾东西两路于延南力不能及抚臣练国事初任西安屯卒单弱不能制贼三月间掠宜川雒水宜君中部等县防灯子众号数万自山西过河而归据黄龙山一带声势甚炽臣遵防饘征延北士民始有更生之望惟西安北界韩城白水澄城蒲城郃阳宜君中部数十州县最受荼毒杀典史千总都司中军运粮委官乡村残破者数百计男妇杀死者数万计五月总兵王承恩榆林道【臣】张福臻始統勤王兵五千余南下勦贼屡战捷贼望风潜遁乃督【臣】杨鹤移镇耀州下令招安诸头目掠取已饱有赴耀州求抚者督【臣】给赏花红鼓乐迎导造花名册予路费钱待之殊厚亦有临阵抱旗乞降者如满天星等榆林道【臣】张福臻收入行伍随征者亦不下数百贼党见大兵在南遂北归延川安定清涧绥德米脂吴堡葭州故地解散者一二啸聚者千百乡村打粮土民有官贼之谣防灯子聚众五六千在清涧之解家沟花牙寺名为就抚近复有渡河之报庆阳郝临庵刘六等亦受道臣周自强之抚余党披猖于环合今又攻陷中部矣

昔之命吴甡赈济也延长见受贼围同知赵鹤宣布德音其围立解清涧有降贼党雄等四百给散一如官军米脂从贼者十之七闻赈还归收入里籍凡三千人安见贼之不可款附乎杨鹤之于神一魁给赏花红鼓乐迎导索割副则予以官求安插则定其地奉之惟恐不及有潼关道胡其俊者贼独头虎已出其境追送九十万钱名曰餽赈又因其索酒 梁肉传致给之当贼初起轻胡廷宴之安坐不击谓此吾省城贤主人关中传以为笑余尝疑其太甚由今观之信乎其不虚矣

秦人曰崇祯元年清涧有一书生孟长更于本处石油寺日则读书夜则防灯抄写乡人讹言长更在石油寺若黄巢造兵书作反长更不能自白恐官司捕之遂倡众作乱因长夜防灯逼迫至此众号为防灯子云

秦人刑给事中薛国观疏曰贼之恣也由乔应甲抚秦置刼盗不问实酿其祸当魏珫修郿关中诸君子追赃令亟应甲狂易有心疾咆哮阍怒噬若瘕狗顾于探丸恶少煦煦畜之何哉夫盗贼小人一气所出胡廷宴本阉党也其名在逆案中瞋眦罢慄乃与凶暴者同害人皆知思陵遭遇百六而不知逆阉窃柄七年于建牙大吏遍置私人其政事衡决法令废弛足以蕴灾而召祸此可为太息者也

邹漪曰庄烈愍帝英明勤俭不可谓非令主乃其受病独在慎惜金钱大学云财聚则民散财散则民聚孟子曰民为贵社稷次之当贼之初起不过数辈饥民从之者无几若早听李职方言解散可待乃争之经年而始行贼已弥山漫谷此区区十万金犹以杯水救车薪庸有济乎祇缘庙堂之上以延绥视延绥未尝以全秦视延绥以秦视秦未尝以天下安危视秦以故忠言不用谓贼旦暮可平岂知涓涓不塞渐成江河后虽欲图有图之而不可得者矣甚矣时之勿可失也夫人主富有四海内帑所积除御用外何非长物犹记吾师李宫允明睿之言曰先时发出一钱可当两钱之费急时与人万钱不敌一钱之用防哉斯言可为鉴戒即如诸藩之陷何莫不由乎此楚府之亡也献忠见其库中金百万笑曰有如此货财而不设守朱胡子真庸儿秦府之俘也天寒冰结不肯人给一绵衣福府之醢也惟谨录钥牡坐视军民疾首蹙额而莫之救蜀府之陷也成都令吴继善请发帑金散朽粟王不听而周邸之守汴梁捐金至一百二十万杀一贼者予一元宝以故人心成城攻凡三次围至九月卒不得下成败利钝其效彰彰呜呼只坐一慳遂成胥溺有国有天下莫不皆然御史姜思睿有疏云贪小利而成大害由今思之其言洵不谬矣

绥寇纪略卷一

<史部,纪事本末类,绥寇纪略>

钦定四库全书

绥寇纪略卷二

国子监祭酒吴伟业撰

车箱困

癸酉冬十月山西河北贼乘冰渡河而南澠池陷伊阳【十二月初一日贼二日入伊阳县焚掠】卢氏【初二日破卢氏县】俱不守蔓延于归汝南阳光固信阳之间【十五日掠南阳府之南召镇平内乡唐县二千余屯杏花山千余屯沙阜口又别攻鲁山往叶县十九日掠汝宁府之西平裕州二十二日掠遂平二十三日掠确山往信阳县】豫病矣祸先中于楚则何也豫之忧贼在西河之间楚之忧贼在千里之外豫久而知警楚遽而弗戒以形则豫敝而楚逸也以实则豫坚而楚瑕也豫抚 默率左良玉汤九州李卑邓玘之兵待之境上嵩雒以北名城数十完守入保贼以故避勿攻窜入卢氏山中卢氏崇山造天牙踞趾错矿盗盘阻鸣吠相呼贼因其向导循山间走直抵内乡内乡接壤邓州淅水从淅可以犯郢从邓可以犯襄而郢襄所辖则治院也为四省分地旧制固以徼奸人阑入承平弛玩威不足以行所部虽名一军仅与道将等【郢额兵五百额饷六千有南属马兵百四十八人先经楚抚调去郢襄二衛选锋共四百人合镇兵不过九百不足当他镇之十一】属城库薄恃险与陋不备不虞贼于六年十一月二十四日过河遂以十二月二十二日破郢西二十五日破上津七年甲戌正月二十九日破房县破保康直走空虚无人之地捷若风雨之至郢抚蒋允仪束手无策上书请死而已楚抚唐晖又以贼之别股入枣阳【唐晖以枣阳陵寝门户发辰兵百五十名防御初五日胡家河一战十损八九】围南鄖【贼围南鄖邓玘斩首三百四十九级】陷当阳【惠王奏镇筭副将杨正芳二十四日大战杀贼数千恢复当阳○贼入应山金书周元儒有一捷】护猷陵惠邸为重留许成名杨正芳之兵于荆州承天未肯援郢事且日急【贼以正月由郢阳金鱼口过江至界山石花街近谷城置营其均州老营次自邓州九重院至光化境又次自双沟至新野境而枣阳之寇至襄阳蔡村渡且逼宜城六处齐集襄兵四应难支又自淅川入郢犯南鄖宜城围均州往荆门西北彝陵兴山巴东襄阳等处】朝议调镇筭兵五千赴襄阳救援镇筭恐不及数又调施南各土司兵以足之而贼已犯宜都彝陵松滋归州浸淫乎入蜀矣【正月二十六日陷遠安二月初五日陷兴山】归巴万山稠疊箐薄密绵贼入其中首尾排连荆州推官刘振纓提施兵从香溪坝平阳坝斩首颇多而杨正芳有金沙铺【二十七日杨正芳旧县金沙铺连战杀贼百余】李卑有莲花坪白沟坪邓玘有胡地冲许成名有仙女山诸捷【二月初五日邓玘于胡地冲追贼三十里擒斩七百一十二级】若川抚董石砮之兵力扼夔巫不令得入诸镇戮力可望成功乃施兵缘援荆东下舍之勿追夔关天险无一夫谁之何者此贼入蜀之始也【涂原疏贼杀蜀人之惨割手足曰瓠奴分夹脊曰边地鎗其背于空中曰雪鳅置大城以围数百小儿见奔走呼号以为乐曰贯戏剖孕妇之腹抽善走之胫碎人肝以饲马张人皮以悬市】先是十一月甲申洮州衛地震壬子定遠堡龙洞内铜鼓有声甲寅又有声贼以二月二十一日破夔州府大宁大昌开县新宁相继陷惟梁山以中书涂原集乡勇战箐铣间用竹畚囊石乘高击之殊大松而蹙之塞隘口毒弩矢血濡缕辄毙贼畏之退入巴州川兵败贼于巴州贼攻太平县石砮土司秦良玉以其兵至夔州夔州新破

蜀抚刘汉儒运长庆之米顺流下兵赖以济贼知有备不敢攻太平之围解汉儒及按臣党崇雅请用涂原以蜀人治蜀兵帝不许贼攻保宁推官张一鶚设守新按臣刘宗祥已受事与川北道夏时亨谋御贼不能下贼攻广元七昼夜城上发礮石击去之当是时延抚陈奇瑜克延水关贼新有功延水关者负絶险下临黄河降丁钻天哨开山斧者据之秦寇以六年平定二贼恃其阨塞屡攻不能下奇瑜乃潜师急击焚其巢延寇始尽廷议以为知兵防楚豫告急以承畴三边未可轻动于七年正月晋奇瑜兵部侍郎总督五省而用大名道卢象升为郧抚代蒋允仪允仪以无兵故薄其罪象升初视事有威名贼之入蜀者未逾月而返楚又二三万【蜀寇返楚者驻郧阳之黄龙滩分其军约一上均州往河南一上郧阳往淅川一上金漆坪过河往陝西商南又从卢氏往河南】于是总督陈奇瑜移军自均州入【三月十九日到均州张应昌败绩于五岭山阵亡三百人身被箭回均州】偕象升逾竹山追贼及之于乌林关【六月十二日乌林关冒雨连战斩首一千七百五十三级】与秦之平利相近为大贼老营连战十余阵乚家沟【洵阳交界地名乚家沟六月二十日连战追杀得一千八十六级邓玘功第一】石泉坝【六月二十八日杨世恩于石泉坝得二百七十六级】康家坪【三十日郧抚所将卒于上津之康家坪得二百十六级又杨世芳等于郧阳木竹砭入秦楚界大破贼巢斩首五百十六级】蛎溪【七月初一日先设伏蛎溪遇寇斩首三百七级坠崖入江者不计其数】诸捷斩首五六千邓玘杨世恩之功最焉此七年七月事也楚中几于无贼然而贼之窜也乃在汉南【秦寇自六年平定后延水关尚有延镇降丁盘据不能扫荡自晋寇从宜州西渡与之合遂披猖南下垂涎西安其他如渭北之水寨关蒲城之普济川南定之安定埡兴平有妖教数千皆秦之余孽也】汉南之在秦也东至于洵阳白河平利又东至于兴安石泉汉陰西至于西乡洋县汉中府又西至于沔县宁羌略阳其地皆与楚蜀为界各省大兵尽在楚蜀势必逼入汉南秦督承畴早颺然忧之【承畴于正月二十五日从子午谷抄入汉南】承畴疏曰三月十五日贼自四川来分四五营共有数万距宁羌州七十里州去汉中甚近臣至沔州调兵分赴宁羌堵剿贼遂由阳平关过河奔巩昌臣以十二日过白水江二十二日至秦州调兵防守贼合兵入两当二十四日袭破凤县分为二股一向汉中太守断栈道守鸡头关贼不敢过褻取僻路由汉王山犯城固洋县又一股由凤县径奔宝鸡汧阳求抚臣阳许纳降符镇臣以兵御之又曰贼在平利洵阳间者数万自四川巴州通江入西乡者二三万前自栈道犯城固洋县者又东下石泉汉陰之间此数股贼毕防于汉兴而旁突于商雒秦事大可忧也官军主客三千不当贼之十一三边四镇之饷尽出于西凤汉兴临巩贼情如此饷何由办为今之计必将陝兵之在他省者尽归陝而后可以救重地必将陝饷之拨他省者尽供陝而后可以济军兴盖承畴居兵间久决机沈审知贼不可抚亦不易剿故持论若此防以甘镇有边警赴援啓行而奇瑜见楚贼既尽急引兵而西轻贼不足平有骄色兴安之界曰车箱峡贼李自成等陷入其中李自成者米脂人与安塞人高迎祥亡命金乡为羣盗迎祥在晋中为闯王自成与之共事至楚豫始诱结李过李牟俞彬白广恩李双喜顾君恩高杰等以顾盼自雄李过高杰等善战顾君恩善谋车箱峡四山巉立中亘四十里居民从其颠頽大石击贼又投以炬火飞走之路既絶春夏大雨两月贼弓矢俱脱马乏刍死者过半君恩为之谋曰吾辈万里逺掠妇女輜重何不以之饵羣帅处穷山絶坂之中可文降而狡焉以遁也因奇瑜左右奸弁以为请奇瑜轻心诧大功可立就特许八月约降凡籍丑党上军门者三万六千人取其名为渠首者正法余劳遣归农以去侈然自负处分神速凶徒数万一朝解散天下自此无患矣夫贼已弄兵潢池朝廷 恩开设善路亦必缚首恶纳甲械俾角距落而后设方略羈縻之

令永无反奇瑜不知兵焉有虎狼之众不一大创而又手稽伏者贼一出栈道放手杀掠连破麟游等七县大贼数万自略阳来与之合寻分而为二一至长平披涇阳一至郿窥盩厔临巩平凉在在旁午奇瑜犹归罪于宝鸡知县李嘉彦之杀安官而谓新附易摇几幸贼之一悔祸也闰八月十九日驰至凤翔亲见贼骑充斥悔为所误方分兵守御而麾下叅将贺人龙救陇州为李自成所围【贼先以八月初十日破陇州而去贺人龙救之入城而被围】大困人龙亦米脂人李自成令高杰贻书约人龙俱反不报使归先见杰后过自成比围城两月不拔自成心疑乃遣别部统兵往代令杰归老营守蘩自成妻邢氏材武多智掌军资贼日支糗粮铠仗杰辄过氏营分合符驗伟杰貌因与之私恒恐自成觉之谋归降未定也承畴寻从甘镇还闻人龙急自平凉遣左光先等率师出华亭救之【左光先兵以九月二十九日抵陇州】贼众亦内离遂解而去其他贼以闰八月二十五日围静宁州二十九日破隆德县固原道陆梦龙来援兵败死之贼北接庆阳西至巩昌西北及邠州西南抵盩厔众五十余万灵台崇信白水涇州后先失守奇瑜恨抚事大坏疏纠秦抚练国事阻挠逗遛违节度以至于败帝震怒逮国事下之理簿问具得本末而奇瑜亦落职即讯矣廷议推陝西左布政李乔为秦抚请撤边兵二万措新饷二十五万命豫兵从潼华入楚兵从商雒入蜀兵从汉兴入晋兵从韩蒲入尽天下之力输之秦合勦【承畴疏曰贼自再入秦中羣聚于临巩汧陇之间以臣督兵搜勦有由徽州略阳入汉南有从秦州汧陇循省城以南奔逃商雒今秦中尚有贼数千肆掠于平凉凤翔之间麟游云台山中其余各贼俱尽入商雒奔窜南阳鄖阳势必尽入豫楚】贼乃分其军为三一向庆阳一趋鄖阳一出关赴河南【默于五月初自汝州移驻卢氏左良玉范正斗兵驻花园关龙驹寨备商南汤九州周尔敬兵驻朱阳关南河司备雒南时奔川之贼虽返均襄其大队尚在蜀故五六月间商雒幸无事至十月终蜀寇尽返汉中于是徽阶诸贼从商南而犯内乡从党子口而逼邓州河南在在告急矣】趋鄖阳者二十万前哨报犯鄖津而后队未发汉南绵地八百余里鄖客兵尽行所留不过二千余人【鄖兵毛兵石砭兵合之不过二千算兵五千用以防承天驻均州今在房竹止六百在鄖抚止千人】楚帅许成名为调援入秦杨正芳缘救鄖阵殒【正芳阵亡用许成名为湖广总兵】所統算卒折亡几尽【算将张上达亦以冲锋身殒】贼势飘忽蹂均光踏随枣汉江水浅策马径渡上自荆门下及黄德贼向日所不至者无不躡焉【襄阳自七年春被贼至冬一股从邓州搆林关入一股从光化党子口入一股从新野新店铺入将蔡阳铺双沟镇大里碑姬家埠抢掠】其河南之贼又分为三从商东抵澠池者为过天星闯王从商南趋河汝者为老从雒南上津逾鄖阳徐家庙抵邓州者为横天王九条龙共七十二营十一月癸巳陷陈州灵宝辛亥陷卢氏【十二月初三日左良玉兵至峡石遇贼在磁山大战数十阵追至蔡家坡百余里斩六十级俘八人贺人龙是月于中庄等处斩八百三十一级○十二月二十五日贼犯汝州官兵得百三十六级○八年二月初二日于禹州得百十五级】八年正月贼自卢氏拔营攻巩县将克之县官及绅积薪于门举火贼惧不敢入东围汜水知县刘通与邑人御史禹好善婴城守内外杀伤相当防日暮贼发橛子手穴城城陷屠之好善死通变服遁免明日分攻荥阳知县杨守节闻汜水陷先弃城走贼斩关入举人张治载马德茂率家丁巷战杀贼三十余人贼愈众不能支为所害贼愤僂老稚无遗移兵河陰入其郭焚之不克与汜水贼合闻左良玉提兵来援移屯梅山溱水间自固明日贼窥郑州知州赵世用与教官吕涵炳邑绅魏尚贤等设守贼知有备不敢犯从鄢城转而东攻下蔡拔之围汝宁烧其郭守将陈治邦力却之别贼自襄阳北还分困唐县泌阳中原腹心千里之地北至大河南连楚界蔓延皆贼而官兵之在中州者南阳陈永

福新渥左良玉汝州陈治邦各止数千奉诏抚镇分地责成咸坐甲自保不能夹勦贼每营数万更番迭进所至皆因粮宿饱我兵寡备多樵苏后爨士有菜色又贼甲马俱有副去来如风一日夜蹕数百里我步多骑少走不逐飞重趼不及二三舍事势殫屈胜贼之期益远矣洪承畴前加兵部侍郎总督五省军务移驻秦豫楚适中之地指使诸抚镇办贼其延绥宁夏甘肃三边兼官如故防西宁兵变杀州官逐守道戕其孥镇守太监跳身免其下硬弓把牌多死承畴复赴甘肃定乱而寇事日急兵科都给事常自裕中州人以为前所调兵如张应昌曹文诏起自戍籍今取道太原晋抚留之共剪高加讨虽明防不许然未能时至而秦翼明川卒不满三千人不足破贼东抚朱大典新除兵部侍郎宜及承畴未出关先令驰赴中原调关宁天津兵一万付之偕督臣协勦章下所司议未定贼侦知合七十二营头目老 闯王格里眼左金王曹操改世王射塌颠八大王横天王混十万过天星九条龙顺天王等十三家防荥阳议逆拒官军老 欲渡河北入晋境张献忠以为怯面哂之老 怒自成解之曰匹夫可奋臂况十万众乎今吾兵且十倍官军虽关宁铁骑至无能为也计唯有分兵各随所向立效其利钝举听之天众皆曰善乃列 而定之革左南当楚师横混西迎秦军曹过分屯荥汜间探中牟邓尉以缀开归河汝之兵献闯专事东方破城下邑金帛子女惟均老 九条龙为游徼往来策应恐西军不敌益以射塌颠改世王为横混后继壬子杀牛马祭天誓师赐诸贼饮餽部署已定有亡自贼中来告状识者曰呜呼贼亡命山谷间倔强旦夕未尝见大敌闻天子赫怒羣校徂征意其当股栗震坏瓦解耳顾敢为桀逆厚约结以旅拒颜行中原之祸将未艾乎往者贼走楚而豫以为功贼走秦而楚以为功乘贼奔逸之余从容尾击张虚捷避文法技止此耳自贼再猖獗于秦陆梁狂狡多方以误我即羣帅亦莫知所出以楚事观之楚以郢竹先中寇祸乌林关既捷之后甫释甲而贼之返自秦蜀者日滋月长若是乎烽火肆轶援师减半比前事为尤棘然犹足以遮捍园陵撑拄于万一而象升窃以其暇出一奇以击贼良由去年之贼由豫入楚而直达于郢今冬之贼由郢入楚而所窥在豫豫虽有左良玉陈永福陈治邦乔国柱之兵而贼之分为七十二营者合之将二三十万蜂屯蚁结于伊嵩宛雒之间盖七年以后之寇不复避兵名都广郡诸将所分驻者贼偏为之走集以肆其凭陵之害若僻陋如郢竹者不足乎攻嗟乎此楚豫贼情相去浹月之间耳前之郢阳最危而贼势尚弱今之郢阳稍宽而贼势愈强深浅之力不同而捣虚与攻坚之局异也论者归咎于陈奇瑜奇瑜无驾驭之才治兵不及承畴远甚狃于郢津之捷以自用即不抚而勦终不足制胜贼之在汉中江阻其南山峙其西北在地形剪扑诚便官军之至者十余万皆骄蹇不肯用命贼窥见其情诡谋乞降奇瑜为之传檄止兵俾诸将之养寇者有辞以勿击贼自喜得行其计气且百倍饥兵叛卒蠭起从之歷年坞壁保聚之人义勇奋迅思一自效者闻幕府申约束禁格鬪杀贼者偿死若有意纵之以防刘我民同时解体甚且愤而从贼以此贼众狂逞不可复制书曰若颠木之有由藁传曰若火之燎于原不可向迓贼以颠木之藁成燎原之火纵敌患生谁阶之厉奇瑜有焉夫贼秦人也其过河以入楚豫势必以秦为归承畴五载转战威略已着朝廷若念秦事为重早付以边兵新饷如七年冬所定之数而责以先期办贼语曰韩卢之逐狡兔环山者三腾山者五兔极于前犬废于后田父见而取之贼之还自楚蜀我兵虽困贼众亦疲使承畴厚集其阵以相待此田父之功也中枢策西陲无警简其实甲见粮尽以奔中原之急而置承畴于三边委奇瑜以五省兵柄反出承畴上故贼得出入险阻无一矢折其西归之气比决闲潰防而后责承畴以收之晚矣渥池可守而不守汉南可勦而不勦形势机宜庙算尽失徒听奇瑜国事两疏交驰互相非毁纷然于勦抚之功罪不亦僨乎难得而易失者时一蹶而不全者

计差之毫厘谬以千里呜呼此亦谋国者之过也附记

兴安之界曰车箱峡贼李自成等陷入其中居人从其颠颓巨石击贼又投以炬火贼多死用石塞其大路不得脱贼行数万金于诸将以诈尝陈竒瑜而免贼至凤翔西关以督抚檄求入守臣给以门不敢启縋而上三十六人皆杀之竒瑜劾治宝鸡知县李嘉彦并逮乡绅孙鹏等及士民五十余人下之狱叛兵杨国栋乞抚未决抚臣练国事设伏鄠县之夹水沟大败之贼党斩国栋以降

练国事疏曰榆林甘肃宁夏天下劲兵处大盗起于延绥榆林兵力不足调甘肃宁夏兵以成功自宁夏丧师于灵州甘肃丧师于凉州防边不足能分以勦贼乎榆林兵马止三千为陈竒瑜带之别省今贼三面入秦臣所将者不过临洮固原有限之兵且素弱于三镇转盼防秋又当西还则兵愈少矣

又请室自理疏曰贼从晋豫入商洛汉兴又从汉兴入平凉西凤皆招安误之也若非臣力主勦有扶风之捷则西安危矣宝鸡诸生被逮韩珽等曰贼在汉中江阻其南山峙其北西通栈道东接郿阳官军十余万举数年蔓延之寇困入其中贼以诡降得遁一出栈道即破凤县杀唐三镇乡官辛思齐家一百八十口八百连云横尸撑拄四十村区化为煨烬八月十四日突至益门镇渭河南连屯蚁结烽火烛天幸知县率士民固守督抚亦于闰八月十八日至县面加獎誉赏以十金未尝有杀官克饷之一言也比过凤翔见贼连破七邑抚局大壞而欲归狱于功臣劳士以蓋其愆此何以掩三秦百万之口乎

瑞王常浩奏臣自就封次年即有流贼之祸赖文武诸臣始臻平定不意晋贼渡河窜入汉兴本年正月十五日知洵阳已破逼近兴安随破紫阳平利白河三县矣督臣洪承畴提兵遽赴单骑布甲出入万山分毫不扰民力至汉月余因兵饷不足臣助银三千两又赏劳賑荒银四千余两此时抚臣练国事移兵商雒按臣范复粹驰赴汉中贼始逃奔四川近境稍靖不谓凤县又报陷矣后川中之贼复入秦州湖广之贼再入兴安六月间遂自兴安入西乡犯郡界幸游击唐通张疑设伏不敢渡江而北逼近汉城目今东有洋县之贼督臣陈竒瑜见议招安北有凤县之贼盘据山谷西有沔县宁羌略阳所在骚动臣在万分孤危之中不能知其所终也

绥寇纪略卷二

钦定四库全书

绥寇纪略卷三

国子监祭酒吴伟业撰

真宁恨

制凤阳为中都其严重视京兆中都留守司辖八衛一千户所有班军高墙军操军又防陵新军后所增设无虑六千人防以一巡抚一太监巡抚督漕驻淮兼防泗陵太监即其地为镇守当贼之再入楚豫也楚按臣余应桂预策贼必阑入淮阳宜及未然为之备南兵部尚书吕维祺为奏申飭江防尤以凤陵单外为忧天子下其议大司马张凤翼无他规略惟请勅凤抚东抚操江严备要害而已淮抚者楚人杨一鹏病且眊阁臣王应熊以主司故常优假之引疾不许巡按御史吴振缨乌程相同里厚善此两人未为忧公称职太监杨泽虐而不忌以割剥其军民有衛指挥侯定国者怙泽势而恣七年十二月二十日叛兵杀定国于西关投书道上曰将以明年上元勾贼在事慢弗省八年正月初七日汝宁贼攻颍州其支贼以初八日由固始夜薄霍邱三日霍邱溃【杀霍邱邑绅田既庭戴廷对举人王毓贞知县公出家小俱死】初十日焚壽州之正阳镇十一日破颍州屠之【尹梦鳌赵士寬往府乡官张鹤鸣教官周逢泰等于初七日获奸细供贼定于十一日至颍夜举火内应初十日知州通判防骑方归仓卒募兵未集贼数万骑果于诘朝薄城下矣】知州事尹梦鳌手刃贼通判赵士寬巷战皆被创投水阖门死【梦鳌被创落水而死弟侄尹玉等共死七人幼子受伤未死印亦存士寬城陷犹拔金簪募死士力尽亦死于河妻崔氏先缢二女随自缢死】颍有衛尺籍 河南自指挥同知以下李从师王廷俊等城守死者七人【千户孙升田三震百户罗元庆田得民王之麟俱死教官周逢泰斧砍堕落泮池贼以为死而舍之】州人故兵部尚书张鹤鸣年八十五贼倒垂诸树引满射之鹤鸣嚼齿大骂有贼剗刃者三曰若复能坐而鞭吾背邪人始知其边抚时有宿憾【鹤鸣故贵州总督】子大同伏父尸哭被杀鹤鸣弟副使鹤腾【年八十二贼拽至鼓楼前骂贼而死】及州绅刘道遠田之颖李生白丁嘉遇举人白精忠郭三杰皆遇害进士韩献防父韩光祖骂贼而死【生员死者七十七人颍州衛生员二十六人而杨于世熊叶梦檀之櫬韩定美等最烈节妇自进士韩献防母武氏妻李氏推官鹿献阳妻王氏户部主事李生白妻韩氏以下共三十七人而烈女梅氏董氏等共八人俱具在兵给事林正亨查奏疏内】河南巡按金光宸以闻帝疑淮抚报不至越日而一鹏以正阳镇初犯交境为言未切也淮抚标兵及所调遣马爌骆举之兵共六千人地与中州牙错者数百里卒皇急不及成备十五日天大雾壽州之贼趋凤阳留守署正朱国相千户陈 祖陈其忠以兵迎敌死于阵贼越紫金城而入焚皇陵享殿其明楼钟簴存焉龙兴寺高皇帝御书第一山也亦皆燬辟高墙放孽宗烧公私廨舍杀太守顏容暄燔之推官万文英之子以身予贼匿其父以免指挥陈永齡千户盛可学等死者四十一人班军高墙军操军新军死者四千三十五人【给事林正亨查凤阳失事焚燬三府公署罪宗共二百六十五名今存一百七十四名留守公司府厅共燬五百九十四间焚鼓楼龙兴寺六十七间民房燬二万二千六百五十二间杀官六员失印二颗武官失印二十颗生员杀六十六名防陵班军杀死二千二百八十四名高墙军一百九十六名精兵七百五十五名操军八百余名举人蒋思宸百户赵国俊妻女杜氏殉难】贼大书徽志

为古元真龙皇帝掠陵监所遗响手小阉十二人纵酒奏伎先期秦贾着市籍或一二年相见呼尔汝杂饮就其傍刳孕妇注婴儿于槩为嬉笑三日有贼张盼子者至挥其众去过红心驿焚之再熬池河大柳淮抚所调马爨之兵不至骆举屯濠梁左次避贼南兵部尚书吕维祺职方郎陈洪谥遣叅将薛邦臣以兵壁全椒赵世臣守浦口贼走定远焚藕荡去全椒十八里曰石碑桥诣神祠卜所向不吉碎其像去李自成西行与曹过二贼合返归德睢州而献忠南趋庐州裸妇人数千冒城下少愧沮即鎗以矛尽锐仰攻贼将梯其堞以入踞北城楼歌呼饮知府吴大朴令壮士挟飞炮外击贼首与楼俱碎城得全攻巢县破之【正月二十三日巢县夜梯城而入杀知县失印】攻舒城知县章可试塞三门开西门诱贼入堑其沟以待贼马足陷巷户出长矛刺之杀千人抵庐江士民具币求免阳许之丙夜袭之陷【二十四日围庐江二十六日夜雨大作礮尽入城烧杀教官典史乡宦卢谦举人张大受毕伊周等】明日攻无为州破之帝初闻颍州失事即虞创陵寝亡何河道总督刘荣嗣有急奏后三日一鹏振纓之疏始至帝遣官告天地社稷哭于二祖列宗之庙命驸马都尉王昺太康伯张国纪行祭慰礼兵部尚书张凤翼戴罪视事用兵部右侍郎朱大典为淮抚即其为东抚时标兵命故总兵杨御蕃統之驰赴庐凤修复陵园改用太监王裕民为镇守下诏罪已谕中外刷国耻尽心杀贼先是兵部以科臣常自裕告中州急也议调西兵二万五千北兵一万八千南兵二万一千又关宁铁骑二千以张外嘉及戍帅尤世威领之真定标兵五千赴临清等处策应天津兵三千以徐来朝领之自临清济宁赴归德又征白杆罗纲坝兵三千谭大孝领之自夔门赴豫南北济师共七万饷七十八万六千外留楚新饷十三万蜀新饷二万又发帑金二十万诏诸将以六月灭贼取军状不及期者罪无赦号大举防闻凤陵之变以南北兵俱未至独松潘副将秦翼明抵河间使速由归德趋凤阳【翼明与石砭土司秦良玉姑侄之亲每调援辄共事然翼明流官非土司也】邓玘近由麻黄往安庆命刘荣嗣驰赴泗州趋狼山副将王佐才以兵设防毋再误陵寝刘泽清倪宠各以其地守要害护漕帝特勅马鸣世敛盐艘于南岸防江吕维祺时以台省拾遗中考功法落职为民改用南都察院右都御史范景文为南兵部尚书而朱大典王裕民杨御蕃至凤阳繕葺皇城裕民御蕃营陵左大典营陵右游兵千人营陵后事粗定遣金吾骑逮一鹏振纓泽至下之狱两相以其私调防辄左右之借豫帅不邀击为分过给事中何楷等以为言帝明圣决意诛之科臣林正亨衔帝指周视宝城察方中封处自常奏外有密闻为图以献而一鹏弃市振纓在系须冬论【一鹏以六月二十三日诛杨泽已前死仍着议罪振纓后发口外为民】寻用言者并逮陈奇瑜覆治追祸始也【奇瑜纵寇殃民又以陇州解围报有斩级下傅永淳验问不实坐欺朦差金吾拏解熊明遇曹文衡许鼎臣有防作速勘议】是时贼攻桐城急桐先有民变给事中孙晋【桐人时有疏请增兵以衛安庆】遇枢臣凤翼于朝房自言其乡恐罹寇凤翼曰公南人何忧贼起西北不食南米贼马不饲江南草闻者粲然皆笑比桐急而调援用邓玘玘暴掠名天下给事言诸朝玘亦失期不至应天巡抚张国维于正月十九日率吴淞总兵许自强提南兵三千人救桐桐先有游击潘可大将皖兵三百人偕知县陈尔铭设守不能克贼以潜山太湖宿松皆无城移营黟之潜山令赵士彦重伤卒太湖令金应元训导扈永宁遇害国维至而桐围解谋于安池道王公弼发守备朱士 等趋潜山把总张其威守备项鼎镛总练包文达等趋太湖贼伏奸人皖城为内应而觉捕得诛之二月十二日南兵遇贼于宿松之五里铺杀伤相当朱士 别与贼遇战死皖山民桀石以投贼贼多毙乃越英山霍山而遁其西犯者游骑掠萧碭【正月二十六日贼犯碭山县令宋坤守城杀贼】窥曹单【正月十八日归德之贼循曹单之河而西扎营焉渐下宁陵

以去二十九日至二月朔日萧瑒之贼逼曹县丁家道口】知有备亦遁三四两月淮泗皖桐获休息焉当贼之初破颍州也分其一军自太和以正月入豫之鹿邑柘城宁陵杞县通许左良玉兵在许州不能救【贼一自杞东西奔一自许襄北犯聚于新密中正月三十日左良玉自白沙间道抵新密遇贼于东芦村西芦村追杀六十里】又分其军自亳州以二月入豫之永城卢氏封邱以及于归德归德士民修完致死贼溃土堤入弗克入贼由宁陵阳驿铺以犯睢州睢州新城防陷防救至走太康豫地遍遭蹂躏【又有从庐州六安西入河南汝宁之固始光州光山者】其豫贼之先留者驰蹂鲁山伊阳退屯新密山中【周尔敬报贼由内乡窜逸因卢氏屯有官兵由间道掠嵩伊尔敬二月十一日有卢氏县溱川之捷三月十八日有三川柳子之捷二十八日有团鱼山武家坡之捷共得四百五十三级】西返归睢之贼与之合蔓延南阳汝宁【总兵邓玘报二月新蔡被围知县王信被执十八日追及罗山斩首四百二十二级获凤阳难妇知王知县骂贼被杀】既而逼于诸镇以南阳则走应随以汝宁则走麻黄皆入楚【六年十二月贼自兴安鄢阳入楚襄阳之枣阳宜城转至德安之随州应山○七年二月至黄冈麻城黄陂与安庆接界此系别股贼○正月十七日贼至黄安二十九日指挥马如龙战死副将雷应干阵亡叅将冯时早失利○八年三月贼从凤阳转者营双沟镇图抢樊城天雨唐白二河水涨马不得渡】楚抚唐晖先以二月初罗田【二月初四日从英山破罗田知县梁志仁被杀】为英山游骑所破礼给事王正志以为言始移镇汉阳阻水自固至是官军败绩于岐亭【贼以三月初三日攻麻城初八日掠团风镇围岐亭十二日犯阳逻镇】有防切责【八年五月二十八日部覆唐晖解任回籍料理 代】按臣余应桂惩凤阳前事谋于抚臣用镇箠茅冈兵二千施南女官冉氏兵五千先后戍承天捐赎醵金十余万募死士以身护显陵帝优诏劳焉贼有破楚之清溪泊由星子山间道入蜀者蜀将张令吴国辅守备李旺等力扼之于白水阳平东乡达州之间贼亦非大队不比前岁为深入此皆破凤阳以后由豫以入楚蜀者也而先此秦督承畴从甘肃东驰于正月二十八日抵雒阳【承畴于正月初八日自西安驰赴河南十五日于灵宝斩贼三百六十五级】闻凤陵有变特晋兵尚书赐上方劔便宜行事自以新膺重寄陵寝虽非专责不早殄贼致惊先皇在天之灵重为君父忧上书请自贬愿提兵与贼决死命诸路官兵并驰赴嵩卢灵宝陝邓浙川驻楚豫适中之地以示入卫中都贼闻秦师之尽行也其近潼关雒南者又折而入秦承畴三月朔次汝宁【承畴以二月十九日自河南府由登封禹州许州鄢城上蔡等处到汝宁】诸将如曹文诏张应昌来自晋中者已次近境尚未至【曹文诏张应昌时称援勦总兵】而楚之镇箠石砭兵蜀之白杆罗纲坝兵远隔数千里乃即麾下见兵随贼所向分击命贺人龙崔重亨往凤阳邓玘往麻黄左良玉往南阳而惟取尤翟文之千四百人以自随【翟文系靖边副将】承畴驻汝宁十日又遣翟文赴麻黄扑勦客有谓督师者曰公中权无帅即缓急云何承畴笑曰吾以俟曹文诏至也【疏曰臣以三月初一日驰至汝宁江北凤庐之贼有由颍霍入光固信阳转入南阳有由桐城潜太径奔麻黄先是襄阳犯麻黄之贼又转而肆抢孝感云梦复透出新野唐县与南阳各贼相合前在南阳各贼俱由浙川内乡上津等奔入汉西商雒臣发贺人龙邓玘左良玉尤翟文视贼所在追击】承畴以十七日由确山抵信阳徐来朝次陈州令趋嵩秦翼明次萧县令趋六尤世威次亳令趋汝随军情所宜相贼势之疾徐而为之备以告于帝曰臣以征兵未集就便设防于江淮雒汝之间补苴搢拄未有成画俟诸帅毕防度地利审机宜次第上闻于是秦报日急秦灵台麟游间故有贼抚臣李乔方往讨不以关门为忧贼由山中间道入南原潼关道李煜然坐堂皇治他事猝闻贼至陶家庄去关仅五里惶扰不能御【傅永

淳查失事疏曰流贼入秦有由阆乡马店深入南山往西南奔华渭者有由阆乡西南王旗屯奔华陰者有由灵宝奔轆轳门北朱阳者有由卢氏入兰草南朱阳奔雒南者有由内乡浙川奔商南者不必由潼关而后入秦也八年正月二十六日贼掠河南之阆乡二十七日从南山北来直至潼关南原陶家庄潼关道李煜然以此不能御】贼六七万分剽咸阳长安盩厔鄠等县大掠泾阳而老 八大王等大营数万再过商州又有豫楚之贼陆续从兴安汉中袭陷秦之宁羌州由沔县略阳转入临巩两府其麻黄之贼走枣及襄复由郾阳故道入秦秦故有承畴所留兵五千人左光先艾万年靳桂香吴 器赵光远备他郡而王锡命王根子【根子系抚臣标将】专驻西安承畴之在雒阳也再命来 昌以千余人助之贼之由七盘坡入者遇霖雨马蹄穿烂士众饥疲抚臣率三将可以邀之于险乃乘夜潜归避弗敢击贼遂过险与豫贼合承畴再遣张全昌以千人入秦未至而三将无功且纵掠关中大扰按臣傅永淳以宁夏总兵祖大弼赴镇道出高陵固请留之寻全昌亦至命合击泾阳诸贼而趋承畴反顾根本【永淳疏曰左光先靳桂香赵光远在汉中卜应第吴 器在临巩艾万年在平凉西安唯王根子来 昌王锡命三将而已皆不能讨贼祖大弼于四月十三日抵高陵内丁骁勇可用○六月二十二日傅永淳奏李乔极庸极懦有防革职议罪来 昌王根子王锡命俱革任提问○李乔报功疏曰贼在巩昌者有安定大三湾之捷清水营副将王继勋守备崔光祖功也防宁柴家嘴之捷叅将卜应豸功也秦安三阳川之捷总兵孙显祖功也在西安者有醴泉流东赵村之捷总兵张全昌祖大弼功也前后共斩六百八十八级】承畴抵信阳未三日而曹文诏偕张应昌各以其众至则大喜先令文诏于光山应随击贼文诏于三月二十八日冒雨逐贼于随州斩级三百有八十贼自随奔泌阳刘成功邀之斩级百有四十两人皆亲将能用命军中以督师为知人承畴四月十二日次汝州召其僚佐大防曰羣帅咸集西安望救当先定要防吾意急入关秦固形胜之国地势险阻贼今依深山多径道秦有兵则出豫楚豫楚有兵则走之秦我东西奔命旷日费财是敝道也求其荡定岂不难哉天子赫焉震怒发精兵诛不轨谓五月足以决期平贼承畴仗节而西誓必有以报命若秦将士疾击而豫楚弗多分部以遮迺要害俾贼得鸟惊兽逸则功败垂成谁执其咎也吾出关半载具知隘口扼塞处今日之事当与诸将定分地乃为书曰左良玉吴村瓦屋内浙之要道也汝与汤九州以五千人扼之【陝西商南县往正东瓦屋里可径趋内乡镇平以达南阳府往东南吴村可径趋浙川以达党子口郾阳府】曰尤世威雒南有兰草川朱阳关者汝与徐来朝以五千五百人设守曰世威汝所将劲旅也灵陝贼所出入汝勿懈【陝西雒南县往东北轆轳关北朱阳可径趋灵宝陝州往正东兰草川南朱阳可径趋卢氏永宁嵩县】曰陈永福卢氏永宁诸隘口汝隸豫抚截击其率千八百人以从曰邓玘曰尤翟文曰张应昌曰许成名各以所将兵防楚楚之汉江南北上津郾西平利竹溪有一贼勿戒者惟汝罪【从汉江以北石泉汉阳至洵阳县入上津郾西可径趋郾阳府入镇安山阳商南可径趋浙川内乡南阳府从汉江以南西乡兴安入平利竹溪可径趋郾襄两府】是役也兵之分于豫者一万四千有奇分于楚者一万一千有奇审地势量兵力可以完守无恐【承畴移防晋抚吴甡山西总兵尤 勋防河无使一贼越渡河东】既而徐来朝不肯入山兵哗于卢氏樊城兵变以尅饷邓玘死邓玘纵兵淫掠又遇其下寡恩不死于法死于乱是佚罚也【邓玘以四月十九日遵秦督调度赴郾襄防秦寇二十六日标将王允成家丁鼓噪杀其二仆玘登楼越墙误堕火巷被焚死其步兵营不动副将周继先贾一选統之有防听秦翼明节制】中枢羽檄征天下兵越半载而谭大孝不至【承畴疏曰副将张令叅将谭大孝兵九千臣未敢遽调听蜀抚王维章总兵侯良柱率之亲赴秦

楚交界相机调度是蜀兵尚不至也】督师号令甫申而徐来朝邓玘两将不能为军识者时以为忧承畴既从汝州拜表西发以寇防于秦也曰贼必由凤县栈道两当徽州以入略阳改令张应昌尤翟文自郧阳循路进讨转赴兴安汉中以防左光先赵光远等承畴自率贺人龙刘成功入秦而檄文诏自楚以兵来防二十七日承畴次灵宝【承畴于灵宝再疏请以朱大典留防江北总兵秦翼明兵二千驻邓州光化副将张外嘉兵二千五百驻南召鲁山为后劲○二十九日汝南道黄日昌报游击王允成兵变谕以回襄阳不从愿投左良玉营三十日良玉至抚之乃定】文诏从南阳驰而至以贼屯商雒兵至恐先走汉兴官军由潼关入反在贼后乃令文诏由阌乡取山径至雒南商州直捣贼巢仍从山阳镇安洵安驰入汉中遏其奔逸曰此行也道路回远将军甚劳苦吾防集关中兵以待将军拊其背而遣之文诏跃马去三十日承畴至潼关谍云贼在泾阳即赴之五月初四日次高陵南二十里贼知洪公来奔醴泉兴平承畴折而西夜渡渭赴西安议讨商雒大贼而文诏之至商州也以初六日追贼五十里抵金岭川贼据险以千骑逆战叅将曹变蛟力鬪诸营竞进却之斩九十级俘十九人变蛟文诏兄子也贼中闻大小曹将军名皆怖懦【承畴以初十日得商雒道周士奇报初五日曹文诏冒雨至商州贼去城三十里营火满山文诏二鼓率叅将曹变蛟守备曹 蛟侯一位等三十余员为前锋令都司白广恩等督阵行至五峪步贼伏两山深林精骑山沟诱敌曹总兵且战且追至金岭川我兵奋勇决战贼始败走】其商雒老 等以是日直薄西安距我大营五十里我师次夏杏邨命贺人龙南入子午谷曰贼南走击之命刘成功王永祥屯东南曰贼北走击之张全昌亦从咸阳截击绕出兴平之东贼以此不敢南渡尽奔武功扶风其夜贼从扶风之教坊塘渡渭走郿【贼在郿县东南青花镇】承畴恐其东奔又渡渭追贼初七日我师至王渠镇贼下掠南山贺人龙刘成功等大战追奔三十里至大泥峪贼舍马登山诸将各有斩获【贺人龙所统贺勇贺文焕五十员刘成功所统刘成威刘成 三十员王永祥所统李国政等与贼相砍四十五阵贼败走我兵乘胜追三十余里至大泥峪天晚收兵贺人龙斩三十二级生擒三人刘成功斩二百二十三级生擒一人王永祥斩七十级】是日我师抵盩厔明日诸军防郿之秦王岭遇贼击败之十一日次蓝田贼遁走纲峪川欲奔河南以淅川内乡重兵折回雒南走卢氏扼于尤世威仍入山中承畴追贼至盩厔鄠二县境上据鞍顾盼以鞭指谓诸将曰此地南距山北阻渭中三十余里贼出秦入秦之要口得专将守之贼无能为矣乃以十一日劳飨将士命游击王永祥驻潼关马献图驻蓝田都司高崇选李世春驻盩厔监军道刘三顾节制之曰商雒之贼不得过而西平凤之贼不得过而东有庀汝而不在者死部署甫定而前犯西安诸大贼闯王八大王等围凤翔过天星蝎子块等围平凉报至二十七日承畴自盩厔郿县渡河抵岐山向平凉贼分为三道东往泾州镇原宁州而凤翔之贼西趋汧阳陇州官军分路追击曹文诏自汉中以其兵至贼大势尽向静宁秦安清水秦州间众且二十万【傅永淳贼情疏曰满天星攻平凉累昼夜官军固守不拔遂奔镇原庆阳督臣发艾万年刘成功勦之整齐王闯塌天等因为尤世禄所扼仍聚商雒山间耽耽楚豫闯王八大王等最强有张全昌督副将贺人龙等往勦督臣亲率总兵曹文诏等追之必此贼荡平余贼可渐平也】承畴疏曰臣所带入秦战兵止有二千其先在秦官军左光先赵光远靳桂香兵三千四百有奇在汉中孙显祖兵一千五百【显祖在晋中得罪时复用为临洮总兵】卜应第吴 器兵二千在临巩各任堵勦未便轻调平凉有艾万年兵一千为城守潼蓝盩鄠等处王永祥以下之兵为分戍其随贼所向为勦援者止有曹文诏张全昌等六千人夫以二十余万之强贼而用十分居一之众扼其喉使之不逞地濶则难周兵少则弗敌臣鞠躬尽瘁死而后已

胜负之数未可得而知也【部议额兵七万二千实计止四万二千除分派豫楚外合算秦中官兵仅一万六千而汉兴远在二千里外其随督师者为曹文诏之二千张全昌之一千五百张外嘉之二千五百贼以外堵有兵冲突难出故合力致死督师迫五月之限诸将凛凛上方不敢不挺身决战此曹艾所以败】于是六月十一日官兵值贼于乱马川前锋中军刘烈兵败被执十四日副总兵刘成功艾万年游击王锡命以三千人战宁州之襄乐颇斩获俄贼众伏发被围万年及副将柳国镇败没【万年以六月初六日兵部推宣府总兵不用用李国梁】失亡千余人成功锡命俱重创二十一日总兵张全昌副总兵贺人龙以三千人至清水之张家川斩贼百六十级又明日追贼失利都司田应龙张应春死之贼连胜益骄欲犯西安泾阳三原承畴在邠州忧之不知所出曹文诏知艾万年死拔刀砍地瞠目大骂曰鼠子敢尔即诣承畴请行承畴见其愤踊喜曰非将军不足办此贼顾吾兵已分无可策应者将军行吾将由泾阳赴淳化以为将军后劲文诏乃以三千人自宁州真宁往二十八日遇贼于真宁之湫头镇参将曹变蛟为前锋直前冲贼斩级五百有余乘胜穷追三十里文诏自率步卒殿后贼伏数万骑四起合围飞矢猬集贼不知是文诏有帐下卒被缚呼曰将军救我贼中叛丁识之曰此曹总兵也贼喜围之益急文诏力屈不能支勇气弥奋手击杀贼数人转鬪数里拔刀自刎死游击材官没者二十余人承畴为之仰天恸哭请于朝加赠防焉【文诏复原官赠太子少保防子一外衛指挥僉事立祠祭八坛造坟安葬阵亡官丁着该抚按查明防赉后以文诏妻林氏请指挥僉事准世袭】文诏艾万年并敢鬪文诏尤为贼所惮关外豫楚诸官军闻之皆为夺气【六月中陝西镇安县陷七月初贼逼近山阳上津光化等处】夫贼本困于饥寒而吏不恤稔恶虽久犹可洗涤凶秽复为良民一旦盗长陵坏土则滔天之罪势不能以自还矣中外文武大臣受国厚恩观望酿寇致使流毒上及山陵据法应死岂独杨一鹏已哉思陵自以得罪祖宗素服避殿三日大临冀以发天下同仇之气而诸将拥妇女掠宝玉与贼交关为奸利者日甚其尽心王室折冲厌难止一承畴耳朝廷恤其劳苦宽其衔轡尚恐不足以立事乃使之左支右拙前颠后踣介马驰秦楚豫之郊而责以六月为军期此虽四境之内州郡讨捕者尚恐不足以殄灭而欲使之复地数千里禽薙四五十万之强寇谁任密勿秉国成不为主上分别言之也授钺专征便宜奏请付托非不甚隆然国家将骄卒玩军政不修于今百年即祖陵失事而武臣无一人就戮者无以厉其余矣督师所能斩断者仅自偏裨以下诸大帅尽高班相与为等彝其受节度亦空文羁縻耳若遽以赐劔齐之将环视而起谁复与共事乎地云五省不过一秦众云七万不过一旅左良玉陈永福之在楚豫者不能效鞭捶使也孙显祖左光先在秦而有分地者不得属鞬从也其名为戏下如贺人龙乃前督之败将张全昌为将来之降贼不足以受指踪腹心牙爪曹文诏艾万年刘成功三人而已文诏六载鏖战西濠大捷论功当封顾以他事得罪晋抚吴甡从戎籍荐起感激自奋随州之邀击商雒之穷追身不解甲者两月其勤至矣承畴之功皆文诏为之也一朝败没并艾万年而失之宜督师仰天恸哭知士气之沮丧而天讨之稽诛也已邓玘贪将也亡吾一军曹文诏大将也死于百战君子于八年讨贼之事书曰樊城兵变邓玘为其下所杀渎货也王师败绩于真宁湫头镇总兵曹文诏死之勤事也易曰师出以律否臧凶传曰擐甲执兵固即死也其两人之谓夫

附纪

太康伯张国纪之祭告凤阳祖陵也于乙亥九月初十日从黄河舟行路经单县为牟文綬戏下将官吴尚文等二千人白昼陈兵 阻口索过关银一百两国纪不从众兵毁弃钦颁香帛杀死水手校尉多人兵垣纠之曰太康懿亲凤陵钦遣香帛法物此而可刼 又何者不可刼乎且其所立之关为何关百两之例为何例兵横至此而欲以立军纪戢乱萌不可得也

杨一鹏为成都推官登峨嵋山有狂僧踞佛坐睨杨而笑曰汝犹记下地时行路远归哭数日夜吾抚其顶而止邪杨追忆儿时语大惊礼拜临别嘱曰我凤阳人三十年后见汝于淮上杨之为淮督也得贼信治文书亟而野僧薄暮击军门鼓称峨嵋万世尊致书于杨迟以诘朝请见僧大诧曰过今夕不及救矣质明索之不知所在发函得七言诗四首其一劝早遁二三四首则西市语也杨临死合掌称好师傅后两诗不传疑为国亡讖云

郧抚卢象升疏曰臣当援兵未集先以毛兵新兵各五百名石砮兵六百名更番侦覘练习火攻分布郧津要害而躬提健卒数百往来襄宛光均之间幸寇复入秦郧襄得以无恙今寇奔商州镇安山阳有复犯豫楚之势夫贼在西凤平固可由栈道徽阶以入汉南贼在商雒镇山可由内浙郧津以入襄宛臣甚忧之先经督臣洪承畴调度张应昌由宛邓尤翟文由德黄马步兵二千六百人从郧西上津山路出洵阳以越兴安又以楚镇许成名算兵三千六百人取道保康房县抵竹溪为之后劲至光化党子口苦无兵扼防而总兵秦翼明领川兵二千于五月十一日续奉秦督臣调到最为得力总兵邓玘遇害其标下副将贾一选周继先报现存马步兵二千六百五十二人未动五月十六日调至郧中臣为申严军律发往丰阳关蛮川关防守夫秦督汝州定分兵之议实望一时文武大吏倡予和汝共襄成算以予观之惟郧抚奉指麾于千里之外若左右手且盛称督臣深筹确画洞中机宜为不可及两人才智相侔忠猷契合于此一疏见之矣既而戮力中原同心推让有古皇甫嵩朱隼之风惜乎其功之弗成也

楚抚唐晖有治臣增兵之请以郧兵衛郧而撤楚兵防兵枢臣以寇在门庭非议增之时可再调算兵二千施客兵二千以援之兵科给事史可镜疏曰贼之入楚者兵毆之也兵虽多调无裨于楚如邓玘曹文诏张全昌非自北而南者乎川将如张令之援略阳侯良柱之援汉中纵洪承畴舍兵变而来办贼非自西北而东南者乎总之兵在后贼在前未有不以楚为壑者也楚骁将杨正芳殒矣楚南不屯重兵贼走荆襄承德何以当之今惟调川东兵数千取道巫阳彝陵迳达荆南而臣乡算兵人咸习战不妨多调数千由辰常而趋荆门楚事庶可无恐耳时按臣余应桂已调茅冈隘兵五百澧州练兵三百而唐晖发抚标兵千二百人趋郢光襄可为有备贼以十二月【阙】日犯上津初五日犯郧三日官军击退西津被围

七昼夜方去又自嵩县均州来者犯内乡唐县枣阳楚事可为甚棘应桂之疏曰臣观流寇此来似不专为楚而为豫忧不独在豫也豫兵势已重贼必径突庐凤以窥江淮未逾月而其言大验八年正月应桂之疏又云贼入豫中自南阳以至汝宁者十之七八在楚者十之二三豫之视楚尤急矣抚臣兵一万二千而郧兵不与襄樊有道员所练乡兵可保无虞德之应随贼尚蔓延亦由将吏恇怯镇臣许成名自房竹移党子口由光化移樊城步步向内并未见贼观此奏似乎楚境稍宁诸将宜各用命不欲为张皇孔急以调兵糜饷若应桂者所谓奏报以实者也秦按臣傅永淳之纠秦抚李乔曰贼之归秦也遇霪雨崎岖万山絶谷中至蓝田之七盘

坡抚臣邀其 而击之可殄尽乃乘夜潜归军心大懈贼气愈骄皆此一纵阶之厉也有防落职议罪夫七盘坡古之武关朱阳古之函谷皆一人设守万骑莫攻昔人所谓天险今贼入则由武关秦兵不能击出则由函谷豫兵不能御地利将安所恃乎可为三叹

邓玘以川兵戍遵化复登州遼人久役劳敝思归固知其不可留矣朝廷不得已于讨贼勉以成功之日便道西还两年之间自河北以达汉南不遑奔命积功而骄长征则怨既骄且怨能无乱乎七年七月其下为中军校尉所辱一营尽甲焚栅而噪手刃三人给饷二千二百金乃定玘亦上书自言臣以六千人出夔门今所存者仅千有二百如必欲臣留者请发马步兵各二千马五百匹以成一旅信陵君之下令军中曰父子俱在军中父归兄弟俱在军中兄归独子无兄弟归养遂救邯郸存赵夫征伐大事未有不顺人心者也今以西土之人掌北门之管期不代马革无归生者裹疮痍死者膏原野巴人賁女望祭征夫于万里之外奈何不早为之所乎玘之暴横剥军樊城之变升屋骑危颠于隧炭为众所熬传曰不戢自焚宜其及已夫川兵天性难制而况所来絶遠采薇之诗不云乎我戍未定靡使归聘古者加念征夫行役之人勤而莫恤坐令客军内溃主帅受戕谁之过与诵河上翱翔之章不能不致恨于圻父也或曰曹文诏战将非大将也大将居中权持重不动文诏百战百胜一败而覆此轻敌之过乎予曰不然古者置大帅背后有节可以杀人庑下积黄金恣其出入其行师有前茅有左右翼帐下设长弓劲弩为之卫故可坐制胜先朝承平右文武臣资地积防世胄如尤世祿杜文焕亲信健儿皆祖父私财豢养而倪宠王朴之在京营士马皆选又倚借中官未尝深入赴利其他拔足行伍之中致身大将无斩断以为之威无金钱以为之用遇有敌则挺手鬪或不幸则死之耳曷足怪乎或曰左良玉与文诏俱起者也左累败复振卒致封侯何与予曰良玉拥兵观望又纵其下大掠以充军资招徕降众张形势以成跋扈要朝廷滥爵赏此岂文诏所欲同者耶自其隸马世龙麾下为军锋入秦收王嘉 歼防灯子西濠铜川桥二战手所摧破者数万花园寺疾驰中伏濒于死者防矣不知所为逗遛也过河数十战功高赏薄遭谴湔祓朝受命夕办严追贼于随州商州累昼夜不解甲不知所为怨望也生平惟定边有哗兵之变溃去二百人抚之即定部将如冯举张天禄贾呈芳赵国佐等推腹心共功名常称其师行有纪所过秋毫无犯白广恩之降也文诏令变蛟共遊处广恩见制府不肯解所佩刀制府疑欲杀之文诏曰杀广恩贼心益危且广恩才可用愿以身保之其收揽驾馭岂出良玉下哉朝廷不付以重兵多其赐予取平贼将军印佩之顾谓起自徒中立责后效制府分兵守险挈瓶口而壅之丑徒致疾于我文诏愤王诛之不加痛同事之摧败猛气坌涌遂以其属驰贼军而死夫李广北平公孙为泣贾复伤创光武大惊国家之于曹将军非徒不能加之膝也又从而摧抑之迫促之身歿之后下诏褒忠惓惓于金岭川之一捷虽复周处坟高霁云庙食于国事奚补之有曹变蛟收散卒复家仇孙策之还领父兵灌夫之直走吴壁忠勇慷慨有叔父之风文诏有弟曰文耀同收河曲阵殒忻州变蛟松山不食而死一门没于王事君子闻鼓鼙而思将帅若曹氏者可弗书乎

张大将军曰崇禎五六年曹文诏逐贼山西所向披靡因小故得罪于洪洞乡绅刘某之子刘瞻豫按劾之常勦贼太行山中豫帅良玉蜀帅玘皆防蜀兵大败文诏从山而下斩级无算时豫按在懷庆相见文诏尚未解甲恨其功为所抑语不合面叱之由是朝内操文诏短长犹以功大仅调镇大同而以勦贼付秦帅李卑贼得息肩势复横自文诏真宁阵亡变蛟能继其功

由秦而蜀由蜀而汉中商州宝鸡无处不战无处不捷至潼关原之捷而贼几尽及移办东事而贼之余烬一合而燎原岂非天哉虽时势使然当国者亦闇于计矣

绥寇纪略卷三

<史部,纪事本末类,绥寇纪略>

钦定四库全书

绥寇纪畧卷四

国子监祭酒吴伟业撰

朱阳溃

崇祯八年秋七月初五日告败疾置闻时庆阳之寇乘胜傳烽下火照西安城中临巩平凉诸贼又十四五万我师如左光先张应昌等皆遠在汉中檄徵未集曹变蛟袁文诏散卒鳩他将见兵 戏下者才二千余人不复能军承畴张疑设伏力 泾阳三原之冲裹粮决战贼见督师之不可动也乃由耀州走朝邑渡渭入华谋突潼關承畴以十五日次华州贼复由朝邑折而北奔澄城郃阳而全营混世王等声向渭城承畴昼夜驰于十七日入西安汉中诸将之兵亦至【张全昌兵自清水汧鳳已到泾阳催赴省城合勦】议众击贼奄至西安东偏我兵疲未出诘朝恐贼之东逸也先令张全昌曹变蛟僂道走渭华格其前承畴亲至红乡沟遇贼游击李效祖栢永镇力战贼始却登山陰防越關而下承畴從蓝田取山路出其背搗之二十二日贼觉遁商雒山中承畴又命张全昌赵光遠提兵三千截潼關大峪口游奕及閔乡灵寶界其耀州之贼已破澄城【澄城知县毛昂霄初任公謁上司七月十五日城防】围郃阳不下承畴还师救之始解去趋平凉邠州承畴留勦澄城凶丑兼顾商雒欲追击无兵可分上书言状朝廷加曹变蛟副总兵示激励厉军锋而令延绥总兵王承恩以五千人受号令益甘宁兵五千镇葭二千收回蜀兵九千搜卒乘补士伍以防督师之乏絕军势防于复振夫襄乐湫头虽败于中灵陝郃津尚堵于外豫楚完守贼未能越軹堵勦之局犹可得而収也而尤世威徐来朝之溃闻矣世威先守兰草之隘徐来朝守南北朱阳關为犄角朱阳關即古函谷汉武移其守于新安斥故關为 农千百年来嵌崟既辟民人之所走集百二之险荡为彝庚包原陵藪泽而为守千里连营兵法所忌谋国者莫之戒也徐来朝兵首变强令设防比贼至跳身遁一军尽亡【天津营杨明相领溃兵奔入左营徐来朝不知何往】尤世威经时暴露师大疫二十八日猝遇失利世威与防击刘肇基罗岱皆扶伤其众左次自溃【八月二十七日贼在索峪河系河南卢灵交界尤世威于二十六日带伤回卢头伤一刀面臂中箭刘肇基右臂中一刀】贼遂越卢氏奔永宁豫抚 嘿 代未谢事【八年六月初十日部覆 嘿革任 代】徵左良玉自内乡陈治邦马良文等自雒阳援卢氏维时楚抚已改卢象升【由郃抚改任】而岢嵐道宋祖舜为郃抚许成名于七月解任用秦翼明为湖广总兵郃抚以翼明之兵邀于丰阳關隘贼不得过【监军道苗祚土率川兵营副将贾一选周继先与贼在丰阳關连战又丰阳后有小径罩川口可通郃西郃抚发防击周士凤率兵六百人守之秦翼明乘夜架梁絕壑透入贼营后山连破青崖河吴家堰袁家坪三处斩一百四十九级贼始退】又转出朱阳分为十三营于灵寶号数万南光祿卿陈必谦为豫抚【必谦以六月廿六日拜豫抚命】未至按臣金光宸累疏陈危逼帝于是不忧秦而忧豫且忧江淮河北之为豫楚续也召谕户兵二部以淮抚兵二千三百杨御蕃兵千五百扼南畿要害防祖陵以董用文兵五千走彰懷倪宠兵三千牟文綬兵二千赴齐豫之交相机调遣刘泽清推福山副将未行令暂防曹濮马爌移镇颍亳陈洪范召募健丁三千防陵又以龙固關防将李重镇兵四千辽东总兵祖寬兵三千先后驰援河南念秦寇在商雒者入豫余数十万尚在泾阳三原洪承畴势不能舍秦入

豫命楚抚卢象升总理直 河南山东四川湖广等处军务用道臣于豫则戴东旻于楚则苗胙士于江北则史可法为监军其承天兵三千属巡按御史余应桂居守如秦寇尽入豫则承畴勦西北象升勦东南如贼复入秦则象升入關合讨初老 久伏商雒整齐王扫地王蝎子块后至共出關其留秦为闯王闯将二股于是知其中李自成成为特劲云【闯王西走武功扶风闯将东走富平固州其众各七万承畴兵止九千人驰赴蒲同东勦而闯王西走无兵可追官军關山一战同州再战各有斩获乃折而西闯王闯将合为一】八月初五日秦贼李自成防咸阳杀知县赵跻昌初七日张应昌左光先与战斩四百四十九级获其军师刘某李自成遁归泾阳屯醴泉之石鼓赵村别部屯七里原为淳化耀州交境十四日官军乘夜渡泾河于王桥头被贼小挫二十四日贼将高杰不得志于自成窃其妻邢氏以降防击孙可法挟以破贼【在富平马家村乘夜出奇杀贼二百】取立效为信豫抚陈必谦于二十日始受事是日豫贼攻中牟二十三日贼抵 封入其郭俄遁去攻长葛鄢城扶沟其令皆秦人能完守再攻鄢陵鄢陵故大司马梁廷栋邑里也告急趋兵援之二十六日左良玉败贼于鄢陵之张桥偏将李云程冯良文败之子彭祖店贼自鄢陵败后趋西华商水焚沈邱豫抚所遣将陈永福從鹿邑遮击贼分为二道一走项城由上蔡入江北之太和一走颍川防宿而太和之贼合之淮抚朱大典与巡按防史张任学以杨御蕃兵專防陵而令防击朱子凤援太和杨振宗援防副将刘良佐援懷遠九月初三日秦兵追贼于渭南临潼间贼退走逐之贼恃众还战承畴督麾下苦鬪大败之初六日豫贼自嵩华趋郟禹攻密县知县苗之庭败之城下李重镇顿不进事缓用解围奏捷【李重镇者司马张凤翼私人豫抚陈必谦遣之援密以五日有半行二百三十里至密围解已三日推官汤开遠促之追勦去贼营仅十里两日不动第三日发马拨八十名杀贼五人擒二人离营二十里密邑村落为空自鄢城至汝宁以六日走百八十里逗遛恒怯如此司马反谓必谦为吝赏为苛求云○帝以豫抚疏召对阁臣文震孟等议撤尤徐病溃之兵以省饷司马欲留尤徐之半豫抚令全撤徐兵而尤营仅撤病兵留千二百人以尤将刘肇基罗岱领之若津兵则闻贼便奔一查便噪徐来朝劣而贪兵月糜饷八千余金一撤而中州祸根拔矣】左良玉蹶贼于郟之神屋山贼连营数十里番休更战良玉收其卒而止赵柱被困防不脱初七日江北贼与朱子凤所领庙湾兵五百人遇于懷遠之龙岗集子凤力战死之刘良佐杨振宗能郤贼官军亦伤不利十一日豫贼于颍州南召集编筏渡淮陈永福追及之我师大克贼不得济【豫抚以颍上逼近凤泗祖陵攸系故别命永福出境二百余里堵御】是日豫贼攻信阳县官兵败之于北關及中山铺【斩三百级】百户叶正芳力战被执骂贼死二十日秦贼破扶风杀知县王国训二十一日豫贼恨密令再破之城下谋必残其城城庫而土恶攻围三昼夜令乘堙杀贼三百余人河南府监纪推官汤开遠趣左良玉自郟援之乃去【左将骑汤将步其劳与武臣同】是月豫贼自光罗趋黄安麻城自麻城趋罗田西犯蕲水楚抚卢象升以九月初九日闻总理命初以全楚主客兵一万八千人分之以三千防陵寝一千六百人守郟四千四百人备防阳光化其援随应孝感则算兵千五百人防将冯时早领之援麻黄蕲州则算兵辰兵二千人都司周元儒领之镇臣秦翼明川兵四千算兵一千驻随枣而象升自率杨世恩雷时声三千人赴光山罗田迎击十月象升至罗山再檄李重镇陈永福入楚而整齐王從信阳走孝感应山其众特盛象升命李重镇雷时声陈永福以六千人自罗信而南杨世恩邓祖禹以二千人自麻黄而西秦翼明周继先以五千人自枣随而东夹勦或告以宜急趋宛洛者象升曰贼大势在豫而前锋皆向楚吾不能舍楚而示贼以瑕也【楚按余应桂疏曰秦督新败皇上调楚算兵入秦此谓楚豫暂宁也今贼在汝汴楚疆震隣

郟之龙驹寨告急汴贼駸駸從鲁召唐汝入境抚臣屯枣随防献陵门户臣亦发郢兵出屯三里峡之松林寺香花园创设關隘扼守若遽调算兵五千则随枣不能军而臣之力孤矣】总兵张全昌降于贼初承畴遣全昌与赵光遠截大峪口也兵大器杀掠【全昌乱兵入荥泽县刼库杀人】豫抚请急援卢氏不应光遠擅归秦至是全昌值贼蝎子块等于颍之瓦店集即潰为所防胁之共攻蕲黄黄梅之贼由宿松入潜太应抚张国维檄许自强救皖操江王道直以水军为防遘安池道史可法入潜山之天堂寨穷搜捕豫贼扫地王等别自霍山趋英山分掠潜山宿松太湖英霍舒城皆陷应抚于皖属邑募土著二千人为久戍是月辽东总兵祖寬勒兵至豫豫抚陈必谦推官汤开远引之同左良玉抵灵寶官军剪贼于灵寶六十里之涧口焦村焦村即朱阳關地也【必谦书云三年以前流寇尚畏官军迺来势益强炽有伏路静聽以防袭杀有前拨倒拨左翼右翼以备防应收一壮丁即给一良马授以美妻一人逃出即杀其管队一阵退缩立置之重典故人皆为尽力死鬪】贼聯三大营待秦贼至而逞秦贼李自成在干州阵失其弟诡乞抚于监军道刘三顾三顾知其譎弗受真宁知县王家永被给见执豫贼陷卢氏知县白楹自刎死【十月二十八日】秦贼李自成为左光先击之子高陵富平间斩四百四十有奇【十月二十九日】是月秦兵于渭河南北三击贼共斩千余级秦贼闯王高迎祥自华陰南原絕大岭夜出朱阳李自成亦东走左光先追之失利曹变蛟提刀陷坚战甚力十一月朔秦贼悉其众薄豫之閩乡蓋秦贼至是凡三出朱阳關惟自成最后别股已下淮楚而张献忠等久盘踞灵寶迎祥自成与合左良玉御之灵寶东祖寬御之灵寶西不能支【祖寬兵以十一月朔晚刻入閩乡城而贼大众逾閩趋灵左良玉弃大营来灵欲与祖寬合势七十里间被贼隔防以初四日早据城外高坡为营以御之贼伏精骑沟中诱左军左持重不动遂驰骤东下左军自寅至申尚未食又与祖营隔防故不能追贼贼于是日晚從陝城破垣突入矣】初四日陝州陷【贼以初五日早出陝东去】贼东下雒汝汴皆空虚金光宸檄牟文綬之兵溯归入汴豫抚陈必谦监军道戴东旻分率左祖二军兼行救雒贼已攻雒闻兵至而去高迎祥李自成走偃师巩县张献忠走嵩汝左良玉出雒追迎祥自成【抚臣领李云程等督左军】祖寬分击献忠救汝【监军道戴东旻督祖军】十二日祖寬败贼于嵩县之九皋山【祖镇于十二日向汝州将至佛店探得贼营在葛家庄时当四更督副将祖克勇衔枚疾驰黎明遇贼祖镇身先士卒跃马砍入贼整齐王逃奔九皋山阻险不下祖乃伏二军于山沟伪退而诱之贼果以三股從山脇而下伏发大捷】十四日又与刘肇基罗岱大败贼于汝州之圪料镇【监军分巡河南道戴东旻报攻灵破陝卢之贼于十一月初五日抵永寧长水张村东旻亲督刘罗朱李官兵与之相持数日于苏羊斩二十八级○刘罗二将自苏羊败贼后再赴汝州贼果至汝为二将击回而祖军适至于是刘罗击贼之后祖兵击贼之前圪料镇在杨家楼地方一名姑家厢十六日委官勘验贼尸山积约长二十余里北至杨家楼南至樊家坪东至灵官庙西至李家楼除已经割级九百一十有二未上首功者七百四十有三】先后击斩一千四十七级俘八十四人中朝以汝西之捷为战功第一献忠愤辽兵之再胜也纠合迎祥自成等声攻雒阳报圪料之役以二十日与祖寬遇于龙门白沙设为数军以牵綴前行伏起冲我师为二寬身自防后鬪士无不一当百自晨接战至夜半卒大克之而左营别将有宜阳黄涧口之捷左虽不在行其指踪力也卢象升见楚氛小定闻汝雒急倍道而前歷郟襄宛叶驰千四百里以二十五日入汝命李重镇雷时声于城西三十里连战二日飞矢殪贼千余人斩一百七十七级【十三营大贼有精骑五六千四山贼有五万其日狂风大作尘叫噪官军植立不动用炮攻打马丁施长弓劲弩直前朴击战正酣内丁都司米文进從

贼中冲杀而入赍汝州知州伏见龙所运粮糒至士饱益奋贼死不下千余】盖秦督自亡曹艾二将张全昌叛张外嘉为其下所杀【陝按钱守廉疏报防击李建功尅减各军盐菜银两以致军变建功逃而外嘉以主将被杀】王承恩以十月從延绥至【十月十四承恩以兵至西安三原县】亦未肯效命威望稍损理臣新受事为天子诛不服有清中原之心其在汝也驭羣帅甚有纪以杨世恩雷时声兵合之祖寬营罗岱赵柱兵合之左良玉营而刘肇基朱三才兵汰不用罢周继先举邓圯所遗蜀卒 之他将秦翼明用逗挠被纠责后效【象升曰秦翼明疏请援郧臣壮其志既而寇突丰阳有功及闻曹文诏阵亡尤世威挫衄遂谈虎色变事事观望不前左良玉近来怯战以视翼明则彼犹然乌获孟贲也但其性行纯谨尚可鞭防后效余应桂疏曰秦翼明击蝎子块则不前援猷陵则后至十月十六日以后一战于蔡阳铺算将刘九思败之丧卒二百再战于唐县镇部将孙振武周继先之兵复溃镇臣皆不以实闻比之旧帅许成名更为不及】军令一变所至辄有功十二月高迎祥李自成從鲁叶窥光固初九日陷光州之南城十六日象升次信阳寻败迎祥自成于确山斩五百六十四级【确山之捷祖寬功也余应桂疏曰理臣卢象升与闯王相遇既败之于汝州又败之于确山贼距楚已遠而后来之大贼又复自桐栢唐县而逼于随州】九年丙子正月先是帝以寇未平斋居武英殿素服减膳撤乐象升率诸臣于元旦表称臣等暴师经年不能摧殄凶丑貽君父宵旰忧罪万死总督臣朱燮元臣洪承畴臣朱大典抚治臣张国维臣陈必谦臣李懋芳臣甘学濶臣吴甡臣王维章臣宋祖舜请大驾还宫御常服尝法膳臣等誓捐躯命为效帝优诏答焉象升又自为奏【疏畧曰贼横而后调兵贼多而后增兵无人不落后局兵至而后议饷兵集而后请饷时时寓有危形况请未必敷致卒从贼而将为寇是八年来络绎而请之兵反树贼党积累而用之饷适资盗粮也】极言督理宜有專兵有專饷请调咸宁甘固之兵属督薊辽關寧之兵属理【山林奔窜骑兵不善扳缘再调川算滇黔兵便习险阻者一二万佐骑兵所不及】每月需饷银各一十三万而聽承畴辞三邊象升辞全楚所在抚臣不得以一方有贼辄求调援分督理之兵饷【各省直抚臣俱有封疆重任一处有贼一处求援一处需兵一处求调不应便成吴越分应何以支持夫粉饰太平尚可调停迁就用兵勦贼岂容委曲那移】台諫毋從中苛求俾臣等不能專心办贼【不问事之难易不顾人之死生一味求全责备在识力不坚者必致因人以自馁不肯向前即清白自矢者亦且避忌而灰心從何展布又云中外勿惜浩费有司毋憚苦难各省直毋吝饷金诸绅士勿事横议大家齐心合力效顺除凶待贼悔祸乞降再议散遣安插然后轻徭薄赋卹死吊生保固元气此则勦荡之大局也】臣与督臣有勦法无堵法有战法无守法其言切中事宜论者韪之【因粮输饷实自象升之疏发之以报国大计不得已出此故中外皆服】诏起左通政王梦尹为楚抚如理臣指十七日李自成攻庐州太守吴大朴知合肥县熊文举坚守贼不得下南枢臣范景文遣池河提督杜 域【大将文焕子】往救二十四日围解李自成连陷含山和州和大州也贼以数万骑仰攻夜半怪风作城上火尽灭守陴者不能立贼乘以入知州黎 业州人御史马如蛟教官康正諫运判马如虬生员马如虹皆死操江临淮侯李 济遣其将薛有年援和以迟发贼已破和而北有年中道失势遂败谍者云贼将据浦口江浦二邑以谋渡江职方郎钱位坤趣战都司汪之斌以七百骑与贼鬪神机营都司徐元亨先军滁州闻之斌急移营救之元亨战歿之斌负重创贼围江浦应抚发其将蒋若来助知县李维越缮守贼登若来防诸城上又縋而下与之角矢着其颊左臂伤裹而还战贼已退复来更与陈于王同捍蔽攻围九昼夜疾鬪得无陷李自成围滁州连营百余里尽銳攻城将穴西北门而上【贼之攻滁州也城头火礮交发夺其云

梯焚之贼死无算贼掠村落妇女数百裸而淫之已尽防其头环向堞植跣倒埋露下私以厌诸礮城上燃礮迸裂或暗不鸣城中遑遽太仆寺卿李觉斯命取民间回鹘亦数百枚如其数悬堞外向以厌胜之燃礮始发贼乃大创】卢象升在西沙河闻警遣祖宽罗岱祖克勇乘夜疾驰平明抵滁贼分其骑来战两军相击日出至晡时贼始北我兵徙城东五里杀至關山之朱龙桥横尸枕藉水为填咽不流象升自引杨世恩之兵徙定遠至躬援枹鼓大呼直前搏贼【时淮抚朱大典亦引其兵至】贼披靡斩级六百七十有八夺获马骡无算【其奔蹂而死未割级者自城东至朱龙桥關山查验一千二十有四其没溺濠堑者不在数中】守滁太仆寺卿李觉斯知州刘大巩 城门劳军其下譟呼曰我徒更生微救至者殆矣贼北走凤阳礮却之十二日焚正阳镇过河攻壽州不能破【邑绅御史方震儒捍御之力】懷宁无城残之漕抚朱大典以刘良佐苗有升等战防城之陈搏桥所杀伤相当余骑奔颍霍或趋萧碭掠灵璧虹县窥曹单刘泽清防河不能渡贼走考城仪封而西其大贼走亳【亳州知州叶景先同守备查应才二十日有卢家庙之捷】复折入归德永宁豫抚陈必谦檄总兵祖大乐壁于归德要之先是祖宽滁州一捷大乐自恨勿如其麾下吴竄二将者偏师挫贼于白龙庙大乐怒其贪小获为己功骂曰竖子不报我待大军至而覆取之耶我无所用汝叱使去二将大恚走数十里道逢监军【监军道王继谟】诉曰我何罪监军顾左右 豆秣其马慰曰贼旦至 大军战僂而助为击帅必喜有功何虑不见礼如初二将悟揖而去徐驱至龙山之谷熟集遇大乐与贼战大胜【谷熟集之胜为十九日】追来二将以其属逢迎急击贼号呼走曰何处来此铁帽子军六家大寇漏刃破胆竟全开归焉二十七日贼走汴梁陈永福徙归德秣马驰一百四十里及朱仙镇过河日天大风贼不虞官军至蹙之武穆庙中砍一银甲贼或云闯王非也二月初二日贼攻密县不利走登封初八日王进忠周维墉败之于登封郾城镇贼走石阳關与伊嵩之贼合故总兵汤九州徙军自效以千二百人由嵩县深入败歿【左良玉徙宜赴嵩与九州有夹勦之势不意良玉中道遄归九州以孤军杀贼大胜穷追四十余里悞入深崖贼数万据险攻围九州见势不敌乘黑移营为贼所乘以败】贼一走裕州一走南阳知南阳市何腾蛟设守有方畧必谦骤两昼夜以十六日至南阳贼在安皋山下腾蛟具糗粮必谦中夜击鼓起陈永福陈治邦于帐中銜枚傳贼垒收禽挟囚还而象升由叶向裕祖宽祖大乐罗岱等大战于七顶山殲李自成精锐几尽【闯贼精锐马贼七八千在滁州朱龙桥渰死杀死者二千又以登封朱仙镇杨家桥七顶山连败死逃畧尽以去冬攻光州时气焰比之江北折入豫中强弱大不相侔理臣力也】十九日象升至南阳誓众曰我逐贼至此诸君努力无令得逸命祖大乐趋唐县新野备汝宁祖宽趋光化备邓抚臣提亲军绕出镇平而已建大将旗鼓由正道期至邓州进取使人告于襄阳曰贼疲矣东西拦截前阻汉江可一战擒也楚抚梦尹郧抚祖舜慢弗应汉以南无一兵阵而待者贼于三月徙光化之羊皮滩渡矣【郧兵三千祖舜以五百戍南阳又有张大节田景壽川箠之兵一千四百人而不能御】贼虽入郧襄其在内淅山中者大小共七营尚二三万象升移军搜讨骑兵利野战不利阻隘率之入山骄不用命祖大乐之兵强于祖宽其人稍恭谨两家所部皆缘邊铁骑又养曳落河为摧锋虓阚而狼戾二将常倚以立功宽部五百人方过河噪而逸其在大乐军者一千二百饮食嗜欲不与中土同非可以法令使也往者官军多秦人临阵以乡旧相劳苦抛生口弃军重即纵之去邊兵不通语言交手即杀然所过熟庐舍淫妇女恃功不戢又见贼逡窜淹旬朔未可定自以为客将无持久心【将吏俱买香扇作亲识人事全无杀贼意】象升谕以朱龙桥谷熟集之胜宜勉竟大功始俛而聽令进至党子口仍按甲不动与素恇怯之李重镇同跼蹐思归

四月朔王进忠一军晔于三峡口罗岱刘肇基之兵多逃追之则弯弓内向【因祖氏罗兵被汝阳上蔡官兵斩获防尽刘兵被河北道发炮打沉一船因此少定然诸军生心防成不测】象升上言入山搜捕之难豫楚大山绵亘密箐深林马不能进贼抵突榛莽出没无端我兵攀木逾崖日行三四十里车驴不能馈饷人负米二斗踵兵而往十日粮尽遇贼胜负未可知以千兵入需千人运万兵入需万人运过期则兵夫同归于尽矣可出臣章与有识防之【兵部议浙川通郧襄江口恐透贩济贼宜禁絶运船豫抚驰书总理乞檄楚中通运但禁私贩龙驹寨南华不宜并禁浙川絶官兵咽喉也】帝初闻中州累捷甚悦既知祖军杀良抄夺诸部帝怒下玺书镌责曰即如是贼何由得平枢部以豫士大夫苦客兵也乞练乡兵代之天子下其议象升曰贼皆百鬪边兵骁悍仅能克之宛雒萧条若用土团即贩区病坊佣保小儿耳毋乃貽贼嗤靳乎苟求其便祇应充拓主兵募壮丁买马费百亿以上從何出其說遂沮不行豫饒奏请日急属城残敝旱蝗少谷以思归之众牢廩不给持矛相诟厉譌言匆匆在事者外忧寇内忧兵不得已建祖寬李重镇入關讨贼之防蓋资秦饒安邊兵非中州杀贼本指也乃承畴亦以为请其六月十一日疏曰贼之在秦者闯将可三四万过天星满天星可三万混天星可二万臣见统马步官军合之川兵无虑二万人【承畴以正月在临潼渭华将入秦大贼老

闯塌天蝎子块等屡次勦杀俱從峪口遁逃乃定计專勦闯将等】臣以今年二月追闯将混天星二贼起澄城歷韩邵过宜雒循鄜延入环庆涉宁夏固原界杨武乎海喇都西安州隃香山一日数合鏖看透山下所捕斩卤获已累疏报闻其过天星满天星伏合水真宁山中潜出高陵三原焚掠臣在万安监闻之回军南下而于混闯则分命诸将蹙之混贼狼狈逃于萌城至延绥再与闯合过天星满天星【在西安以假抚肆抢】臣追及之于中部破之四贼遂纠结西奔谋犯兰州河州臣檄左光先与甘肃总兵柳绍宗并力于干盐池大挫其众贼怖懼乞降抚臣甘学濶监军道臣刘三顾因加慰纳延绥贼藪同恶胶互通逃归之者首尾不絕臣固防其必变续被四月二十八日诏书允枢臣奏命职方员外郎包凤起颁告赦令贼犹不悛放兵自如今且以叛告矣此未出關之贼官兵得失之大畧也若闯王闯塌天蝎子块等自江北河南败后经郧襄以趋兴安汉中臣遠在西陲声援不接【承畴时在同官】以五月五日选趨敢三千三百人授之柳绍宗由畧阳赴救【自同官耀州前往武功鳳翔寶鸡凤县徽州驰赴畧阳汉中夹勦又发兵一千余名飞驰徽州畧阳兵图扼勦】此十数万贼亦非三千官军所能扫灭而老 整齐王等见在永宁卢氏山中【贼在秦之商南雒南山中约一二万欲从商雒透出蓝田西安虽有川兵五千扼险道岐多裸防勦为难】臣所备者多分額兵歲有折耗不能分支军以往计理臣忧邊兵入山道险乏食而楚疆卑湿即调遣亦违所长惟關中平原旷野此用骑之地關宁兵虽疲余勇可鼓愿以祖李二将受臣节制与理臣合力办贼惟明诏博諮公卿以时聽许当是时贼大势尽归秦闯王高迎祥荡拆汉南自冬徂夏道臣樊一蘅【一蘅调监军】守备唐通【通调守大同】以迁调行天雨壞城瑞藩几不守李自成踞南山险隘穿商雒间走延西官军败绩于罗家山死亡甚多自成谋于绥德渡河入晋为定邊副将张天礼所持不果延绥总兵俞冲霄徂于高粱之捷五月十四日以三千人战安定中贼伏以殪延抚高斗光不能救镇兵精銳殲焉过天星之叛也侵绥德袭安定执华亭令郭养民夺其印释之谋入山西渭河水涨不能渡登黄鹿山乘高叫噪声振通谷距岩關不百里承畴以追贼东还于五月二十八日出關与象升防而定议既同拜表不及俟报用便宜先遣祖寬李重镇二将随秦督西行而象升计豫楚诸将惟左良玉差强其众率中州人故独得久留寔亦骄怙难用因以孔道兴代其偏将赵柱令驻灵寶防雒西左良玉与罗岱驻宜永防雒东

祖大乐未行分其军驻雒汝就饷并遏内浙逗出嵩卢之贼而用陈永福守吴村钱继功守白亭周维墉守花园關以專备内浙部分定而襄阳告警矣贼之由羊皮滩过也汉江春浅均州之沙陀营郢之舞阳河陝西之洵阳白河偷渡均州宜城谷城上津环山皆贼竹山知县黄应鹏竹溪知县魏镇安郢西知县刘伯元各遁秦翼明以步卒逐贼于南漳深入山中转战浹旬不能一大创均州土寇为向导焚武当太和宫防于襄阳楚抚王梦尹不能制象升议入楚防勦进军雒阳待发其内浙搜勦專委之豫抚陈必谦六月混十万等從山中直薄浙川【此时黄河吴村尖角梳洗楼黄里瓦屋半川巡检司板桥一带俱贼屯聚以传炮为号一股由花园關犯内乡一股由板桥一股由黄河竟犯浙境】陈永福以初九日苏家沟大战十八日袭之于關峪【混十万老 并新来整齐王等十家逆贼自苏家沟大战后尽移江南依山为势据水作险自东西關峪住起直至郢阳地方亘长百里○贼在關峪高山歇凉我兵暗渡都司钱继功等从西山口进防将江慄等從东山口进时直二更两路齐上贼夺路坠崖败走南山去讫】二十四日袭之于清泉山【贼因人多粮少徙东南就食潜聚白亭清泉山永福由鸟道暗绕清泉山谷左右藏匿夜深袭之贼惊遂防营分三股往东南而下】明日又破之于兴化寺【贼一由江北张壑店一由西北种子坪一由江南朱家扁来犯内浙三鼓俱到兴化寺前永福分其军为四路邀之從中截防伏兵齐出贼死战自夜至二十六日午时首尾不能相顾逃入东南深山樵谷一带】贼既不得志于内浙畏象升驻党子口不敢东下天雨粮絕于淤村缚筏谋再渡汉江为永福所觉击之半济遂遁入山中【贼混十万不沾泥黑虎摇天动张妙手老 等营于淤村黎明半渡我兵伏发贼一半仍奔回东南大山一半入东北山内○窥浙之贼系老 混十万等七营众三万陈永福以二千饥疲之卒与之争冲四十余日副将王进忠防击周维墉坐守内乡廩饷数万去浙川百里而近畧不应援】七月初六日象升提兵入襄阳贼闻之從浙川以犯汝雒内地八月豫抚必谦以初四日移军唐泌舞阳撤左良玉陈永福兵從汝裕反顾根本防象升因京师有急入援初六日由泌阳转趋确山冲西平口而出汝宁赖以无患【贼苗头已 舞阳去汝宁之西遂咫尺以此遂折而并奔许鄆东北汝宁得无恙】良玉永福兵寻抵汴梁大贼仍遁登密其道舞阳者为杨四所败杨四者舞阳土寇也与确山之郭三海为党其部最强大梁道中军尹先民招之劝以杀贼自赎北吴渡之役杀贼至二千余人然其心未可信也【舞阳杨四据九曲而泌阳人郭三海据平头垛在遂平确山交境遂平侯驭民秦至刚与之合至刚结营槎枒山顶与三海贼巢相通他若舞阳间之张显明裕州之张五鲁山之何孟魁等皆踞险为坞壁拥众以万计杨四狡且强逐莊 粮遍地勾丁图大举以鄆城有河为之阻乃与羣贼会谋槎枒山期先取鄆城鄆城知县李振声与大梁道陈睿谟所遣中军尹先民合兵夹勦七战七捷杨四乃以七月二十九日乞降侯驭民以遂平县乡兵西平千总刘洪起等各有斩获脱身遁泌阳知县李蕃长于七月二十一日至二十九日合确山西平汝阳之兵围秦至刚于槎枒山至刚降郭三海不至至刚以为其侄郭镛所阻乃先取镛首以献侯驭民逃至上蔡以八月初四日自缚而郭三海亦于十一日挈其兵二千人归命先民說杨四以杀贼自赎八月初六日流贼至舞阳之北吴渡杨四夜发兵大杀一阵遣陈百谷持首级三百献功口称杀贼二千余人是役也先民之功居多云○泌阳生员樊以屏散财募乡兵逐贼颇有功浙川生员李宗理亦以乡兵会同都司钱继功在小水河逐贼时长葛鄆城密县叶县诸令皆有杀贼威名】左良玉以二十八日杀贼于登封之唐莊【唐莊官兵深入自辰至申鏖战百十余阵贼從大小金店西奔一越北山向巩境奔去】九月尹先民以初三日败贼于郟县之神道街陈永福以十四日由神道街之野猪峪进明日

大败之于高家坡扫地王授首孔道兴以十七日于叶县之独树单骑提刀逐贼【贼在郟县神道山野猪峪败后渡河越涧由鲁竇走叶县官军以十五日從郟县襄城驰赴叶县绕出贼前十六日抵叶闻贼在旧县三更乘月色行三十里前渡湍水往旧县进发贼已防营南走十七日辰时追及于离叶县八十里之独树败之收兵暂歇裕州】唐河后坡两战亦先登【唐河即唐县河也十八日贼從泌阳之绕凉店遇唐县孔道兴与李守业刘承训等渡河追击后坡为邓州地二十日贼在邓之九重鄢官军至已遁去乃追至后坡周家寨胜之】左良玉以十九日败贼于田家营斩获颇众【田家营在唐县之间左军于二十日越岭渡河至田家营宋家营大有斩获追至倪家冈收军○左良玉败贼于大石桥罗岱车登科败贼混十万于罗汉山又渡河追击皆系唐河勦败之贼】自九月来各营斩级一千有奇而秦中新至蛤蜊圆一股与混十万合营谋引荆州闯塌天等北渡大逞【贼以八月朔内犯为老混十万整齐王张四天王共四大营附以扫地王瓦背王兴世王等三小营共为七营今张四一营为杨四斩杀几尽扫地王死惟混十万马上精贼多整齐王次之老多权谄羣寇奉为谋主因屡败愤而杀其管队四人退入内浙谋掠鄢阳上流江船渡鄢襄大寇过北岸并力下山大战】我兵如祖寬李重镇入秦非其本意寻与祖大乐皆以入卫撤回即陈永福为豫主兵其选骑半抽以勤王【营中壮士好马随其子陈德赴总理标下勤王】奏请功次辄为部议所格【陈永福南召集之捷遏贼不过淮河保祖陵朱仙镇之捷保梁宋南阳安皋一捷保宛】有心举止自擅于抚臣不相承禀而杨四郭三海等伏莽叵测事同养虎必谦惧且愤上书疾陈曰臣区区一身内无同心之助外无片甲之援九年新饷不许动支内库折色地亩均输尽归督理臣提军所过郡县不能供顿叩头请士马无淹久三军为之气索事势如此臣能伸两臂捍贼耶【八月初四日帝念勦寇官军离家日久地方荒凉衣食栖止必多缺乏失所况天气渐寒深可軫念着兵部发帑金三万两忠勇营差官分解督抚军前量兵数酌行犒赏】未几必谦为巡按御史杨绳武所劾【老张四伪乞抚于内乡知县艾毓初遣其党曹星文入见豫抚求安插于壕碛石澠池一带必谦谬许之俟兵集而后合击初不以为信也副将王进忠者收贼武成文为心腹成文侄与婿俱在贼营贼一条龙因成文以抚诱进忠入贼营而杀之巡按杨绳武以轻抚必谦而罢○必谦奉防解任回籍在九年十月十二日】与鄢抚祖舜皆以不称罢用兵部左侍郎王家祯湖广右政监军道苗祚土代之自象升归朝關兵回镇贼亦大举入秦中原不以殄寇为事廷臣屡以为言帝念总理难其人顾视诸大吏无可属惟家祯初仗钺疵瑕未露即令豫抚摄焉

外史氏曰以余所闻洪承畴貌不逾中人苦身勤职每军行顿舍未尝蓐寝中夜治文书张灯达曙温卹士卒问所疾苦水干饭与下共之得秦人之心尝仓卒裹粮弗及贷之于民民争投釜钟为满有一老妇蹙蹙不前仆于道问之曰我为洪军门送干糲来也象升生长江南特以气闻负胆决便弓马临阵用麾幢自随旁睨他骑距跃辄上夺其刀便以击贼好轻身独将所亲信弃大营趋利自其守大名跳躯临洺關濒于死者数矣此两人虽儒生苟获尽其用岂出威宁新建下哉中枢责承畴以分兵曰督师兵七万三千以三万人分豫楚隘口而尤世威徐来朝以之溃逃以二万人分三秦各郡而曹文诏艾万年以之败衄固也今使承畴不分兵不守险此七万人皆帅以自從将中原不瓦注乎各抚不束手乎秦地之险遠者不甌脱弃之乎即不然豫楚诸路撤防尽以壁于朱阳關兰草隘而灵永以南鄢津以北其何以禁贼之无防出也承畴曰豫楚堵于外秦兵勦于内象升曰臣与督臣有勦而无堵有战而无守两人

公忠一体顾其持论不同何也曰督理空名辖五省就各抚之兵以为兵各抚之饷以为饷势不得不就各抚之兵饷以为堵为守此岂承畴杀贼之本指哉襄平湫头败朱阳關潰在阌外未尝指授乖方而筦枢者貽之误也兵食大计檣梧奏请不思暂费永寧徒云用少击众置人死地而不助以实力及其形见势拙天下晓然知空拳不可撩虎一掌难以堙河即当宁亦推寻失防拊几恨之象升乘其间得以呕心肺抒愤懣犹不敢显言亦曰臣等止知一战已耳语有之后起者借也而首事者时也在承畴可以为而不敢言象升则可以言而为之已无及然象升能言之亦未能尽行之也各抚以疆事为首鼠言路以庙筭为蝸蟻此曰督理何不援彼曰督理何不战主豫者曰救汝雒主江北者曰救安庐主楚者曰救德黄随枣史称周亚夫下七国请以梁委之孝王太后爱子守便宜不救今贼攻一亭陷一堡剽掠用事者乡里则哗然從之彼亦家在围中忧念妻孥耳尚复知有国事乎董用文牟文綬之防河也马爌倪宠杨御蕃之防陵也志在便文自营巧违节度邊将如李重镇蜀将如秦翼明选懦逗挠防之不前左良玉拊循延揽诸将潰卒多归之者有驾馭才然为人深沉持两端无意殲贼求其伉健有气挺身便鬪惟有祖家军耳汝南归德二捷中原祸患少纾谁之力乎其部卒虽为百姓所苦亦为强寇所畏朝廷若加封侯之赏大示鼓舞而后以军令齐之拙伸颠倒士气自振今赏既淹月罚又逾时人言既入譙让相属彼见吾血战之勲仅与坐甲观望者伍怙功失意渐乖本图无复向时杀贼之志矣陈必谦之屡捷也以随理臣然委任陈永福亦其知人之力中枢以为党人异己于必谦奏请将吏功状多被寝遏而又与羊皮滩縱贼南渡之郅抚同致其罚即疆吏将安所劝焉方事之殷独承畴象升可倚承畴八载驰驱疾呼将伯始得象升之助冀左提右挈相与戮力成功象升一歲中初分全楚继受專征将士羸调习而又移之于云中九原南北东西不遑奔命是犹顏闔相东野子之御马足已惫而鞭答不止求其无破轅而折轴不可得也诗曰终其永懷又窘陰雨其车既载乃弃尔辅载输尔载母乃类是乎嗟乎当寇患交切国家犹急任人哉

附纪

卢象升疏曰州县库藏如洗折色万难措处本色颗粒无资勦兵所至率多闭门坚守惟以身聽 拏臣以功令责之则曰饷银原无欸项從何设处凡勦寇用兵之地即兵荒应免之地偶有一二完邑所输无防不足以供防兵况勦兵乎贼行甚速且无定向穷兵力以追之尚虞不及今支领刍即吏随手立办定稽半日之程稍迟一日再迟二日断无及贼之理矣据台省动以尾击责臣等持论非不甚善但均一勦也有追之者必更有一二重兵或堵之或扼之始无潰决之患若前无堵者旁无扼者止赖一追即有缩地之法遠出其前而贼巧于避兵转身他向仍然尾贼也即欲不尾不可得也嗟乎廷臣多不知兵好为大言以诃责在事即此尾击一语亦既章满公车秦督充耳置之卢公拄颊与辨赵充国云兵者国之大事当为后法老臣不惜为主上别白言之卢公意在与国非为身也不则滁州之捷方闻何不侈言威灵而反陈尾击之非过大臣告主夫岂不以其其实哉卢象升荐侯 文疏曰原任高平知县侯 文以守制道阻侨寓襄阳见臣叱馭郢疆遂投袂而起散私财以募死士介马從征臣欲昌言其功彼辄长揖告去臣比叨总理 文大义防免意气凜然因言及中原步兵不能追贼臣思得滇黔之人用之 文愿以孤身奔走万里为臣奉檄往募有臣如此敢不闻于主上乎帝從其请命为监纪已而卢公移任宣云 文率所募兵重茧至楚为后事者所陷以驿骚上闻有防即讯公

不胜愤懣上书曰 文破家为主捐躯杀贼身罹法网臣窃痛焉臣初闻 文谴问即遗书责之其报臣初不及已事惟以滇兵莫为绥辑兼乏饷为虞身虽对簿义切封疆懷忠报国之气可槩從而抑没之乎今羣臣欲以误用 文罪臣推其意且有故激滇兵之变以甚 文罪者总之臣不请 文为监纪必不至此此臣误 文 文不误臣也卢公名知人幕府初 文为首且踪迹竒引救切非苟然者未几督师死王事 文于十四年论戍予痛夫防夫沮抑异才不用又重督师之能得士于阩外也故表而出之

绥寇纪畧卷四

钦定四库全书

绥寇纪畧卷五

国子监祭酒吴伟业撰

黑水擒

当卢象升之移宣云也其与洪承畴同杀贼者又得孙傅庭云傅庭代州振武卫人长身七尺二寸魁塞沉毅多大畧秦抚甘学濶駮不解事贼至不遣兵手记下都虞 缚治左右给以亲往则缓服盛輿從逐之薄暮宿一堡闻人马声其下将弃之去前驱传曰督师来相见愕眙告以贼难扼辄怖急还走登城门以瓴壁谨录钥牡不敢张目视贼秦士大夫哗于朝九年三月罢学濶推用傅庭往傅庭泣秦严徵发期防一用军兴法秦人爱之不如承畴然其才自足办贼【豫抚陈必谦与人书云秦抚孙白谷初入關即发兵 寇二千之众败歿千余此总理亲为必谦言之九月二十八日提兵三千入山勦寇全军覆没此必谦差官王衍范在彼所亲见此二事必有所据留以备攷○秦抚有标兵三千向從勦饷拨 傅庭在事亲出屯课银十四万两以充其费故十年后秦标兵饷不复關支于大农此与楚按臣余应桂自捐赎鍰十万两养兵以防猷陵皆所谓实心任事之人也】闯王高迎祥已陷汉中之石泉由陈仓子午出将關西安傅庭以七月二十日战于盤屋之黑水峪当阵生得迎祥及其领哨黄龙伪总管刘哲三人檻车胶致京师膊之于市【杨嗣昌疏曰以贼攻贼今人人言之而亦有行之者文如孙傅庭武如左良玉是也良玉招降贼数十万而与傅庭相提并论蓋秦抚推心置贼腹中能收其用不比他抚云】初兵科都给事中常自裕称贼渠九十人闯王为最强其下多降丁甲仗精整步伍不乱非他鼠窃比宜合天下之力悬重购必得其首第获闯余贼不足平傅庭凭国威灵俘以献余党复推其弟迎恩为长后败入他贼中而秦人或云贼在黑水峪遇大雨野无所掠十万余众半僵饿高迎祥病瘡卧石穴中一女子指之曰此闯王也遂擒之呜呼秦中野如赭民饥贼亦饥其羸困无惑耳曾谓百万之寇左右无寸刃义手萎股以就执者此媚功之言何足信哉【御史党崇雅疏云臣县寶鸡为蜀汉咽喉遭寇十余次九年春西平县失利堡塞及各關荡无余】苗胙土之始受事也贼入其郛者七营营万人襄阳樵汲道絕贼将张某某者犄而肥多智数七月十二日豎五丈木于郊之江神庙系尺书其杪以示城中曰吾欲见军门口画便事胙土大喜命两将延迎入盛供帳以飧之從贼皆霑醉期以八月定降乃命郡通守祝锡范一經歷一主簿 其壁贼倨甚坐而受书留不遣为漫谢曰若治浮梁于汉上俾我全军济而后议之可也胙土犹几幸其真开城门为互市贼阳阳出入贸易守者莫敢讥宜城令撤弓刀礮石藏诸库曰无令贼疑我襄阳总兵秦翼明自言以二千余骑与闯塌天等贼十万战于丰阳于界山于均州于官山于观音關于丽阳于七星店真武山大小数十鬪虽未尝败北贼益强终不能破【翼明报贼八大王從均州入老 從新野入蝎子块從唐县入二十余股之贼不下二十余万】理臣以楚士大夫史可镜等言其高卧汴梁置全楚度外有防切责乃遣兵救襄阳大战于牌楼阁亦不能一创贼也楚按臣余应桂疏纠翼明今水潦将涸不时进兵势且縱贼北渡贼果于十一月從罗汉滩填土过江矣始翼明谋于汉江浅处设防以李同阳刘大归之五百人守庙滩幸无事贼竟于罗汉滩深处渡知浅有防而深无备也苗胙土罢以陝西右布政陈良训代之命王威为延绥总兵雷火火其城楼镇人大惧汉中贼破

褒城【汉中霖雨田禾没城垣圯道臣刘宇阳且筑且防工未毕贼至十月十三日二更袭破褒城】瑞藩乞师于蜀蜀帅侯良柱救之【礼部侍郎刘宇亮乃宇阳之弟以入都道遇侯帅勉以大义良柱乃命防击侯应辅都司刘贵率兵一千四百五十人宇亮督之以救汉中】十二月二十三日总理王家祯家丁三百人大噪烧汴梁西關掠黑尾营杀五十余人家祯夜归急登城 谕之遍加赏赐俾往南阳勦土寇杨四始定十年丁丑春正月辛丑朔日食免朝贺丙午贼老 等趋江北时海内羣贼混天星侵軼商雒李自成盘踞西安过天星鸱张汧陇独行狼蠋动汉南蝎子块雄视河西与西羌作约而老 等久占郧襄休粮息马秋高足食以其全军合曹操闯塌天诸贼可二十万长驱沿流东下蕲黄六合懷宁望江江浦在在震扰烽火及于仪扬枢臣以江淮天下要地陪京神灵宫阙之防而凤泗比丰沛有陵寝至重京口綰漕挽 仪綰盐纲计吴兵二千新调浙兵三千芜湖召募二千牟文綬兵二千凤应二抚标兵率不满二千操江水兵南枢标兵皆羸敝无步伍凤陵泗陵孝陵周庐设卒合之无过数千而总理王家祯専任折冲其兵亦不满万未覩制胜之道不得已请以留都防御责之南枢臣范景文江防责之操江都御史王道直临淮侯李 济孝陵责之南和伯方一元凤陵责之总兵杨御蕃泗陵责之颍州道而淮抚分标兵协守史可法郑二阳杜 域许自强桂本枝马爌各整所部军互防援江抚扼九江浙抚防独松应抚分其兵守京口其处分非不严且密亦可谓之急矣安池道史可法提兵营太湖城外以身当贼冲【九年十二月二十九日史可法抵太湖扎营城外】贼徙间道突至石碑镇三十日前锋哨大石矶距安庆二十里巡按张煊告急安庆为应抚张国维分地而江北之浦口六合亦其所辖贼本分两路来犯徙楚来者由黄梅入潜山太湖以逼皖桐徙豫来者由光固入定遠滁州以闕浦六国维先发川沙寶山刘河吴淞诸营兵令张载赓张天广率以赴皖至是下流警急江浦知县李维樾六合知县郑同 缮守国维提新募兵二千人命永生洲副将程龙中军守备蒋若来陈于王统之以分戍两邑而安庆石碑之报亦至贼在白兔河修攻具谋必取桐城知县陈尔铭守御甚力 将潘可大救之贼徙舒城去而复来连营百里国维以道回遠不及请济师权宜分六合守兵合之芜湖新旅【分 守六合张人杰王定遠所将四百人徙监军推官李芳华之请调芜湖新募壮丁四百人】聊往应然无益也南枢臣范景文谍贼以正月二十四日奄至滁州朱龙桥出岱山道藕塘直奔池河【此由河南光固南突之贼非石碑犯桐皖之楚贼也】设醺太山寺荐亡大江山小江山皇甫山常山所在皆贼二十八日徙尾埠哨至大树街走易家集三十日壁全椒之西门谋东窥二月贼畧绳絙取竹木声言缚筏渡江陵京大震景文先期以池浦为兵部屯储地遣提督杜 域以新营兵屯江外而金立功阎雄邊丁佐之其都城居重大计有神威营三千守红墙内外屯于大教場陆营兵一千防大奎門五顆松近郊之守粗完舟师则龙江關以水操营驻焉【江防系操臣职掌新江营则兵部所辖勋臣提督三营水军景文再以水操营佐之】景文下士喜奇计坐客多谭兵顾临事无所用高皇帝所置五营四十八卫仅存尺籍成祖江营战船亦久废景文慨然思整饬谋于南计臣钱春春曰留储出者四十七万入才二十三万军士时虑呼庚癸遑复故额乎景文叹息而止临淮侯前以援和事与景文相失勲臣多羸疏贼急谩为大言灯盞沟二里沟覆舟山咸有布置又自称以舟师逆于老州头枞阳镇【正月十四日贼至枞阳镇焚官仓漕米桐城县所输也】然都未见一贼江以北淮抚朱大典以防陵故多宿兵亦屡有挫衄独其将刘良佐号骁果善战有诏令大典与理臣合击而撤中州左良玉徐州马爌之军救皖正月二十日爌败贼于桐城之罗唱河三十日刘良佐战于大安集二月四日战于庐州二十里舖七日战于六安州之茅墩【初六日监军同知杨

正莰督防击杨振宗都司张士仪陆宗美守备袁思有陶城镇之战初八日杨正莰有沙河之战】左良玉勦南阳土寇杨四侯馭民郭三海皆授首率师抵六安与贼遇部将罗岱孔道兴乘胜疾击初五日初八日比战皆大破贼十一日贼走霍山深入潜山之天堂古寨【潜山知县朱家相与贼战被执縋楼逃免】其滁和之贼亦西遁【二月初三日向黄山巢县仍归旧路】陪京解严江北之警少息是月也秦抚孙傅庭报蓝田兵变傅庭黑水峪捷后再破贼于渭南豫贼誓不敢西向又破贼于咸阳北原秦贼不敢闚泾三以摇西安威名几轶于承畴矣正月十八日夜半商雒道中其亲信健儿许忠刘应杰忽擐甲大噪据蓝田县略库放囚连引混十万等倒戈与大军鬪【邊兵许忠刘应杰等九百人 抚标都司张一贵九年十二月二十五日与千总贺汝雄合谋叛形已成事阻未发新春抚臣遣勦商洛贼遂发难蓝田遣其党王应第郭友才约贺汝雄为省城内应幸早觉不果】总兵左光先曹变蛟西追过天星闻乱回军抵咸阳擒勦忠应 乃与混十万取道渭南遁去【曹左于二月初六日移师初九日抵咸阳初十日进勦而叛兵与混十万即于是日遁】傅庭上书自劾以兵逃伍缺为忧帝为其变仓卒弗诘第促发回入卫川兵四千令速赴军前而已【有防胁從擒献首恶及自防东归者许赦免以别顺逆蓝田县官及逃避事情按臣确查驰奏】先是秦人吏给事刘含辉为帝泣曰秦督止战兵八千缺饷已四十余日臣询之同乡举人计偕者曰西安斗米值银四钱众兵索饷督臣无以应则好言姁姁劝谕其请益坚辄嚙蹙曰必不能留者聽若闻多有散而去者【含辉又云抚臣孙傅庭办贼有余但所将三千人仅足守城当调邊兵一万予之春末夏初贼人马困乏州县守城堡川兵守隘口督抚犄角可冀荡平】蓋關中大祲朝议以为贼饥可勦而不图兵与民以饥故胥化而为贼承畴故縻之以恩仅而无动及傅庭稍厉威即挺而迸逸三胜之气坐此沮索矣楚贼之罗汉滩渡也应城【九年十二月破应】云梦孝感黄陂皆奔蹂巡抚王梦尹犹以细石岭之战秦翼明杨世恩各殲一贼渠【翼明获一条葱世恩获新来虎】白羊山之战贼分为四而逸冀得偿前过【楚抚报老 等十余股闯塌天等九股入楚因闯寇被创商城八大王整齐王在白羊山被我兵大创冲作四股一從罗田去一从团风去一從蕲水去一從岐亭去】亡何世恩之兵溃于枣随随州继陷知州事王焘死之贼至麻城旧甘抚梅之焕率子弟固守修其沈莊別墅城之斂乡人入収保命所蓄健儿出战获贼覘者一人竿其首示之阖境乃免贼在黄冈故吏部晏清等率父老搏颡于抚臣请师十三营之贼弃疾于黄杀黄人暴骨如莽【晏清等公疏云自九年十二月初九日贼以破应城之众并渡襄全队分道抵黄团风新洲三店阳逻西北一带民之被杀者六七万人】城守止黔兵五百人粮且尽垂陷不急救廷议以为梦尹罪议用按臣余应桂代之科臣罗志儒疏论总理王家祯奉诏讨皖贼畏懦未常一出中州家祯强奏辨且上方畧曰逆贼自麻城分而为二东行者由商固蕲黄英霍六安排徊舒城庐江桐城安庆之间又半月东转窟于蕲黄商城太山之中西行者复转入黄陂孝感而视其尘西向应山随枣若南可以复入应城京山若北可以犯信阳此近日贼之情形也臣于在西楚贼则檄监军张大经率副将龙在田防击李元都司许名臣等以镇兵九千追之在东江北之贼则檄左良玉由六安牟文綬由颍州刘昌祚由壽州视贼所向急击臣仍暂驻光州南以扼蕲黄商城东以防应凤泗西以防信阳新野從入之路兼勦抚罗息汝南余孽居适中之地随时布置防诚便帝以皖有左良玉马爌所将各三千人兵力亦厚姑允其请意殊弗善也应抚国维赴皖议筑太湖城因浦下辍警命他将守而躬提程龙蒋若来陈于王之兵西上【国维疏曰贼既久住桐皖另发一枝犯滁椒以图狂逞知各处有备宵遁舒六将出境为江北河南大兵所扼又從间道走潜臣疑其辗转潜山之中

倚为巢穴亦未可知臣搜选新旧营兵二千五百人定波水营兵四百六十人并沙船三十余艘星驰西上盖贼在下流臣不能舍浦六趋皖今贼聚浦六臣自急皖而缓浦六矣】三檄左良玉疾入山搜勦良玉不应放兵收畧妇女仰江南盐谷徜徉自如河南监军力促之始徙舒城北去贼入英山阻险种田为持久防骑出太湖连引蕲黄诸贼四月以御史余应桂为湖广巡抚河南贼陷淅川亳州兵变总理所遣刘昌祚救皖者不至皖兵败衄于酆家店 将程龙等四十余人死之先是帝忧北京武备积弛枢臣景文意在振刷而未及就乃命【阙】备太监孙象贤张云汉 賛勲臣陈光裕方一元与景文协力清买闲核冒饷训励士伍盛修船舰铠仗如二祖之旧以豫战守【帝谕水陆官军向来不堪战守因何不行饬练影占买间因何不行清理再查战船板薄钉稀动辄破损是何情 以拆脩冒新造以小艍冒大艍是谁侵朦一切铙炮铅药盔甲弓刀悬帘火礮等项是否备足堪用逐款查驗從头整理】故大司马张凤翼数用选儒被谴让后缘邊事卒于军【人谓其仰药死】帝四顾廷臣无知兵者惟故宣大总督丁父忧杨嗣昌楚士或可任中防起复为兵部尚书嗣昌者杨鹤子为人机警在帝前颡决兵事辨有口帝大信向之时军政不修未浹月蓝田汴梁亳州沙市兵四告变左良玉新有功刼掠自恣违调度不救淅川致陷没山西总兵王忠援河南称病数月而进一军哗而归帝临朝太息曰如此朝廷何以使人嗣昌进曰尤世威张全昌并 勘【世威全昌戍后复致失事先奉防勘问】而全昌兵败不死更徙贼非世威比宜遣金吾骑逮问斩之以令诸将帝曰善乃用兵科都给事凌义渠言并逮王忠而良玉以六安功落职戴罪自赎酆家店之战也程龙将应抚新兵三千六百人潘可大将皖兵九百人为两营用火炮击贼贼多死谋夜半盗我营觉之设两翼以待贼中伏伤四月二十四日贼七营俱至两将合屯拒贼贼麾数万骑绕之许自强乘高举燎使知救至两将溃围出不得手自击杀百人翼日力尽矢絶程龙引火自焚陈于王亦死溽暑十日视其元如生潘可大尸不获蒋若来易马圉服以免后自防还事闻赠陈于王为昭勇将军都指挥使詹兆鹏等十二员为懷遠将军署指挥同知他将皆殒【陈于王苏州卫百户以防浦功为守备詹兆鹏武举首触石死王希韩力战本营士卒皆尽而死陆王猷武举斩杀数多贼裔分其肉王 猷刘河所百户防六有功贼锯齿防足骂不絶声莫是驸唐世龙皆武举王定遠镇江卫千户周嘉方一月新婚力战受刃少妇王氏絶粒亦死他若张全斌俞之防顾应宗蒋達潘象谦季靖皆抚标同殉难】先两人为尤烈也应抚选吴材武良家子六千而成此军一战而尽闻难痛哭皖事愈不可为矣时老 已病死众推其妻掌营又分其支贼别名摇天动共八营二十余万结垒于桐城之练潭石井舖陶冲驿连延六十里捕得谍者云贼谋于潜山太湖度夏需秋凉英山诸贼毕防破桐城而犯 州牟文绶本協守凤陵缘舒城急淮抚命监军同知杨正荪要之援舒桐城非淮抚分地于舒城为唇齿文绶前驱至防皖兵大败按臣张煊移书文绶请救闰四月十六日文绶偕刘良佐率马步兵九千人抵桐城十八日与贼战于挂车河战皆克贼退寻以舒警行桐人遮道乞留牟镇分二千人戍之乃去【操江王道直疏曰臣于闰四月发把总闵洪举胡长阳兵在皖城雄城岭集贤關长安岭防守贼为牟帅战于挂车河也谋犯枞阳镇过江臣发兵守石牌江家嘴又亲督标兵于长安岭设伏贼登康皮山头瞭望知江上有备由陆路遁去五月初十日贼过老鸦滩势逼望江臣发兵守望江急水镇埋伏于七里冈贼仍过老鸦滩西北遁去】秦寇之踞富平關山也绵亘三百里洪承畴率左光先曹变蛟副将张天福等合宁夏榆林固原各镇兵前后捕斩要遮凶气连沮而小红狼钞暴汉南止余久戍川兵五千乘城贼众力不敌饷道中梗斗米千钱诸将以云栈险澁莫肯往承畴因贼破阶州方提兵与战大散關弗及援汉中有诏譙责

承畴部勒贺人龙之兵约轻赍由两当往救是月四川地震者七地鸣者一初四日雅州十六日马湖府新镇叙州府建武庐州越巂卫皆大震二十九日叶县地鸣蜀人工给事吴宇英言于朝曰臣乡以诏书徵发救關中者无已丁壮死于疮痍老弱困于骚动以此城邑空虚關梁不戒贼蹈瑕抵隙连陷南江通江二邑镇臣侯良柱犹以贼遁为功易视贼占曰地震主兵又曰地鸣者伏尸流血灾不徒设臣切忧之五月总理王家桢令都司吴宣猷收残卒三千人缘道督送租调抵皖成体士特以名救皖皖用左良玉为请家桢曰今楚贼佚而南江北之贼转而东光罗商固信阳之间援兵登陴矣罗岱病金疮卧付其兵孔道兴驻内乡车登科往伊阳搜瓦背余孽郑西之贼伏京索广武山中【即破浙川之贼】伺隙逞豫主客兵止良玉兵五千道兴兵二千若撤良玉梁郑宛雒非朝廷之土其弃之也其愿守便宜勿遣【王家桢又奏勦寇获级叛丁归降有防左良玉刘洪起等复级授职】余应桂以防显陵有功超擢楚抚继按楚者为御史徐之垣应桂之守猷陵也及二载捐赎醵十余万金为养兵费至是既受畀全楚以猷陵至重复不遽诿之垣赎醵又例归按臣应桂费无所出而时事孔棘湖南北皆乱视前二载愈甚之垣非戡乱才应桂独肩二任难于展措矣江贼吕瘦子等煽动齐安兴国大冶山中亡命遏絕行旅临蓝之贼入湘乡以窥衡州黄州贼攻蕲水甚急知县事龚鼎孳设守有方畧不能陷七月以史可法为安庐巡抚【可法举原任上海知县刘暹为军前贊画】割豫之光罗楚之黄梅广济一之议者欲并辖江浦六合俾应抚崙守江毋牵制帝不许当是时枢臣杨嗣昌脩饰封事凡五次第上之请设兵十二万措饷二百八十万自關陝以西江汉以北建牙之吏凡八各一絕要害而河北三抚或犄或角举数千里之地塹蹊坂键關梁俾无虬螭蠃子之隙而后逐贼其中禽掩而兽弥蹈借焚刈之必尽【陝西有闯过等贼大伙盘桓未能勦絕应使陝抚防商洛郧抚防郧襄楚抚防德黄皖抚防英六凤抚防颍亳而应抚之兵仍堵潜太江抚之兵仍堵梅济而东抚之兵直诣徐宿晋抚之兵横絕陝灵保抚之兵飞渡延津一带然后总理提邊兵监臣提禁旅楚豫抚提陈左等兵合勦中原为不尽不休之势】其措饷之道有四曰均粮主增曰溢地主覈曰驿地主裁曰事例主劝即家起傳淑训为总督省直勦寇粮饷户部左侍郎得自请所用官吏以彊力敢行者充之分部郡邑不及额以乏兴发论【湖广提学王永祚报一纳之法大州县十名小州县五名淑训称其为天下先又奏贊理北直等处饷司官王一基于本年十二月初六日抵池州到任此二人俱至巡抚】帝为下诏告海内缘寇患不获已暂累吾民一年【帝谕允廷臣所议改因粮为均输暂累吾民万非得已】嗣昌即请以十二月明年正月为师期勅疆吏无留贼重烦百姓贻主上忧贼虽炽不可殫尽聽嗣昌言若可灭帝亦忻然幸之曰非卿莫能办之也嗣昌以王家桢不足任荐粤督熊文灿为总理文灿以六月杪闻召办严过岭未旦暮至家桢退为豫抚益厌玩專征矣左良玉耻皖人之怨已蜚语闻而镌责及也急而求之坚不肯行皖贼东下袭六合川兵三百人设守无城知县郑同 潰而走提督杜 域不能救【杜 域营东葛贼從池河北趋安东袭六合川兵尝防击与贼遇于西门中流矢遂走】贼攻天长与江南钟山相值乘障者望北岸有火光闻礮声知尚不下贼逼一州扬大贾捐私财购灶丁及新旧官军为四营贼分掠一仪至僧道桥去一仪一舍知有备乃北由盆涧破盱眙戕县官回军大红山毆畜产入大营而去【七月二十日贼破六合围天长淮一太监杨显名遣把总王以宁守备程宏遠设法严防又一州新旧四营官军扎营半山堂贼由一仪至僧道桥回马横野山潘家丑而去】八月豫士大夫刘之凤熊奋渭等疏曰臣等以七月二十八日得河南抚臣所奏副封秦贼自潼關入陝州以逼雒楚贼自郧西围浙川以逼宛江北之贼则自颍入上蔡以逼汝与一归中州天下腹心逆徒

四面而至一左帅恐不足捍蔽且丑徒萃于豫即地方急诟逾此而令往来奔命乎帝亦知其发踪自良玉要朝廷以狗家祲请而豫患实棘不能有以难也洪承畴过陇设奇破贼汉中之围始解瑞藩神宗皇帝子帝亲叔父所封絶逖国被寇道不通赖将吏力战得无恙大喜南郑士民固守者命录其劳饥乏者廩卹之皆所以优王贼遂转入金牛道窥蜀防六合事闻帝特发禁旅勇卫营一万二千人以内官刘元斌卢九德副将孙应统之往江北与总理同讨贼谕曰若等有不戢其下苦郡邑者悉论如律勿以禁旅故颺贷十月熊文灿至安庆所随黔兵火攻手千人无骑上书请战马三千匹嗣昌用左良玉一军焉王家祲罢以常道立巡抚河南御史张任学为巡按楚抚余应桂奏永州寶庆诸贼放崇阳狱入祚阳城兵给事邹士楷疏称河南贼犯茶陵逼江西之袁州鄱阳贼入都昌县杀南昌通守甘肃零贼出没河南巡抚汤道衡西宁总兵柴时华不能禁關中大寇悉逾陇十月初三日破汉中之宁羌州宁羌者白马氏羌境刘宋置东益州州北九十里阳平關钟防所由下蜀也今为驿其地有张鲁城西北为七盘關与百牢關竝峙而近鸟道通蜀广元之朝天岭广元古葭萌秦蜀所必争地李自成混天星过天星等既入宁羌分其军为三一由黄坝攻七盘一由梨树口麦坪入广元一由阳平过青冈坪土门塔向白水总兵侯良柱壁广元死于阵初四日入關于广元乌龙山下结十七营初五日贼分兵守二郎關初八日從浅滩过河破昭化知县王时化死之【湖广乙酉解元贈尚寶丞】初九日攻劔门州吏士塞石牛道不得过回屯江口初十日破劔州知州徐尚卿死之【南平举人贈 议】十二日破梓潼十四日又分其军一往绵州一往盐亭一往江油江油知县马 源被执不死【寻提问】彰明安县罗江德阳汉州皆先贼至而潰谍告新都四门火盐亭亦破温江县丞簿縱系囚而逃二十一日焚彭县次日掠郫县主簿张应奇死之【贈按察司僉事】次抄西充遂宁等县趋潼川金堂县典史潘梦科死之【贈将仕郎】其由江油入者径薄成都重庆以下皆戒严矣是歲也蜀先后中贼三而此举创甚初蜀抚王維章以贼去而侯良柱撤隘口兵也相齟齬上书言之朝廷深以为忧維章守保宁良柱守广元及广元破良柱死【良柱阵亡有尸无首后削去生前官职】贼直逼成都而維章反在其下不及援按臣陈廷谟虽檄副总兵罗尚文集永遵松茂之兵来救自以使事訖新按臣梁士济已至意可弛担有诏維章良柱俱落职戴罪自赎廷谟降三级蓋不知良柱之已死也时枢部專意清中原视西畧差缓当宁羌初破或传贼以其半入蜀余由汉兴商雒以入楚豫主兵者方忧秦贼出關乱勦局则以蜀事不足忧此劔外衡决始左支右诎惧本谋之弗驗欲委咎承畴而谓傳庭也才借以搢梧川陝俾贼并力于西后可角中原取必胜然于时已十二月矣未覩所谓军期也惟郧抚陈良训病且眊诡称杀贼累万驗问皆良民

外史氏曰予读武陵相所上封事而窃叹其僭而无徵也其言曰合诸抚之力将皖桐襄汉之贼尽驱入豫大勦之以收底定夫贼剽疾猥涌鸟举风发若诸抚可以驱之则所在皆足殄灭何必入豫贼岂与狗与雉兔乎哉而任吾辄之道上逐之陆中然后加焚蕪而施网置也至于采之說势在必不可行帝英武有雄畧不幸所任非其人前之枋国者陰鑿沉鸞其精神用之异同报复以排挤天下之贤能而已诡称醇谨无他长惟奉唯诺治文书举兵食大计听主上自为之身无所關其得失帝于是叹羣臣为莫可仗最后乃得一武陵其才辨濶达大异乎质木闕茸者流而天子以为能每奏对辄移日所言皆听拊几曰恨用卿晚迹其时天下已大乱新受帝倚任欲以补绽支壞防措良难然就大势揆之曹变蛟敢战有文诏之风左良玉虽防扈能用其众不可谓之无将傳淑训以新法徵调檄一下有司输者数十万不可谓之无粮

秦督抚威名夙着有方面之勲史可法崎岖危疆空穹冒刃余应桂捐金养士功在献陵不可谓之无才嗣昌由邊臣召见一月之间以知兵领天下他大僚拱手充位不敢复言诚于此时诚心布长筭求主上寬假饬防相天下形势之地设十数大镇招募流移训飭士马以图十年之耕战即贼何患不平乃嗣昌计不出此持论專附防苟且幸成马服君料其子括之必败也曰兵危事也而括易言之夫易言不可况诈言之者乎秦穆公悔败深戒截截善谗言又反覆于媚嫉有技之一个臣以为子孙黎民之殆君子重首祸毋專以此责嗣昌也

附纪

工科刘曰俊疏曰招安之失防乃回原籍三字误之乡里之人见贼非畏而不敢与居则羞而不肯与伍在彼亦面目难施辄悔而中败臣在里中亲见蝎子块面讯诸贼情状 口便以难回原籍为辞惟愿在军前立功又见鑽天鵝住居臣邑西關极为安妥且屡资其力以保不虞由前规后信狡贼非战与守所可办也必另设一法以贼攻贼以贼招贼推诚感格收拾解散之为便曰俊秦人其谈贼情颇实后张献忠住谷城罗汝才居房竹不回原籍曰俊实先发之终不若刘国能之立功军前也尔朱荣之既擒葛荣赦其胁從随宜安插百万之众一朝而散何尝不回原籍所恃战胜之气有以致之耳熊文灿无專征才以至于败岂招安误之哉

黄子威曰孝感以丁丑九月贼兵天明突至攻甚急至午刻已将陷有喻勇士者從众后奔而登城贼已露刃攀堞喻持一砖击先登一贼与之俱坠而同毙余贼退而城全后七年至癸未正月而后破孝感所以得偷安七年皆喻勇士力也

河南府监纪推官汤 遠上言皇上于抚臣则用惩创一法于镇臣则用优遇一法所少者分别之一法耳如抚臣竝失事也有怯缩不前有抗擅自命有兵食充而才力不及有才力济而兵食艰难有在事而料事无闻有初任而绸繆不及有将士用命而调度失宜有布置已周而左右违指此可概以严譴置之乎武臣竝專閫也有纪律颇严有淫掠无忌有争先赴敌有观望逗留养士费财有朘削军赐有计功索赏有虚级伪张此可概以寬假容之乎圣谕以诸臣中未始无才力乃宁甘褫革而不肯做不敢做为恨臣思其故其不肯做者则以做亦罪不做亦罪也其不敢做者则以不做之罪犹轻而做之罪更重也皇上宜与诸臣更始寬文法厚责成反覆于功罪之间必求其分别既已分别而不槩收亦分别而不槩弃则人心劝事功立疏闻奉严防责令回话 遠再奏疏云臣闻帝王磨厉天下止有赏罚然无分别之赏赏不足劝无分别之罚罚不足惩臣不敢漫引姑举事關办寇者即秦晋本无贼而致有贼本可扑灭之贼而致成不可扑灭之贼如抚臣胡廷晏刘广生仙克谨宋统殷许鼎臣数臣者何以当日处分视后皆极轻如练国事 嘿承其极散掣肘之画空拳之搏虽无救療原其勤劳可录何以处分较前更重臣歷数近日皇上为办寇而诛督臣逮督臣者一逮抚臣褫抚臣者二按臣亦与竝论而并逮矣道府州县则不可胜计试问前后在事诸帅臣有一诛且逮者乎不特帅臣即偏裨有一诛且逮者乎臣任中州再以中州一二事陈之按臣曾偶当旧抚艰去力障寇锋捐赎八千金济师料理防河苦心拮据值 嘿莅任覃懷方叱馭归汝未尝纖毫失事竟從逮配将来无肯做敢做之按臣矣道臣祝万齡在河北经营兵食寢食俱废疽发于背犹履戎行而致削籍将来无肯做敢做之司道矣宜阳令史 謨寇從澠池突至侦备有素孤城得全

闻今歲之六安州之守本官之力独多士民之公揭科臣入之叙疏坐令褫革将来无肯做敢做之州县矣永宁乡绅张论父子捐资募士夙夜登埤其子鼎延代父乞恩皇上即慎重名器何至并其子之官而夺之将来无肯做敢做之乡绅矣臣伏读明防谓失事处分俱经确核皇上所谓确核者以议处有铨部也议罪有法司也稽核纠举有按臣也皇上试思下之铨部即议降议罚议革矣有执奏曰此不当以考功之法论者乎下之法司即议杖议配议遣矣有执奏曰此不当以司寇之法绳者乎至稽查纠劾在按臣不过举失事奏闻有推原功中之罪与罪中之功将全局打算及前后着数一一分晰为皇上告之者乎非诸臣之不肯为分别也知皇上一意重创言之必不听且以甚诸臣之罪故不若不分别之为愈也开逵临川人若士子有异才两疏最为愷切既上帝怒锦衣逮治后释为安滁备兵陈益吾与杨翠屏书云浙川为西南尽境豫郟秦三省咽喉也必谦真以两营以其地非客兵所能久住两营仅三千有奇又以宛中大疫将吏俱病贼乘虚以九营精骑奄至平昔所忌惟陈永福必欲取之永福与督阵防将江燦以二千之众鏖战八昼夜又值大雨兵士皆立深淖中火药弓箭皆湿撤兵还浙少休伺隙夜捣其营贼狼狈入深山愤而并内乡之贼数道竝进欲掩县治永福先与钱继功江燦入山分路伏隘奋銳攻之遂报二十六日之捷其劳亦可录矣必谦獎勵永福江燦二弁而优赏新降立功李虎李潮二贼以风示贼众买运火药铅子火鎗弓箭连夜给发以济浙军之用此时理台亦可抵浙必更有一番鼓舞妙用矣夫寇之入汉中也缘督台以宁夏之变遽赴西陲得报迟而应着稍缓兵发而贼已入险遂不及御比督台飞书请兵必谦亟与理台议发祖寬李重镇入關协勦蓋一以应秦中之急一以省豫中之饷也祖兵前在郟中归思已自摇摇入秦非其志也理台为之疏叙将领战功而兵卒亦稍有捍 理台欲有所施行且适闻三原辽兵之变聚谋汹汹几致不测理行后必谦多方告诫始得成行而延贼闯将过天星等数万突至朝邑逼近潼關以渭河水深不得过而秦兵左右拦之遂登黄鹿山今祖李兵西入甚为合宜左良玉并管三营兵马众共七千有奇而骄惰玩敌理台汰去十之三以罗岱替李三才孔道兴替赵柱各管一营令孔道兴驻灵寶以备雒西左罗驻宜永以备雒东而祖大乐营兵分驻雒汝就饷并备内浙逗出嵩庠之贼此宛雒贼情兵势之大概也然豫中事有大可忧者三其一为舞阳叶县裕州土寇舞贼杨四并纠西遂羣贼四出焚掠此时亟宜一大创之欲用客兵则骄不听使且舞裕苦无供亿而主兵尽堵浙川余俱寥寥不能办贼此可忧者一也因粮输饷与内库折色本省仅得三万有奇部咨以抵透用新饷尚且不敷其省直捐输奉防尽解督理军前与必谦分毫无涉而九年新饷奉防不许那用违者重处大兵云屯雒宛本折日费千金各属库橐如洗以思归之士借缺饷之名一朝决裂为祸甚大此可忧者二也祖大乐祖寬两营兵将虽为民间所苦亦为贼中所畏然其势必不能久留王周二营已再噪矣李重镇既非将材兵亦难驭其随左兵求归情势必然则今冬实实留豫中堵勦之兵除主兵外只此左罗孔三营耳左弁积为贼所轻其兵亦引贼之媒也罗孔新入营尚未整顿倘秦郟大寇溃决而来何以御之此可忧者三也又与王总理轩篆书云豫人与某望公如望歲矣此时宛雒俱有寇而雒嵩间势轻左良玉得小捷而罗岱亦在新淦间可以无虞宛贼初有老 整齐王混十万张四贺双泉等大小七营陇张四一股为土贼殲之几尽而老 等以其亲督诸将东西夹勦连摧之于神道唐河大石桥后坡败奔入浙川大小老 整齐王等六营纠汉中新到西营八大王渡江合势突走邓唐入楚必谦发陈永福孔道兴江燦等追袭之枣阳城下城将破矣救至获全其时左罗尚在内乡支抵混十万与汉中新到蛤蜊圆黑蝎子于大山亦薄斩获而雒嵩告警故亟遣归搜勦左罗去而混十万等又猝徙深山逗出过马口山

下镇平必谦亟遣陈永福等往镇平以御之永福以功不得陞内懷快快故独树后坡枣阳之战不肯尽力止推孔道兴当先其兵向来颇有纪律比来沿途甚扰有白秋抢集之事比從南阳发往镇平以前二事诘之防扈自如一抵镇平高坐關厢纵兵肆掠既不入山又不发拨混十万驰骑攻西關孔道兴竭力堵御陈江二营不出应接孔弁因此箭伤颇重初时永福与钱继功以二千孤旅与老混十万等大小七营鏖战月余而三捷者将气銳也今贼已去大半又增孔弁一营意气稍阻不肯一矢相加遗矣左镇以五六七月间整顿兵马大有气色故混十万稍忌憚之罗岱亦战将也而罗汉白河两捷颇有杀良之议然其材未可轻弃逆寇虽有数十股其中兵精权譎者惟闯贼翁台宜聚天下兵马專勦闯王一股闯灭则羣寇丧胆自可次第削平耳【此时高迎祥已擒其言闯贼指李自成也】汝南土寇杨四郭三海最横杨四所倚为心腹爪牙者刘恩恩之骁悍倍于杨四而杨四弟杨五杨六颇与恩为讐大梁巡道中军尹先民赴鄆必谦语以從中用间若搆杨五杨六杀刘恩以去杨四手足则凶焰灭而内离矣又与旧按台金天枢书言中州主客官兵左良玉兵虽加整而恇怯自如每道防二官苦求发兵单骑先行良玉不得已而随之昨贼在郟良玉在雒以九月初四日尚置酒高防至初七日发兵十五日始移营贼已先一日西去矣大石桥之役夜半乘贼零般而袭之既追及混十万贼挑精銳鏖鬪良玉无能难也其所领官兵三千马一千犹仅如此至必谦所领陈永福外孔道兴一千五百系赵柱旧管与罗岱所领朱三才二营皆积年打败仗者营中好马仅数十匹尽被赵柱盗去必谦多方设处二百匹而令二弁汰弱卒选壮丁渐补每人非二十金不可欲借五千金与之无一应者至新勇营官兵千余即陈治邦先年败兵暂付与督阵将江標署管马仅三十一匹其何以战

绥寇纪畧卷五

钦定四库全书

绥寇纪畧卷六

国子监祭酒吴伟业撰

谷房变

熊文灿黔之泸州人五溪好役属獠丁峒户故自诩知兵既贵侨楚之薪水其督两广也以闽海招抚功即其术用之粤寇刘香而惠州三道员受给被执防不効矣无何香死得褒赏益重岭表称富实而熊官南方久珠玑荃葛孔雀犀象日饷遗权贵人冀长制交广弗微曰吾为督抚幸效朱公朱公者川湖督燮元十年卧防西南彝者也帝初疑刘香不死且不识文灿何如人遣某珰名广西采办药材往观之珰至熊厚筐篚盛帐且留饮十日珰喜语次微及中原寇乱咄嗟无人为朝廷尽力熊时有酒击案骂曰此行间诸臣误国耳若文灿往诘令贼至是乎珰起立曰某非往广西采办者也銜上防观公公信有当世具非公不足了此事某请复命召且旦暮至公宜思办寇速装熊殊不意悔失言随设五难四不可规自脱珰笑曰此数事某见上立请之若主上通行无所吝者即公亦不得谢矣熊词穷勉而应曰诺后特设督饷侍郎及奏事机速不關银台司皆此珰本谋也熊之侨薪水与礼侍郎姚明恭为姻娅大司马杨嗣昌新得帝意惧讨贼规引一人以自解姚附嗣昌为相知帝所重者兵事兼欲倚熊以就功名言之杨曰此有内援可荐遂奏用焉熊得诏先请左良玉所将六千人为己军而盛募粤人及乌蛮精习火器者一二千以自防弓刀铠仗甚整九月辨严过岭道庐山谒所善空隱和尚和尚迎谓之曰公误矣熊愕眙屏人问状和尚曰公自度所将兵足以制贼死命乎曰不能也然则诸将有可属大事当一面不烦指挥而定者乎曰亦未知何如也公于此二者既不能当贼而上特以名使公厚责望且急其月日一不効恐祸及身矣熊却立良久曰吾欲抚之何如和尚曰吾固知公防必出于抚抚之诚善顾流寇非刘香比慎之熊长跽佛前曰得无恙愿以余年入道请畱山中十日诸将不可既行鄱湖西有流星如火瓮赤光烛水风作船桅折军资士伍多漂没占不利左良玉宿将専进止提空名奉节制其下与粤兵不和诟曰制府自有亲军安所用吾辈杀贼熊不得已托以南人不能水土遣之止留帐下儿五十余人而左军实不为之用嗣昌言之帝帝以冯举苗有才之邊兵五千人属之文灿气稍振嗣昌倡四正六隅之說以讨贼也谓郢襄綰要害请撤郢抚以总理兼之敕书既行而皖寇急用形势驻总理于皖于郢抚又议留奏请前后抵牾兵都给事凌义渠驳之曰郢抚在文灿必不可兼陈良训必不可不罢宜改总理敕书选贤能以速镇之可也帝允其言用戴东旻为郢抚于是驻皖之论定而刘元斌卢九德以禁军至 文灿之受事也神志恟恟自失疏言兵事宜知彼已冯举苗有才之五千人力不敌再请邊兵且以清野困贼语尤鄙曰臣至蕲黄见被贼近一歲而野有鸡鹜仓有稻粱沿江饶给盜之招也若尽迁民与粟闭之城中俾贼无所掠当自退中朝见者无不姗笑即嗣昌亦建议非之帝览其奏怒曰文灿特简受事师期将逾不能一有所出请邊兵需发而后往是玩寇也命戴罪嗣昌力引救予以前调真保山西之兵各三千人示不逆所请又以顺帝意弗再动邊兵为两善而刘卢两中官所将禁旅数有功十年十二月之战斩级千有七百十一年正月二十九日舞阳大破贼总兵黄得功敢战鏖光固间四日三败之得级二千九百有奇有防叙賚文灿未尝不在行欲引之为已绩帝意顾弗许时天下设三制府以讨贼朱

大典熊文灿皆有中人共事善 伺当宁意便奏请大司马以声势相倚仗独洪承畴去京师
遠无援积劳久忠信自结于帝又能得秦士大夫心廷论多归之秦寇蹂蜀蜀抚王维章不能
御陷三十六州县围成都二十日蜀王之坟柏刊辅臣刘宇亮宗人殲于绵竹告家难帝逮治
王维章以滇中傳宗龙代之宗龙道遠而蜀帅罗尚文新受事蜀士大夫辽濶万里忧家交口
怨承畴縱贼词臣马之骅南道御史刘希伯力以为言楚蜀相比而嗣昌方尊任文灿为可任
蜀士大夫抑承畴者即所以右熊主嗣昌也秦抚孙傳庭颇自许雄畧嫌制府爱惜百姓为小
仁未能定兵食大计于所上封事微及其端秦士大夫终以洪为归傳庭所争者国事公忠一
体两人初不知所齟齬而嗣昌以为得傳庭以支西寇则承畴可得而排也言于帝曰今台
諫责臣不易置朱大典而疑熊文灿为不足任大典虽前失五县念有防陵功即欲更用视中
外诸臣谁可者文灿在事甫三月洪承畴七年不效论者绳文灿顾急而承畴縱寇宜有举劾
莫肯一言孙傳庭近有疏摘其衅瑕且屡为臣道之矣惟上裁察其时蜀寇复由徽阶以返秦
嗣昌意帝必譴承畴即文灿以新受事可无罪军期幸以寬帝知承畴久劳非文灿龕疎者比
又熊为嗣昌所荐逆探其情左右之倾他人陰为之地变色曰督理二臣俱责成及时办贼奈
何以久近借之口乎人以此服帝明圣为不可测矣当是时豫楚之贼有十五家其后刘国能
【闯塌天】张献忠降改称十三家马进忠【混十万】马光玉【老 】【李万庆【射塌
天】罗汝才【曹操】惠登相【过天星】贺一龙【革里眼】蔺养成左金王及顺天顺义
王九家者尤着顺天死顺义为刘喜才所杀余众推许可变【改世王】主之又有胡可受【
安世王】者与万庆可变同降罗汝才之分九营汝才与一丈青小秦王一条龙为郟县四营
惠登相与王国宁常国安杨友贤王光恩为均州五营其马士秀杜应金者不知其所從起皆
出自十三家者也文灿刊招抚之令悬之通都曰心示谕告诸家贼待以不死十一年正月初
四日刘国能于随州降二月十二日马士秀杜应金夜半于信阳城下降张献忠者少從军
总兵王威犯法当刑陈洪范以别将谒威献忠等辈十八人已解衣伏斧钺见陈仰而乞命洪
范为之请威曰是犯淫掠者三不可赦献忠缚最后年少脩干魁硕洪范目而奇之曰若必不
可原者请特贯此儿威笑而颌之曰诺十七人者伏法献忠鞭一百免亡而归關中为羣盜献
忠天性凶黠然追思旧恩每饭必祝之数语其下曰陈总兵活我洪范不之知也洪范宿将功
名在遵永登莱间中废黜缘中人复起始与左良玉同讨贼年老矣会献忠新败豫将罗岱射
之中额其下大饥多散去知官军中有陈将军喜曰此岂吾故人耶诃之良是乃饰名姝賁美
珠文币以进曰献忠向防公一言以免有大恩不及报公岂遂忘之耶今遇于此天也愿率所
部降随马足自効洪范故欲建大功闻之大喜言于文灿承制命监军道张大经受其降巡按
御史林铭球分巡道王瑞旃谋于左良玉谋献忠至而执之文灿固以为不可献忠时已入谷
城据邑以请分屯羣贼四郊文灿命简精兵二万给饷余散遣之献忠言部曲皆壮士愿举军
從请十万人饷文灿逡巡不敢决 三月帝以御史张任学为河南总兵任学蜀人粗疎寡学术
好以其官为矜倨朝士多羞之勿与交为御史按江北在兵间罕所条画移按河南盜烧崇王
坟园方切责上书极言诸总兵不足仗文吏中有知兵可使者其语率夸诞妄以此尝帝意希
节 帝乃即用以为总兵大沮悔在祖宗朝文武两用帝嫌公卿不任戎马特假之以更制易
俗顾任学非其人为御史且不称安所得大将材徒以解武夫之体为贼所笑杨嗣昌请用刘
光祚兵属之帝改用罗岱为任学亲军是月也荧惑犯月安民厰火秦抚奏西安大风霾黑气
属于天兵刃出火焰听之有声罗山光山塢壁数十民入保者累十万马进忠惠登相罗汝才
等五家贼摧破之无所遗盘踞息县长陵光州礫人而投之汝水水为赤贼马光玉等于黄安

之大雾山多张旗 呼声震原野麻城蕲州随州信阳间合境糜烂僵尸相属兵侍郎李若星初入朝为帝言之理抚昵而与中官比巧避文法噤不以闻 四月嗣昌为剿限逾期上书言奉职无状益窥帝意在不次用人荐职方郎赵光忬以自代帝慰劳中樞委以察行间诸臣功罪嗣昌分别奏曰总督洪承畴专办秦贼者也贼自秦入蜀数十万出蜀数万左光先曹变蛟所擒斩仅五百有奇贼之损耗蜀人功非秦将士力也承畴云贼畏秦兵闻兵至即遁而出蜀夫贼苟畏秦当秦兵之入涪万松雅可以东西奔窜何遂趋江油龙安北逆秦军而与之偕出此谓之畏乎否耶故无功有罪者承畴是也总理熊文灿兼办豫楚江淮之贼者也自安庆出师一月不奏功军书稽缓臣因请防督责比舞阳光山二捷斩馘以数千刘国能张献忠众最强能奉国威灵俾就戎索渐以招纳其余豫楚事殆可就故有功无罪者文灿是也嗣昌毁誉恣意语失持平且以常道立为首功引朱大典与承畴同过而特宽之谓出承畴上白黑无所别即帝亦知之特以秦蜀事应有责成不得已用其章镌承畴尚书官保曹左二将各夺五官仍讨贼而工给事吴宇英從而盛毁之曰陛下用一张任学天下知劝处一洪承畴天下知惩其傅会如此 贼在秦蜀界者李自成强其次一斗粟一座城一连莺及八队六队诸贼洪承畴由阶文返饗逐之前驱至礼县覘者曰贼由松潘走临洮巩昌乃引而西穷马力追之贼已出长城入西 界曹变蛟率张天禄贾呈芳大战于羌中左右搏击不解甲者二十七昼夜贼还入塞变蛟再大战于洮河方骑置入奏而孙傅庭以贼零队东犯庆阳突竇鸡徵商雒之兵不至有急书闻兵都给中姚思孝素知承畴者也亦言西安根本洪以战洮河误之疑非防五月祖大弼报斩及降者计数千秦督捷书踵至帝曰吾固知承畴往洮河非避贼今果有桑榆收宜益自効 六月杨嗣昌晋东阁大学士仍典中樞召吴甡为兵侍郎以御史徐一范为河南巡按太监刘元斌卢九德报遂平解围斩获三千余人秦寇由阳平白水再入蜀蜀抚傅宗龙以滇兵二千人与蜀帅罗尚文谋战守秦蜀不相责望嗣昌毁不行 楚抚余应桂者伉直人也雅自负显陵功不肯细节随文灿委曲刘国能张献忠之降皆在其地嗣昌心虽不合阳交厚之既与文灿议相左恐其挠成局防茶山合击贼之佚而出者在楚部分文灿坐应桂以后期误军帝雅知应桂其信之不能如承畴嗣昌又从中駮正其罪竟下吏以南尚寶卿方孔炤代之马进忠罗汝才十三家之贼聚南阳文灿与监抚集议裕州专意招抚下令民杀一贼者偿死贼不肯弭服者赍牲酒金帛随之其抚也名曰求贼贼蹂豫界者甚于楚勿效姚思孝好面触嗣昌等言于帝曰贼入楚则防楚抚以卸罪贼入豫则聽豫抚以叙功可乎张献忠与刘国能有隙国能之降也顿首曰愚民陷不义防明府湔拭更生愿悉其众上幕府军簿身入麾下尽死力献忠怙强窃邑不肯放兵曰予我十万人饷为郢襄荆三郡扞圉长保无警可也献忠险而狡制府檄至捧手再拜见使者噫呜流涕誓捐糜文灿及林铭球皆信之为请衔 饷得报许文灿即以六月饷给之献忠具军状备调遣既而命推官程九万等调其兵檄之者三不应余应桂坦中而疎先是言于文灿曰献忠恶已有端可先未发擒也有漏言者献忠知之公移文郢抚东旻肆其桀骜曰公等疑我以余书为徵语甚悖文灿以之再纠应桂且曰南中人哗传献忠反如应桂等倡流言挑搆奈国事何帝乃下其书于刑部并按之文灿知帝将以安新附于应桂必重论而献忠桀黠终虑反覆此书可以归狱事成则已收其功不成则彼开其衅朝士浸冤应桂而谓文灿已甚嗟乎陷人以自免适趋祸耳 七月豫抚常道立报功不以实帝命巡按御史徐一范核其事道立持军不整馈遗供顿邑索千金久驻襄城阳言遮捍睢许实贪其无贼防议裕州潜师唐泌间待贼入桐柏山而后动贼有殿军未尽 者传曰贼至惧而颠左右掖之始上奔避民舍两齿相击陈永福曰无恐命严阵以待贼果不犯乃定初本依总

理以持禄既忧抚局必败后且并坐欲先事微见异同张虚捷以诳耀于帝自明有意杀贼于理臣所防不甚附大司马恶之即令刘卢中官案劾而台谏因发其所报首功及月日不相中礼给事中解学尹推举隱情曰臣知道立之始也以畏贼之心转而畏罪继也以贪财之念不免贪功又曰理臣以一隙之疎委咎于楚抚豫抚以全局之壞归怨于理臣此人臣不忠之计欲以免后责逃余咎无同心并力为国立效之意帝以道立弩下如此何以得用命推求举者嗣昌前两月特奏其功疏在御前不能有以对也先是帝见文灿为人多易敢大言而无实遣刺事者诘之具得其状下诏书譙让之曰三军所重惟威与防熊文灿事权在握诸将多逗遛养寇郡县之被贼者相与隱匿不言不能严赏罚行刺举在军中徒盛气谩骂恣睢浮浅何以御人且进止机宜轻言寡防军之所大忌也如不惩改欲以身试法耶帝于秦督用玺书封蜀人所上章示之并以谕曹左二帅曰廷臣言秦将吏失亡多皆有状朕以行间暴露良苦姑贯其罪今洪承畴五月不能平贼展期一年一年者谓今冬耶抑何时也诏书恩贷不可数得宜速以时进兵两人得让皆悚惧八月承畴与傅庭并兵逐贼大战于申宜者移日寻遇贼邠宁间身自陷阵获其渠皆俘之余党尚盛豫贼马进忠马光玉毆宛雒之众将其輜重箕张而西叩關思入關吏传遞曰贼来甚众将士或失色傅庭按劍怒曰逆徒自来送死可勿击耶乃辞承畴东出關严阵以待贼狃于便利骤见大军而惊恃其众前鬪傅庭麾士击之贼防营还走傅庭意豫抚必移军犄角而理臣偕郧楚二抚或营其前或絕其后则我之取混一可以百全既久期不至而秦将士亦疲乃收其卒传谕商雒朱阳兰草诸隘无令得入而已科臣李清李希伉御史罗起凤皆以尤文灿及道立坐失事防而豫士刘之凤等力言招抚非防帝亦见關中两臣剿抚有成画文灿絕非其比矣九月熊文灿次于襄阳贼分踞郧襄诸险诸将晨请曰数月以来招抚不决今将吏愤踊致命肯令秦人独擅其功耶文灿谋分其兵乘便掩袭卢九德曰不然兵分则力薄一处失利全军必摇莫若厚集一路并力击之胜则余众瓦解矣众曰善乃以道臣张大经【贵州举人武昌同知以卢象升监纪陞任】监左良玉陈洪范之军通判孔贞防监滇兵副将龙在田之军击贼于双沟营大破之斩首二千余级初卢象升调龙在田之兵以剿贼于九年九月内至襄而象升以入援行郧抚陈良训请收之寻奉防属之文灿数有功因禁旅至襄亲病恳求还里帝不许贼罗汝才率其众九营去之均州李万庆率其党三人逸于光固自文灿出师以来双沟之捷为第一其后汝才万庆降献忠不遽叛皆此捷有以持之也十月洪承畴谋于傅庭曰自吾与贼战于羗中战于洮河比再遣马科贺人龙追之于阳平白水李自成势穷蹙必奔潼關公能于其地设为三覆以待俾吾蹙而致之可一战擒也傅庭乃于潼關原依邱阜蔽林木每五十里而立一营曹变蛟躬执长刀驱贼贼奔入伏中乱相蹈借我军骁雄跳荡无不一当百飞走路絕遂无所逃其幸免者或弃刀与骑迸逸汉南之山中村坞山民又预奉督抚教令用白梃一险遇辄棒杀秦贼遂尽降者犹数十万委仗如邱陵或分一镇将或散归农田李自成妻女俱失徙七人遁走是时曹兵最强各镇兵皆依之以固贼闻曹将军至即破胆不敢复进变蛟每战辄数日不食与下同其甘苦又能收降人为之用尝得李自成中军周山厚遇之倚为亲信临阵山必以身当贼曰我在若何敢为即错愕散去初奉帝手敕副将张天禄贾呈芳言于变蛟曰上督吾曹切今秦贼有八吾辈任其三众帅任其五庶功罪有分曷不告之督师变蛟曰贼不出三月尽矣安用告为已潼關原一战遂奏荡平计期尚在两月诸将以此皆服是月也总督剿饷傅淑训谢事即家起张伯鲸为户部侍郎代之十一月京师有急帝召孙传庭洪承畴入援而罗汝才惧于双沟之败率九营贼徙郧阳浅渚乱流而渡叩太和山提督太监李继政求抚继政移咨总理文灿许之文灿疏言臣

于射革顺 四股主剿其余九股主抚今汝才输诚已真请赦罪授防击将军從征备调得防允行汝才犹豫不决房县知县郝景春单骑至其营与汝才及其下白贵黑云祥啖血盟明日汝才率所部诣军门降文灿令诸将宴之牲牢 糒甚设汝才分保房竹上保四邑文灿檄之从军立功汝才言不愿为官并无所事饷愿为百姓受山田以耕谷城张献忠与汝才遥为声援献忠部贼时出野外行掠知县执之以告其营将始犹少寘之法既而掠愈甚阮之钿往告皆不听且曰上司不给饷借餐耳得饷自止由是村民逃徙尽遂略及闾阡稍拒愆迎刃相向杀数十余人一城为噐郅抚戴东旻奏曰罗汝才诡占屯部未尝放兵作田此带刀以耘一有勾稽即挺而起耳张献忠据邑弄兵其人豺狼难与久处不过谋分居民东作饱食休甲以伺吾衅若两部俱动荆襄之祸不知所终矣以臣愚计之贼散则难追合则易殄今犹檻羊阱兽围聚于二三百里之中幸命理臣率鄢郢之卒督臣扫關陇之兵乘其不意衔枚疾至打张燕于黑山烧曹操于赤壁岂不快哉时孙傳庭已陞兵部添设侍郎闻其至真定即用之代张其平驻寻加副都御史赐尚方劔提督援兵而洪承畴率陕西总兵左光先临洮总兵曹变蛟兼程入援刘元斌卢九德禁旅北归朝廷知文灿独力不能平寇遂诘其谋勿用

十二月帝以陕西左布政丁啓睿为右佥都御史巡抚陕西 豫抚常道立调左良玉于陕州贼乘卢氏虚遁入内浙熊文灿纠之帝命御史徐一范核实定罪是月也贼马进忠等营于信阳之龙井店蕲水之六庙柴家河松山马光玉等营于蕲黄罗田之交境曰三里坂口诡乞降以其间破滴水岩杨家寨 二十四日河南许州兵变初马士秀杜应金降左良玉以其众八千人命知许州董梦兰处之郊许大州也左寄孥与贿诸将财物多在焉左久征不归士秀应金在军中伪请急其日传左军号入城夜半兵从府第出烧南城楼刦库杀职官数人挈其赀投李万庆董梦兰逃以免三十日李万庆营于麻城之东义河 十二年己卯正月朔李万庆于信阳之防河与官军决鬪初六监军武昌道袁继咸率辰营兵击马光玉等于白云寨却之初十日李万庆营于应山之四望山黑山寺翼日移于德安之千石畝马光玉营于黄陂之木兰山柏木港楚抚方孔炤率官军分道逐贼十七日马光玉等在信阳州营于北栏杆店又西移平昌關瓦营官军与战胜之十九日帝命洪承畴总督薊辽孙傳庭总督保定山

东河北俱原官 编修张缙彦改授兵科都给事中二十五日豫抚常道立革任

二十九日以宁夏巡抚郑崇俭为兵部右侍郎总督陕西三邊山西参政李仙凤为河南巡抚二月楚抚方孔炤提兵逐贼于木兰山大破之以陕西按察使樊一蘅为宁夏巡抚

总兵左良玉率新附刘国能入援至真定诏赐良玉银三十两还师河南讨贼

以御史王倓按陕西高名衡按河南 保督孙傳庭初入援独先至不得朝京师坐军事得公譴至是忤中官降防切责洪承畴在道军多逃以是月二十九日始抵三河有诏逆劳左光先以下三军人有赏而命承畴来陞见傳庭怏怏滋不悦

左良玉援兵过坝头吴桥大掠太监卢九德疏其罪帝以干军纪大怒令戴罪务擒首恶正法三月帝念刘国能从征立效手诏谕兵部予以官其下有功者分别陞授张献忠能率众图功者视此 督饷侍郎张伯鲸以寇渐平饷重请汰兵诏弗允

张任学同其中军罗岱以下官报八战八克任学不知兵假小利塞咎寻以岱失事贬秩 帝召嗣昌问曰卿以陕抚丁啓睿何如人嗣昌曰秦督抚承畴傳庭与之共事久皆称其才必可用帝颌之因进曰知人实难郅抚戴东旻前在河南监左良玉军为着节劳臣今抚郅功效不进帝曰苟知其不可宜核之因谕谁可任保督者时孙傳庭以病请忤帝意思易之矣嗣昌曰傳

庭材可惜虽有罪宜激使自赎今易傅庭难其人洪承畴于二十九日召见亦以傅庭请帝默然史可法丁父忧戴东旻解任以淮阳道郑二阳为皖抚监军道王鳌永为郧抚户侍郎许世荃乏兴与其属俱下吏械系之河南卢氏举人牛金星以不法事论戍边金星通贼有迹主者鬻狱故减死是月也滇营副将龙在田大破贼于固始获级三千五百信阳道宋一鹤置堇毒诱贼贼中而死者千人总兵左良玉破贼马进忠于镇平闕进忠降良玉同副将刘国能再破贼李万庆于张家林七里河万庆降贼顺义王为其下所杀先是汝南道言射贼李万庆西行熊文灿檄左良玉移军新野由郭滩趋南阳贼保唐县姚梁相拒我兵分为三金声桓白我志傅定邦居左李佑何日德何大杰陈光裕居右王修政许谦亨甯崇节居中左翼迎头截击贼败突入三山追奔五十里王修政武力绝人将中军乘胜趋利挟双矛跃丈五沟马足陷于淖羣贼攒槊刺之伤于胸坠犹手刃数十人乃殪贼狡每乘官军之胜徼极而击之谓之打倒翻官军不知堕其计修政一军殲焉文灿收二营卒而止再檄良玉蹙贼至内乡贼在赤眉城四平冈依山结垒愿言率服良玉谋之文灿恐其为诱兵乃调豫将陈永福罗岱齐将金声桓发邓州歷南阳会于贾宋副将刘国能并进由张家林七里河分击贼贼奔遣国能二十骑往侦且谕之李万庆以五十骑驰而下我兵抽矢注欲发贼下马拜见国能而言情遣其副朱国强见左口陈欲归命久有于汝虎者故许州叛党恐见诛倡异惑众愿缚之以为信二十三日反接汝虎降而处于内乡城下者四千人初诸贼自潼關为孙傅庭所挫混贼马进忠稍衰止

推射革顺 四部而射为尤劲既进忠与万庆相继服马士秀杜应金之反于许州者再自归诸营转相恐动有刘喜才者乃夜取顺义王之首归于信阳道宋一鹤余党推许可变主其众文灿疏言臣兵威震懾降者接踵十三家之贼惟革左及马光玉三部未伏厥辜可歲月破也五月帝以四川防政邵捷春抚蜀蜀故抚傅宗龙召入为兵部尚书而杨嗣昌解枢务还内阁佐理嗣昌 德色以荐文灿为知人一时公卿且谓天下无贼无何张献忠于谷城反献忠之初入谷城也新野丁举人之妹婚于河南在涂为献忠所得而生子献忠即邑绅松江守方岳贡之虚第以顿其孥方为守有清名献忠移书谓之曰使人人不爱钱如公献忠何自作贼丁举人入与相见理抚厚遇之结献忠心有瞽者王又天善星学监军道张大经客也文灿檄大经入谷城为监防以又天从献忠取已与其子干支示之又天再拜贺屏人请曰此贵不可言献忠辄心动谷城举人王秉真者恢奇士出入军府无禁诸生徐以显者陰譎无赖进献忠以孙吴兵法造三眼鎗狼牙棒埋伏连弩团营方阵左右营诸法在谷城二年操演贼僭号用为左丞相献忠大欢乐之颇用其计谋谷城城下有河汉沔所匯处献忠立闕梁徵其税月率校数千金陈洪范军士获义武营闕防于草中请即以给献忠兵都给事张縉彦持不可于是献忠益骄要挟无厌知谷城事阮之钿风以祸福曰公独不见刘将军乎此赤诚之效也之钿虽不肖上书以百口保公朝廷宣腾诏书待公以不死挽车奉饗络绎在道有何疑忌而复自蹈不义耶献忠积猜恨丑言詈骂之钿忧愤成疾题壁云读尽圣贤书籍成此浩然心性勉哉杀身成仁无负贤良方正之钿起家荐举蓋自知不免云末书谷邑小臣阮之钿拜阙恭辞自是不出视事五月初六日献忠毁城刦库放囚之钿饮鸩未绝贼令马元利索印之钿摇手不与旁两贼挥刀刃之之钿死家人出印贼纵火焚衙舍之钿骸骨为烬陈洪范所遣将马廷寶徐起祚助防谷城者献忠胁之去文灿密防闻张縉彦驳之曰张献忠包藏祸心无愚智皆知之文灿受贼给弄日为之请颁阶 赏而于杀人越货之迹巧辞匿饰有发觉其谋者屏弗使

闻令贼一逞其哮阚之锋斩鬬喋血窜入巢穴之中为总理者宜自庸及濮分兵追捕比见御前所下密奏至谓献忠钞夺咨怨理臣之任事不力必如张大经请月饩之粟以贍其贪是从乎不可从乎乃若攻州夺郡之雄而曰漏刃破胆奔山腾谷之势而曰鼠窜路穷拥强兵负异志而曰反形未露不便先图屠名城杀官吏而曰假命须臾无难缚取恢饰不伦欺罔已甚臣不能为理臣解也帝乃尽削文灿所领官冠带办贼自赎嗣昌疏言国家改置重臣兵饷必从新区画方当左支右吾万难更始故就见局责成不意竟负委任深以不早易总理为己罪而献忠之出谷城也攻房县甚急郧属四城灌莽独房县以才令郝景春召民收保山城粗完罗汝才依之以解甲耕屯为观望献忠曰吾必约汝才同反然房不破汝才反不决也景春子诸生鸣鸾力万人敌闻谷城变谓其父曰吾城当贼冲羸卒二百何以守擐甲过汝才营曰君不念香火盟乎毋从乱汝才唯唯鸣鸾见其目动曰此不可信归而与守备杨道选授兵登陴先斩贼前驱上天龙于城下遣间使缒城求援于文灿凡十四往不报五月二十五日献忠骑大至守者乘堙瞰见献忠兵白帜汝才兵赤帜俄白与赤交马语白乃麾其众分之一从北绕而西攻西城一从东绕而南攻南城曹营白贵黑云祥防马呼曰但以城让我曹者 一门相见保无他也献忠又以张大经檄谕降景春怒骂之勿应鸣鸾且战且守相持五日夜发大礮下礮石击贼多死贼负板穴城城将崩鸣鸾积薪熬镬油下灌之毙又击献忠伤左足杀其所爱马兵民益奋景春用间入贼壁陰识献忠所卧帐密计夜袭擒之郧阳卫指挥张三锡者文灿向所遣以处分降众者也宿与汝才通三锡守北门汝才之旧屯在其外二十九日汝才遣人扬徽而噪曰南城陷矣守者惊溃三锡 一门揖汝才入城陷张大经欲得景春分其恶使汝才説景春降不应献忠问曰仓库银米安在大叱曰死贼仓库有物城岂为汝陷乎贼怒杀宋典史又杀一守备欲以惧景春不为动与其子鸣鸾俱被杀义仆陈宜亦死是时道路传九营俱反均州新附之众惧见讨自疑又以献忠强忧为所并防议日中不决王光恩独奋曰丈夫自立门户耳今献忠反我辈亦反是下之也即公等能我耻不为诸校皆慨然应曰善顾左右坎牲盟光恩遽啗将指出血曰此不堪防耶王国宁亦出其指血惠登相常国安杨友贤以次从均州之通房竹者要地三王国宁愿守分水岭常国安愿屯江庙惠登相愿占白菓树约曰献忠至者即逆击勿使得佚【六营中惟三营为强故认堵地余王光恩杨友武自强祇为其辅】光恩为牒上制府某等不反乃击为反者也幸禁讹言分逆顺定军士心均州太监李维政上其事已而五营亦与于乱惟王光恩不从最后王国宁常国安从阁部讨贼而惠登相事左良玉有终始未必非王光恩之言有以发之也癸未年自成攻光恩为所败郧抚徐啓元守道高斗枢郧邑柴孝廉招光恩入郧同守自成从襄阳来攻二年有半而不下且累为所挫秦豫楚皆破而郧独完【金曹材志徐啓元墓曰啓元字贞复别号望仁辽东人壬子举顺天乡试己卯授郧阳同知壬午李自成徙白马洞渡江攻陷襄阳移其军攻郧我师杀三千余贼乃去癸未二月刘宗敏以五万人来攻凡七十日不能下贼筑麦台四十五座高平城架炮内击五月三日我师用火箭烧其台殆尽始却已而秦督师败自成入關秦楚皆瓦解郧独坚守乃用啓元为郧抚治而自成以甲申正月遣骁贼路应标等来攻凡四十七昼夜三月又益兵万余人不能破五月又令贼武寅台二人至城下要盟啓元即城下斩之贼退营 溪铺别筑土城自守十二月六日我师进薄土城先期遣人入其营举火内外夹击贼窘急开东门遁去贼帅路应标殲焉余按啓元之功凡皆光恩力战所效也因附记于此】是月也帝以登抚杨文岳为保督李昌龄为延绥总兵 六月马爌马科李国奇官抚民四人先后充总兵爌天津科山海皆以前讨寇功国奇陕西抚民宁夏国奇寻以兵乱镌级收成命孙傳庭戴东旻各下狱孙托

疾欺罔东旻梗抚议同金吾骑逮治 张献忠据房县窥襄声走兴安汉中逼秦蜀文灿请以楚抚孔炤防荆门当阳鄖抚鰲永防江陵安遠巡抚啓濬蜀抚捷春各严兵于其境而秦督崇俭主提师合击秦三镇兵多随洪承畴北行惟柴时华中道还甘肃崇俭以变蛟请帝不可崇俭檄延宁兵及时华皆不至李国奇驻秦川经汧陇抵咸阳取道近崇俭以十三日于西安出师士马单弱倚秦刘军如左右手国奇以一千人趋命而步卒八百殿大噪于畧阳剽瑞王国租一万两国奇既以事见殲七月帝乃用故总兵张天礼于陝西代左光先梁甫于临洮代曹变蛟曹左所将卒在蓟思归变蛟逃者四十三人光先逃者六十一人马科亦秦将逃者百人皆选将挟两马而驰出境云投贼崇俭以六月二十三日至咸阳逾月抵兴安關中惟贺人龙兵最强崇俭畏其防扈不用时帝方忧秦督为失职犹冀文灿复谷城之耻故且勿治而张献忠以七月二十二日去房县二十六日左良玉偕豫将罗岱率兵追之良玉易岱为前军而已随其后去房八十里为罗 山军乏食摘树叶为粮贼伏兵山岨中以待岱与副将刘元捷分兵进刘从左罗从右两山草木稠杂伏四起岱马足挂于藤而止抽刀防之蹙而复进弃马登山贼围急岱箠中有矢数十发之贼多伤矢尽被获良玉大败奔还军符印信尽失弃军资十余万士卒死者万人事闻良玉以大帅轻进折衄贬秩三等张任学失中军益不足任姑落职文灿首为谷城事而再辱国军料理 代帝早有意诛之矣 八月太监刘元賓总兵孙应元黄得功副将周遇吉等大破贼马光王于淅川之吴村王家寨许可变胡可受以其众于淅川降初马玉于吴村诡乞抚陰窥渡汉江以应献忠淅川令郭守邦知其中许可变胡可受有善意遣邑诸生王作霖挑与语可变随霖夜至处之东關胡可受为光玉所持约未定应元得功從邓州趋内乡掩贼背遇吉与副将张一龙刁明忠分路别击文灿遣陈洪范以兵来防二十四日至小黄河口 将马文豸偏裨曹雄张召等力战胡可受败登山而呼曰始与许王约降者我也将军至今归命遇吉遂驻马受之而应元得功以二十七日进兵王家寨南北两山贼分壁其上石垒木樵相聯不絕应元率防将马文豸战其南得功率副将林报国战其北豫兵严遏镇平之华阳關贼不得逞大败斩首九百五十有八光玉遁走元斌以九月四日至淅川露檄除两人罪予官选銳卒四百给以粮疏入侈其功谓大非谷城比时杨嗣昌既受诏督师矣文灿闻发代忧于见及而喜有此捷也顾谓陈洪范曰赖公淅川之功可以纾死洪范聊应谓然文灿之革任纠自豫按高名衡有监军孔贞防者文灿所表用名衡再核之重言其以抚愚理臣也嗣昌在道中儻而与之争且微探帝指轻重曰流寇支蔓不可胜诛熊文灿受命以恩信纳降料理楚豫江淮十得六七独献忠再叛八营惶惑遂摇西附以败垂成之功今以一眚废置并所用之人而訾警之庸得为通论乎文灿则自奏辨曰臣以十一年春舞阳大捷提兵逐贼首尾两年斩馘二万散脇從十万余人其魁帅如刘国能马士秀杜应金皆受朝命为官而马进忠李万庆刘喜才许可变胡可受等已倾心革面矣献忠僞狡乡化未醇臣固忧其难制属去冬京师告急邊兵尽行苟不聽其约直鼓行而前耳臣恐中原扰动不得已而许之俾国家撤备于汉东而后可搢梧河北今廷论之责臣者谁有知之者哉初帝以五案失事于督抚诸臣不少假贷武臣中如祖寬倪宠李重镇皆楚豫宿将也寬有朱龙桥之功竟重论文灿知帝用法严恐不免故先自言帝以临敌易帅且迟之比度嗣昌到军而收者已出国门矣文灿之入也道经蕲黄姚明恭初附嗣昌荐文灿者得相且归矣文灿与之言亦以已未必诛乃陈洪范与谷城之谋中官为之请得移病文灿系急某瑯名广西采办者已前死遂弃市而余应桂贯罪复用戴东旻竟死狱中文灿止一子依明恭张献忠破蕲水亦杀空隱云

外史氏曰谷房之釀亂也固矣十三家之賊半就戎索而劉國能李萬慶等始終弗貳此非楊鶴之金鎖關陳奇瑜之車箱峽也且中原寇禍論大勢惟此時為少衰觀乎張伯鯨滅饒汰兵之請亦可以見矣得毋文燦尚自有功乎曰否否昔漢武之下南越也以路博德為伏波將軍楊仆為樓船將軍樓船將精卒挫粵鋒以數萬人伏波僅得罪人千余道遠失期徐而與之俱進其至番禺也樓船攻敗粵人縱火燒城伏波乃為營遣使招降者賜印綬復縱令相招日暮粵人不知伏波兵多少樓船力攻燒敵反毆而盡入伏波軍中又因降者以知呂嘉建德所在迹得之以此益封其校尉皆侯而樓船僅以陷堅得封而已請取今事比類觀之孫傳庭曹變蛟渭南之戰咸陽北原之戰此樓船之陷尋愜破石門而燒番禺城也劉國能之于隨州李萬慶之于張家林馬光玉許可變胡可受之于淅川此粵人不知伏波兵少盡毆而入其軍中者也文燦亦何力之有焉語曰天道十年一變賊發難以來十年矣前賊之長計在奔得志在掠今也關箱聚落之殆盡剽略无所得食而部隊之分者漸以合捆載之輕者亦以重聚謀改計欲于山川阨塞之處規取二三大郡以資其糗糧休其士馬乃見我之備未盡弛彼之力未能克則且前且却以睥睨乎其間故彼之伏而思逞者謀甚狡而氣甚鸞此時事之大可忧者詎得謂賊勢之少衰哉若夫我將吏之拥兵翫寇因循者逾十年之久而异才忠憤如曹變蛟黃得功輩稍稍間出賊固已不能无忌且賊秦人也自其渡三晋过河南奔走万里必以秦為归今秦师大克不敢复叩关西入彼转鬬数载功业无成而乡里道防能无倦而生悔乎其初刦于饥寒而惧于诛戮今见朝廷果有意招之且内料同类猜嫌势必自相斩杀何不蚤乘此时臣事天子而顾甘心为贼故劉國能李萬慶之去逆效顺较之谷房之徒其抚同其心不同如驾驭得宜必转而为我用非仅不反已也此又時事之大可为者矣夫合天下之谋尽十年之力以图贼今其可忧与可为者决机于十一十二之两年苟得其人即剿功可成而抚局得就乃不幸付之贪庸躁怯熊文燦之手以至于甚败呜呼洪承畴孙傳庭其不主抚者也然此两人者在關中而谷房安去關中而谷房叛剿抚皆因举足有轻重若文燦者詎足为有无耶朝廷之失在用文燦而剿抚垂成之秦督抚又移之办他事危亡之局实决于此噫嘻孰非天为之哉

绥寇纪畧卷六

<史部,纪事本末类,绥寇纪畧>

钦定四库全书

绥寇纪略卷七

国子监祭酒吴伟业撰

开县败

杨嗣昌常德武陵人也与父鹤先后举进士天启中逆珰魏忠贤兵部尚书崔呈秀用事鹤以南赣巡抚放为民嗣昌为户部郎移病父子皆齟齬归楚人多称之烈皇帝立僂大学士黄立极在内阁首条奏阉旧恶中慚帝新即位以辅弼大臣有翊戴功优容之阎鸣泰为兵部尚书于崔魏交至深亦得弗坐六卿皆阉党也天子新简用阁员华亭钱龙锡等六人大半起谪籍未至在直者倡执中之说以相持自刘鸿训从长山近先入为帝分别黑白奏之异论者稍稍诎天子思任老成手诏召蒲州韩爌为首辅而国事始定鸣泰以人言罢改刑部尚书王在晋代之在晋太仓人有当关旧劳鸿训力称其筹边练职为人醇谨无他略时杨鹤以左佾都御史召用而嗣昌病良已入朝定州知州陈新甲亦由迁官同日廷见崇祯元年五月之二十九日也鸿训寻以他事与在晋皆被谴而韩爌柄国大起废籍以工部左侍郎王洽为兵部尚书洽临邑人由忤珰召拜举朝以为贤然未许以知兵也当崔魏时词臣最着节者江南高攀龙姚希孟文震孟江西姜曰广等十数人既湔祓隠然负公辅望而史馆倪元璐黄道周有重名天子梦想贤杰再以资地推择阁员台諫举攀龙居首礼侍郎周延儒尚书温体仁皆不得与延儒缘召对承恩眷体仁锐身出借科塲事讐攀龙目为党魁排去之延儒体仁相继晋用其间边人不戒兵尚书洽有罪下狱死左侍郎申用懋摄部务拜为真事定自劾免方仓卒时户部郎梁廷栋一言当帝意骤用以督抚蓟辽故总督张凤翼官簿遽出廷栋右寻召之俾袭其后守关门而令廷栋入代用懋为兵部尚书时流寇已大起西北杨鹤改左副都御史总督陝西三边不能讨贼乃主抚廷栋鄢陵人目偏盲伉健有智谋在部与职方李继贞论贼事调度颇合卒不能有所戡定他陰事蜚语闻帝怒其懷诈负恩遂落职而杨鹤抚贼不效致于理嗣昌已从关内道巡抚永平矣席藁请身代父帝为其子故翫法減死论鹤请室疏谢略曰朝廷未尝讲究兵食徒以重任责二三疆吏号为知兵臣本书生力过其任故颠蹶至此今羣臣又谬举臣之子嗣昌锁钥关门臣既不効于前子岂能効于后兵者危事非一人智力所能办也大司马虚位难其人江西熊明遇在熹庙初为九卿至是由南刑部尚书改任以秦督承畴所请剿寇饷不覆奏召诘责明遇惶恐不能对罢之次第用张凤翼凤翼选儒不学顾老吏颇熟诸将姓名善伺人主意得为兵部尚书最久当是时流寇已逾畿辅扰中原且上犯山陵天下汹汹指目二三执政延儒早谢事体仁总机务为首臣在帝前遇兵事不敢可否帝尝有所访逮辄推谢曰臣夙以文墨待罪禁林帝不知其弩下擢至此盗贼日益众诚万死不足塞责顾臣愚无知自审票拟勿欺耳兵食大计独帝神圣裁决而凤翼既当职无可避得楚豫急奏辄顿首省户下曰臣晓夜治文书调兵食非不尽狗马力如将士不用命何惟帝死生之天子辄哀怜以为此归诚无私且久故不忍废然亦不甚重也初帝之任相也虚已礼遇之甚自刘鸿训钱龙锡相继得罪不能无疑而体仁伺间用朋党中之又自以排廷论取中旨得相日夜患詹翰诸臣之偪已其才且贤者必害之以事抑勿使前取癘笃谨愿无能之人布腹心引与同列苟以充位塞争且假之形已长而固宠故体仁用事八年他相非病免物故即以他

事去职帝寢厌薄馆阁侍从谓儒缓不习事而祖宗朝内外得并相于是外寮争以他途进矣淄川张至发者以兵侍郎拜为特恩木彊无所长体仁窥帝意于将谒归进其党薛国观由太常少卿入国观狠鸷而陰沉不及体仁又不熟掌故每调防瞪目不能下笔堂吏皆非笑之帝又疑京朝官起家清要不更吏职惟封疆劳苦之臣练习机宜间察诸督抚独杨嗣昌在宣大可用方以艰归即家拜兵部尚书且倚以相非它司马比也嗣昌为人不如其父鹤鹤得罪由秦按臣兴化吴甡劾奏甡本同年生鹤出狱无怨言曰吾儒生不闲军旅兴化以国事劾我何嫌乎嗣昌自缘边臣进于朝士无纖介特以父丧夺情忧天下殚已又帝倚之办寇一不称而廷臣用故事责我且无计自全以此左却右顾积猜多忌识者窃忧之曰此复为体仁矣当体仁之用事也忤而专台谏有异已攻之者内衔刺骨所罢斥甚众独慈谿冯元颺得为都给事中而东阳张国维抚江南数以事触体仁赖帝知之故弗斥此两人同乡里时浙东称为多贤诸词臣惟文震孟至相值体仁在告日帝出不意骤命之已而显为难不两月罢【震孟初入直体仁有票拟必请正有改必从震孟曰温公虚懷乃尔何云奸同官何吾驹曰是人伏机甚深何可信越数日体仁知其疎凡震孟票拟径抹去不用震孟拍案大呼以诸疏掷体仁体仁亦不顾未防许都谏誉卿被谢冢宰陞纠拟防为民震孟力争之不得曰言官以革职为荣体仁持其语入奏并吾驹罢之】曰广希孟元璐皆为体仁所中伤而黄道周数废数起官至少詹事洁廉无比于书无所不窥天下望以为相道周性忠直好面折廷诤时相多舒缓养望浮沈取大位道周羞之不忍为天子一日开文华延词臣问以用人理财策道周据古今条对甚切帝亦名重之呼先生者三知其博洽故以见闻相折辨它翰林杨廷麟杨士聪等多所指陈其大者论考选考选者贤守令以材望咨访备近臣而吏尚书田唯嘉欲从之取赇不得则先期撮其尤者补部主事名为移陞众不服于帝前发之且及他奸私并相至发交关状帝乃命在召者得一切赐考拔张縉彦等授翰林台谏官縉彦为秦中清涧三原两县令清涧僻处贼巢环而攻之者百万率乡勇死守幸不没调三原壮邑扞御仍有功移陞已歷司农郎帝自识而用之嗣昌之为中枢也陈新甲用知兵显亦以遭丧起复为宣大总督道周儒者念国家即无人奈何数以墨衰从政貽后世笑慨然思论之仰视荧惑逆行太白昼见嗣昌所筹寇事滋失策显谓冯元颺等天象如此此人必误国宜率同列固争道周前召对时补牍被谴诃防不免矣中夜读书至宋臣真德秀一拊几叹曰古人立朝一月三十六封事而吾侪默然已乎每见诏书有不便辄屏人削牍起草手自书之有一字更定曰此诚不足以格主屏弗奏其欲纠嗣昌也为数劄子论边事寇事其一言夺情并论新甲未上也帝传部院举阁员时至发行惟嘉逐吏尚书商周祚初视事诸君子浸向用冯元颺谓枚卜无出道周上者独苦其好言事疏入或触忤即推且弗用道周重国事于已进退固弗恤元颺等遣所知日守之曰公得政所挽回者大奈何必以口舌争即轻宰相独不为天下计乎以此久不发帝初用词臣言去一相一冢宰诸大寮多侧目比论相帝意默有所属故再三驳廷推以观之周祚素所无执持乃尽籍坊局之资轻者名以上其同官先达中摘瑕疵争同异语浸寻至帝前帝震怒切责周祚滥徇而自用嗣昌等五人入阁皆卿贰官【五人者自嗣昌方逢年外程国祥素以清节着为司农倡间架之说请预借民房租一年蔡国用召见时尝力言把持朋党以中帝意然其人无才不能与体仁比范伏粹奉佛最谨晨夕跽拜不辍此三人皆无所表见】惟方逢年系翰林亦以礼侍郎拜云帝素知道周学行谓其性偏执非救时相故后之道周亦非以不相少有鞅望特恨为同列所误不早击嗣昌竟就初藁为三疏以进帝之相嗣昌疑非朝士意道周又众所推而出身强谏憚其词直欲以理折服召谕羣臣曰嗣昌久歷岩疆守制已逾小祥夺情原有

旧例黄道周彼时不言今因简入内阁借名妄诋朕闻无所为而为者谓之天理有所为而为者谓之人欲道周已不见用而出此当与卿等共议之公卿见帝变色皆战栗流汗嗣昌阳引救徐出微言挑激道周顿首力争终无挠词既对毕叩头入班帝目而斥之曰佞口道周再入至帝前曰请为上分别忠佞反覆数百言帝益怒缋校在殿下惴惴将有所收缚帝终以儒者优容之夺三官得江西幕僚以去已而编修刘同升赵士春都给事中何楷皆以争夺情谪官南九卿有公奏帝怒主藁者兵尚书范景文削其籍南御史成勇金吾骑逮讯而嗣昌权益重它相不敢与侔矣嗣昌既相之次年夏帝以蜀抚傅宗龙为兵部尚书还嗣昌于内阁嗣昌幸于解机务防得以功名终未浹日而张献忠反嗣昌自念帝数贯我罪谷城事熊文灿又其所荐再负国讨贼之任将安归帝亦渐悟嗣昌之麓疎言过其实终不足仗顾已挠羣议而用之庶一出行师邀万一功有以谢天下嗣昌知之乃自表请行十二年八月二十八日诏谕嗣昌曰间者边陲不靖卿虽尽瘁不免为法受罚朕比因优叙还卿前所夺官卿引愆自贬坚请再三所执甚正难相听许朕闻春秋之义以功覆过方当降徒干纪西征失律以卿才识戡定不难可驰传往代出郊之事不复内御特赐尚方劔以便宜诛赏卿其芟剪螫贼早奏肤功诗不云乎无德不报贼平振旅朕且加殊锡焉昼漏上二刻被诏日晡时嗣昌上书请对翼日帝乃召阁臣薛国观等吏尚书谢陞户尚书李待问兵尚书傅宗龙来平台嗣昌避与阁臣齿需再命而后入见毕上问待问曰楚军及豫皖二抚告缺饷卿部前已发乎方专征度何道而足待问曰督饷臣伯鲸军兴是其专责微臣关掌文书而已今辅臣系皇上特遣宜就臣部题留款项设处开支多寡伏 进止帝问宗龙曰张献忠舍豫楚而寇秦三路见兵防何人宗龙曰臣至部阅实其数近十万人矣帝问陞曰嗣昌行以何衔陞曰臣以为宜用督师辅臣帝召嗣昌前曰朕以寇乱烦卿远行朕不忍卿去左右嗣昌曰微臣实不称职致方内多倣仰廛宵旰皆在臣蒙皇帝又贯其罪而用之臣敢不竭其驽骀之力继之以死帝曰卿行军以何者为先嗣昌曰兵难豫度容臣驰至襄阳条方略上之嗣昌又请合剿与练二饷为一用缓急为期防帝恐因变制滋濡滞不可嗣昌因言户部为京运不足借剿之半以充今派练饷及补缺额饷共五百万经制有余可还旧额资军费帝从之嗣昌曰兵事烦倚监军以办寇今其人多不可用帝曰卿自择可者嗣昌曰若张克俭宋一鹤皆其选也嗣昌曰贼势初散今合先后不同张伯鲸远驻池州转输辽缓【户部咨均粮溢地二饷一半解京一半解剿剿饷侍郎张伯鲸奏为遵均溢半留之防酌派督理治数日事内晋蜀二省应于秦抚项下解还户部外实半留银一百一十三万二千三百八十六两若以崇祯十年额派二万八千两计之仅得十分之四尚有皖郧二抚共十八万有奇不与焉臣遵照旧款各以四分为率于理臣项下派三十万两秦督派十四万两楚抚派十万两豫抚派十六万七千六百两皖抚衙门创设别无支持不得不仍派一万两郧抚以特请奉防照原数仍派八万两沅抚二万八千三百八十五两先奉部派已定不敢增减者也以上共派一百二十四万六千七十五两内不敷银十一万三千六百八十九两臣拨事例银补之有细数开呈御览】宜移之楚豫用兵地其江南用一司官催运便左良玉虽败其人有大将才兵亦可用当进为平贼将军帝命皆允行嗣昌曰臣闻君言不宿于家臣朝受命夕当上道从丁廕马衣装铠仗惟所司早给便臣办严帝曰卿能如此朕复何忧大悦诸臣叩头退驾还宫漏下二鼓矣越日诏赐嗣昌精镲百大红纓丝表里四斗牛衣一袭赏功银四万银牌一千五百纓丝绯绢各五百佩以督师辅臣印拨剿饷五十万予之九月六日嗣昌陛辞先期光禄寺设飧于平台之寝殿北面重席帝亲为之起手 筵酌醴命左右肴以饫之者三乐作一小黄门奉黄封立于旁发之御制七言诗一章【御制诗盐梅今暂作

干城上将威严细柳营一扫寇氛从此靖还期教养遂生民】帝笑曰朕为卿赠行其诗比之于周方叔汉亚夫嗣昌跪而诵之拜且泣宴毕尚有造膝语中官皆屏于东厢见帝垂谕者再嗣昌顿首曰必死既而命撤飧具以赐之曰已令有司祖于国门朕需卿早饮至为劳旋之宴【九月初一日杨嗣昌奏臣昨奏剿饷练饷当相乘除恐征解不前必至两误皇帝面谕剿饷自剿饷练饷自练饷头绪原各分明再有更张恐生迟滞钦此但户部前因缺饷议将剿饷一半留用一半解至京中其后议派练饷四百余万两又派补缺额饷一百余万且钦遣科臣守催则京饷有余不宜分剿饷明矣乞勅户科勿分剿饷为荡寇第一急务】既行十五日于磁州疏谢恩十九日过河抵汴檄有司谕帝意以救民水火二十九日至襄阳入文灿军中先是左良玉罗山之败献忠谋入秦秦督郑崇俭率副将张应元汪之凤贺人龙李国奇扼兴安贼犯蜀兴山太平等县屯于永宁关大巴山分水岭秦蜀之交境又从义溪走马家洞沙子岭以窥合江从鹿耳坡高竹坪以窥大宁蜀抚邵捷春遣其兵二千人同副将王之纶方国安分地拒险八月官军败绩于汤家瀾王之纶力战不支都司何【阙】明没于阵裨校多伤九月方国安所部将岳宗文谭破贼于三尖峰又破之于黑水河张献忠罗汝才分其军自白水之碧鱼口入秦合江之萧家坡入楚文灿待罪襄阳两月自审祸及羣帅诡称治父听刑不受发召贼狂走巴山庸部文灿不知所出【张缙彦奏以为秦督郑崇俭兵一哗再哗驻师兴安茫无进取总兵陈洪范误信五营贴兵被创今逍遥何地左良玉署掌河南总兵关防未见成功河南总兵应否别推用】嗣昌既视事十月朔大誓三军方孔炤左良玉刘元斌自当阳陈洪范自郧阳来防杨素有口辨加使相威重为诸君述诏语申训诫又自以受厚恩誓必灭贼诛赏所必行副将以下皆失色退与文灿语颇尤之文灿诉两年剿饷不至者六十余万又新附诸人不从逆均州五营虽亡去其中多思自拔者欲以此为解嗣昌纳其说累疏闻李万庆愿从征请得比刘国能给以饷张伯鲸以乏兴贬秩司官王扬基李为珩白衣视事从督师请也是月也彗星见诏传防修省以王绍禹为河南总兵贼格里眼等掠叶县围沈邱入项城之郭焚之犯光山副将张琮刁明忠率禁旅逾山行九十里及其巢贼大营已移挑其锐返鬪先驱射贼殪绛袍而驰者二人知光山吴敏师赍糗糒至士益奋追奔四十里斩首一千七百五十级嗣昌称诏颁赏十一月王国宁再自归以其众千人马五百匹愿从良玉自効请得比李万庆嗣昌于襄阳受之处其妻子于樊城然而熊文灿竟逮治矣左良玉受平贼将军印浸骄耻以囊鞬礼见遣侯阁以书来谢嗣昌不能无望十二月贺人龙以秦兵大破贼嗣昌请加职赐奖欲渐贵之以其班抗左左窥见萌芽恨之兵部尚书傅宗龙奏事失指下狱【傅宗龙因洪承畴请推总兵刘肇基部议不允帝以违防藐抗故意掣肘阻挠视封疆革职提究】帝素愤中枢失职嗣昌权谄免宗龙戇猥承其后偶不当意辄移积怒怒之时冬月已尽大司马考成用小故被重谴百寮震懼嗣昌军中闻之亦心动十三年庚辰正月楚师败绩于麻黄嗣昌归狱于抚臣方孔炤诏命逮治以荆南宋一鹤代之楚制府镇上游兵多下游稍薄而抚臣自以护陵为重分汉南属治臣王鳌永调容美土司增当阳遠安戍以备荆州而已提陵兵五千标兵一万五千专断德黄兼顾陵寝其败也无所辞咎故得谴而嗣昌亦戴罪然以初至军为法受过帝意不甚责也当是时贼分为三西则献忠负岷蜀楚之界东则革左四营豕突随应麻黄南则曹过十营鸛伏漳房兴遠【曹过寻从兴遠入宁昌在是年之腊月】我师视东略为缓河南江北自抚镇外借朱大兴卢九德为防应而麻黄千里委之郭金邦二三裨校以设防其京兵滇兵多聚西南议以左将军先行献忠之诛余可次第剪灭阁部乃大计兵食规形胜之地专倚襄阳为根本濬城外为三濠造机桥列横桓以启闭每门设一副总兵文移出

入讯诃验问立军府监以道臣张克俭储备甲仗累亿万诸道饷皆输之申严号令大会师襄阳之射堂斩后期者兴安路监军殷太白以殉所奏荐万元吉等起自废籍监诸道军元吉有识略委以军谋进止所言无不用闰正月檄诸道进兵左良玉于二十四日合诸军击贼于枸坪关献忠败走乃请从汉阳西乡入蜀追之阁部前调秦督率贺人龙李国安之兵从西乡入蜀于良玉则欲其驻兵兴平别遣偏师追剿良玉不从嗣昌与元吉计而疑之移檄良玉曰观贼形势似不能入川仍当走死秦界将军今从汉阳西乡入川西太兵多紫兴兵少万一贼从旧路折回疾趋平利仍入竹房将用何兵御之不则走宁昌以入归巫与曹操合我以大将尾追趋贼入楚非算也依幕府本谋秦督提兵入川秦府驻兵西紫我兵仍驻兴平此为正着量遣偏裨入蜀追剿此为奇着其详议以闻良玉报曰蜀地饶衍贼渡险任其奔逸后将难制且逆献被创入川则有粮可因回郾则无地堪掠良玉料之贼非万分窘急必不复窜楚境郑嘉栋前报折回吉家庄者此捍子手乃老一斗粟之残贼嘉栋误以为献耳夫兵合则强分则弱今已留刘国能李万庆守郾若再分三千入蜀即驻兴平兵力已薄逆贼折回能遏截之邪良玉所统乃剿兵非守兵若主兵不出战而战兵又代为守贼将何时尽乎今日惟当出其不意尽锐疾攻一经大创自然瓦解纵使折回房竹间人迹俱断彼且从何得食况郾兵扼之于前秦抚在紫兴抄之于右庸能狂逞若宁昌归巫险而且远曹献两不相下倘献穷而归曹其中必有内相并者可无虑也良玉已于二月朔涉蜀界之渔渡溪矣嗣昌得其书以示元吉元吉曰良玉初称入蜀之路定于西乡今倏易而大竹进退皆主之不复禀承督府何邪嗣昌曰良玉书词慷慨惟敌是求将在外不中制古也宜从之于时献忠营太平县之大竹河规取其邑以休士马良玉驻军渔渡溪之两日而秦督崇俭亦引其兵来防献忠闻两道俱至乃移营九滚坪以待我兵见玛瑙山险峻将据之以决胜左兵秦兵以初四日追贼于九滚坪不见贼部勒行伍指划形胜初七日始抵玛瑙山而贼已奔山巅结垒乘高鼓噪其气甚盛左将军下马披荆榛相险易周览者久之既而谓所亲信曰吾知所以破贼矣分所进道为三左兵当其二秦兵当其一令曰闻鼓声而上我所部兵或冲其中或冲其右而贺李二将从左路夹击贼置阵坚不可动我师奋勇鏖战贼溃坠崖涧者亡算追奔四十余里左兵斩首二千二百八十有七内有扫地王曹威白马邓天王等十六级皆贼将而张大经亦为官军所杀献忠妻妾九人被擒者七获伪金印一镏金龙棒一伪令旗令箭各八卜卦金钱二马羸千余头甲仗军资以数千计阵降贼将三百三十八人秦兵斩首一千三百三十有三降贼将二十五人人龙所将卒获帝赐熊文灿准抚献忠勅书别将收献忠大刀上镏天赐飞刀四字是役也左良玉功第一贺人龙次之阁部主调遣而秦督在行楚巡按御史汪承诏方差次其绩以上制府先被二月十四日诏书帝以阁部在行间须发白又调度有方赏罚明信所以劳勉切至发御前赏功银一万两赐嗣昌斗牛服御廐良马金鞍各二使者甫出国门而玛瑙山露布告捷帝大悦时陈新甲由宣大总督入为兵部尚书召见贺楚捷帝先免嗣昌良玉戴罪再发五万金锦币千端为军赏令新甲定诸将功格而急趣进军是月也楚将张应元汪之凤乘胜逐北十六日及之于水右坝斩馘九百献忠又走岔溪千江河蜀将张令方国安十九日与战复破之张令者故奢崇明降将年七十余能马上用五石弩中必贯革为贼所惮献忠乃由千江河之十二湾转入柯家坪其地崇牙错峙菁薄绵亘贼弥山漫谷依阻其中张令于二十七日分其军为五路负勇争利贼众我寡方国安支军后距取僂道得脱而令深入被围居绝坂之中猛气弥厉挽强持满屡奔贼营应以毙甚众而水远士渴赖天雨得济围终不解郾襄道张克俭犒军入蜀谋于秦督崇俭曰张令健将奈何弃之急呼张应元汪之凤从八台山进贺人龙从

满月蟾进三月八日过箐入坪楚兵先至张令方与贼鬪呼声动岩谷内外合势贼乃解去应元之夙功居多是役也张令以五千人当贼数万相持十三日力战得不没所杀贼亦已数千虽救自诸将人皆服其勇云当是时献忠既遁兴归山中寻自盐井窜兴归界上【盐井属四川○贺人龙李国奇高 等以三月初九日追贼及之于寒溪寺翼日再及之于盐井共斩首一千五百有奇贼目三人先后率所部降于阵已而木瓜渡黄墩两战秦楚蜀之师皆会木瓜溪斩首一千二百八十有二黄墩斩首三千】四月左良玉大军进屯兴安平利诸山连营百里诸军惮山险围而不攻贼重贿山氓市盐刍米酪其人有反为贼耳目者献忠收散亡养痍伤气乃稍稍振久之自兴房走白羊山而西西即罗汝才入宁昌道也初汝才之在宁昌其地阻江为险汝才与过天星分兵出羊头坂窥渡【二月二十四日】大昌参将刘贵击之半济寻犯巫山【三月十一日】石砭女将秦良玉盛兵雒门百子溪扼渡再缚筏巴雾河【四月初四日】秦翼明以三千人设守大昌游击杨茂选力战郤之既屡挫不得渡潜求附于献忠献忠之走白羊山即巫巴深险处掩息旗鼓转入转西汝才之声援渐近既至遂与之合献忠剽悍虽累败不以气下汝才汝才分士马以资之语次颇忧江险为难渡献忠曰不然立马江岸有不前赴者斩之其下争死鬪我师刘贵等皆退贼乃由鱼住溪渡江结营万顷山苦桃湾其别部阵于红茨崖青平寨归巫之间震焉督师在襄阳闻之曰二贼合西邮必倣急引其军出彝陵彝陵与巫山接壤荆楚之门户先是宋一鹤镇当阳以滇兵刘元斌控荆门以禁旅地势相为犄角督师标兵三万余人张伯鲸解饷至者八十七万幕府如袁继咸万元吉皆奇士有智谋故总兵猛如虎以白衣从征自效文武将吏一志专力贼且旦夕可灭乃嗣昌虚恢自用又烦碎无大略其上彝陵也偕幕士饮酒赋诗流连名胜酷好形家者术遇梵刹邱陇指兴替以访其验否举鞭于马上算之万元吉以为不急废务然亦未敢强谏躬亲文簿过于米盐反滋丛脞军行必自裁进止千里待报动失机宜偏裨驾驭难周辄经年无所调发将吏以之解体郅治王鳌永因关门共事之旧乘间言之终不见听【鳌永既罢疏曰臣目击督辅行间尽瘁举凤皖秦豫楚蜀诸抚分任之而不足者嗣昌独任之而有余但贼情瞬息变换檄文往返动稽时日比至而情形已变又须另请调度所以有经年不战之兵其将所自为出奇仅得玛瑙山一战若遵督抚之令则左良玉应守兴安无此捷功矣臣以为督抚之责成诸抚不必人人而授之机宜止核其条上机宜之当否可也】驻彝陵一月不进取华严第四卷谓可诅蝗已旱公然下教郡邑且以上闻朝士闻而叹曰文若其将败乎拥百万之众戎服讲经其衰已甚将何以战五六月间曹过再越巴雾河侵开县【开县失陷】郑嘉栋击之于仙寺岭贺人龙击之于马溯溪各有斩获【马溯溪斩一千二百七十九级】罗汝才同小秦王等东奔而过天星特过开县而西贺人龙李国奇又折回追之【过天星之突遇开县为闰六月廿日】当是时诸将士马居山谷中罹灾蒸瘴毒疾疫物故者十二三京兵之在荆门云兵之在简坪楚兵之在马蝗坡久屯思归多中夜亡去关河旱蝗人相食土寇蠭起秦有窦阿婆贼破名城杀长吏豫有李际遇等贼河汝之间多从之嗣昌乞恩请罪帝为发帑金五万军前营疗医药二万赈恤饥民于嗣昌传旨切责而已王鳌永缘议不合解任代以监军道袁继咸秦督崇俭老不任事谢病诏不许俾率郑嘉栋归秦留刘贺李三将讨贼秦之长武楚之罗田蜀之新宁大竹皆告陷嗣昌不得已规以便宜招抚为谕帖万纸散之贼中革左全营自归未防颺去王光恩素有善意并说其八营俱降见阁部犹豫不能专决久之八营之降者复叛七月中罗汝才小秦王混世王等自蜀折回兴山楚兵之备兴远者副将王允成王之纶等京营总兵孙应元等以十四日击之丰邑坪大有斩获【贼之折回也尚有满天星一连莺共五股贼在兴

山连营舒洞口初围香炉寨继走白草坪丰邑坪京楚官军击走之惟丰邑坪斩二千三百余级生擒五百余人亦玛瑙山之亚也】十六日小秦王混世王降惟汝才佚去嗣昌见楚地不足忧决防以八月二十六日出师入蜀嗣昌楚人不欲贼一骑蹂楚其初至军也即谋以蜀困贼势不得不先困蜀抚恐蜀之门户坚反而致死凡抚戏下之强者辄调之以饬他备抚邵捷春提弱卒二万守重庆恃秦良玉张令为左右手张令忠勇善战军中号神弩将秦良玉自将兵三万援夔城过夔一步即其石砮司守夔亦守家也知绵州陆逊之罢官归抚遣之按行营垒过秦秦冠带佩刀出见见左右男妾十余人然能制其下视他将加肃为陆置酒叹曰邵公不知兵吾一妇人受国恩应死所恨与邵同死耳陆请其故秦曰邵公移某自近去其所驻重庆三十四里而遣张令守黄泥洼固已失地势矣贼在归巫万山之上俯瞰吾营铁骑建瓴而下张令破次及我我败尚能救重庆之急乎且阁部驱贼入蜀无愚智皆知之邵公不及此时争山夺险令贼毋敢即我而坐以设防此覆军之道也【时又有降贼自言于邵公曰某降几日矣而公不从我计有疑我心乎邵曰军机大事汝新从贼来固不能无疑为郑重然且图而用汝贼曰吾作贼久恨失身欲于国家图报効故背以自归公若疑则速杀我否则当早用吾计贼大众饥疲乘之可殄灭倘有它贼以军粮接济者虽百万众无能破之矣邵俯仰从其防贼盛言山中贼所窖金银处以动诸将而又道上所遇皆饿殍无人色其死者剖其腹皆草树皮谓可信乃尽邵新军二万人以深入而皆为所没】无何楚兵于土地岭败绩先是监军万元吉集川将守巫巴诸隘而秦将贺人龙李国奇楚将张应元汪之凤张奏凯专使击贼楚兵自达州入夔营于土地岭而贺人龙逗挠不至楚兵多新募不习鬪献忠悉锐来攻应元等苦战不决贼分兵从后山下突入其营官兵哗贼乘之合围应元中流矢突围出收其兵稍稍集贼度巴雾河犹力与之争之凤走他道所将潘映奎没于阵余士卒从东平散回巴雾川之凤苦战久山行道渴饮斗水而卧血凝臆而死贼退屯圆渡坪元吉驰赴楚军命应元兼领其众楚蜀兵势皆危嗣昌惟以受降为得防九月过天星闻小秦王混世王之既降也亦请降求内徙嗣昌徙小秦王于房县过混于竹溪山中初嗣昌之用蜀困贼也蜀险且旷再远则松潘徼外诸蛮吾借将士力蹙贼而致之蜀蜀能守则守不能守而弃涪万松雅之间以陷贼秦兵断栈道临白水滇兵屯曲靖扼白石江我率大兵掩击其后驱入松潘诸蛮在豫楚取蜀为阱在蜀又取徼外为壑策固当乃贼谋尤狡觊嗣昌喜谀诡言畏督师天威诸部悉捧马足督师虑降者与行营杂处非便辄发内地安插以远之先时兵围贼久而大军反为贼所围嗣昌不悟川东道康四海郧襄道张克俭区画新附日不暇给贼得免死牌莫肯散自择便地连营数百里河南北大侵饥民就食襄汉者日数万贼因之阑入张克俭心忧之上书督府曰襄阳自古要区在本朝筦钥猷陵视前代尤重近者西河饥民云集新旧降丁逼处其间一夫叫嘯皆足致乱况秦兵以长武之变西归郧房军府初立降营碁置何啻放虎自衛紫汉西兴初无重门之备可不为之惧乎嗣昌报曰昔高仁厚六日降贼百万卒擒阡能故事可法也参军何怯邪于是嗣昌遣亲将至京师上进军状且曰臣嗣昌弩怯窃冀奉神灵扬威讨逆献指日授首然后扫除余孽拜见阙廷帝亦以功必成出其章示羣下兵都给事张縉彦言于帝曰督师专征以来所上章前后多不相讎玛瑙山献忠单骑奔逃已而突巫山掠巴东所在见告革左全营归命不数日皖将又以阵亡今谓过渠束手竹房漳保已无内顾泝归巫而上尽敌可期在督师定有成算迥非前事之比然臣不能不虑之也十月张献忠陷大昌先是万元吉驻巫山邵捷春驻大昌相声援捷春用其将邵仲光之言以大昌之上中下马渡水浅地平难持久乃扼水寨【阙】之观音岩为第一隘而夜义岩三黄岭磨子岩鱼河洞下涌诸处各分兵三四百

人以守元吉以兵分力弱为忧贼以九月先突观音岩三黄岭窥上马渡无备破之元吉急檄诸将邀之于谭家岭七箐坎干溪而张奏凯以专兵屯净壁捷春用罗洪政沈应龙二将兵助之已而献忠从竹坪突过净壁进屯开县嗣昌闻蜀兵溃取观音岩守将邵仲光斩以徇是时张令秦良玉皆败【张令性轻敌有贼防一骑于山呼其垒曰谁是张将军令易之跃马出贼曰若善弩今用相报矢中项以殪令宿将死艺川人惜之贼大至秦石砭兵亦覆没秦单骑见抚曰事急矣尽发吾溪洞之卒可二万我自廩其半半饩之官足破贼土官家用一箸一帚调兵者最急箸以能饭者毕至帚则扫境内出也邵见嗣昌与已不相中而蜀无见粮峒寨之人诘可信遂谢良玉计不用】令竟以死而捷春自收其兵扼梁山罗汝才自丰邑坪返走再与献忠合献忠以梁山河水深不得渡乃与汝才谋曰达州河浅不如自开县西走复东向而趋达州时方国安奔败引残兵保达之郊献忠至不敢与之争贼既渡遂长驱深入捷春退屯绵州扼涪江贼疾走陷劔州趋广元将从间道入汉中赵光远贺人龙拒之于阳平百丈二关不能进乃逾昭化复走巴西张应元合楚蜀官兵邀之于梓潼战小利贼返鬪被衄蜀将曹志耀王光启张世福等力战却之降将张一川张载圣俱陷阵遇害【万元吉命防一川妻子于彝陵】捷春涪江师遂溃贼屠绵过浮桥直抵成都嗣昌先以大昌失事纠捷春罪用监军道廖大亨代之邵抚蜀有惠政其逮也成都巷哭蜀王为引救不得卒论死十一月嗣昌进军重庆万元吉大飨将士于保宁以诸军进止不一立大帅以統之用猛如虎为正总統张应元副之率其军趋绵州诸将分屯要害而元吉自间道趋射洪扼藤溪以待贼贼方屯安岳之周里場谍知官军且至宵遁抵内江猛如虎选骁骑逐贼元吉与应元营安岳城下以遏贼归路十二月嗣昌在重庆下令赦汝才罪能降者授都司以下官惟献忠不赦有能擒斩者赏万金爵通侯次日堂皇庖餼徧题有斩阁部来者赏银三钱嗣昌瞠视咄叱疑左右皆贼勒三日进兵防雨雪道断再戒期视师三檄贺人龙骄蹇不奉约束初嗣昌忧左良玉跋扈人龙屡破贼有功私许以人龙代左为平贼将军贺大喜过望已而良玉有玛瑙山之功嗣昌礼重之如故顾谓贺将军且需后命贺不得意具以前语告左左深阻内恨而人龙徧中显谓其众曰阁部不足为尽力当献忠之败玛瑙山而走也追急遣贼马元利操重宝说左曰献忠在故公见重公独不之思乎公听所部多杀掠而阁部猜专无献忠即灭不久矣左心动实纵之去献忠在山中得收集溃亡左兵骄玩久不之击督师数移文责让于左贼窥知其故于所过要路故署其壁曰某日战又不到欲挑两人衅而乘之左忧阁部之闻而按之也顺防请亟战然其中实不用命万元吉雅知两将皆怨望进曰军心不一未可以战盍令前军蹶贼后军为继中军从间道出梓潼扼归路以徐俟济师此万全策也嗣昌有骄色曰贼易与耳焉用分军示弱邪是月也张献忠陷泸州泸州三隅皆形锐而面江止立石站一路可北走贼既走絶地元吉谋以大兵自南捣其老巢伏兵旁塞玉蟾寺蹙贼北窜永川逆而击之可以尽歼永川令戴尧云者先期遁猛将军询向导无一人应者元吉轻骑按行城中惟见丞簿一二人我师宿西关空舍不戒于火延烧民屋已而抵立石贼营先移秦师屯小市厢隔水而阵贼渡南溪返走秦兵隔水诡云追之不及贼遂越成都走汉川德阳元吉单骑至籍田铺贼渡绵河入巴州阁部先既诎监军谋不用将以十四年辛巳正月自統舟师赴云阳檄三军陆行疾趋追贼毋令他佚诸将乃尽从泸州蹶贼后贼折而东返归路尽空不可复遏猛如虎所将宁国兵止六百骑余皆平贼镇兵骄悍不法焚屋于永州掠马于仁壽皆其卒也惟叅将刘士杰深思立功诸军从良玉多优游不战今从如虎驰逐山谷风雪中军中谣曰想杀我左镇跑杀我猛镇时贺人龙兵已大噪西归阆外所赖止此一旅人心如此元吉深用为忧【诸将军会于泸州中军陈可立

拥纛牛头山饮酒奏倡乐以观鬪元吉令之赴敌背道驰去】贼之入巴州也自巴抵达逡巡及于新开正月某日我师追贼及于开县之黄陵城日晡雨作诸将请以诘朝战刘士杰奋曰吾四旬逐贼今乃及之舍而不击纵使佚去吾不能也擐甲持矛大丈夫独取献忠耳如虎激其众鼓而并进士杰所当摧陷贼大披靡献忠登高以望我师见无秦人旗帜而左兵亦携阻不前士杰孤军跳荡后无继者乃密抽壮骑潜行箐谷中乘高大呼驰下左兵先溃士杰及游击郭开如虎之子猛先捷皆战死前兵既覆如虎率牙兵苦战中军马智挟如虎溃围开冲突以出旗纛军符尽失嗣昌在云阳闻败顿足曰吾悔不用万叅军之言故败今引兵急归楚顾根本再破贼退回重庆传箭召溃兵顺流东下贼已席卷出川西烧新开驿置楚蜀消息中断襄阳尚未审知败问贼大队已至当阳郢治袁继威方谋出军献忠令汝才与之持自以轻骑一日夜驰三百里未抵襄阳先遣刘兴秀等二十八骑伪为官军持军符令箭日晡叩城门曰督府调兵守者合符信启关入夜半贼从中起放机桥纳大众城陷郢襄道张克俭推官郢曰广死之襄王被执献忠坐王堂下属之酒曰吾欲断杨嗣昌头嗣昌在蜀今当借王头使嗣昌以陷藩伏法王其努力尽此酒遂害之嗣昌出蜀抵荆州沙市之徐家园方图告败曰帝待我厚谋再举俄闻襄阳破遂不复食乃李自成陷雒阳福王先以正月遇害报踵至于是抚膺大恸曰无面目见帝以后事付元吉伏毒死焉帝闻其死也且恨且怜之得元吉所上死状叹曰督师功虽不成志亦堪悯宜用辅臣礼归葬既而诏谕羣臣嗣昌二载辛勤一朝尽瘁虽有玛瑙山功不能掩其闯献醵张两藩罹祸之罪下所司防勘以闻中外皆知帝意引傅轻典即议功为解帝可之【中军会议嗣昌中外才知有二府三州十九县之失前此兵刑都科俱不知以密本不下部也】呜呼当嗣昌在军中薛国观早得罪因召周延儒为首臣乃先后并坐法赐死余相虽或枋用不次其任遇皆不及嗣昌继起筦中枢者傅宗龙使过阵亡陈新甲失职弃市才亦远出其下惟张国维冯元颺相继受任【元颺初以侍郎署部事帝问谁可大司马元颺以史可法李邦华张国维三人对帝以邦华在戎政为兵士所恨而南枢不可无可法故用国维国维到未两月而得罪即以元颺代之】国维再下狱见释元颺被帝知遇最深因病独得放还【癸未年袁时中被擒帝念旧枢臣冯元颺调度功特发上传加太子太保病痊即与起用】而张缙彦由庶僚超拜贼已躡秦蹂晋逡巡乎畿辅矣其争夺情诸臣黄道周防毙诏狱复原官范景文召用遂擢为相帝亦深悔前挠廷论专任责成之非然十六年遣辅臣吴甡讨贼面谕以自杨嗣昌死后廷臣无复能督师者以此知君臣之际其相知为深也【十一日召辅臣语曰朕昨夕梦故辅嗣昌稽顙庭下曰臣鞠躬尽瘁死而后已为诸臣不公不平连章见诋故归诉皇上朕语之曰如某疏犹公平否嗣昌摇首曰亦不然语毕天颜惨恻久之见笔记】张献忠陷武陵发杨氏两世冢破其骨有血自二年彗星见杨鹤节制三边受流寇降父子遂与寇祸终始鹤有弟曰鄂辛未进士帝以嗣昌故遂用为兵侍郎抚蓟后改川湖云贵总督而国已亡矣

外史氏曰嗣昌之败在乎用良玉而不能得其心信元吉而不能行其计然皆以筦枢失防有以致之不待督师而后悟也嗣昌实畏讨贼而引文灿以为已贰恐其颠覆乃曲意护之初以良玉威名足仗欲文灿倚以就功不知其短于驾驭谷城之役良玉既显相齟齬嗣昌终信文灿以左右其谋比受降事壤又不欲显其是非故薄罗山之罚而反加委任良玉有以窥见其微且从而心轻之矣区区一平贼镇印谓足以服豪杰而得其死乎元吉见两帅离心其意实主于不战即嗣昌非不知持重万全顾其生平本不识用兵竭其私智专以揣摩迎合日举

六月荡寇之言以摩切阃外明知其势之未可冀幸身不在行姑以之塞帝意而规自脱既不得已受专征去左右在万里之外自念往昔在帝前谓智略辐辏功在反掌今出师经年糜饷百万情见势屈责我者且四面而至矣故虽将骄卒惰终侥幸于一决其战也初非辞元吉而别有成算斯其所以败也【嗣昌奏臣受理臣交代之兵新收王国宁之兵与续调辽兵合之京营勇卫大同之兵一月约饷十万余两又楚郢二抚派饷未足于理饷内通融支給约每月楚抚支二万七千郢抚支一万三千合之前数共为十五万】元吉之为人果达精警其从嗣昌也初无意于富贵特以识事机习劳苦将乘机防以垂功名于竹帛其自保宁进达州贼烧绝驿置七百里不见烟火单骑崎岖箐铙间舍骑放舟始及大军故一见督师即请分兵以为后距开县之败元吉亲至战处为文以祭阵亡将士刘士杰等哀动三军在防门收召残兵登白帝以望贼骑歷歷在山谷间我师川湖诸将反出其后无一人御之者不觉拊髀流涕而痛吾谋之不用也嗣昌之縊于沙市虽曰无面目以见天子亦缘良玉因其败平牒倨傲不复存节制之体故愤而自裁元吉畏祸未敢深言又逆揣帝防知在元臣正终援春秋之义微之而已帝览表歔歔亦以监军有劳败非其罪后之君子追论其事者于君臣朋友之间有三叹焉呜呼嗣昌一生心力不专用于办贼迹其议论奏疏亦可谓之能臣而机变有余忠诚不足国事僨而身亦从之小雅节南山之诗曰不愆其心覆怨其正此秉国成者所当引以为戒也

附纪

当嗣昌之讨贼于楚蜀也秦中大旱土寇蠭起长武被陷环县以借赈杀乡绅白水以征粮杀县官皆岌岌为长武之续贼首窦阿婆闯子黄三鹄等为雄窦阿婆名窦开远咸阳诸生也十三年六月三日贼同其党渠魁百人自桃虢川赴料峪关汉羌总兵赵光远率诸军追之贼初据关山岭继据张家后山皆为我军所夺监军道伍右文催诸将赵大 鲁文彬党威疾击之于西雒峪闯子惧而逃于牛圈子窦阿婆谋走于娘娘山西遁我师觉之先伏山之左右以待文彬威夹击驱贼贼势急奔山大 迎头截杀窦贼在阵被擒闯子来救不及东西奔溃凡擒斩共一千七百有奇运筹则伍右文力战则赵大 为上鲁文彬党威次之秦抚丁启睿以闻

李长祥曰阁部之驻彝陵也下檄曰贼东走大宁大昌山彝陵下荆襄者我当之贼西走紫兴房竹入秦者左良玉当之贼西入防关者蜀抚邵捷春当之蜀之险在防门而大宁大昌与竹溪房县联界有三十二隘口阁部以为隘多而力分不如厚集兵势以专守防门弃大宁大昌以啗贼我师四面蹙之以决胜邵抚曰令甲失一城者抚坐之且有诸隘口不守而使贼得入是阁部杀我也欲分兵出关坚守三十二隘阁部乃命猛如虎以兵至防关助扞御焉时张令死矣四川总兵为方国安隘将杨茂选覃思岱者有骁名而不相得思岱潜茂选于邵抚曰通贼捷春召令计事而戮之即以茂选之兵隶覃部茂选之兵怨覃相率骤委去贼遂从此一路入既入诸隘兵俱溃贼乘夜斩防关防将士尚卧未起遂惊乱方国安兵败收残卒数百骑过达州达州设守严献忠从白马渡过江壁达之西关仅三千人已而阁部亦率其兵至有数万人相守旬日未交绥献忠伪为阁部之旗帜穿其营遁去阁部引兵追贼已过蓬溪绵州而攻成都再往泸州而阁部追及贼又掣其兵转至达州开县我师与之战而大败按全蜀形势防门去达州八百里而开县在其中间长祥达州人亲拒贼设守其言极推重嗣昌而专以邵抚为失防虽议论稍偏未必无所见也

内江王于蕃曰当武陵视师献忠由大宁大昌开县达州以入绵竹界遂逼内江内江有土司家将毛文者设守贼至文大败之于东瓜崖杀其渠魁曰曹四献忠乃偃旗鼓疾走成都成都城形其下皆磬石惟北角楼用土填筑少瑕贼夜至穴城数处将穿矣觉之城中出董卜蛮者与之战献忠大败杀其卒万人乃遁走其后甲申八月之九日成都陷没贼仍从北角楼以入尽杀蜀人所以报董卜蛮之怨也邹漪曰世之议武陵者指摘防无完肤予心以为太过及读其中枢奏议又未尝不服其才亮其心也武陵尝上四正六隅一疏谓下三个月苦死之功了数十年不结之局及为督师建圆盘议防滴不漏谓灭献一股以全胜之力制闯可无余孽若果其言得行釜鱼阱兽贼自可平无奈抚臣邵捷春未必同心镇将左良玉全不効命卒致剿局无成中原糜烂杀藩王隳名城而督师以身殉之其亦异于后之受贿偷生欺君伏法者矣特以处分漳海一事为不理于众口然观献忠初纳降时遣腹将薛姓者入京朝士无不婪其厚利而不受献忠钱者止武陵一人亦可见其清执矣迨其后两世之棺遭贼发掘襄王之死也贼语之曰吾欲断嗣昌头而嗣昌在蜀今当借王头使嗣昌以陷藩伏法则贼之致恨于武陵者极至不可以见武陵之心邪夫元和讨贼全倚裴度建兴恢复独任武侯武陵受帝知遇亦欲为国宣劳独是荐熊文灿为首功绌洪承畴为首罪功罪混淆人心不服而开县之败由不用万元吉之言此则有难为武陵解者然予友李翰林长祥推许不啻口出而杜贡士濬亦言其才可用岂阿私所好乎至以加饷殃民为武陵罪则剿寇需兵用兵需饷前督师卢象升早已建议请行矣世之君子未尝设身处地而苛求不已恐未可为定论也宜乎思陵有云功虽未成志亦可悯武陵亦可瞑目于九原矣

绥寇纪略卷七

钦定四库全书

绥寇纪略卷八

国子监祭酒吴伟业撰

汴渠塾

洪武三年大封诸子列圣相承家法建置维屏迄于季代二百八十余载或除或絶存者三十王太行以西曰晋曰沈雁门以东曰代覃懷以北曰赵曰郑曰潞河济之间曰鲁曰德海岱曰衡洞庭以南曰岷曰荦曰吉曰桂豫章以西曰益曰淮苍梧界蛮徼曰靖江此十六王者所封夔絶河山或仅以免即先后被兵中十余年获休息焉君子于其事也始之书终之书非不一书而足也大梁溯洛入汝惟四王周高皇帝第五子封开封定王橚以下十传而端王之子恭枏绍封为周王唐高皇帝第二十三子封南阳定王桢以下九传而裕王之子聿 绍封为唐王崇英宗第五子封汝宁简王见泽以下七传而昭王之子由櫜绍封为崇王福神宗第二子常洵封洛阳为福王又封其次子由崧为德昌王关中絶陇道惟五王秦高皇帝第二子封西安愍王棣以下十四传而【阙】王之子存枢绍封为秦王肃高皇帝第十四子封甘州改兰州庄王模以下九传而宪王之子识鋹绍封为肃王庆高皇帝第十六子封庆阳改宁州又改宁夏靖王防以下九传而宪王之子帅铎绍封为庆王韩高皇帝第二十子封开原改平凉宪王松以下十一传而敬王之子亶 绍封为韩王瑞神宗第五子常浩封汉中为瑞王自鄂达郢属之蕲春惟四王楚高皇帝第六子封武昌昭王桢以下八传而恭王之子华奎绍封为楚王襄仁宗第五子封长沙改襄阳宪王瞻墉以下八传而靖王之子翊铭绍封为襄王荆宣宗第七子封建昌改蕲州宪王瞻垌以下九传而定王之子慈 绍封为荆王惠神宗第六子常润封荆州为惠王梁山跨劔阁惟一王蜀高皇帝第十一子封成都献王椿以下十三传而恭王之子至澍绍封为蜀王冠初起西延闔镇反庆肃国被边地唇齿而临洮宁夏之兵疾讨贼不与于乱韩恃固原为捍蔽秦有金城之固瑞有云栈之阻秦将吏既破贼则桐封以草窃为不足忧崇祯之六七年贼渡河再入关往来豫楚而窥蜀诸侯王之被兵者其鬼神以震扰阙其禋祀田畴以莠秽弃其耔耘民人则辛苦垫隘罔敢宁居聘问则淹恤雍阙失于期防卒至乎枝叶凋本根拨底丧亡而莫之救也迹其形势楚悬絶大江则缓周秦蜀通都居重则缓荆处蕲春非上游肃洮河之阳庆贺兰山下远则亦缓唐与福负秦岭距关崇涉于淮泗韩据泾渭西控陇瑞綰梁益出褒中襄惠通庸濮而犍之江七王不幸当天下之冲疆场日骇大惧社稷之颠隕以耻王室故数以贼情上闻瑞王之言曰臣赖先帝休德获奉西藩未朞年而寇至比晋贼再渡河阑入汉兴七年正月十五日破洵阳紫阳平利白河继陷督臣洪承畴来救单骑布甲披荆棘入险阻搜捕山间寇臣助犒军及赈饥银七千余两贼始奔遁近境以宁既而凤县再陷蜀贼入秦州楚贼上兴安六月自兴安西乡犯郡界游击唐通凭汉江力拒不能渡贼方东钡泽北据凤西扰沔县宁羌南郑孤城在万山絶谷中贼四面至覆亡无日臣于肺腑至亲近也于藩封至僻陋也于寇盗至危迫也惟陛下哀怜韩王之言曰贼以七年九月初五日攻平凉东西两门交急贼已从东关之北攀而上都司李应孝刘添禄手击贼杀七人膊之擲其首城下贼乃转而东自辰薄盱行始尽崇信灵台泾州相继失又转入平凉之郭为李应孝所却而镇原华亭咸被围平凉属城十破其五邠干汧陇邻封钡略殆遍声言芟夷四境即

平凉在掌握无所逃国初设平凉衛屯田碁置列三百寨官二百军三千有奇今仅存庭羸百十老卒何以守前一年皇上念潞王苦寇急增设一叅将兵三千人即潞州衛屯粮充饷臣愿以韩比潞邀亲亲之恩焉初贼才过河入豫楚也雒稍偏宛汝荆襄各有警而荆州当阳先陷故惠王奔命告急南阳城庠薄唐王捐千金谋修筑太守陈振豪弗授功又与王因他事齟齬王以为言帝震怒逮振豪下之理王请以陈永福为叅将亦援潞事以比帝弗许八年冬贼再犯南阳王又奏曰臣有庄田数百顷为朝廷恩赐及臣祖父之所封殖以十月十一日之交贼燔烧聚落储侍略尽守舍辅国将军顾煜遇害其母梅夫人重创死贼往来瓦屋石桥臣祖坟园咫尺系臣心腑旦夕靡宁南阳恃鄙而不警备臣出私财蓄火药布渠答贼是以避弗犯而焚我郊保今七月不雨二麦未艺臣乡沈家冲饥民揭竿有平林下杜之志可为寒心又曰臣府护衛千二百人近制以其半为汴梁班军番直给抚臣以下由使甚无谓也惟明诏念臣困屢以全军见还臣得赖国恩周庐击柝逖斥堠无恐帝报之曰南阳班军番直祖宗朝定制已久朕不敢变诸可以为王捍御者不爱于王当帝之从信邸入也笃宗庙厚同姓以崇重诸侯之礼郡县吏弗拙体于王者王得自言即所持非是帝辄飭天下法以右王帝又数召见宗人遴其才擢之官欲以通宗祿之穷而变其制其后上书言事得乘置至京师日益众或非所宜言帝亦浸厌之不能有以禁也帝发金匱书得高皇帝制曰宗室子孙入为中朝官者得以其阶换授有司议者曰将军中尉皆一品如此即三公九卿一朝而盈廷者数百人非所以为法帝拂然曰亲亲任贤古之道也何不可却其奏再详之有朝士显谓仪制郎吴之屏曰君胡不以有唐故事告上乎夫入为卿士出为牧伯此三代制唐室诸侯王兼官借职不必以其阶如曹成王者传称其为叅军刺史可攷而知也今宗人坐糜国储奈何不讲求通变于当世可施行者而专以固陋逆上意吴愕眙弗应宰相大僚无一人读书识国体者以此大不慊礼侍郎陈子壮署部事主覆奏遂欲以守官坚执为名高各藩皆知帝意所向懷廷论切弗敢争而唐王独贻书子壮相驳难王素辨博喜文词其书称説典训援据经传皆有本廷臣顾弗及知特以诸侯厉锋气持异同为足畏而已帝寻恶子壮疏词强诤下之狱众口惜子壮者辄以尤王王亦浸骄薄公卿为不足重当高皇帝时诸王得巡行所部革除后网渐密京师所置吏握其事禁私车将从轻嬖出即送丧至诸坟园非诏令不许南阳既寇冲八年后弥甚王尝望烽火接天思海内且大乱终日守空宫对仆隸拊髀太息曰安能郁郁效庾涓死此下乎中州督抚大臣见诸藩各以轻重逼寇患周王好行其德福王日闭阁饮醇酒崇王奉浮屠战守事皆听将吏所为而南阳日陈兵自衛得材武称然王血气方刚恣自用又不能防其宗人过浸淫上闻非真有淮南济北之心伍被开章之计也帝既挠羣下重骨肉渐闻诸王怙恩德骄盈不自简束南阳要害地而王建请转广书辞不逊顺失藩臣礼倾侧扰攘之际恐有赤睂樊崇平陵方望詿误王以成狂狡之谋意不能无纤介防都门有急王请提军入援事不行廷臣辄文致其罪帝乃下诏废为庶人禁锢之自此诸藩懾息不敢复言兵事矣帝爲讨贼需饷歳百万民力大屈有司捐薪俸有纪录民入钱佐军者假清卿秩优之下诏褒美风示海内焉武清侯李诚铭者慈圣皇太后侄也先朝待外戚有体太后母天下诟肯金钱私其亲熹庙失御累朝所积无訾省有传其在李氏宫省事秘人莫知侯有孽子其母微家众不以为兄弟齿侯亡争财忿闻告其兄藏禁物精鏤瓌宝累万万帝召见侯长子谕令输助国以自为名固对曰无有因发怒稍迫趣之亡何得病死帝追感先后取田宅还之余弗问【诚铭长子锦衣百户李国瑞次子李国臣孽子李国正国正奏庄房地土金银外它珍宝数百万帝命遵吉解部以襄城工国瑞娶于新乐又与嘉定为婚姻故新乐太夫人及嘉定伯奎皆为之请帝弗许后以慈圣

凭语于皇子而免】时有上书者曰诸王跨土连城衣租食税此皆县官力也今天子忧劳日昃苦征缮之不给王高枕而王一郡天下有急王独得安耶愿下明诏遣近臣谕防其上国帑以贍军用帝曰朕以方内不靖为诸王忧维王骨肉兄弟共吾一体诗不云乎胙之罄矣维罍之耻其诏有司弗复言久之卒莫应国初亲王禄五万石后改为一万石秦晋楚蜀地相埒周于后徙封皆极天下膏腴商贾百货所臻殖其富比京师万厯中人传楚王名他人子为子后嗣王姊张郡主索货财不能满宗人相告言【楚恭王无子取舅王大之子子之其家亦取家人子一人以进乃后封通山王者也恭王长女张郡主为讨芦洲不应又宗人双桥负王府货五百金被锁郡主请宽不从怒而发其事】帝遣官即讯王行金累亿万事得解楚坐此少减耗而四国俱完他王虽高帝子不及也文皇靖难后自言我子不得与先帝子等禄不及十之五累圣所封后亲属渐以疎即恩赉亦浸薄惟神宗四子帝叔父最亲瑞惠桂在熹宗朝始之国开邸之日浅土瘠而多故天下皆怜之独福王在兄弟中莫得以为比福王神宗之爱子也母郑贵妃最幸王皇后无子光宗于兄弟居长系中外心帝意亦素定第贵妃早贵顾天下有出郑氏上者即望虽至尊亦两难之仗廷诤力稍自强浸寻乃日为离间诸大臣调护万端元良既册命而四子同日出阁恩宠惟均凡以为郑氏也福王大婚费三十万营洛阳府第二十八万帝非贵妃不寝食妃一子虽长犹不离抱闻其将遽离日夜泣请之国日期者数十百奏置弗省最后妃弟子郑养性亦言之虽非至诚顾以太子名号久正帝春秋高久病不乘此时早就邸为王富贵计何庸复待乎妃亦心动言之帝不能恋恋母子情独办治国装宜厚帝喟然从之当是时海内全盛帝所遣税使矿使数十人月有奉日有进广南明珠滇黔丹砂空青宝石豫章磁陝西异织文毳蜀重锦齐楚矿金矿银他搜括赢羡亿万计名人主私财入贵妃掌握拟斥十之九以资王诸宫人中使窃言曰王本共天下此不足计也特为下诏赐庄田四万顷所司争之力得减半中州腴土苦不足度山东湖广界以充王又奏乞江陵故相所没产江都至太平沿江荻洲杂税并四川盐井榷茶银自益旧制王府田听民占而征其赋王左右劝王多规肥饶地入府为永业既则伴读承奉诸官假履定步亩为名乘传列旌旗笳吹所至索舆阜饩廩无算田之良楛租之多寡胥悬其口常过汝州擅杀人山东江楚之间富家忧攘夺农夫疲供亿天下骚动其请福府食盐也于洛中设邸阁中使至淮扬支王盐一千三百引干没要求辄倍中州旧食河东盐有令防非王店所出不得鬻淮南商开中既沮晋引复滞九边军饷无所资帝悉其故命换给长芦然去洛阳远以为不如河东便弗肯改自慈圣登遐未两月而爱子去膝下帝忽忽不乐瑞王年二十有四婚未成惠桂齿相亚无选择命羣臣交章叩阁率寝遏而福邸信使通籍中左门一月数请朝上夕报可四方奸人亡命之徒探风防走利如鹜闵不畏死张差庞保刘成之变缘是而生然两宫慈孝无间王亦专奉已无所睥睨讫于三朝继統骨肉晏如原本祖宗家法之善而光庙因心笃爱为卓絕已及崇祯中王失神考久贵妃亦前歿内官宫媼为王中调京师者多失势老病死河南大乱王于国家属尊地近在宫中时防夺宗独性不喜宾客智谋奇计之士莫进乎前所好惟妇女娼乐中外为不足忌然终用败十三年河南大旱蝗人相食王谨录籥牡不忧念宗人百姓援兵之过洛者口语籍籍或骂道中曰王府金钱百万厌粱肉而令吾辈枵腹死贼手南大司马吕维祺在城中闻之惟以大计动王王不用先是秦大破李自成于潼关原余众散略尽自成窜汉南秦兵蹙其北左兵扼其南窘不知所为伏一年有余不复出食且尽谋自经养子李双喜止之是年秋自成令军中尽杀所掠妇女以五十骑突围走由郟均向伊洛河南饥民相率归之复大振十二月李自成陷永宁杀万安王采熊耳以西民保聚山泽者连拔四十八寨遂陷宜阳十四年正月

壬寅黄雾四塞日眚无光河南分守道王 昌率邑绅警备总兵王绍禹偕刘罗二副将引其兵抵洛王召三将入赐宴加礼出糲醪犒军十七日绍禹请以兵入城王笈阻者三不可止刘罗二军背东南关而舍薄暮有叫呼声束苕烧土门诈云逐贼抵七里河与之合十九日贼至罗用其火军反攻东城见乘障有固志护保者讯应实报曰城守严冯太守【一俊】守南王兵备【 昌】守西张知县【正学】守东王总兵暨衛推官【靖忠】主行檄而西北陬为衛分地贼命其下向西北攻二十日王见事急出千金募士縋而出用矛以入贼营昏时贼渐退夜半王绍禹亲军反从城上呼贼相笑诺执王 昌属刃于其颈口噤齟索饷绍禹从旁解军以手推之曰此岂老总兵当言时邪挥刀杀守堞者烧城楼开北门贼入王逃匿民舍中明日贼迹而执之道遇吕维祺年已迈为贼反接奋其首视王谓曰王死生命也名义至重无自辱王瞠不语寻遇害贼踞王宫醺饮荐王于俎沟其血裸鹿醢尝之曰此福禄酒也维祺大骂贼死之有两承奉伏王尸哭贼摔去承奉呼曰王死某不愿生就若乞一棺收王骨即齏粉不恨贼义而许之桐棺一寸载以下车两人即其旁自缢东关迎恩寺僧道济者郑贵妃所剃度以替王入道者也乘贼间舁其槨止庀下祠而哭之审理李春茂典膳张守贤典乐刘文魁縋城遁世子亦走免遇官兵疑腰有宝物裂其裳裸露道旁得一护衛军牵挽过河庐于孟县访求福王妃尚在相见不复识抱持哭初贼之入王府也珠玉货赂山积装縑囊负任以入卢氏山中发王府中金及仓粟大赈饥民时杞县人李岩术者宋献策起从贼教自成为好言给众曰王侯贵人剥穷民视其冻馁吾故杀之以为若曹令饥者以远近就食男子二十以上愿从军者月食四十金趨敢能为将者倍之从我可富贵无为交手死民奔走赴之者百万烧王宫火三日不絕用雒阳掾邵时昌为伪总理俾守城实弃之去也豫抚李仙凤于二月十日至河南府取时昌及从逆张旋吉以下十数人梟悬之称恢复功其道府推知等官皆在惟白尚文死不得其尸云已为饥民所噉食矣叛将罗泰刘见义不知何以见获伏法王绍禹初传死于兵后胶致京礫于市事闻帝震悼辍朝三日泣谓羣臣曰王皇祖爱子遭家不造遘于凶其以特牛一告慰定陵特羊一告于皇贵妃之园寝河南有司改殡王具吊褻世子在懷庆授馆餽餐备凶荒之礼焉【帝发御前银一万坤宁宫四千承干宫三千翊坤宫三千太子一千又慈庆宫懿安后银一千慈宁宫皇祖宣懿康昭妃银五百皇考孝温定懿妃五百俱着王裕民冉兴让叶高标赍往以慰防福藩世子】呜呼春秋之义大责帅以上相专征之重而亲王不以其道终君子谓督师之罪无所辞矣夫洛阳周王城自汉以来都之三川天下之中地四达善战者所必争嗣昌乃专力于郟襄而缓备于京洛贼因抵隙蹈瑕而王绍禹罗泰之军得以动于恶乃道路所传有谓两王继陷福隕而襄随之者帝与羣臣弗信也嗣昌之将行言于帝曰臣请以襄阳为根本其规度襄阳城也仞深沟方洫而三环之造飞梁设横枢陈利兵而讥诃非符要合者不得渡嗣昌虽移驻夔峡军资甲仗在焉诸将左良玉以下并帑于城中江汉间列城数十倚襄阳为天险贼之得志于洛阳也移师汴梁百道攻城者七昼夜周王出库金五十万资守陴者而特悬赏有殪一贼者予五十金士踴籍大呼击贼贼未退同时南阳汝宁皆午道疲敝唐新立崇仪堞宫垣以守帝诘指念磐石诸宗曰秦蜀遠楚与豫接壤而荆僻处江介一州当有虞心襄阳宿重兵即惠邸在郢中可无恐况襄王乎一日御武英方进炙咄咄顾左右问汴梁云何忽宗人丞传襄府福清王有表帝推案起曰果尔襄王真不免矣福清王奏曰臣常澄襄王之次子也臣藩奉国厚恩世守赤社不意二月初四日夜半南门火一城糜沸传曰监军道家丁反臣父殿庐火亦起融风吹之延熱万屋臣睡梦中闻人马声飞鏃着臣头目见城中兵亦与格鬪天明贼大至太守王承曾保臣及臣弟进贤王常淦突围出臣遣人

探父动定始知初五日被贼执至西城楼杀死放火烧城肢体为烬抬头髑骨数寸以归臣一恸殒绝臣宗弟贵阳王常法于西城门外被杀臣兄已故世子宫枢尽焚杀死兰阳王母夫人徐氏太和王妃郎氏宫人李氏等四十三口臣父国宝内官张进喜投井得存臣兄襄世子常添先于崇祯十三年十一月二十五日薨妃聂氏继逝臣父前经赴告道梗未奉愍纶痛念臣父托体王家没身贼手臣不能相从灰土惭负天地惟皇上早殄此贼俾微臣雪父兄暴骨之恨帝览之感动命所司丧葬一如福邸礼【襄王追谥忠王葬城西青安山】拊几叹曰襄洛天下形胜而襄建瓴东南宪王以仁宗爱子徙封于襄有深意襄亡陪京必震恐且曰朕为天下讨贼浹辰之间两王皆以国毙是天厌我家而剪弃其子孙也不然贼何以至此顾疑杨嗣昌独无奏久之知张献忠邀杀阁部解饷官于路窃其文书传箭以入城嗣昌所积五省饷金弓刀火药数十万及守兵数千人皆归贼洛阳国帑而襄阳军资两藩陷闯献遂不可复制嗣昌在重庆闻乱返荆州将谒惠邸王命阎者谢曰先生愿见寡人者请先朝襄王嗣昌惭乃缢是年东宫田贵妃薨妃帝所爱幸生两男皇五子早殇永王年少帝感天下乱凄怆骨肉伤怀有老宫人及见定陵问以宫中往事称神宗晚年王皇后稀进见福王辞之国出宫门召还数四期以三歲来入朝大渐时顾视贵妃用洛阳为念因言孝恪皇太后病笃光宗请防得往省孝恪目已盲两手扞太子欲有告光宗遽曰皇父郑娘娘待儿子厚今郑娘娘长御随以来孝恪悟其意啮指曰我所尝备极天下苦儿知之足矣复何言遂诀光宗即位之三日悬母画像对之拜且哭防宴驾无人言贵妃时事者果母子耑宠擅天下邪以今观之亦何益帝为歔歔起周皇后居坤宁宫宫禁礼重太子定王既出阁非帝命不得朝一日帝坐便殿太子前致请案上有急奏河南寇以某月日破某城而上叹曰若不知得几见而母而动关我乎今后弗复泥常也宫中所奉宣懿康昭刘太妃者神宗妃嫔中推谨厚抚爱诸王帝以主慈宁宫礼之如太母常朝歲节毕见帝就便坐俄欠申偃别榻太妃戒勿惊命尚衣谨覆之左右植立以俟顷之帝觉乃起摄衣冠谢曰神祖时海内少事至儿子苦枝梧多难两夜省文书未尝交睫心烦懣辄废餐自以年才逾壮为国事磨耗蚤困劣在太妃前惛然不自持一至此太妃为之泣下帝亦洴澜者久之诸宫人莫能仰视【刘太妃以十五年薨年八十有六】帝之忧汴急也寻闻围解乃由王故得全则大喜既下诏褒王且加劳曰此高皇帝神灵悯宗室子孙维城莫固启王心而降之福也又以其意谕秦蜀楚诸藩曰王不鉴洛阳已事乎苟能如周王城何患不完寇何患不灭先是肃王亲庙不戒于火祐主牺象皆亡贼登臯兰山涉干盐池入庆藩国界荆王见革左诡降欲与为好召入宴盛帷帐陈女乐具百人之饌以飨兵见者皆忧其啓寇心【荆王尝戴小帽过酒肆茶坊游戏曰如此世界且图乐耳】其它王初因遠不及寇皆以书来省难比李青山蠹戾于济北吕瘦子跳梁于湖南益王【益王端王十一世孙定王由术之子】亦称建昌妖人密教实繁有徒江湖海岱亡命蠹起而临蓝平凉乃云宗人通贼【长沙城内有谷城主拨置奸党杨吐虹等为贼内应】帝以为此同姓深耻皆由诸王平昔不能树之以德董之以教故穷奇鬻鬻弃亲即异生其祸心论天潢支属惟周为睦故惓惓以周王为宗室仪表周自定王启土宪守其共德而加之以文东书堂集古法书手自临摹勒石暇则制乐府被新声梁园士女歌之飒飒乎盛世之响焉高皇诸子蜀献王好学帝呼为蜀秀才妙选名儒侍讲幄缮写购藏图书甚富而周有中原文物之盛比肩俪美稍欲加尚之万歷初周镇国中尉睦防为宗正招延通儒讲串经义以教同姓诸生作五经稽疑帝系世表竭四十年之力访求遗书牙签识别登万二千五百余卷自大内秘本所未有者西亭竹居悉丹铅雠勘西亭即中尉竹居者其子也王即赵宋故宫为寝城南有繁台遗址四方贤士大夫曳裾来游

比于相如严助它王小子侯鸡鞠狗马多豪少年之戏独汴梁宗人贍文词被服娴雅左右列敦卣樽壶丹青竹素在昔高皇剖符之日备物典防申之以训词分之以彝器百年有道长诒谋燕翼子孙多彬彬三代之风诗曰世之不显厥犹翼翼其周宗之谓乎夫国于天地命祀山川河与崧高周之望也周之始封即忧河圯而迁洛寻复返旧都歲有事于河至端王未载发秘记读之曰王室将衰河决为害王告其世子以为大感曰后二十年必验今王立寇难作河益南徙匠人置淮水形以测望地平河身高出王殿檣者尺有二寸每春涨啮隄吏民刑牲沈璧走马传筹报水至何所与烽燧等自汴梁受围帝以中原为急用丁啓睿为督师赦傅宗龙用为秦督擢巡按高名衡代李仙凤为豫抚九月宗龙兵败死于项城秦抚汪乔年誓师出关于襄城被杀自成乘胜围南阳总兵猛如虎战死十一月四日南阳陷唐王遇害于麒麟阁【唐王之遇害也有湘安王尚在帝令附近州县居住又唐王裕妃张氏颠沛居襄阳有诏抚按官护衛供膳俟修整府第迎养旧邸】十二月自成陷禹州州徽王故封地王废专城太康王以下七郡王多死二十四日李自成引罗汝才之众再围汴梁高名衡偕巡按御史任濬总兵陈永福为城守丁啓睿在许州不能战入汴梁避贼周王尽出库金犒师被伤者与杀贼同赏贼冲车撞击负户穿穴城壞二十七处皆距跃可上坦如大達永福率吏士力鬪贼飞火发机洞胸达脇爱弟亲将碎于背后终不为动矢射自成中目手防巨礮杀其巨帅上天龙等擐甲四十昼夜须眉焦灼指血渗漉生馘三十三人斩一千七百十有八级城乃克全贼以十五年正月十四日退屯朱仙镇三月癸亥贼复进为攻城折伤士卒遂起长围期以必拔帝先起孙傅庭为秦督至是更用侯恂率援勦官兵救汴左良玉壁于近境憚贼弗敢击汴梁食尽人相食九月十五日河流骤决其声如雷水沸郁数十丈王露次闔閤七日督师侯恂率总兵卜从善以舟师迎王王与二妃世子后宫贵戚三十余人乘夜达堤口止于河北柳圈坊太康伯张皇亲之第人民枕籍死者累钜万或乘高缚筏衔绳浮渡以水湍悍非柎絙屋角即身槁树颠游涌而逸者十不得一城中淤泥反土信宿填满【水由来家集分三股一直冲破汴城至二十二日水将与城齐西分二股围住贼巢贼奔吹台避水○或云贼由马家口决河灌城○河决后改从杞县唐邑亳州以入淮河贼竟往西南一带】易曰地上有水比先王以建万国亲诸侯禹导九河冥効职鱼鳖咸若玉帛来同迨乎三后之季汾洮弗宣谷洛交鬪龙蛇起陆百川沸腾自古记之周为国之分子奄宅土中析圭之后麟趾发祥驺虞告瑞古称鲁衛今有周京何意防繇蚩尤跳宕赤县而支祈肆虐河伯助殃顿使士女化为沙虫庙社沦于陷井十王之典章物采故家之礼乐诗书无不昏垫洪流堙沈息壤可不痛哉初李自成非能知水亡人国效王賁之灌大梁者也彼恃其累胜下睢陈卷宛洛苟得一都防则然欲自王及见汴没于巨浸乃聚其徒谋返据襄阳或曰杨文岳以真保之兵守汝宁崇王尚在若秦将吏出关而汝蔡复犄其后中原之势尚未有所分也十一月某日自成乃下汝宁杀文岳取崇王及世子行【贼围急有通谋崇王中贵矫王防议降者文岳砍柱厉声曰谁为此言吾当手刃之王亦誓死守或劝之去曰我去如百姓何其被执也贼令谕降州邑之未下者王不从遂于泌阳遇害并世子慈煥俱死尚有王之弟河阳王由材王之次子慈焜亦与难】而以兵临襄阳福清王以社稷之镇公子兵至走免是贼再克而襄再亡也襄不言陷言易也惠尤不辰【惠王讳常润】以全郢之重郾与沅二抚之左右我而不能一矢加贼奉王以次于湘潭天子以上游形便有司之过裨王失守不得已下玺书慰劳焉十六年正月【阙】日张献忠陷蕲州荆王先薨贼下令围王宫尽掠其所见妓乐蕲人初忧王为海盗果验左良玉畏自成之偪过武昌以军事谋之楚王王又畏良玉之偪而恐其弗行也嘿不应良玉辞而下王乃自募承

天德安之潰兵给以饷用长史徐学颜领之谓之楚新兵献忠破汉阳五月二十九日于煤炭洲以二十艘轻军潜渡楚新兵开门降贼叅将崔文荣长史徐学颜死之故相贺逢圣正衣冠投于水王为献忠所得遗赀尚百万贼缚王置所乘輦舁而沈之江惠王之走湘潭也舟遇风于陵阳矶楚士大夫从孥于王者多漂没王仅以免张献忠陷长沙吉王惠王走衡州献忠陷衡州吉惠桂三王走永【桂王讳常瀛皇七子李贵妃出与惠王同母】献忠追三王于永湖南巡按刘熙祚遣人护三王入西粤以身当寇入永州死守城陷不屈遂殉难时湖南诸邱岷以他事遇于乱荣先薨【荣宪王由榑之子慈照崇祯阙年封阙年薨绝】武冈常德望尘而奔豫楚十二王皆没而孙傅庭以十万之众折于河南李自成西入关西安宵溃秦王有轺道之辱独刘妃恸哭以国破家亡不如死长史章世炯自缢自成入据秦府僭伪号榆林诸将犹苦战力不敌三边覆没庆肃同烜平凉受围四日执韩王屠之贼渡河陷汾州懷庆福邸德昌王【讳由崧即福王】再走免与太妃相失河北山东诸王避寇南下贼攻太原取晋【晋恭王十一世孙穆王长子求桂以万历四十一年绍封】入大同取代【代简王九世孙竦勺以万历十四年进封】自成以三月十七日至京师向彰义门坐其左右两人人有识之者曰此晋王代王也夫纪侯去其国春秋是之蜀之盟蔡侯许男不书乘楚车谓之失位所以存灭国重旧封也先朝以空名奉骨肉实夺之权故处天王伯叔之尊势乃制于黔首诗曰琐兮尾兮流离之子于诸王又何尤焉礼国君死社稷君子于襄洛也则着之于秦晋也则微之城郭坏宗庙隳若是而王存焉者稀矣自成既以犯京师国亡而献忠于岳阳渡江由荆门走蜀蜀锦绮百货甲天下而世盛传蜀王能作黄金自献王得鸿宝之书于内府子孙善黄白冶化然皆积不用王恃其都为金城石郭蜀士大夫以蚕丛本不通中国此遗种处弗复多忧成都令吴继善江南人才辨濶达有谋见贼据秦揉楚而北都之问不至痛哭于蜀王之朝以书谏曰高皇帝众建藩辅碁置绣错数年以来蹈命亡氏失其国家此数王者非真有败道失德见绝于天也直以拥富贵之费徂便安之计为贼所利而不思自全此非殿下前车之鉴乎今楚氛日恶秦关失守曹闯徭黄陆梁左右殿下付之悠悠而不恤夫全蜀之险在边不在腹若设重戍于防关劔阁诚足自固否则黄牛白帝亦属彝庚黑水阳平更多岐径乃欲坐守门庭谓为设险不可解者一也往者藺酋扑灭献贼逃遁止以藺兵力有亏献地利不习今者荆襄撤其藩篱秦陇寒其唇齿揣量贼情益无瞻忌而欲援引前事冀幸将来不可解者二也至于锦城之固不及秦关白水之险宁逾湘汉此可恃以无虞彼何为而失守且城如孤注救援先穷时及严冬长驱尤易累卵不足喻其危厝火不足明其急而犹事泄泄以幸苟免不可解者三也为殿下计宜召境内各官谄谀谋议发帑金以贍戍卒散朽粟以慰饥氓出明禁以绝厮养苍头蠲积逋以免流离沟瘠募民兵以守隘结羣目以资援政教内修声势旁震则可易危为安转祸为福苟或不然蜀事诚莫知所终矣窃为殿下危之蜀世有共德王亦贤见其书太切不无动特以祖宗之法不典兵不与民事而蜀抚陈士奇迂缓不达时务巡按御史刘之渤稍彊执失人心皆弗能力诤继善再三告以高皇帝之制于诸王寄以讨贼委之保邦万一不戒以至失守王纵不爱身独不恤国家不念祖宗何终弗从五月而审知国信七月而防门传贼遽至成都一日数惊【阙】夜呼曰闯至矣明日又呼曰献至矣王不知所为谋以其宫人遯于荒富家亦从孥以出之渤持不可乃已八月四日献忠傅城下王始出其金悬之市购战守者莫应贼攻围三日夜以巨礮穴城东北陬而震之城崩遂乘以入王遇害刘之渤骂贼死吴继善阖门死者三十六人同时成都府推官刘士斗华阳知县沈云祚俱死呜呼蜀竟亡矣当献忠初入蜀而瑞王先以汉中瓦解奔窜于重庆为贼所执杀之天无云而震者三【瑞王好佛从

不近女色丞监以下皆化之吴民有解瑞府粮者无导行之费辄大获早归其死于重庆也见一道气直冲天王端坐其中冉冉而上人谓之兵解云】瑞王在宫中衣服礼秩降等兄弟王善地而已王丑地日苦兵秦将吏不能救资蜀帅以援故其急也归蜀而卒死于蜀悲夫

绥寇纪略卷八

<史部,纪事本末类,绥寇纪略>

钦定四库全书

绥寇纪略卷九

国子监祭酒吴伟业撰

通城击

万历三十四年丙午五月十日丁丑卯刻有星自西北流东北大如盂赤色有光翼日荧惑夜犯房宿六月陝西地震七月十八日乙酉雷震朝日坛风拔树大雨雹涌水南京妖人刘元绪谋反诡称辟地李王分其徒十二天十二星十六佛将以长至日李王出世事觉诛之八月二十一日丁巳李自成生于延安府米脂县双泉堡之农家与肤施人张献忠同岁父李守忠也隸行太仆为养马户守忠之父海海之父世甫家颇饶守忠娶金氏而无子既以侄李自立为后矣祷于华山梦神告之曰以破军星为若子而生自成父母异之呼为黄来儿六岁教之识字大能记忆逾常儿顾跳踉不可禁守忠曰黄来儿后当富贵其如顽戾何长名鸿基改自成从延安人罗君彦者学刀槊颇尽其技守忠金氏先后死李过者兄子也相与为傲荡尽亡其父贖乞贷于邑之艾氏艾着姓有为府同知者邑人呼艾老举人以自成负其子钱也执而扶之自成鬪狠无赖数犯法米脂令晏子宾者械而游于市将置之死得脱自成妻韩氏故倡也县役蓋君禄与之通自成杀淫者偕李过亡命甘州投甘督梅之焕所部叅将王国为兵国奉调遣过金县兵哗自成缚县令索饷并杀国遂反安塞人高迎祥故马贼逃兵李成龙纠为乱饥民王异应之异一名大良因自号大凉王迎祥自号闯王马着门表马贼且特起也自成于高为甥舅往从之自将七千人立一队号曰闯将其在山西也有闯塔天八队闯将皆张姓不知其名自成不甚着渰池既渡河迎祥乃独雄诸部而车箱峡已困复逸官军稍稍知贼帅中有李自成矣初自成西寇郧阳破竹山竹谿房县官兵追及之贼走紫阳入汉中连雨四十日马乏刍多毙弓矢俱脱自成大困于车箱峡诡乞降总督陈奇瑜受之自成既过云栈出险入凤翔掠陇州势复振众至十余万副将贺人龙张天礼为所败斂兵守陇州自成围之四十余日洪承畴檄左光先赴援与人龙合击大破之自成窜入终南山已而纠其众东下凤阳之陷也张献忠与自成皆在焉献忠得陵监所教响手小奄十二人每饮酒令之奏乐自成求之勿与固以请献忠毁乐器而后以其人归自成杀之两人由此相失自成与迎祥再入秦自成从终南出大掠富平宁州副将艾万年与自成同里有夙嫌贼攻益急万年曰我早知自成无赖曾诉之官今必不利于我出砦大战败而被执骂贼死无何张全昌贺人龙皆为自成所挫衄总兵曹文诏百战将于真宁阵亡迎祥自成兵益强出关为祖大乐所败迎祥自成攻滁州卢象升祖寬大破之朱龙桥遂走登封密县复归秦九年二月自成走庆阳邠宁四月自成犯巩昌北境左光先曹变蛟破自成于固原之沐家营自成走庆阳环县五月自成围绥德州六月自成犯朝邑七月黑水峪之战秦抚孙傅庭生俘高迎祥磔之都市贼党以自成梟雄也共推为闯王然自成在关中自鬪别为一军黑水峪败自成不在固非迎祥死起而暴领其众也是月也自成犯阶徽八月自成匿陇州山中九月出汧陇犯凤翔于渭河窥渡十年正月自成犯泾阳三原四月据阶成十月自成偕过天星由七盘关入蜀于是陷宁羌昭化劔州梓潼江油崇宁等州县十一年正月官兵破贼于梓潼贼分队还秦自成走白水六月官兵至阳平关自成由阳平白水谋再入蜀不果当是时秦之白水阶徽官兵分汛堵扼贼既不能转而西北曹

变蛟渡河邀贼去路贼又不得由江而东惟南绕西乡突出汉中越江而北秦抚傅庭偕左光先驻汉中乘贼奔江斩千余级贼渠祁总管等谋东奔豫楚官兵追之至升仙口又严守朱阳关贼不得逸祁总管降十月自成食且尽总督洪承畴偕傅庭共击自成于潼关原大破之自成尽亡其卒以十八骑溃围走十八骑者刘宗敏田见秀谷可成张世杰李弥昌任继荣任继光王虎刘文魁等窜伏崤函山中为小盗不复出寻督师入援总理主抚献忠汝才约降我师无侦 获贼谍者或云自成死已而谷房叛自成喜出招其徒复大集秦督郑崇俭提兵围之曰围师必缺不若空武关一道俾之逸而设伏于商雒郿均可一鼓擒也自成乘间走遂入楚依张献忠献忠欲图之觉再遁走阁部在彝陵闻而以檄谕之自成出谩语崛强时贺左二将再大捷献忠破胆自成为我师困于巴西鱼复诸山其辎重在赤甲寒山不能进困戾数草间自屏养子李双喜止之刘宗敏者蓝田人锻工也有勇力自成尝离其大营偕宗敏步入道旁丛祠中惟孩儿军张勳者从后伪封侯贼中所称小张侯也自成知宗敏亦有归命意太息曰人言我有天下分若盍卜之于神吉即从我不则亟杀我以降宗敏曰诺纳其刀于腰再拜三投之皆吉起而杀其两妻曰吾今死生从若矣军中壮士亦有杀妻子愿从者自成烧屯携轻骑间道而奔河南河南旱斛谷万钱人心蠹动杞县举人李岩者初名信熹庙大司马李精白子也【精白原籍颍州卫】性倜傥非常尝出家粟千石赈荒人德之争称李公子李公子父奄党也士大夫羞与齿信恒以为憾因乱请之督府用扞卫乡里权宜窃兵柄以报其所不平【传云授安义襄乡备御】杞人士仇之缘他事文致为通贼【中州时讨红娘子贼红娘子绳伎女也获信强委身事之信不得已而从后乘间窃归为杞人所执红娘子来救饥民开门纳贼】令亦恶其市名得众遂执而锢之狱民之德之者曰李公子向活我今有急乃杀令破械出之李公子之在狱也思自成既为众所拥叹曰今日反决矣遂往投自成自成闻其名礼重之改名岩伪署制将军用事卢氏牛金星者亦举人也以磨勘被斥与其邑医尚防善防好挟妓游晋为贼得贼得医者辄不杀防尤亲幸介金星以见自成自成奇其辨与谋议帐中车伕及女厮者亦卢氏人常在帐中供奉车伕逃归遇牛之叔昊言金星通贼状举宗唾骂之亡何金星私归窃妻子宗人执首官以车伕为征坐斩后得减死论闻自成之出河南也谒见于牙门自成得之大喜伪署 文馆学士初自成无大志所至屠戮百姓保坞壁不肯从李岩教以据中原取天下宜拊循以收人心唱为迎闯王不纳粮之谣教儿童传歌之相鼓动而金星进所善卜者宋献策身長三尺余上讖记曰十八子主神器自成大悦过城不杀因以所掠散饥民民多归之号为李公子仁义兵传闻者或即以为自成不知有李岩也自成以十三年之十二月二十一日自南阳来破宜阳杀其令唐启泰二十四日移军攻永宁永宁先有邑绅蜀抚张论者以川将傲守论病死其子吏部郎鼎延率家僮捍御有功会狱徒牛可敬魏之明勾贼而守城都司马有义潜遁贼以二十七日四鼓登城杀知县武大烈鼎延匿胥井免自成杀万安王于永宁之西关兵大振攻偃师县一日破之知偃师徐日泰骂贼为贼裔割至死不絶声河南总兵王绍禹者贪而无厌好断军士缣谷以自肥贼近后载重坚请入雒阳又收福王犒士三千金入其橐兵益恨乘夜反招自成入洛阳陷福邸雒城至迎恩寺为所得吕尚书维祺亦被执自成见之于西关周公庙曰吕尚书日议兵饷杀我曹今当何如耶吕曰吾为兵部尚书恨无兵磔汝狗鼠今日之事惟有死耳死不愧天地不愧圣贤夫何憾贼欲跪之不屈北拜阙西拜父母伸脰就刃色不变福王跌坐于地贼逼之王闭目摇首不语已而大骂因遇害邹妃世子得脱走河北世子继妃李氏福王选侍孟氏萧氏李氏皆自经内执事承奉刘显典膳钱福门正李彰云等三十六人外执事书堂官焦如星良医张鸣臯杜一经等十一人皆

死有司则通判白守文训导张道脉冗官武职共九人为贼所戕守道王昌重伤贼退后数日死余知府马一俊推官衛靖忠知县张正学俱在邑绅自吕尚书以下知县刘芳奕韩金声行人王明同知杨萃推官常克念举人苟良翰等多死贼从李岩牛金星策发福邸中库金及富人之赀以号召饥民仍以洛阳掾吏邵时昌为伪总理生员张旋吉梅鼎盛等次第授伪官月给银八十两取赈施赢金付之俾募兵守而自移其军攻汴豫抚李仙风慰安福世子于河北孟县叛将罗泰刘有义亦逃至河北获送京师闻自成已去率其将高谦入雒取邵时昌梟县之名曰恢复而汴梁之急抚军顾不在周王乃出帑金五万两犒士巡按御史高名衡开封推官黄澍祥符知县王燮同设守贼攻西北陬最急祥符令部分捍御有功矢石不避贼穴城将入守者投之以火贼被熬而死积尸与城平七昼夜不能下始解而去过密县怒而屠之登封望风瓦解帝初落仙风职以张克俭代之会克俭徇襄难即补以按臣高名衡而保督杨文岳得进兵玺书先遣其将虎大威张德昌率五千人渡河两将从仙风于偃师忧众少未敢尝贼已而文岳亲至军为鸣臯之战贼亦渐入山汴洛称休息焉仙风之在偃师闻土贼孟三据河陰率高谦张德昌之兵殄灭之欲以此为解帝寻遣锦衣衛逮治惧不免一夕絕吭死初丁啓睿之出关也闻阁部亡将由承天入楚楚按汪承诏以荆襄幸息肩无所事秦军斂汉津公私船启睿徘徊五日不得济折向邓州州闭门诟之过内乡内乡令不与余帝下诏重督师事权所过餉不给者乏兴论而汪承诏止于切责亦以舍楚入豫从贼所急其言良是不足罪也于是左良玉自襄抵南阳贺人龙李国奇之兵亦至丁启睿畏自成而不能已于入豫也见张献忠在光固谋于诸将曰此亦一豫贼也其法当攻瑕请移军当之避自成莫敢击诏乃于五月十九日出故大司马傅宗龙于狱拜兵侍郎为秦督专办自成宗龙年老矣向时部曲皆滇黔人于西北非所习帝特以其宿负用之俾必尽死力识者固防其不效无何丁啓睿左良玉大破张献忠于麻城罗汝才少与自成同里闰罗年长弟畜之后以谷城之役唇齿献忠献忠好凌折等辈浸不合既败舍之去投自成于邓州请改事为兄自成喜献忠既败郧西前茅八哨之兵无所归自成又邀而取之附者日益众袁时中者豫土冠号小袁营据蒙陰之义门窥凤犯泗朱大典以刘良佐之兵大挫之于龙德寺卢九德率禁旅于界沟逐之时中乘风雨渡河其众尚二十万往投自成自成黠譎工驾驭他寇莫及也傅宗龙以六月入关与秦抚汪乔年谋所以平贼乔年清正士帝初以王裕心代丁启睿抚秦既因秦按臣张尔忠言其不足任改用乔年乔年以四月二十日闻命谍报自成将叩关西入乔年急跨马传箭率将士赵大等驰至商雒修烽堠部署未定而宗龙适至宗龙欲搜秦兵括秦餉扫境内以出而关中旱蝗间左调发殫尽未能有以应也即秦兵之在豫者李国奇贺人龙之卒隸焉帝亦遣保督杨文岳率虎大威一军与之会汪抚送宗龙出关曰公破贼乔年身率所领为后距相与涕泣行宗龙既与文岳遇以九月初四日至新kao蔡命军中起浮桥期以明日过河自成亦过河窥汝宁我师与之值二督宿龙口夜召诸将谋邀击迟明飞骑报贼过且尽所留惟殿后一军我师至孟家庄诸将解鞍休士不为备贼匿精锐林莽间日旰出鬪贺人龙之卒先奔李国奇初接战不能敌亦奔偕虎大威陈监军同往沈邱避贼而两督自以亲军与贼相持傅营于西南杨营于东北二更保兵北队走有张副将者挟文岳马上驰去秦督慷慨谓任监军陈副将曰宗龙当死久矣今日陷贼中当与诸君并志决命不能效他人走也乃召其裨校李本实杨从义董朝宣陈尚才孔臣思所将六千人即文岳所置壁处重穿堑结垒誓必死文岳是夜奔项城次日奔陈州贺李于初九日晡时得宗龙小帖取二将来救不信曰此书从贼中来庸知非伪邪呼沈邱令开门令乘堙咤曰若不往救傅督师入城何为者不许乃同奔文岳于陈州自成见

宗龙无救于国外穿两壕困之十一日我师粮尽杀马十五日羸马亦尽十六日二更开营突围遂大溃宗龙以十九日未至项城八里被执贼诡称为家将拥之趋城宗龙大呼曰此贼也身是傅督师不幸落贼手城上速用礮击毋堕狡计贼刀斫傅右脇伤挟两目削鼻礮声起贼退家人卢三负其尸入城乃绝【项人敛之于天吉寺哭祭之】乔年闻败仰天叹曰傅公死讨贼为无人矣我自知以肉餒猛虎然不可不出以持中原心誓师次陝县闻襄城新破惶惑未敢进也襄城诸生李永祺率父老出迎官军时李自成方残叶县杀副将刘国能而围左良玉于偃城国能之守叶也力战不能支城陷贼杀其令张我翼而好谓国能曰若我故人也何不服国能按劒骂曰我初与若同反今则王臣也奈何从贼遂遇害左良玉偃城之围始于临颖临颖为贼守良玉兵过杀所置伪官而取其牛马财物自成怒尽锐与争良玉避入偃城自成围之急闻乔年之出关也释偃城之围来战初乔年之抚秦也尝被命发自成祖父冢自成破雒后声势日益张或献策疑其先冢有异者帝密下乔年图之米脂令边大受者【河间府静海县举人后遇执而以自成兵败得脱仕至广平太守有不死余纪纪其事】健令也有县役诡孙姓实自成族令诃知之执而加拷则曰吾祖墓去此二百里在万山中聚而葬者十六冢中一冢始祖也相传穴为仙人所定有铁灯槃醺火圻中曰铁灯不灭李氏当兴如其言迹之山径仄险林木晦黑果得李氏村村旁累累十六冢中一冢发之有蝼蚁数石火光尚荧荧然斲其棺骨青黑色毛被体而黄脑后一穴如钱大中盘赤蛇长三四寸有角见日而飞高丈许以口迎日色而吞昨者六七反而仍伏乔年函颅骨并蛇腊之以闻贼后矢着其目举大事无成蓋天使之也自成为之啮指恨既知乔年出厉色愤踊曰此发我祖冢者邪闻其多马速图之勿失乔年背襄城而舍交绥一军尽覆斂残卒数百人保襄城城坏未及修故受攻五日而穿溃乔年自刎弗殊副将李万庆共死之【万庆及射塌天与刘国能俱降人忠于王事故书其官以媿不能尽节者寻诏祀襄城】自成剽刳襄城诸生百九十人购永祺匿以免屠其族自成凡再覆秦师获马二万匹降秦兵数万十一月乘胜遂围南阳用大礮攻城守将猛如虎破以计杀贼精兵数十已而他门陷如虎持短刀巷战大呼杀贼手及袍袖有血数斗过唐府国门北面叩头谢国恩自称力竭贼剽刃以出其背焚麒麟阁刺唐邸于其宫张妃及湘安王崎岖走入楚豫抚名衡按臣任濬以汴梁危蹙贻书督师告急丁啓睿称献忠在商固山中庶几旦夕擒今移之救汴恐复脱掌握良以左支右吾不获已先事自言非失策其宛郡干阨出于不意即主上无如何下诏曲为解不欲明其谴也是月也李自成陷邓州知州事刘振世死之镇平令钟其硕内乡令龚新舞阳令潘通许令费令谋先后殉节死唐县新野稽颡迎贼十二月李自成陷许州自许以南无完邑洧州长葛鄢陵陈留禹州相继陷二十六日李自成再围开封开封者宋故都金人所重筑也厚可十丈次亦八九丈贼每攻城不用梯冲仿古法专取瓴甃为首功责一甲士取一甃得者即归营解甲卧惟后退者必斩取甃已穿穴穴初仅容一人渐至十人百人次第传土以出过三五步留一土柱巨絙系之穿毕万人负絙而绝之一呼而柱折城崩矣巡抚高名衡总兵陈永福于城上凿为横道听其下有取土声储毒秽以薰灌之遇辄焦烂贼乃即城壊处环试火攻法以药置甃中火震甃裂名曰大小放迸当其冲者无不糜碎十五年二月十三日汴城之圯者二十七处将迸火而攻之自成下令曰今日必拔列精骑数千其旁距跃鼓噪俟城摧拥以入贼之穴城也土石之积于外者邱陵然已而火作内土坚外土浮内未及穿火反外击瓦土之涨者及于天数千骑歼焉乃骇而遁城之未穿者亦寻丈耳呜呼危矣是役也陈永福之功称最抚按以下有诏獎其劳虽杨文岳亦得刷陈州之耻惟丁啓睿不能外犄角引其军入城防为贼所乘城既开而麾下散去且军不戢汴

人苦之遂获罪焉贼不得志于汴梁攻陈州副使关永杰力战被执知州侯君耀骂贼皆死邑绅崔泌之举人王受爵等手刃贼嚼齿大骂贼怒而屠之少长无或免者睢州太康宁陵考城西华商水遇辄溃邑绅通政使李梦宸宣大巡抚张继世各于其地婴城殒归德者向为州后因乱政独无藩封不置兵知商邱梁以樟者故鄆抚梦泽子也邑举人徐作霖吴伯裔伯相与集乡勇为守御贼攻围七日夜以二月二十七日攀堞入作霖伯裔伯死以樟被兵寻救苏遁于淮南家四十口悉以烬仪封杞县空城逃开毫亦继陷鲁山令杨呈秀郟县令李贞佐宝丰令张人龙皆死贞佐尤烈贼入城厉声曰驱百姓死守知县耳妄杀何为贼褫衣冠倒悬诸树贞佐大呼请诉上帝贼断其舌磔之母乔氏及妻皆死三月李自成复围开封其下以前力攻而挫也惧而逃者日数千人自成乃下令围而勿攻持久示必克帝先期赦孙傅庭罪召见问曰卿度防何人可破贼傅庭顿首曰陛下幸赏臣死臣星驰入关得精锐五千人足矣既西行侦汴事者曰贼碁置数十营望尘莫见其际傅庭乃图上方略曰贼众且数十万臣纵得士死力讐可一当百以时势料之非练兵二万饷百万不可帝省章大怒曰卿面奏云何而前后不讐努力练所发兵足饷一月即卷甲出关毋得逗挠取咎也贺人龙兵溃再逃阵失主帅且家在米脂与自成同乡里诸贺多在贼中傅庭在道故为疏请曰人龙臣旧将也愿赏其罪犹可用帝若不得已而后许傅庭至西安人龙从数十骑来谢傅庭面责数叱壮士收缚即刳之分其兵隸诸将【或曰贺数敢战有功与左良玉威名相轧以及于毙贼中酌酒相庆曰贺风子死取关中如拾芥矣夫开县之溃陈州之逃谁则为之谓其防剿为贼憚者譌也】帝既以僇人龙檄布告行间释故尚书侯恂于狱【因向为良玉旧帅】起为督发帑金十五万犒左营将士激劝之拔中州有司苏京王汉王燮三人为御史京监延宁甘固兵趣孙傅庭出关汉监平贼镇及保督楚蜀兵助侯恂保汴燮监阳懷东晋兵部勒诸将过河诛赏并行文武迭用中外赫然知帝意决于必战矣于是左良玉虎大威杨德政防师于朱仙镇良玉以贼势方盛宜相形势为缓攻大威等议不合既进军羣帅皆溃【帝传密防杨德政正法德政妄议练总以毒害天下又剥军善逃罪大应死人人快之○虎大威后在汝宁以攻寨中飞礮回死于雨花庵】其事在良玉传中汴外援既絶敌围日固刘泽清以朱家寨去汴八里提五千人南渡依河为砦疏水环之谋以次结八营可达大堤筑甬道餽粟城中刘本逗怯壁垒未成贼引众来争恒扰奔迸防不及济我师多聚于河北日夜望秦兵出关不获以时至开封之樵采断人相食罗汝才众亦饥谋他徙自成出余粮廩之重为盟畀以东城所掠为分地乃留不去九月十五日三更河决开封自成前后三攻汴士马毙者无算积愤誓必拔长围半载师老势屈久懷灌城之谋顾以子女珍宝山积不忍委之洪波迨秦师已东恐汴围一疎阳懷东晋之兵必蹶其后将忧腹背受敌方图改算会汴人有计决河以灌贼者时城傍羊马城周王募民新筑者皆坚厚为高岸而贼营直傅大堤我兵以为河决则贼可尽而城中无恐故严云京高名衡从之早为自成所觉援师方凿朱家寨口贼已移营高阜多设巨筏艨艟驱所掠民夫数万反决马家口以灌城天大雨经旬不止黄流骤涨两口一时并决声闻百里丁夫荷锺者随堤漂没贼营亦沈万人河流直冲汴城自北门入穿东南门以出流入涡水汴人皆溺死开封初受围官以城守阅民得百万戸围后民之死于疫与饥者十之二尚得八十万戸水至周王从后山逃出率宫眷及宁乡安乡永壽仁和诸王露栖西城贯雨中抚按以下官从之督师侯恂遣总兵卜从善逆以舟师推官黄澍从王乘夜达堤口高名衡陈永福回城防贼侯恂严云京偕监军御史王燮拥护王及二妃世子止河北之柳圈坊士民从而济者不及二万河身改徙杞县唐邑亳州以入于淮贼乃拔营向西南而去【先汴京有散人褚生精数术言狂易不可

晓事后辄奇中前一年别所知将自沈于河力挽之不肯止笑曰明年今月今日此中人尽如我人皆以发狂怪之已而果验】是役也晔云决河灌贼不意反为贼所灌帝以其孤城死守洺水天灾堤决事不覆较高名衡慰劳养疾归而黄澍召见授御史录守汴劳也十月孙傅庭兵至南阳李自成罗汝才西行逆之傅庭以高杰鲁甘为先锋鲁甘凉世将也与李自成遇于冢头大战高鲁大破贼追奔六十余里为高鲁后距者左勳萧慎鼎自成之败也罗汝才旁来救绕出高鲁之后左勳纨绔不习敌望而怖曰高鲁没矣遂奔余众闻之皆奔遂大溃丧材官将校七十八人高鲁所部死亡顾不多傅庭归而执慎鼎斩之左勳以光先子令入马二千匹赎罪当傅庭出军天大雨粮车不进采青柿以为食士卒冻饥故遇贼至于甚败豫人所谓柿园之役也傅庭上书自劾诏令图功自赎是月也李自成收裕州李好为之用【汝才由鲁山走南阳李好从裕走唐县自成走息县舞阳连营五百余里】自成复陷南阳屠之闰十一月十三日围汝宁保督杨文岳先以援汴不利有诏戴罪防汝贼之至也监军道孔贞会驻东关师先溃文岳督兵戏下副将冯某战于南湖贼炮击南关营之我兵之被伤者濠水尽赤冯将军自刎死文岳收散卒婴城守西关叅将王某北关副将赵某犹苦战势不敌两将自焚营栅收其兵入子城杀所乘马而自杀从死者千余人翼日贼从西北门入执文岳不屈自成曰先生朝廷重臣自不当屈然时势乃尔公欲何为耶文岳曰我恨无兵以杀汝今日死耳复何言僉事王世琮者初授河南推官与贼战流矢贯耳而不动人号为王铁耳既就执厉声骂贼与文岳同遇害【贼瘞文岳尸立牌书衔以识之因感其忠也孔贞防被执去不知所终】知府傅汝为投河北通判朱国宝知汝阳文师颐俱死贼拔营走确山信阳泌阳向襄阳挟崇王由棖及世子行【崇王与其子三人暨河阳王懷安王皆被执王后遇害于泌阳县○时四川援勦总兵温如珍以不能援汝被劾】左良玉自朱仙镇南溃退屯襄阳诸降贼附之有众二十万大治战舰于樊城自成至樊人苦左兵淫掠杀橐桔燔烧之良玉怒夺巨商钱船重装待发身率诸军营于高阜汉东之人牛酒迎贼十二月初四日贼趋白马渡良玉移营扼之江水浅及马腹贼死数千渡如故良玉拔营南行郢抚治王永祚弃城走襄阳陷贼将贺一龙以十二日破德安襄阳属城如枣阳令郭裕宜城令陈美谷城令周建中光化令万敬宗皆城破不屈死贼再破彝陵荆门州沅抚陈睿谟至荆奉惠王走湘潭【睿谟平岗贼有功荆州非所辖奉防故至护藩以行】自成以十八日入荆州湘陰王俨全家遇害二十八日攻猷陵陵军栅木为城从城内射贼贼发薪烧之木城穿遂毁享殿三十日攻承天十六年正月初二日陷之总兵钱中选被创歿楚抚宋一鹤留守都司沈壽崇并遇害知钟祥事萧汉贼以其贤戒勿杀幽之寺命寺僧谨视之汉乘间裂裳为帛以自经钦天监博士杨永裕投贼自诩有异术能佐自成取天下请发献王梓宫俄大声起山谷如雷惧而止分兵掠潜江京山诸县遂破云梦蹂景陵方国安诸将退屯汉口贼先驱逼汉阳左良玉避之南下黄陂亦为凶威所誓置伪令焉惟郢阳以降将王光恩同郢抚徐起元设守自成百道攻围终不能下【自成初攻郢不下于五月三日撤营退回襄阳即往豫迎敌秦兵自成入秦后遣兵攻郢者凡四光恩筑砦于隘口贼营于砦下伐木积与砦平将攀援上光恩投火焚之礮击砦破光恩以泥涂版且守且筑贼以大船载炮光恩设水砦于汉江极汛处而以轻舟往来截杀舟载火药焚其营江水为赤贼二十万水陆并进光恩以步兵伏草莽出没如神贼大溃光恩乃捣其水营尽获其舡贼自是不敢窥郢光恩乘势复均邓光化谷城进围襄阳餉匱还光恩布衣疏食与士卒同甘苦故人乐为用】贼初自称老府奉天倡义大将军寻进大元帅以罗汝才为代天抚民德威大将军分其众曰标营领兵百队曰左右营各领兵三十余队曰前后营各领兵三十余队标营白

帜黑纛自成独白纛大纛银浮屠左营帜白右绯前黑后黄纛各随其色五营以序直昼夜他营次第休息巡徼严密人不得逃逃者谓之落草磔之且连营百里竟日不得越禁行囊勿藏白金精兵许携妻子戒旁渔生子弃弗育收男子十五以上四十以下为兵一精兵容私从为之主刳掌械司磨执爨少者十余人驼驴少者十余载过城市不令处室庐寝兴一单布幕制绵甲纫紵至百层轻厚矢礮不能入一兵倅马三四冬则掠茵褥借其蹠曰恐恶寒也剖人腹为之槽马以此锯牙思噬若虎豹军止即出较骑射曰站队及晡方毕夜四鼓蓐食以听令所过值崇岗絶坂腾而直上毋得旁逾水惟黄河阻轡淮泗泾渭人皆翘足踞马背或抱鬣缘尾呼风而前马蹠所壅阨水为不行下流浅不盈尺步兵褰裳径涉临阵列马三万名三堵墙前者返顾后即杀之战久不胜马兵佯败追之则步卒之伉健者长鎗三万击刺若飞马兵回合无子遗矣其攻城也束手降者不杀不焚守一日杀十之三二日杀十之七三日屠杀人束诸尸为燎谓之打亮城将陷步兵万人周堞下防縋城者马兵徼于外承其隙巡之张献忠至残忍所攻城一门陷则一门可逃自成若覆舟于海无噍类由其法严故也诸营校所获马骡者上赏弓矢铅铳者亚赏币帛次之珠玉为下自成不好酒色脱粟粗粝与其下共之罗汝才妻妾数十被服纨绮帐下有女乐数部嗜酒烹羊豚厚自奉自成常嗤之曰此老佣多嗜好不足数也汝才有众数十万倚山西孝廉吉珪为记室能用其谋自成之兵长于攻汝才之兵强于战两人相须如左右手所陷河南五十余城卤获自成十之六汝才十之四其下稍为自成部众所侵屡以驺貽易其善马滋不平汝才虽权时推奉李兄恃旧故常自呼曹操呼自成老齐尔汝之自成之下宛叶克梁宋兵强士附有专制心忧汝才不为下间置酒防语挑之曰吾与汝起草泽不自量至此今当图关中割土以分王汝才粗疎时又醉张目答曰吾等横行天下为快耳何专土为自成意色大忤薪黄贼帅贺一龙马守应者与贺锦刘希尧蔺养成归自成于开封一龙等即所称革左五营也【贺一龙即革里眼马守应即老 蔺养成即左金王贺锦即争世王刘希尧即治世王】一龙守应恶相属请自为一军颇与汝才善自成疑之其下荆襄也令守应屯彝陵规取澧州一龙走德安规取黄州一龙至黄陂前阻水仅收左良玉残兵八百人以归先过汝才营屏人耳语自成衔之不遽发吉珪谓汝才曰某观李帅非容人者今羣雄皆俛首所颉颃者我与革左耳将军何不早自计耶汝才始 然然弗为备有黄州陈生者客居襄阳遇乱以才智为自成所识又因吉珪以交于汝才知其间私自念曰吾以口舌令二贼相图可并灭也说自成曰汝才必为变自成不应过汝才曰将军苦人以恶马易善马盍以字烙之令识别自为羣邪汝才曰善生其为我行之陈生故分前后左右烙马字而先烙其左为一羣报自成曰罗营东通良玉马用左字为号矣自成侦之而信盛为具请此二人汝才辞以疾一龙至宴笑甚欢五鼓已就缚罗兵犹不之知侵晨以二十骑入汝才营托言事径造帐中汝才方栉发未竟即斩首持以示其下曰汝才反元帅令诛之一营大噪自成先用贺锦刘希尧以收一龙之心譬曰赵应元俾慰诱其众汝才之将曰杨承恩甥曰王龙以其兵散去先后皆入关从孙督师李汝桂以数百骑走安庐从左帅其中军杨山旗鼓朱养民他将王可懷郝有法及其叔罗戴恩皆惴伏侧目思报亦未能以定自成见吉珪加劳勉后因事诛之陈生者其谋亦为自成所觉见杀自成徐按汝才军簿即旧将分隸之叅之以亲信于是两军之士皆属牛金星教以分等威申职守早自异于倖偶创为官名爵号大加署置自元帅以下次权将军次制将军次果毅将军次威武将军都尉掌旅部总哨总各以等第降杀自成诸子锦自成妻之弟高必正皆居帐中号亲信李岩为中营制将军与其弟牟颇简束其下勿纵掠田见秀为人宽厚以权将军提督诸营事贼所过多所全宥皆见秀力也刘宗敏嗜杀狡悍

善战贼倚之亦为权将军亚焉贺锦归自蕲黄一见输诚自成以为识所从又甚得曹贺两营之心而能弭之不动拔为制将军在诸将之右帅标正威武将军张勳自成养子也又威武将军党守素副之帅标左威武将军辛思忠又果毅将军谷可成副之标右威武将军李友标前果毅将军任继荣标后果毅将军吴汝义此其中权亲军也左营制将军刘芳亮左营左果毅将军马世耀左营右威武将军刘汝魁【称灶营】右营制将军刘希尧右营左果毅将军白鸣鹤右营右果毅将军刘体纯前营制将军袁宗弟前营左果毅将军谢君友前营右果毅将军田虎后营制将军李过亦自成诸子也左目眇年少骁敢善战后营左果毅将军张能后营右果毅将军马重禧【又有骆应标者亦后营】此五营二十二将者凡进战视中权所向四营制将军各率其偏裨以从其次则分地以定衛帅自成在中州所署城辄烧燹之无意守既渡汉江长驱入荆念天下莫予难者谋先守荆襄次守承天德安渐以及于汝宁而增置衛帅十有三人襄阳者贼之腹心根本地也设襄阳衛左右威武将军高一功冯雄各领三千人为久戍【又有杨彦昌守襄阳】荆州襄之上游设通达衛用任光荣为制将军配以六千人守荆州彝陵楚蜀之门户分通达衛左右威武将军蔺养成牛万才兵千四百人佐以都尉张礼水师六百人共为守守荆门州者都尉叶云林本郟县诸生所将止六百人则以荆门有彝陵为之蔽也马守应于己貳改用威武将军王文耀配以荆州兵六千守澧州承天特置杨武衛以果毅将军白旺守安陆【左宁南曾遣惠登相攻德安白旺已弃城走既与惠兵战而惠大败旺又再入城故旺部下兵为最强】而猷陵我师所必争即左营都尉马世泰为分驻又以威武将军谢应龙守汉川防左帅之沔流西上也汝宁衛威武将军韩华美守信阳北扼孔道均平衛果毅将军周凤梧守禹郑二州西备关中诸镇既以磐牙屯据乃改襄阳曰襄京修故王宫殿居之杨永裕劝以即真牛金星不可而止自成外虽寝永裕议而心善之颇采其言以设官分职置上相左辅右弼六政府侍郎郎中从事等官于要地设防御使府曰府尹州曰牧县曰令易印为信僭改崇王【由櫝】为襄阳伯邵陵王【在城】为枣阳伯保宁王【其】为宣城伯肃宁王【术授】为顺义伯禹州曰均平府承天府曰 武州其所授伪官自左辅牛金星右弼来仪以下吏政府侍郎石首喻上猷户政府侍郎江陵萧应坤礼政府侍郎招远杨永裕兵政府侍郎米脂李振声刑政府侍郎江陵邓岩忠工政府侍郎西安姚锡 郎中从事姓名之可攷者二十余人郎中则户政府徐邱王家柱从事则户政府阎泰定郭附龙游启运杨四畏礼政府刘清梦杨辉烈兵政府傅朝升邱之陶施鸿翮刑政府安民兴工政府蒋芬之陶寻改为兵政侍郎后死于襄城尚有宣令司张翔纪功司李定一而绍兴徐佳者知书数不受职在外则荆州防御使洛阳孟长庚府尹长葛张虞机襄阳防御使郟县李之纲府尹卢氏牛佺佺金星子也南阳防御使钟祥吴大雍府尹江陵刘苏汝宁防御使江陵金有章府尹江陵邓珽又扬武州防御使陈荇信阳州防御使江陵黄阁均平府尹钟祥刘懋先其府守有丞【荆州府丞张士政】有理刑【南阳胡邦彦汝宁邹士阙均天吴阙周襄阳朱梦庚荆州王业昌安陆吴从绳】州有判县有簿州牧自荆州牧韩瓚以下【 武州姚钦明信阳州王璞邓州徐即达祁州万国定裕州吴腾芳光州方燧邛州赵之璧尉州申毅随州洪圣翼许州刘定郑州彭奕煜汝州裴叔度宝州陈可新阙陵田储归州武张澧州俞兴言固州高孝随州汪鹭】县令自襄阳令杨士科以下若干人【南阳吴鄞镇平夏之弼泌阳康升湘陰张光世南召李延大内乡左懋延新野徐龙光叶县王家桢真阳朱师熹汝阳樊仲表上蔡熊新运西平武显祖新蔡徐必达遂平杜握瑜罗山张丹庭确山吕承显光山郑允孝商城梁凝祉固始吕相圉恩县张文彬商水郁 功沈平田维新均平稽锡太康姚通方淅川郑际明鄢陵薄封

贤扶沟陈周南中牟梁肯建西华姚聘临颖王邦醇长葛陈济鸣新郑王克宽襄城武彦芳密县冷英鄆县王槐 汉阳石作霖荻泽某河阳萧象新鲁山刘尔箴郟县周英宜城王克圣南阳金汝砺保康芮作圣谷城陈智均阕 鲍一骏光化武湛京山蔡国瑞潜江赵国珍沔阳王良佑张来当阳朱维世江陵张允恭公安朱三宿石首张维寰监利田振训松滋张勉枝江王鼎新宜都韩令卿长阳张耀国远安王第魁司东王一垣梁山汪植华容汪一洪安陆邓允渐孝感田助公内城魏文彪应山陈当道】自成伪号新顺王防左辅以下官议出兵所向牛金星请先取河北直走京师杨永裕谋顺流下金陵断运道则燕都自困兵政府从事顾君恩进曰两人所言皆非也金陵势居下流难济大事其策失之缓直取京师万一不胜退无所归其防失之急不如先定关中为元帅桑梓之邦秦都百二山河已得天下三分之二建国立业然后旁掠三边资其兵力攻取山西后向京师庶防进有可攻退有所守方为全防自成从之孙傅庭之败于柿园也归关中招边勇开屯田犹恐不足法用三家出一甲首曰壮丁以五十金资之西人筑楼橹为守望令以一楼养兵一人选严明吏为趋办又自以前出关馈粮不至为贼骑所乘仿古偏箱武刚之制裁以神机曰火车俾得赍衣粮穀弓弩战则驱之以拒马止则环之以自衛州县工匠皆防脂夜作得二万辆即壮丁掌戎右而奏用降将白广恩为火车总兵于西教塲讲肄之时左光先者宿将傅庭老之勿任任广恩又以高杰副之广恩在山海常桀傲不奉诏大掠临洺关西走帝不得已命归隸傅庭办贼或以为反覆乱人傅庭弗恤也高杰尤暴戾不可法度使特以窃自成之妻邢氏为所切齿又前者战冢头有功故专恃此两人者为军锋然傅庭苦不欲速战常中夜呼其叅军定襄乔元柱曰我以权宜任两人此岂自成敌哉且我军初集若迟久闲习以乘贼敝庶可用其如帝意何王龙之踵杨承恩入关也其属三千人皆骁卒傅庭问之以贼事龙曰贼势重不可敌然襄阳野如赅百万之众何以供五月后必大饥因其饥而攻之可不劳而定督师厉威严以军兴法从事州郡皆震栗关中荒责豪右为捐助有不乐者晔于朝曰督师玩寇糜饷秦人日在汤火中累上书迎帝意催战且传危语以啗喝之曰督师苟不出关收者至矣傅庭顿足叹曰吾固知战未必捷然侥幸有万一功大丈夫岂能复对狱吏乎乃上书出关为师期自成在襄阳有传其自内浙窥商雒者傅庭谋以秦抚冯师孔率甘蜀二帅驻商设防已则兼程出关先以总兵牛成虎【秦人大族世将家也】副将卢光祖提兴运各营之兵三千二百人由灵陝入雒七月二十三日至渑池前驱游击张守义与贼游兵于下池相遇薄有斩获傅庭以八月十九日率平治十营与白广恩期于新安来防当是时贼围李际遇于登封之玉寨闻秦师之出也设伏于滋涧以邀我二十日我师至滋涧见道险命下马搜伏贼乃遁归龙门二十二日质明我师追至龙门而贼营已拔留哨骑于伊河之西我降将杨承祖单骑驰谕贼哨苏某者以五十二人归命卢光祖又招贼将高纪祥降之傅庭全军驻龙门催孟县之粮别遣兵五千追贼于汝州贼已尽奔宝丰玉寨之围亦已解豫帅则卜从善久在河北陈永福徘徊新滩秦所式方忧贼北渡请督师来救于进取未能赞万一也【自成闻秦师之出也尽发荆襄之贼防于河南步骑沿河列守自汜水至荥泽伐竹木结筏人佩三葫芦将渡河先驱千余人北渡刘洪起逐之逡巡南岸豫抚按飞檄趋永福还兵河北击之永福称奉督师令不敢擅离及河北无贼永福又以抚按檄避督师此所以徘徊郭家滩也总兵牛成虎稟称河北无贼惟荥泽河口曾有百余贼过渡已被刘洪起堵回陈永福借驻郭家滩傅庭请加惩处有防从善永福实降为副将戴罪杀贼自赎】客有說傅庭者曰公不奉驻军雒阳之防乎自贼之西也归德修复旧城永城缮治新城皆不日告就今雒城故址余二丈四门未隳公下令修筑纠各寨乡民匠役半月可毕土功河北流离之民

闻洛阳复完不招自集公于此储糗粮开屯田进战退守经略中原系四海之望此祖逖之镇雍邱宗泽之复东京也公盍图之傅庭曰吾据关不出犹为持重万全今秦人弃亲戚坟墓以从我奈何用版筑阻士气且贼不旋踵前送死致寇而不致于寇非计之得也九月初八日我师进次汝州之长阜镇伪都尉李养纯迎降闻自成在襄阳西筑汝宁及其属邑邓襄叶唐邾丰七城者待战谍者云贼老营在唐县精锐屯襄阳撤邾县伪将吏归保宝丰并兵设守以为犄角傅庭乃别遣游击折增修从曾山间道捣唐县而督师自以大军从汝州进初十日我师次宝丰贼已改为州其守兵多且楼櫓亦甚固傅庭曰我师前争利而宝丰或掎其后则腹背受敌矣谕降不下乃留攻之十一日自成来援白广恩高杰卢兴福分兵夹击战小利贼却十二日自成再以精骑来援复为广恩杰所却我师以是夜克宝丰擒伪州牧陈可新州判姜渭伪邾县令周英主簿刘溥伪将蒋山李大存孙月等诛之十四日我师次邾县贼万骑迎敌我前锋陷阵擒其果毅将军谢君友砍贼坐纛旗尾自成防获捕得汝才逃兵王定口称贼唐县老营十二日夜半为我师所破辎重俱尽妻子细口被杀一营皆哭督师军声大振防天大雨转道汴数尺粮车日行三十里士马多饥或劝退舍就委输者傅庭曰师已行即还亦饥不如破邾县就食遂攻邾县破之邾穷邑也得马羸数百头噉割之立尽雨不止傅庭顿邾县五日不能进十七日后军噪于汝州降盗陰通贼贼突骑复大至【贼以轻骑出汝州白沙抄絕饷道】我师饥且困有流言傅庭不得已分其军为三以白广恩从大路已与高杰从小路还师迎粮而陈永福闭营休士须粮至诸营进而齐发且戒之曰汝按甲三日以待我弗动也前屯既移后队亦乱永福虽斩之不能止乃亦引所部殿而贼追之及于南阳二十一日我师返饷还战贼置阵凡五重饥民处外步卒次之马兵次之骁骑之选者又次之老营家口居中我师已破其马兵过三重矣遇骁骑而死鬪将吏之怯者惶怖欲走阵稍动壮士推火车者新调发未习战陈有思归心见马兵之小却也骇曰师败矣尽脱其挽辂而奔马兵见之亦奔火车倾辘塞道马絙于局及衡者不得出贼铁骑凌而腾之【傅庭于各州县三丁抽一名曰壮丁造火车约有二三万皆上载火炮中载衣粮以白广恩为火车总兵在西安教塲操演法非不善以壮丁为不教之民故败】步贼手白楮遮击中者首与兜鍪俱碎遂大败贼空壁蹶我一日夜逾四百里官军死者四万失亡兵器车重数十万【傅庭之退军也使高杰断后白广恩设伏道左广恩惧为贼所乘弃兵潜遁贼兵追蹶之杰兵大败独广恩兵得入关】初自成之出襄阳也以兵政府侍郎邱之陶居守之陶相国瑜次子也宜城陷相国父仰药死之陶为所得署兵政从事年二十余有姿容器略自成甚重之擢其官委之筦留务襄阳尹牛佺虽贼相子倚任不及也之陶欲以奇计误贼遣人间道走武关以蜡书进曰督师与之战吾当诡左兵大至以摇贼心彼必返顾督师随其后我从中起贼可擒也傅庭大喜报以手书其书为自成逆者所得督师与之陶不之知傅庭恃其有内应连营稍前自成故见其羸弱以诱之深入其计反为贼困之陶果举火报东师之至自成验得其诈呼而诘之襄县出孙书责其负已支解之陶大骂曰我岂从若者邪恨不能尽歼汝丑类以报吾君父言未毕于口而絶督师取僂道过河入晋【傅庭渡垣曲走阌乡贼兵追至孟津】以转达潼关诸将亦将其卒而至火车营步兵俱歼焉兵之脱者犹数千气伤沮不复振高杰曰三军父母妻子在西安今战败思归而强之守关此危道也不如弃关专守西安凭坚城以人自为战傅庭叱曰若贼已进关则西安糜沸秦人尚为我用乎十月初七日自成率大众攻关白广恩犹苦战高杰以广恩卖己于宝丰以致败拥兵不顾贼从南山绕出其背为夹攻力不敌关破杰奔延安广恩奔固原陈勇奔秦州高汝利奔汉中贼遂破华陰傅庭收散卒图还保渭南贼追及庭与叅军乔元柱跃马

大呼而没于阵知渭南杨暄偕训导蔡其城守渭南举人王命诰潜通贼开东门城陷暄死之是日贼支军陷华州初九日屠商州商雒道黄世清不屈死初十日陷临潼十一日逼西安主城守者为王根子而孙可【阙】练总兵专护秦王众寡不敌留川兵之归蜀者五千人助防兵无冬装劝秦王以人给一绵衣弗应天寒传餐皆结为冰根子射书城下开东门纳贼城遂陷【阙】杂众中逸去巡抚都御史冯师孔按察使黄炯长安知县吴从义指挥使崔尔达死之秦王被执长史章世炯自经绅士则右都御史焦源溥大骂贼贼先断其舌杀之副使祝万龄从容拜孔子佖事王征七日不食宣抚焦源清叅政田时震举人席增光朱谊泉皆死贼放兵大掠三日乃下令不得妄杀一人误者将吏偿其命改西安府为长安据秦府为宫收姬妾数百以充实之命所司一依李唐制度即秦抚故署为吏政府都司为兵政府按察司为刑政府西安分守道为工政府伪授秦王为权将军世子妃刘氏恸哭曰国破家亡不如一死自成遣归其家分兵为三道以追捕诸将李过出北道追高杰于延安东走宜川河冰适合遂渡河入蒲州绝蒲津以守贼追至冰解不得渡乃止田见秀出南道追高汝利于汉中汝利遁入蜀寻复降贺珍刘宗敏袁宗弟党守素出西道追白广恩进次固原广恩亦以城降传檄徇下邑知蒲城朱一铨知中部朱新鐸自尽余从风而靡自成发民夫大修长安城挑濠堑具楼橹视前制倍壮丽命杨永裕阅兵于渭桥金鼓之声震地毁居民屋以大开驰道于城中每三日即亲至大教场校射身御蓝布袍张小黄盖乘马百姓望见黄龙旗皆辟易十一月自成大防羣贼戎马万匹旌旗百里诣米脂祭奠墓向为官军所发焚弃其遗骸自成乃筑土封之访求其宗人赠金封爵以去改延安为天保府米脂为天保县【自成又改清涧县为天波府】以三百骑行凤翔守将诱而歼之回师疾攻杀知府唐时明居人俱尽自成初入关自以为故乡所过村镇慰谕父老戒有所侵暴未一月而军士束丁男以为奴突入庐舍剽掠妇女又以衣冠必不附己诸旧臣故家为乡里所畏服者征而闭之空舍加榜掠以索其金死者并一坎埋之家不知其所在责渭南南氏饷一百六十万礼尚书南企仲年八十三遇害企仲之子进士南居业居业从兄工尚书南居益皆被炮烙死秦人大失望西安都司舍人邱从周长不满三尺醉入秦府防手骂曰若一小民妄踞王府称尊而所为若此何以得长久自成叱曰酗鬼趣提去初不以介意也秦士大夫如惠世耆耄之望匍匐受伪官然胁于凶逆非得已最甚者无如张国绅首倡僭号觊作贼相又为诱文太仆之室邓夫人进之邓江南令族知史书工诗国绅以为必见幸自成顾重太仆名怒曰若同辈不能庇其伉俪而行媚我叱国绅斩之礼邓而归之家白广恩之降也自成挈其手与共饭相对极欢左光先闻之亦降陈永福犹拥众为顾望自成遣广恩谕意永福恐其卖己曰汴城之战永福亲集其矢于王之目今穷而归命惧无以全腰领自成曰此各尽其事何害命取箭折之誓不食言诸将梁甫马岱辈转相诳惑多解甲上谒者惟榆林不从榆林王氏一门八元戎世国世臣者兄弟也尤世禄阅阅亚王而威重过之李昌龄西凉勲胄以故总兵侨居其地贼入关制将军李过徇榆林兵使者都任率副戎刘惠两将军推世禄为帅而与王李三公同守贼遣辨士延安舒君睿者说之赍五万金以犒城中自成为手书以晓譬祸福不听因四面环攻城上强弩持满发巨礮击之数开城出战杀贼数千人妇女小儿皆叫呼击贼贼穿地道放进崩城诸公巷战力尽都公引佩刀自裁刘将军骂贼贼磔之惠显被缚过神木仰酖至二升乃绝二王尤李为所执去西安四十里曰回军店四公沐浴更衣曰将以下见祖宗也既入挺立仰视天贼欲踞之不屈自成曰吾虚上将以屈四将军奈何固执不相与共富贵四公骂曰我大臣也汝草窃且灭不久母污我临死叹曰我四人不早殄此贼致今日真死有余恨贼举城屠之遂以兵临宁夏宁夏不支总兵官抚

民开门降庆阳犹为我守攻四日陷屠之执韩王副使段复兴知宁州董琬邑绅麻僖俱死三边尽入于贼贼无所顾忌遂长驱而东过河入晋破平阳杀西河王等三百余人平阳总兵陈尚智降是时秦陇皆没惟甘肃带河为固贼移兵取兰州甘抚林日瑞以副将郭天吉四千骑守峡口而败贼进薄城下乘夜雪坎而登日瑞及总兵马爌中军哈维新姚世儒等皆死郭天吉军败还守与苑马寺监牧同知蓝台州绅罗俊杰赵宦等及于难杀居民四万七千人西宁衛尚不下贼将辛思忠攻破之即令为守于是肃州山丹永昌镇番庄浪皆降进兵略青海党守素以一军守兰州置西宁节度使【以故监军金事陈之龙为节度使】而秦地悉没矣十七年甲申正月李自成称王于西安僭国号曰顺更其名曰自晟改元永昌造甲申曆拜牛金星为天佑殿大学士厘定六政府尚书益置学士宏文馆文谕院谏议直指从政统防尚契司验马寺知政使书写房以干州宋企郊为吏政尚书平湖陆之祺为户政尚书真宁巩焞为礼政尚书归安张璘然为兵政尚书【有渭南举人王命诰者亦为自成兵政尚书】余官从自襄阳者陞赏贼帅给珠琲瓔宝人二升银千两权将军制将军封侯果毅将军以下封伯封子男如汝侯刘宗敏泽侯田见秀蕲侯谷英毫侯李锦【李锦目亦眇军中称小李瞎子】磁侯刘芳亮侯侯张鼐一曰义侯绵侯袁宗弟岳侯某【失其姓名】淮侯刘国昌伯七十二人光山伯刘体纯太平伯吴从义巫山伯马世耀桃源伯白广恩鄢陵伯刘某【河南人】武阳伯李佐文水伯陈永福其可考者也伯以下封子三十人男五十五人定军制有一马僂行列者斩之马腾入田苗者斩之兵死令妻妾缢以从无别配按册步兵四十万马兵六十万兵政侍郎杨王休为都肄出横门以至渭桥职志环转不絕金鼓动地用怖三秦铸大钱直白金一两次当十次当五钱平物价从之设科目试士甯绍先充考官用定鼎长安赋拔扶风举人张文熙为第一草伪檄宏文学士李化麟台谏宋衛等颂功德张形势以指斥乘輿胁污州郡自平阳降后再陷河津稷山荣河山西望风送款贼以一军上绛州一军上蒲州二月自成率其前军过河牛金星顾君恩宋献策参预密谋宋企郊巩焞陆之祺张璘然以伪尚书喻上猷李振声杨王休黎志陞以伪侍郎皆骖乘攻汾州破之徇河曲静乐遂攻太原执晋王晋抚蔡懋德殉节死自成兵至忻州攻代五台令迎降宁武关总兵周遇吉殊死战兵败被杀自成叹曰使守将尽如周将军吾何以得至于此犯大同巡抚衛景瑗总兵朱三乐死之自成入大同杀代藩宗室殆尽犯宣府白广恩官抚民书与总兵姜瓖约降巡抚朱之冯谋守城军士无应者拔刀自刎死自成遂犯阳和从柳沟以入居庸真保定大名皆不守自成以三月十三日至昌平十九日京师陷驾崩其事在国史故不着夫自成已破太原逾太行蹂真保可以直犯京师乃先攻宁武雁门者盖以宣大天下劲兵处惧京师急而为之援也是以偏师行入赵地其正兵则从两关出代上谷乘瓦解之势以尽收宣大之兵然后转攻居庸以进先断我勤王之师而京师坐困彼其视内外三关之势可从内以出又可从外以入而京师孤注遂落其掌中呜呼岂非天哉自成之败于山海由固关而逃也【自成败于山海之一片石或曰红花淀】五月初二日又败于定州【定州人杀伪州牧董一阳恨其虐政也】斩其伪果毅将军谷可成左光先负创走牛金星以自成为不足辅颇有鞅鞅心而李岩者向固劝自成以不杀者也其在京师刘宗敏居田宏遇故第李岩居嘉定伯府宗敏日杀人而岩于士大夫无所拷掠又尝以大义脱懿安后于厄而俾之从容自死军中多称之宋献策极与善密说曰十八孩儿之讎得母为公乎岩虽不敢应然殊自喜牛金星闻之因侧目定州之败鹿邑考城柘城诸县令为丁叅将所诱执送之南都人言河南全境皆反正自成大惊与其下谋之岩曰诚予臣以精卒二万驰至中州彼郡县必不敢动即动亦可得而收也金星劝从其请既而自成以为疑金星见

其疑也进曰河南天下形胜地且属李岩故乡若以大兵与之是假蛟龙以云雨必不制矣异日者举中州之豪杰以与关中争胜负即主上且奈之何自成曰如是若何以劝我从之金星曰岩蓄叛已久臣始劝从之以安其心耳且岩与主上同姓前闻宋军师讖语在众中欣然有自负色今河南反彼不军令不荐他将而自请兵目中已无主矣国兵新败人心动摇遂欲乘机窃柄以自王是岂复可信乎不如除之无貽后患自成曰善明日金星以自成命盛为具与岩帐饮伏壮士于幕后三爵后并其弟牟执而戮之宋献策闻二李之死也扼腕愤叹刘宗敏按劒切齿以骂金星曰我见金星即手劒斩之文武不和军士解体自成遂不能复战而席卷归秦矣自成既西徙三晋乡绅富户以入关中【榆次太谷闻闯败闭城拒守自成攻破屠之定襄杀伪官为伪磁侯刘芳亮所攻屠俘壮丁胶置太原陈永福皆杀之属城无不罹祸忻州忻州尤惨】留其将陈永福府尹韩文铨守太原【陈永福杀晋藩宗子殆尽】身率军过河驻韩城为策应在道怒吏政尚书宋企郊私其亲故选补多用干州人锁其颈至西安释之使视事如故三晋士大夫皆迫刦以行得蒲州人韩霖爱其才以为叅谋霖知名士久不第故乐为用以故太常卿张第元为兵政尚书给事中耿始然为刑政尚书第元之从于韩城也自成猝问之曰尔家在河北无恙乎第元仓卒不识忌讳漫应曰人皆以其为贼官相屠害自成大怒立诛之始然惧失自成指于刑政所奏讞辄当之以死牛金星谓之曰君为其职奈何无所平反始然稍敢争执自成手其奏怒不测金星密以告始然惶恐夫妇皆自缢巩焞之为礼政自成命以更定威仪服式雅不称意指杖之防毙甲申八月自成新立其祖祢庙将以已生日往祀焞仿古法为山龙袞衣进自成被之忽寒栗索火左右炽炭于位礼卒不成怒焞曰若移两山于肩以压我将加僇金星力救免自成性好杀为众意所矫强诈称仁义以煽惑愚民既兵败见齐晋多杀伪官以背之辄复狠强自用尝住韩城二十五日鞭撻县官斩斮掾吏召里甲而刑剽之发壮夫为丁多所造作徭役繁兴米豇刲茭责之民者万端韩人莫必其命户政侍郎李天笃初论戍寻缢杀之妻子财物皆赏军延安府尹贾我祺以赃秽死于市直指伍中恺谪为军牧守以下如知鄜州袁某三水令李三楚朝邑令某并其教官某等坐受纳用铜税斩胥隸不敢下乡民有盗人一鸡者论死惴惴莫敢犯法自成呼其下相曰平章尚书曰枢密自以不知书命其下教之作字又令讲通鉴而听之辄用己意论臧否少时饥困盗主人抵羊鞭之见血既得志不修布衣之怨遇其家如故秦人又以此异之初自成即伪位天大风霾失色心不乐入燕都抽矢射承天门意有所命不中中其偏处既登殿而晕不能自持归秦怪风作于西安丽谯象魏俱败乙酉正月大雨雪二月

本朝大兵至潼关攻之伪巫山伯马世耀以六十万众大败潼关破世耀死自成欲返据延安闻唐帅从黄甫川西渡谷英李过俱溃逃知西安不能守令田见秀开府库任军士分持去仓廩则烧之自成于十三日出东门至蓝田由商州龙驹寨走武关以入襄阳妇女细弱冻死于七盘坡者数万田见秀之焚积聚也自成欲并以蕪宫室市里防其已去见秀殿曰秦人饥留此米活百姓止烧东城一楼追及自成于商州曰已焚矣宋企郊等皆于道亡牛金星亦留而从其子于襄阳自成至武昌左良玉时已率众南下武昌虚无人自成偕其妻高氏李锦李过高必正皆肺腑戚诸将田见秀袁宗弟刘体纯刘芳亮张鼐吴从义牛万才等犹从之其众尚数十万分为四十八部居武昌五十日改江夏为瑞符县设伪令运铜炭铸永昌钱谋夺舟南下取宣歙曰西北虽不定东南讵再失之将发而陰霾四塞暴雨烈风旗鎗尽折乃以四月二十四日改由金牛保安走延宁蒲圻沿道恣杀掠过通城命其下四十八部先发自成令严兵

行无敢返顾者通城有九宫山一名罗公山山有元帝庙山民赛防以盟谋捍衛间并自成止以二十骑殿又呵其二十骑止于山下而自以单骑登山入庙见帝像伏谒若有物击之者不能起村人疑以为刦盗取所荷锺碎其首既毙而腰下见金印且有非常衣服大骇从山后逃去二十骑讶久不出迹而求之则已血肉离分矣彼其弑君后毒生灵上天震怒之日久矣数穷气索犹思披猖自恣山神社鬼咸思剪其凶慝卒假手野夫以毙之云

外史氏曰贼之所以败者有三曰诈而难久也骄而难制也散而难收也自成天性凶残身所屠灭者不知防亿万晚乃倡言不杀诡以收天下之心吾民父子兄弟皆死于贼手不得已姑从其令以纾一时之急贼又不加拊循而伪官之虐政随其后愚民失望谋起而拒之彼自成者初勉强于一夫之说矫情易意以图就大事既知其无成则将恣睢哮阬大逞其凶毒是以初用李岩既而杀之盖怒河南之叛已也使通城不死自成窜湖湘窥吴越其恶且不下于献忠矣安在其不杀哉所谓诈而难久者此也自成初盗福邸之赀以号召宛雒附从始众逮乎京师陷其下争走金帛财物之府以分之此其为利同也始何以合今何以散若是其悬焉者则以前之所招饥民而后之所御骄兵也兵贪则骄骄则惰惰则不战而溃矣赤眉之入长安也侯景之破台城也皆不旋踵而败彼饥寒乞活之人一旦见宫室帷帐珍怪重宝以千数志满意得饮酒高防有富贵归故乡之心胠篋担囊惟恐在后何暇同心胆共功名哉所谓骄而难制者此也尔朱荣之料其子兆也曰彼止可统三千骑为将耳过此则乱矣今以献忠用寡而自成用众然詎可以将百万乎彼于罗汝才贺一龙杀其帅而并其众皆怨军也诸将惟陈永福以一矢之故反为効死白广恩则性工反覆左光先官抚民则事急来归皆强服也李岩见举动之非宜宋献策恨吾谋之不用刘宗敏以下见自成为帝王而已贵不益又其等彝故人也彼非侧目思报观望鞅鞅则懷布衣兄弟之心詎肯俛眉义手而为之下祇以狃于一胜贪财帛子女以形势相从苟有所挫即涣然奔离耳所谓散而难收者此也当京师未破之前彗孛直扫黄河倒流四方讹言人心蠱动逆贼如鬼蜮之蛊惑士民如豺虎之震怖遐迩未防天柱倾地维折而防黷鬻鬻之气亦澌然其泯灭嗟乎自成一盗羊逋逃之人耳当其盛万金之赏莫能购十道之师莫能征及其衰也二三莽夫牧豕奋耰鋤擲瓦砾而贼之血膏肢体固已借草棘而啖乌鸢矣昔成祖筑元帝庙于防岭见者仿佛帝容楚诸山各有特庙诗曰明明在下赫赫在上此必文皇在天之灵痛子孙而击其贼也彼夫枕戈泣血之士未能手劒以馘仇人之头徒使之贯渎鬼神而降之罚千载而下读其事者恫乎有余恨焉

附纪

崇祯十六年有人运佛九座进武当山来京师挂号其佛高六七尺下有车轮正阳门外布列三座观者沸市后因事泄始知藏炮于佛腹中欲安置九门为贼内应下锦衣衛刑部勘问伏诛

贼抵彰义门宋献策初云此行观兵城下十五年始可破城城楼上忽堕一天啓大钱一当五用献策云此破城兆可急攻发一大炮楼角遂崩

贼将白旺之守德安也兵甚强且有纪律能得其下心当自成之败其军初弃妇女继弃金宝

至德安已大疲惟旺一军完且整兼各寨俱服而德安城坚旺谋守之不肯去自成固强之始行追急自成掠江州至道士洑又登岸入兴国与柯陈二姓交战互有杀伤有王体中者奇士在旺军中自成死旺军乱体中乘便刺杀旺挟其众以降与金声桓同定江西金兵弱王兵强后以不肯相下金用计结其左右王得仁诱体中至都察院杀之此乙酉七月二十九日事也时王兵大噪与金兵战于城中南昌西北民居尽燬次日得仁抚之乃定其后与声桓同反者恃其强以得白旺之众也

自成之败也李锦在榆林唐通从黄甫川过河以自成遇其家之酷也故别为一军以抄其后锦颇善战贼中号小李与通鬪殊有胜负其时惟榆林一队能相持既而闻自成已去长安其下大溃故亦走自成入秦凡秦人之为贼者无不访宗族修坟墓田见秀独不然人问之见秀笑曰如今天下在 里我要去认亲故旧有至者密遗以金帛促之去及败后刘宗敏宗族诛坟墓发见秀独不知其为何邑人故免

牛金星尝在华州考诸生其题为所过者化所存者神上下与天地同流文体改八股为议中格者为县令

自成之待其下惟刘宗敏田见秀谷英张鼐袁宗弟刘芳亮李锦七侯者功最大礼遇为独隆其初封也每侯赏珠一大斗金银一车帑士卒从北都归腰皆有黄金瓌宝饮村人酒掷金与之或手给珠一握无所吝内库锦段如布价皆洪武时造然服之易毁云白广恩家 瑚树高累尺皆禁中物也自成去长安居民争入其所居搜取金银中夜失火秦府被烧防尽惟民有胆力得最多故大富者众关中人遇雨后于布政司泥土中拾得珍珠至今不絕归德宋公权抚遵化之三日而自成陷京师分设伪将军道府州县官于京东而分捕诸旧官甚急公方出外巡徼母丁太夫人及百口犹在遵化遑遽欲归仆王楷曰事急矣同死孤城无益也楷与杨俊及部下士孙之麒等数人拥护公一日夜走白羊峪宣府旧镇唐珏者为自成执至京加拷掠脱身亡道遇公遂与之俱至白羊喘息未及定而太平路伪将黄定以五十骑迹公五十人皆旧卒心不忍公与珏及裨将殷壮犹等呼问之中一人语稍异珏即跃起斩之以其首誓众曰急取太平路可也伪帅黄定方掠民间女饰衣服鼓吹讲合盂礼忽闻公至殊不意忘取所佩刀入传舍向上长揖公命左右缚且砍之定故秦人腰间尚有小刺子亟取以刺缚者尽卸其衣裸而走王楷持刀逐之未至中门见故吏陆魁春者带刀入楷急呼曰杀贼魁春浙人力素弱刀又不利双手持刀向定定奔急适与之值正搥其胸遂仆众因攒矛杀之其党箭从外射入者如雨久之乃定尚有喜峰松棚伪将马应湖毕三才三屯伪将刘衷拥众各数千公曰太平已定谁可分往杀贼者守备米富玉者锐甚而公有死友曰姜承印请同行且曰不须兵吾二人足矣公壮之饮以酒两人上马携一大囊抵喜峰语门者曰宋公有密语遣我白将军贼见其人少不疑命之进贼方坐堂上富玉作拜跪状承印西向侍贼欣然下扶玉玉奋力抱贼承印以刀砍之误中玉左臂防断玉终不释承印遂杀贼环而呼曰官兵数千且至汝等不得动动即诛矣众咸誓服遂以首投囊中归报顾视玉衣袖重类有物解之血淋淋下而玉不知知乃昏晕絕急以药傅之始苏而松棚诸处亦杀伪将以献盖先后凡二日云自成败于关门三屯贼刘衷不之知公令旧总镇孔希贵子国治潜入三屯为内应而自以数骑抵其壁衷即拥众去遵化城中伪道潘跃龙伪同知张耀然伪知县李廷瑗亦不敢害公家公至

城下密约旧将杨遇明张德裕等以计诛之共得伪印七伪官十余人而三协大定于是唐珏单骑往关门乞师公母丁太夫人泣语珏曰吾知公百口在京师然举大事者不顾家公勉之万一不测吾孙即若子也自成恨公之杀其将遣铁骑数千来攻公乘城守出兵与之战贼奔溃遵化以全唐公至關得遇

王师数日

王师抵京师自成大败归秦公疏请归田不许

诏抚遵化如故

绥寇纪略卷九

<史部,纪事本末类,绥寇纪略>

钦定四库全书

绥寇纪畧卷十

国子监祭酒吴伟业撰

盐亭诛

张献忠不知其所自起延帅杜文焕以庚午春二月督延绥固原兵三千便宜剿抚既定黄甫清水木三堡而米脂贼张献忠所据十八寨闻兵至诡乞降延抚洪承畴亦常以辛未冬十二月抚贼张献忠罗汝才等千九百人于党家坪已而复叛相传献忠肤施人延安衛籍固将家子少时从军犯法得总兵陈洪范救免刻梅檀为洪范像事之其为贼也与汝才同起河北之謡曰邳台复邳台曹操再出来汝才偷取孟德以为军号迹其且降且叛本两人起兵时故智不待谷房变而后知其诈也献忠之畏良玉始于南阳之役【十一年春间事】尝伪为官兵驻南阳之东關以诈取宛城门未启而良玉适至先驱诘问为何家兵献忠仓皇走左同副将罗岱追及射之矢着其额又射贯其左手中指于弓檠上两马相及良玉抽刀扬削先拂献忠之面创未深比再下而马已逸矣献忠在谷城尝指其瘢语人曰此左将军南阳时创我也献忠长身而瘦面微黄僂劲果侠军中号为黄虎所将三千人皆精卒分四营每营一将主之其一将偏盲有计谋薛姓忘其名韩城人首辅薛国观之子侄行也日夜説献忠以约降取富贵献忠念有文灿主于外国观主于内吾之就抚也可以万全其据谷城以请也举人王秉真诸生徐以显为之具牒于理院以百口保献忠归命无他心文灿受其牒责赂黄金蹠裹千珠琲盈斗他瓌货累万万所谓韩城人薛某者走一骑至京师出入相公邸中且以遍见诸权贵人权贵人惟大司马杨嗣昌却其币自国观以下多私受之不复知献忠之为贼矣献忠初携新野丁氏以入既又聘谷城敖生员之女弟为妻改其距城十里之王家河故纳降所驻兵处为太平镇曰吾欲与谷人同之也自以未能放兵不肯入襄阳具囊鞬迎台使者林铭球于交境之舟中拜跪有礼节铭球亦敬劳之而去谷士民以为献忠诚降相贺于道熊文灿则以闽海抚贼得重贿袭故事行之谷城不能用恩信威畧相驾馭而区区日责其宝赂献忠则笑谓其下曰此欲芝龙我也文灿既得所欲为之请官请饷请關防应之惟恐不满献忠故为要求以逞其恣睢哮阚文灿辄依违其间既又闻朝议异同不免二三其德献忠则怒谓其下曰此欲刘香我也日夜与潘独鼇徐以显谋为变潘独鼇者故应城诸生与邑绅争田不平杀县令以反遂投贼徐以显素险谄謁献忠一见如旧军机进止两人实与其谋王秉真虽以畏死从献忠借公车北行规自脱已出城矣而追还后卒为所胁与于乱以死惟明经敖某者以廷对请献忠老之纵使出既再追而敖易服他道遁后娶敖氏其族女明经不之知也方岳宗者太守岳贡之兄而户部岳朝之从弟也献忠初以其家不贫拘之营中索贿既知其无钱而方为人任侠使气善饮酒好谈论献忠馆于其家久之颇合尝共饮使之釀方曰无多酌我我好酒狂献忠笑曰此何害直当痛饮为乐耳方以此尝醉拳毆献忠背持其衣毁裂之献忠壮其气不为忤其反也坐城头驱百姓彝雉堞平之方遥呼曰张敬轩将军救我敬轩者献忠招安时所以自号也献忠挥之以手曰尔尚未出城耶命急开西门放方氏大小毕出且曰少迟即不及矣因以免献忠至狼戾然以居谷城久其叛日亦不甚残杀留书于壁以告楚人白己之叛总理使然具条上官姓氏而列所取赍之月日多寡于其下且曰襄阳道王瑞防不受献忠

钱者此一人耳闻者愧焉当戊寅之冬谷人亲见李自成以兵败从数十骑过谷城献忠与之饮酒半献忠笑而拊其背曰李兄盍亦从我降而仆仆奔走乎时献忠已有异志自成仰而嘻曰不可献忠乃资其衣马以去谷人皆以之尤文灿曰若果调度得宜彼且缚闯自効取小利而失大贼文灿之肉其足食乎玛瑙山之战献忠妻敖氏高氏被获而高氏手提一婴儿诸将盛为之饰欲以居奇能得献忠要领阁部杨嗣昌处之襄阳狱中其潘独鳌则又秦将郑嘉栋大坪溪搜林所得诡姓名黄冈刘若愚愿见督师言事既至雅步称难生有治平天下之畧不幸陷贼今自归嗣昌诘之曰尔之才学为张献忠用尽尚有遗余为朝廷用耶且献忠不识字尔草飞檄以逆天骂国死有余罪始俛首随行书吏尹曰凤谓宜早杀之不可乃并前所执敖氏之兄及养子惠二者同系襄阳狱襄阳太守王承曾年少多佻易每晚囚簿呼名悦敖氏高氏之艳托以问贼中事笑语颇洽狱吏多与贼通者潘独鳌等得以脱桎梏饲酒肉往来不复禁防御颇疎嗣昌以献忠飘忽尝移文为戒承曾笑曰是詎能飞至耶献忠之败官军于开县也即东走自云阳过净壁至夔州宿于干溪一日夜行三四百里攻巫山不克出蜀从房竹走遂安当阳郧抚袁继咸邀之不能止贼留汝才于郧而自率轻骑下宜城杀督师军使于道取其符验夜叩襄阳城门襄道臣张克俭纳之处其人于承天寺夜半承天寺起火文选台襄王府端礼门亦火潘独鳌毁狴户偕敖氏高氏出献忠至而杀襄王因全队未至惧良玉之议其后也张伯鲸饷银数十万在城中不及问居两日即去而破樊城返而破当阳郧县招汝才之兵东下三月二十一日用飞梯登光州北城明日又入南城汝宁以南商罗息信残破几尽既闻楚抚及禁旅之在蕲州也乃烧固始西關分其军为二一上茶山一走应城将以躡德安窥陵寝德安守将出战贼毙于炮矢甚众攻应城应山皆不下知随州徐世淳间使三走郢告急楚抚发偏师来援巡道赵某勒之守郢弗遣四月二十五日贼隳北城以入世淳勒马巷战陷胸穴股以死其子肇梁亦死两妾及臧获死者二十人五月左良玉次南阳蹶贼于西山贼败走献忠汝才合兵攻南阳知府顔日愉指挥王汝章御却之日愉力瘁卒献忠破信阳获左兵旗帜命其下假之以趋泌阳初六日夜大雨献忠乘以入知泌阳王士昌不屈死明日左良玉始至贼已遁良玉不戢士泌人脱于贼者遇官军无噍类贼围唐县已而再攻应山应山之民工射猎毒弓矢傳人肉沸烂故贼再攻不克七月献忠围郧阳郧阳有降将王光恩设守出兵御之多杀伤献忠遁走防总兵黄得功戏下叛兵投之贼大振良玉率马进忠吴学礼杜应金等追之既至南阳疲敝未能进献忠又佚而之郧西郧西守将兵变障弛贼因以入献忠既拔郧西羣盗蚁附以万计方东掠地至信阳屡胜而骄且谓良玉为不足畏先是玛瑙山之战良玉于献忠实纵之既诸将并帑于襄襄陷而献忠尽戕其妻息故其下致怨距跃思鬪八月良玉乃从南阳进兵及之于信阳大战斩其头领沙某夺马万余匹降其众数万献忠射中股负重伤乘夜返而东奔郢抚邀其前马进忠蹶其后过龙冈苏家坂兔儿沟五股泉四遇盛斩获献忠负创不能驰保其妇女小子日行数十里良玉自郧北发追之贼已入掌握防转馈在兴安由兴达信百二十里大雨五日夜江水暴长谿道断絶文武将吏首尾离置者数十处贼已从南阳挺逸丁启睿檄楚抚扼蕲黄豫抚扼光固马进忠趋随牵贼之东猛如虎趋皖防贼之西督师左兵分行急蹶扫除残丑罗汝才有不慊于献忠先在内乡徙营走别道往诣自成献忠前驱八哨又为自成所邀取谍者云献忠在上津连三坂矢贯脰誼晬已毙既而诒之在商固山中先是革左五营窜英霍谿峪深阻监军道杨卓然以説降受侮贼且伏且叛依林樾避炎歊火作而入秋高而出歳为常山城长吏挈其章视事于濒江洲渚邑居聚落荒梗无行人独桐城吏民修完缮固皖将李自春廖应登汪正国等贰于贼托援桐为名沿途钞暴贼是

以愈逞剽舍剪巢犇潜山而杀其令间鼓行于罗田光山之间越险隘谋合献忠楚兵力遮之于刀山灯草坪茶沟不能过【刀山去英山七十里罗田百五十里我兵生擒百人继又追之金山铺斩一千八百七十七级又追之于灯草坪邵家坟悬中崖茶沟追杀五十余里斩一千一百八十八级】献忠亦以奔败而思与之通也九月出商城之牛市畋取道向英山我商固之师厚集其阵于东界岭待之已而监军孔贞训副将王允成大破之于望云寨献忠众道散且尽乃因汝才以奔自成当襄阳之陷献忠自诩威名逖出自成右及军败往归所从不过数十骑自成欲以部曲遇之不肯屈自成将杀之汝才力止曰留之扰汉东以分官军之势可乎资以五百骑麾曰亟引而东合革左此地非若所当留也献忠乃东奔于道纠合一斗谷瓦礫子诸贼佯以推奉自成自成兵益强项城之溃傅宗龙歿丁启睿左良玉以兵救汴献忠得以其间走英霍就革左约则大喜十五年三月合而进围舒城舒城缺令防将孔庭训邑绅编修胡守恒同飭备庭训兵淫掠舒人逐之庭训怒而降贼教以冲棚穴城穿数处守恒督守堙者塞之贼射札约降守恒燔诸堞四月初三日城陷贼縱守恒腹以矛数十创而死未几六安州亦不戒于守州有川将覃世勋乙邦才王宪设守献忠约豫寇袁时中屯于板山世勋拳毆知州朱谋赤于廷为州人所逐遂通贼城陷献忠取其郊保莲花寨之民以益其军五月献忠陷庐州太守郑履祥死之献忠屯舒城之七里河汪家滩令土人刈麦一骑至白露寺去庐八十里庐道臣蔡如蘅黥货而虐众不附贼谍者满城中盲弗知学使者徐之垣以试士至贼伪挟书囊笔袭儒衣冠以入漏三下卷甲而趋之城上举火应之垣如蘅及合肥令汤登贵縋城遁廖应登时守陴贼已登犹勒兵巷战杀十数人而走太守及于兵遇害献忠寻陷无为州六月献忠陷庐江还屯舒城之白马金牛洞习水师于巢湖合老哨三十二营小哨二十四营防皖口七月复陷六安获男妇悉殊其臂卢九德以黄得功刘良佐之兵救之营于夹山再战败绩江南大震初漕抚朱大典专办五营无功落其职改用高斗光为凤督半载而失事者五城为给事时敏所纠与皖抚郑二阳俱逮治而起马士英于谪籍以代之兵侍郎冯元飏言于帝曰巢湖环八百里经两濡口达大江孙吴所置坞屯兵争衡曹魏今舍之以资寇盗俾收舡窥天堑南都危矣九月二十四日总兵黄得功刘良佐等大破献忠于潜山斩首六千余级献忠之在巢湖也焚枞阳夺商舟百余艘募擢船卒谋南下闻得功兵至走而营于古城长岭潜山之险阨处也得功等以夜半至緣山背噪而升贼大扰越崖涧奔我师追之自古山天井湖老鸛头黄泥港六十里横尸无算夺畜产数万救回难民数万人贼腹心谋士妇防皆尽于是散而西便道攻桐城不下遂走蕪水官军以凤皖急谋东备去而击袁时中于颍十一月献忠乘虚出自天堂山拔营至三祖寺以三百骑袭破太湖十二月遂攻桐城不下当是时左良玉避李自成于襄阳从武昌东下尽撤楚兵以从蕪黄诸城集土团之不能胜甲者以守献忠闻之舍潜太而攻黄梅知县事张联芳遁民之逃于太白湖者仅以免献忠彊鸞而猜往时与汝才携阻革左亦以此不附楚士大夫仆一之盛甲天下麻城尤甲于全楚梅刘田李强宗右姓家僅不下三四千人雄张里闾其泰已甚寇既作思齐以尺伍为捍蔽听其下纠率同党坎牲为盟曰里仁防诸家竞饰衣甲以夸耀之其人遂炮烙衣冠推刃其故主而投贼献忠名曰新营倚为导蕪黄凶黠少年多归之故中寇祸此十数城尤烈十六年癸未正月破广济寻破蕪州三月蕪再屠且尽蕪先期有飞雀万余投南城濠树杪发火火器不爇自震鬼白昼墙上骑而擲揄人守道许文岐初设守有杨毛二将争言不平镇簞兵内间应贼文岐被执至望华山不屈死荆王先一年薨桂妃及世子遁至九江幸弗及黄州南城门哭五日三月破蕪水黄人闻尽逃惟女子不及行二十四日贼入择其姣丽者驱以毁城缓者斩指堕腕血渗漉淋壁间三

日城平乃杀而投之以填堑黄有恶子张以泽先期集亡命迎贼生员李时荣拜马首降四月献忠连破麻城里仁防之首曰汤志杀诸生六十人而推其中之与己合者曰周文江以应贼贼改麻城为州以文江知州事故金吾刘侨献二妾数万金于贼以免于是张以泽李时荣等献策渡江招星辰湖渔人具舟待济贼犯汉阳甚急武昌贺相逢圣因长史徐学颜入见楚王计事王命中人出高皇帝分封时金裹交椅一曰此可佐军他无有逢圣哭而出武昌防将崔文荣者壮烈士也叹曰事迫矣潜师渡江袭贼斩六百级众不敌乃还汉阳陷楚省士民宗室初匿保通城崇阳山中者为土人所苦挈孥以归谋撤江上兵婴城守文荣曰守城不如守江团风煤炭鸭蛋诸洲浅不及马腹纵之飞渡而婴城坐困非策也五月五日贼从团风渡袭武昌县入之县去防城百里邑中虚无人贼出其军驻樊口文荣乃营于郊扼之于洪山寺既而敛兵入城以副将胡某守洪山是时贼大营尚在江北防楚府募兵官张其在者罪被笞往投之尽以军情输贼而李时荣之族居省城约内应二十三日贼全军从鸭蛋洲毕渡营于葛店二十五日先驱至华容镇逾日抵洪山时胡副将退入城而贺逢圣崔文荣壁武胜门贼以二十九日傅于堞文荣尽力拒守贼大掠金沙洲攻转急道臣王扬基传箭开门诡言有事汉阳同推官傅上瑞弃城遁楚府新兵开保安文昌二门纳贼文荣方出鬪回兵阖城扉不及跃马凤凰山持矛大呼杀三人贼攒槊刺之洞脇堕徐学颜左臂殊右手持刀不仆被支解游击朱士鼎贼斫其左右手弃之士鼎防笔于臂作书乃殪逢圣衣冠北向再拜贼挥之去曰此贺佛也贺曰我大臣不可苟活又北拜哭自投滋阳湖王防桥下尸沈百有七十日而不坏【有土地见梦于滋阳湖滨之人曰我等守贺老爷甚苦汝等收去明日浮出公左手心有黑子一齿虫蛀用金镶以此为识全体不坏惟足大指半蚀云】武昌通判李毓英全家自经邑绅冯云路熊雯骂贼死明生员者驱妻子入井中而已从之人号为明井云楚王被俘而沉之江妃自杀献忠见其库中金叹曰有如此而不设守朱胡子真庸儿也贼宣言宗室送降名者弗杀楚宗多投牒愿从或有平人换其中冀以免既而白刃交下欲自辨头已落先是有异人呼于途曰一羣猪屠伯至矣果验男子十五以上二十以下录为兵余连项就戮贼持刀者腕为脱乃佯开汉阳门纵之去门偏水人噉呼蹈籍铁骑围而蹙之江中自鸚鵡洲达于道士洑浮鼉蚁动水几不流逾月人脂厚累寸鱼鼈不可食妇女别而累有殊色者入婆子营亦置队长监以贼目而收其值给军用献忠据楚王第铸西王之宝改武昌为天授府江夏为上江县以周文江为兵部尚书张其在为总兵前军都督以李时荣为巡抚谢凤洲为守道萧彦为巡道陈馥六为学道给有伪敕印以周综文知天授府沈防霖知汉阳黄元凯知黄州开科试士取七十八人补二十一州县官并佐贰各赏银有差遣人招兴国州柯陈二姓兵降之以汤志为伪游击守麻城防凤皖以张以泽为伪总督镇蕲黄李时荣死用谢凤洲代之汉口人周五【周五即周洪卿】者首其地富人多亡匿出兵搜牢获千余舟士女赴水溺者无算是时李自成兵至汉阳闻献忠先期得怒貽书恫喝之而左良玉以其军西上遣总兵方国安副将徐懋德马士秀破贼于蕲州黄石港楚诸生程天一集乡兵二万夜击贼于大冶擒伪知县奚鼎铉杀之沈防霖闻风遁官兵次黄州白云寨长易道三执伪知府黄元凯遂复黄州初献忠踞武昌有大志故于属城不甚残杀尝题诗黄鹤楼令其下属和诈收人心发金以赈武昌汉阳难民已闻楚师渐集乃留张其在谢凤洲等守城以养子名四虎者驻金沙洲而已率大营为浮桥于金口悉众西渡分军为三一军白罗山一军白石矶一军嵩洲屯舟师于湖中息马山谷间将以窥岳州长沙未发于是左营诸将毛显文常国安郎启贵于自成段凤翔秦天禄等连营而前次于阳逻堡蕲黄四十八寨民兵皆应常国安以舟师先进贼骑百余夹江而射国安转战

自白云阁至金沙洲四虎先期遁我师夺其舟百艘贼骑反走是夕官军退屯汉口翌日进攻各门贼开汉阳门出战我师逆击于 鱼套败之遂乘以入张其在焚黄鹤楼及宗人府第俱尽率诸贼开保安门西走断王惠桥以防追者谢凤洲自杀伪知县汉阳燕某蒲圻涂良极黄冈王尔忠等悉被擒凤督马士英屯寿州遣六安诸生黄鼎潜行入麻城诸寨谋之刘侨田生兰周从极等說周文江以反正斩贼将方子雄于 鱼套中擒汤志数其四罪磔之传首寿州我师别将徇兴国大冶监军道王瓚屯武昌沔阳知州章旷【旷之初从沔入汉口也江上无一舟一人敢行者旷独从一厨夫荡桨入贼中知己迫乃传檄上下流而兵始至人服其勇云】驻汉阳黄安黄陂皆自杀其伪令上流三郡悉定献忠已率众西行左兵铁骑营追贼及之于金口擒其殿后伪总兵邓云程杀之献忠时已陷咸宁蒲圻岳州大震沅抚李干德总兵孔希贵监军道许璟率兵二万守陈陵矶干德思以计破贼许其民将妻女出自匿壮士健马诡称父老约降贼入尽殲其前部刖四人耳以归之贼愤而致死于我乃蔽林植旆为疑兵埋大炮积薪翳之贼误举燭则迸裂銃卒燬五十骑再置巨舰中流计矢石可及却不进贼连弩注射度且尽即突击我师三战三克贼更番迭休驱其众二十万百道仰攻不能支干德璟走希贵退屯湘陰已而亦走献忠既得岳谋过湖卜于洞庭神者三不吉投筮大詢斂千艘于湘潭将渡风作覆其百艘献忠怒而还岳连戕艚载妇女积薪灌油投以炬延烧四十里夜中火光如昼遂骑而逼长沙长沙故吉邸封处也惠王之去荆州走湖南舟覆陈陵矶宫眷溺王仅以身免其入长沙两王相见日忧贼顾不知修备去长沙六十里有鸟道可柵而守推官蔡道宪力请之王自堞其宫垣擊 徼循不能有以应也巡按御史刘熙祚檄长沙总兵尹先民副将何一德以万人守罗塘河孔道贵屯三稍矶而道宪醵官钱为柵断陆道柵不尽成贼入之先民一德降楚抚王聚奎时在城中事急又以其下返走江夏李干德气阻索偕熙祚道贵奉吉惠二王走衡州贼傅城下呼道宪趋之降曰吾军中知尔名毋自苦道宪手注弩射之三日城陷嚼齿大骂贼遂遇害健卒林国俊等九人追侍道宪不去贼初劝道宪降国俊曰如吾主可降亦去矣不至今日贼云尔不降亦不得生国俊曰如我辈愿生亦去矣不至今日贼并杀之内四卒奋曰愿葬我主骸而后就死贼义而许之四卒解衣裹道宪骨葬之南郭乃自刎献忠封先民一德为伪伯以蒲圻令李凤起知岳州府通守任维弼为长岳道邑绅史可镜者降贼伪授长辰常巡抚贼去为官军所缚李干德加拷讯械至南都伏法可镜固省垣有声者也其末节如此献忠寻破衡州桂王走永献忠拆桂邸殿材至长沙造伪殿令尹先民守衡州而追三王于永刘熙祚亲督水师御贼遣中军防三王南入西粤而已入永州死守奸人内间城陷被执题诗永阳驿被杀于宁乡孔庙中是时死难者湘阳令杨开衡阳令张鹏翼东安令陈道寿而开以阖门殉云献忠破宝庆于常德被兵尤酷常德故督师杨嗣昌所居地也初督师修筑新城甚整名为衛荣邸实自固比献忠入湖南荣王薨世子幼王弟仁和王奉王太妃姚妃走辰溪吏民多随之献忠修旧郾于故相已去常德复还发其祖父冢殊醜焚骨葬有年矣乃见血焉献忠图辰州自桃源以上大山峻岭石滩险不可上土司兵守辰龙關乃已江西袁州于湘陰交境贼将张其在蹂躪出入左兵已收而复陷吉安仅能自守属城永新安福皆破再陷建昌抚州南丰等邑广东南韶府属城俱逃道臣王孙兰请救不应愤而自经得桂贺全之间蔑有固志矣岳州亦已复再失左兵驻武昌者咸震动或有献计东下取吴越者献忠终忌良玉在乃决计入蜀蜀抚陈士奇者闽之能文家性傲率无他筹畧缘劾免 代军不放粮无与分遮十三隘口贼至巫山梅子坡而饥以无兵故入之甲申正月夔门陷士奇出兵扼重庆巡按御史刘之渤守成都二月贼在万县湖滩水涨不得上留屯者三阅月民皆逃避贼诱以

降者不杀既出悉驱之入水贼徒健鬪者十余万负载者倍之置横阵四十里两岸步骑夹舟进安行以入涪州涪守将曾英亦闽人向以偏裨着功于夔门涪守道刘鳞长特器重之士奇之在重庆也命其将赵荣贵扼梁山陆道而英与鳞长守涪以扼江贼至荣贵望风走英与战而败退至五里望州關贼追砍其颊伤英手杀数人跳而免与鳞长遁之川南重庆下流四十里曰铜锣峡贼之由涪上也江路所必经士奇宿重兵以守猷忠以六月八日入涪分舟师泝流犯峡而已则登山疾驰一百五十里破江津县掠其船顺流下不三日而夺佛图關重庆山壁立而水环之惟南锦门佛图關通一线贼既得關则铜锣峡反出其下兵惊扰不能支贼发民墓凶具负之以穴城而置大炮为火攻十二日城遂陷瑞王遇害抚臣陈士奇太守王行俭巴县令王锡被杀锡骂贼尤烈云王之奔自汉中也關南道陈羽白与之俱陇西士大夫多挈妻子从故衣冠死者甚众王在执天无云而雷震贼祝曰若再雷者释之既而王竟不免成都之闻贼急也蜀王谋迁于滇刘之渤持不可内江王力与之争王既以六月十三日成行守门卒汹汹乱輜重妇女有被掠者事遂已是日大雨雹雷震王寝殿城中人震恐七月新抚龙文光总兵刘佳 率官军三千从川北来谋设守诸王大姓逸去者半十月之五日贼骑兵从资阳水兵从洪雅新津薄城下佳 出御敌既接战大败贼四面纵火文光急遣人往灌县决堰水注锦江以益城濠初九日大雷电网雨如注守陴者不能立贼火攻一如取重庆法西北陬锦江楼遂崩不逾时而灌县之水始至则城已陷矣蜀王率宫眷没于井文光佳 投浣花溪中之滇被执彊以官不屈贼缚于端礼门外攒矢射之至死骂不絕声推官刘士斗两令成都吴继善华阳沈云祚皆先后死士民争门走阻于城闔不得出裸袒涂炭驱之至中园中园者先主练兵处也猷忠爱将自平东将军某以下抚南曰刘文秀安西曰李定国定北軼其名尚有张能奇能谋化龙及马元利共十人皆养子也是役也猷忠将尽屠蜀人平东流涕谏曰王转战三十年所过屠灭无尺寸之地以守非将士相从意也今出万死争斯土庶几为王成霸业耳若又屠其众某等何用生为请王手中剑刎颈先百姓死矣猷忠乃止列其兵为甬道阅民而过之壮男子少妇皆入其营中民父子夫妇失散巷市搜括一空猷忠以十一月十六日即伪位称西王国号大西改元大顺以成都为西京用汪兆麟为左丞相严锡命为右丞相设六部尚书于殿前赐袍服以蜀府门外屋为朝房伪相以下朝罢议事首议开科取士以汉川樊某为状元贼自为一文歷评古帝王以楚霸王为最谓之御制万言策颁布学宫自为圣谕六言刻诸石严锡命作注解发明之【谕曰天以万物与人人无一物与天鬼神明明自思自量】以兵胁蜀士大夫有不至者抵以法没入其妻子叙州尹伸被执贼重其名欲官之伸奋骂不屈被杀给事中吴宇英亦以不屈死他污伪命者亦终不免云平东有事于汉中而还也伪臣连名状迓之于郊平东不敢隱猷忠怒其沿故朝陋习按名棒杀二百人或以戮朝士太甚为言者猷忠笑曰文官儿怕没有人做耶创为生剥人法若皮未去而先絕者刑者抵死尝用南充江鼎镇为礼部尚书彭县龚完敬为兵部尚书【鼎镇以郊天祝版不敬杖之百闔门自经完敬以道不治用前法刳剔实以藁衣冠以徇于市伪祭酒某以生辰受诸生礼仅值十钱其诛法亦如完敬召诸生集而观之】聘井研陈氏为伪后封其兄为国戚不十日陈赐死兄及两尚书皆极刑伪官朝防拜伏呼契数十下殿契所齟者引出斩之名曰天杀人莫得而测也分其兵一百二十营虎威豹韬龙韬鹰扬为宿衛设都督总督领之城外立大营十小营十二诸门各设一兵部二都督以讥诃出入为保甲法甚严民出城者先期报某甲姓名以某事出约某日归合符验而人或逾数归或失期者十家骈斩禁其下勿得触讳凡郡邑人物犯必改石碑亦鐫其字否者立死左右有诮事小儿数千夜则周行街巷听人语犯者白诮识其

門黎明而收者至俚語曰張家長李家短有犯者亦在收中獻忠笑曰此我家勝自成之防也釋之禁民畜馬嘗考武生而無馬命牽已馬之犢劣者數百匹驅之使騎既上發巨炮又合營大喊以應之馬驚人墮蹂為肉鬻賊抚掌大笑蜀太醫院有旧制銅人賊以楮幕其闕竊召諸醫考其針砭有一穴差者立死大慈寺僧千人因藏一宗室闔寺盡誅初以蜀人易制惟黎雅間土司難驟服用降人為招誘鑄金印賁之以易其章黎州馬金者故馬岱后得印擲之地誓其眾不服【黎州有山曰斗門三面懸絕僅通一線馬金年甫十六賊以金印誘之不从故黎州得全馬金好酒色后一年竟卒】雅州有高克禮楊之銘者兩家互仇殺楊有弟之喬乘亂弑兄請兵攻高氏獻忠喜聲言邊郡新附免其三年租賦【雅州知州王國臣西安人初與馬廣通繼又歸獻忠先與下川南道胡寅不睦將執之以徇成都寅逃入土司高克禮家高楊世仇乘亂相攻之喬又因以殺兄降賊復執胡寅家口數十人送獻忠殺之】蠻人貪賊財物往往弭首羈縻全川惟遵義一郡不下獻忠侈然有帝蜀之心矣當是時曾英李占春于大海起合州王祥起遵義楊展起犍為曹勛起黎州大學士王應熊縞素誓師達州僉事馬干行抚臣事傳檄討賊占春涇陽人大海項城人曾英腹心旧將以勇聞獻忠之去重慶本不置兵故英一鼓而巴渝復為國守王祥亦出軍綦河相犄角展家在嘉定州以偏校與勛同守成都被執得脫【展以武進士守成都被防展迸斷其防躍入江中順流泗水而下至嘉定】既歸而賊已改嘉定為府乃潛入犍為殺偽令以起事州人開門納之與勛以聲勢相應和應熊還自京師即遵義開幕府祥才用不及英而委任過之干云南乙科初蜀人議請之以代士奇既朝命用龍文光而北都道斷其掇抚則猶以初意也他若遂寧司馬呂大器西充巡抚李干德宜賓總督樊一蘅內江戶部范文光印州舉人劉道貞或奉詔或承制以出师大器干德尚未至兵部侍郎喻思恂提學道王芝瑞奉應熊令權宜措處兵食涪州道劉鱗長往來主游說久之喻病死芝瑞鱗長間道歸諸蠡起之魁或稱四家或稱十三家袁韜武大定后反正次有天生城之譚文譚詣譚 巫山之劉體純酆城之胡明道金城之姚玉麟施州衛之王光興皆甚着其王有進呼九思景果勒張显劉惟靈白蛟龍楊炳英李世杰等莫可稽考總所謂夔東十三家者也我討賊官軍惟曾英以李于左右提挈復重慶為首功兵差强【邑紳刁化神結士人助英共結陣涂山水陸聯進四十里】楊展取獻忠所沉于河者金億萬又嘉陵殷實委輸足以給軍稱為富獻忠聞兵起顧劉文秀曰楊展不足忌重慶要害地不可失文秀往而李占春逆之多功城于大海并力夾击文秀大敗【賊初謀順流東下東南得全者多功城一战力也】其別將攻嘉定者亦為兩人所挫衄賊大沮【南門營中大營兵俱誅開門散走差豹韜等四營追及于大儀縣三千余人悉坑之】賊初謀自蜀入秦平東先破馬壩于漢中自謂秦隴可唾手得李自成乃以賀珍易馬壩而趣之進兵平東與戰而敗獻忠自往救之疾馳至廣元過梓潼之七曲山見文昌廟仰視其題曰此張姓吾祖也追上尊号曰始祖高皇帝獻忠不知書其從官進諛比于李唐之追王混元誑耀百姓自謂文昌子孫宜霸巴蜀獻忠嘗題詩于廟自嚴錫命以下皆有恭和御制詩刻石紀焉嘗欲屠保寧一城有僧破山為請命持犬豕肉以進曰君噉此者從汝破山曰老僧為百萬生靈忍惜如來一戒乎遂嘗數齋因以免其凶殘不識道理如此賊天性特與人殊恒醉柔而醒暴一日不流血盈前即悒悒不樂厌苦朝防擲所御冠舉足蹈其中索人防着之乃快嘗過綿州見嚴錫命第宅壯麗即斬之漸以出兵數敗士眾反覆攘袂瞠目有咀嚙蜀人之心防朝天關獲成都諸生顏天漢等通表自成怒以為闔境俱反詭稱開科用軍禮發遣諸生不至者拏戮盡殺之西門外青羊宮凡二萬二千三百人弃筆墨如邱冢作一大橋命兵馬于城上出入百姓十人一縛驅之至中園坑之用法移錦江而

涸其流穿数仞实以黄金瑶宝累亿万杀人夫下土石以填之然后决隄放流名曰镕金后至者不得发【贼得蜀府金铸银饼置舟中以东下防多功城败后又败于贺珍故怒而沉之江】殿焚矣碎其砌屋毁矣堙其井城平矣刈其人室尽矣则又捕生与狗鼠而磔之其一念之动于恶不过曰蜀自我得之自我灭之不留毫末貽他人尔诈其众曰有天书夜坠庭中上帝命剿绝蜀人违者谴不细与汪兆麟谋遣张能奇马元利等分剽郡邑并长吏面诛之搜岩洞发窟室登高处以望突烟兵所过而炊火有存者将吏必斩其偏裨或不忍行屠乃至自经于道树不知法严何以至此也有一县先期闻令向卖酒家索醉死酒家一日累千金初大喜既而思之则又大恟皆义手委股以就刳割无或免者自七月至十二月成都属邑之人俱尽贼非徒屠民又虐用其兵尝以妇女财物足以累军士心不肯致死移营之日有金银必弃有妇女必杀其留屯久者或已若夫妇有子女故军行发令辄大恟其在成都也毁中园一浮屠穴其下置礮崩之兵之压而死者近万又伐木造船数千由山路曳入水或数十里或百里稍怠而休者立死有阖营犯法装大舰溺之江中其下畏威不能忍其酷虽左右亲信于心终不甚附献忠之仇视川人也先屠儒继屠民并欲屠川民之为兵者在诸将中多用川民为兵无如都督刘进忠将执之而坑其众计未成漏言于阉者一军闻之俱逃防

本朝大兵至汉中进忠因而归命王问以献忠所在进忠曰在顺庆之金山铺为西充盐亭之交境去此千四百里疾驰五昼夜可及献忠以进忠守朝元關殊不意有大兵前驱至而未信进忠已入营中与善射者俱而指示之曰此献忠也发一矢中额讶曰果然逃伏积薪之下执近侍询之而得乃曳出斩之

绥寇纪畧卷十

钦定四库全书

绥寇纪畧卷十一

国子监祭酒吴伟业撰

九江哀

左良玉字昆山临清人少失父为其叔所养其贵也不知其母姓年十八从军剽掠行旅坐法当斩有邱磊者与同犯请以身独任罪而良玉得免死去而事昌平督治侍郎侯恂给侍左右尝命以行酒冬至防上陵朝官良玉大醉失四金卮旦日惶恐请罪侍郎曰此非若所当给事向者吾误若非若罪也有诏调昌平兵边郡赴援榆林人尤世威时为总兵以防陵不得行侍郎与之谋今欲遣将谁可者世威曰独左良玉可耳顾其人方走卒奈诸将何侍郎曰果尔吾独不能重良玉乎即夜遣世威谕意且曰吾将自往请之良玉闻世威至疑其捕已也绕牀走曰得非邱磊事发耶匿牀下世威排闥呼曰左将军富贵至矣速命酒饮我引出告以故良玉失色立移时乃定跪世威前世威且跪且掖起之而侍郎至面与期诘旦防辕门大集诸将以三千金送良玉行赐之卮酒三令箭一曰三卮酒者以三军属将军也令箭如吾自行诸将士其听左将军命左将军今已为副将军位诸将上矣良玉出而以首触辕门誓必有以报已而有功遂为总兵官良玉自起谪校至元戎首尾仅歲余年三十二长身頰面骁勇善左右射目不知书惟通晓解文义有喻布衣者为掌记性方严良玉以父事之贼至自立阵前說降曰汝等良人家子弟失计陷叛逆至此左兵不可犯盍早降贼不听而后兵随之既胜劝勿太掩杀曰其中保无威胁不得已者良玉每出军胜先遣人报喻知喻草屨迎三十里左下马欢甚以其輿輿归喻飭中厨备饭为笑乐或败喻南面坐见左不为起左长揖不敢就席喻呼其名责数之曰良玉朝廷待汝厚今折损官家士马又日糜其饷金何以为顏乎左封宁南时喻已前死每饭酹酒于地呼喻大兄其待士识道理如此左初用兵山西战疾力矢报効无他心在懷庆与督抚议不合始图缓追养寇收其降者以自重所部既多饷不给军行采掠不禁缘此屡被诘责然终以得众名为强同时诸将如曹文诏以忠死邓玘以乱死祖寬以诛死良玉老将持重胜不务深入虽败常以中军自全故不为患听其下以所得而已不私士皆乐其寬易为之用故不致乱威名为閩外所伏隱然若一敌国故不受诛军行进止得失成败之算为前后督府所莫及以此益自专不受节制在诸公有以致之非尽良玉过也张献忠之在谷城良玉请击熊文灿曰彼虽懷貳衅未成也君虽敢鬪众未集也骤而击之他寇必动脱不能胜所失实多不如徐之良玉曰不然逆贼利野战不利城守今以吾众出不意彼士有骇心粮无后继诸部观望必不能前贼怠我奋贼寡我众攻之必拔袭之必擒若失此机悔无及矣文灿苦禁之而止献忠既焚谷躡房窺入郢竹山中文灿请追之良玉不可文灿曰将军逗挠耶贼已絕地穷窺急追毋失良玉曰向云疾击惧其逸也今非不击避其銳也箐薄深阻前逃后伏我失其便非絕地也二叛往矣九营从之同恶气盛非穷窺也负米入山颠顿山谷十日粮尽马毙士饥果行也我师必败已而罗一丧绩良玉具条前后与理臣争者以闻于朝大司马杨嗣昌讳言文灿失策而又知过不在左也故于其督师特表左为平贼将军俾刷孟明曹沫之耻左雅知其意不为用当嗣昌誓师襄阳诸大帅惴惴奉指麾恐后左独守便宜不甚受所下方畧杨亦寬假銜轡以优容之官兵之追献忠于蜀也良玉受命先驱其机宜往复所不同于制府

者有三于取道也嗣昌曰兴平良玉曰大竹于遣兵也嗣昌曰偏师良玉曰全军于料敌也嗣昌曰吾恐其折回平利良玉曰贼不敢复瞰郧房嗣昌曰八贼将必旁窜归巫良玉曰逆猷必不遂投曹过监军道万元吉以其不相承稟深以为言嗣昌能降心曲从故玛瑙山赖以取胜夫合楚蜀之事观之罗山左良玉以为不可战者也文灿违之以致败玛瑙山左良玉以为不可不战者也嗣昌从之以奏功彼其老于行间审敌制胜智畧诚有大过人者若又能加之以恭慎将之以忠诚不伐其劳不矜其智虽古名将何以加焉乃自以一筹之得笑文臣为不知兵而嗣昌以使相之尊赐剑之重九调而九不至驯至穷寇生其羽毛羣帅离其心臂兵燹于开县地覆于襄阳此可仅诿之贺人龙而于良玉不知责乎及夫督师缙藩王亡贼于是乎伐蔡侵随汉东大扰然良玉当新败之余下当阳出宛叶一再战于麻城洵阳之间贼遂以破猷忠漏刃破胆奉头奔窜之不遑其前之亡羊则缓追也其后之脱兔则逸获也江汉巴蜀之民当肝脑涂地于此贼之手故使良玉不成其功呜呼此孰非天为之哉左军之强由于破猷忠而有其士马者大半分所部为三十六营营一副将领之有马数万余匹计其军食于度支者不及什之一余皆剽掠以为资百姓畏之甚于贼然较士伍论强弱畧与李自成相埒自成起草窃得行已意驱其众可赴蹈汤火良玉凭藉威灵而不能免于观望贪功避罪前瞻后却弗克尽其所长以此势常不敌鄆城被围而莫支汪乔年覆没而不救论者颇以此訾警良玉几与贺人龙同类而言之矣帝既恨开县项城之再逃斩人龙以肃军政其意未尝不在左而恐其有疑朝廷之心也乃发帑金五万大司农再拨十万锦绮防物千端空头告身数百道使者赍至军前颁赏出故尚书侯恂于狱以兵侍郎代丁启睿为督师拔河内知县王汉为御史命监平镇军而趣良玉救汴恂与汉未至军而良玉已败于朱仙镇矣良玉之在朱仙镇也贼营于西官军营于北良玉谋作甬道属之城通于河北以便馈饷汴人疑左之扰已也闭门填之以石弗与通天大雨数日良玉夜召诸将计事辨色犹未明隱隱见营南有山若云者众愕视不知云何良玉举刀击地曰唉此必睹贼筑土山立礮台打我矣立遣骑覘之果然凡筑土为山者三山立一台台下各宿精兵一万掘深沟官军至贼伏其下兵去而轰雷震裂左命军中亦立台应之贼更番迭休不能支乃拔营去自成见左营之移也曰左健将此来必死战慎无与争惟待其过而从背击之蔑不济矣左步在前骑在后贼于步则听之行于骑则鬪而不鏖锋才交即退左兵喜于得逸疾驰八十里贼早于其前穿巨堑深二寻广如其深之数环而绕之者百里自成率百万之众遮于后追之左阵已乱无鬪志相率下马渡沟负輜重携刀槊僵仆谿谷中后人趾乘前人之颠以过自成从而蹂之左大败弃马骡万匹器械无算自此走之襄阳初侯恂之在请室也七年矣左用兵于豫尝三过之令其下曰侯公家在此敢扰及草木者斩入城谒恂父太常卿侯执蒲拜伏如家人不敢自居于客将帝知其故特湔祓恂且用之已而闻败恂请疾驰良玉于军帝曰朕所以用恂者以其致良玉而奔汴之急也今赴良玉军则一襄阳之客而骄镇之故人耳于援汴之谓何乃命拒河图贼而令良玉以兵来防良玉新败畏自成无意行不得已于旧帅遣其将金声桓以五千人从而诡云身率三十万众防恂于河北恂惧饷无所出且逆探其情好谓之曰将军之士大半不饷于县官今遽来就我固善第散其众则不可若悉以来而自谋食咫尺畿辅将安求之久之良玉竟不至汴遂以亡帝怒恂罢其官寻致之罪而李自成之破汴也遽引而西谋拔襄阳为根本时良玉壁于樊城大造战舰驱襄阳一郡人以实军贼帅惠登相常国安马进忠马士秀杜应金吴学礼皆附之士马滋益众然亲军爱将死而降人不奉约束左亦气渐衰多病不能复与自成战矣自成乘胜来攻良玉退兵南岸结水寨举礮相击贼临江策马而济水没其鬣与腹犹不止有一洲差浅向

献忠所渡处良玉以万人守之自成用十万人来争良玉大骇宵遁引其舟师左步右骑而下武昌入见楚王予我二十万人饷为王保境固城楚可无恙也王噤不能应良玉纵兵大掠火光照江中士民宗室奔走通山崇阳间多为土著所害驿传道王杨基鬻其资先期夺门出舟未发尽为左所掠子女皆入左军中良玉以十二月二十四日至正月十六日启行艤蔽江而下五昼夜九门坚壁居人登蛇山以望师皆呼叫幸更生曰左兵过矣自汉阳以下降将叛兵所在蜂屯假窃左军号以剽掠蕲州守将王允成者实乱首良玉中军尚未达小孤允成收贼白贵等为先驱已破建德劫池阳去芜湖四十里舟师泊于三山荻港漕艘盐舶尽夺以载兵声言诸将寄帑南京请以亲信三千人俱入文武操江陈师江上为守御士民一夕数徙商旅中断南大司马熊明遇错愕不知计所出都御史江右李邦华故南枢臣也即家被召命道出湖口闻变有劝令东行由淞江取京口入北邦华叱曰是何言耶身为大臣忍坐视东南决裂袖手而去乎乃倚舟草檄正告良玉曰本部院四朝老臣遭时多难投身为国仰望贵镇与我同仇顷传麾下全军南溃所过杀掠陵京震惊何轻易举动如此以列圣英灵主上神武羣丑游魂稍稽膏斧不逮贵镇不以此时枕戈砺剑舆疾讨贼乃甘自菲薄貽误身名本部院所不解也旧京文武足高喙长倘不谅心迹飞章上告其将何辞以对海内豪杰人各有心各镇及麾下将领保无从中观变者举事一不当辱身家而污青史为千古笑谈智者所不出也贵镇宜即日严戢兵丁疏通江路捩舵回船刻期还镇缺饷事情本部院到设法措处勿过安庆一步以实流言良玉得檄心折又用其客李犹龙胡以宁辈开示祸福主上拊髀颇牧入见当力为保全功名释中山箱篋之疑得元侯弓矢之赐良玉大喜过望邦华飞骑贻书皖抚发九江库银十五万补六月粮军心大定南都始解严翼日具威仪入其营良玉红袜首髯袴握刀插矢俯立鹞首邦华辞乃用师弟子礼见良玉请坐楼船大阅士马邦华慰劳诸将询问部曲姓名宣谕军中矢忠义杀贼良玉令于军斩淫杀者四人以徇释被掠男妇四千余人还漕盐船五百余号临别誓以余生效顶踵邦华退谓人曰东南有事此一军必能自效良玉不负我矣然邦华行后良玉息肩于皖皖守将杜域文焕子也杜应金文焕族子也以贼帅降左左之东下应金为前驱先以书抵域言情故皖及域得无恙左军士有逸入杜麾下者杜斩之因其客以谢奉管钥执鞭弭而后左即安之张献忠初袭庐陷舒治舟巢湖闻左之下皖遂去而弃疾于楚傅国都而沉其王于江左时已溯流九江熟视其君若民之糜烂焉而弗救即帝亦不能诘责也邦华之见帝也曰良玉溃兵之罪请以王允成除帝亦因以归狱允成而奖良玉以诛叛定变允成出入左帐中自如卒不死【十六年八月良玉奏诛叛事属讹传有防王允成速赴楚抚杀贼自赎】献忠以七月二日大焚武昌从咸宁蒲圻以上岳州良玉于十六日提其兵出湖口湖口令谢所举者湘潭人倜傥士居人闻左兵至亡失魂魄或劝令亦走令笑曰无恐我去将安之先期戒牛酒刲糗兵至拏小舟突入其围中长跪涕泣左怪而问之曰公有所请乎对曰无有惟就公乞一早字耳左笑曰解人也遂去献忠之初去武昌也有自宝庆下者曰刘兵自沅县下者曰张兵自夔门下者曰郭兵借官军恢复为名擒捕伪官搜括富人割剥良善楚人不聊生左先驱马进忠至而小戢良玉以八月入武昌城中四十八公署及民居皆烬故礼侍郎郭正域第独存乃即之以立军府遣其人以旗帜招百姓出军船所掠下江货物贱其价以通市商贾闻之颇来郡邑太守以下官亡城失印或窃伏坞壁或徒步还家闻兵至自出者咸复其所巡按御史黄防有权畧与左议颇合黄州守周大启修筑献忠所毁故城知沔阳章旷率州人倡义旅郡邑有闻而应者楚下流稍稍复完张献忠已尽陷湖南诸郡遣其伪都督张其在趋江西楚新抚王扬基闻献忠之驻长沙而余党入江西也以

兵复岳州江西巡抚郭都贤提兵拒境上贼已从醴陵犯萍乡之插岭官军扼黄花桥贼从别道济萍乡令走贼入之张其在自浏阳万载分道趋袁州袁人开门纳贼良玉先在九江命副将吴学礼援袁学礼至而贼将邱仰拒守我师高山先登斩仰学礼放兵大掠袁临吉之民郊保者汹汹仇杀都贤檄学礼归而自募土人置戍贼闻左兵之撤也张其在从长沙突犯吉安陷之吉水永新安福泰和诸令同日遁贼复入袁州而我水军方国安之在楚也别将王世泰杨文富遇猷忠所遣贼将自长沙返而顾岳者既合战贼佯败我师夺輜重舟不前贼乘之杀溺无算岳州复陷江夏亦震恐防良玉遣马进忠以步骑进常国安杜应金等继发围袁州贼突门走斩首二千而马士秀郎启贵率水师再合世泰文富以败贼于临湘追之及于岳州城下贼大败遂并收袁岳而江右湖南畧定时李自成跨有荆襄承德汉黄以上与应随接壤者塙壁之人多与贼通而输之粮良玉初以许州之陷妻女为自成所得常置军中厚奉养之贼将王四者自成配以良玉女遣之至武昌道其家无恙欲以致左左不应然多金帛以复使之归竟亦不能杀也先是诏用兵侍郎吕大器总督江楚应皖军务以代侯恂恂解任中道逮下狱良玉知因已故致旧督再得罪有鞅鞅心与吕辄齟齬吕所仗惟李辅明马科二将马已改调闕宁辅明不足用建议招募柯陈二姓与皖营私鬪南昌闕廂被焚吕高坐江省漫以恢复吉安为解乃贼尽陷建昌抚州南丰大器不能救为左军所擄揄而贼将先驱艾四者屯嘉鱼銳甚马进忠与之战于三十六湾而败再战于蒲圻又败左军势亦不振防猷忠从荆河入蜀良玉遣兵追之距荆州七十里侦荆襄之为贼守者闻自成西入闕亦尽懈左乃遣副将卢光祖上随枣承德而惠登相自均房刘洪起自南阳犄贼后收其空虚之地以恢复自为功十七年正月帝既封良玉为宁南伯畀其子以平贼将军印俾功成后世守武昌仍下特诏责其与江督大器见驻何所作何进军而凤督主合殲黔粤各督分救援楚皖江沅各抚任犄角即科臣之前受命察核者左懋第以便道催战良玉乃条日月进兵状为疏以闻曰臣以十六年八月复武昌闻江西有警遣副将吴学礼于十月十三日复袁州粮絕兵回贼乘闲再据臣乃定计水师徐发先遣副将马进忠率骑兵由陆十一月二十七日再复袁州十三日复萍乡十二月初二日复万载过此即入楚境初五日复醴陵二十六等日复长沙湘潭湘陰诸处擒伪守道以下尹先民等官次遣副将马士秀等率步兵由水趋湖南十六年十一月二十四日复岳州临湘十七年正月十六日复监利二十二日复石首二月十一日复公安臣先已密调副将惠登相率所部由均州东下十七年正月二十四日登相协同副将毛显文复惠安二十六日复随州计期三月复府州县一十有四臣与监军职方司主事李犹龙先后驰报疏在御前可按也并言江督吕大器不发兵及旧抚臣王聚奎狼狈回省状时道路梗塞骑置稽缓疏入未奉防而京师陷贼之信至矣良玉审知登遐凶问三军缟素率诸将旦夕临翼日诸将前请曰天下事皆当闕我公今南中立君挟天子以坐诏我辈宜乘其未定引兵东下可也良玉拊膺而号曰不可世守武昌此非先帝之防乎先帝甫弃天下而我背之是幸国家之变以自利也封疆之大臣应守封疆南中立君我自以西藩为効有过此一步者良玉誓之以死尽出所藏金银防物凡二三万散之诸将曰此皆先帝赐也受国厚恩祸变至此良玉何心独有之乎于是良玉哭诸将噉然皆哭副将马士秀奋曰有不奉公令复言东下者吾击之以巨舰置礮断江众乃定当良玉出所藏其子梦庚有吝色良玉曰尔以此为若物耶向者吾散之乃所以为若也太息曰左氏不得世有此军矣大学士史可法马士英定策奉福藩世子立于南都奏以宁南伯左良玉靖南伯黄得功并进爵为侯防一子锦衣衛正千户封高 为兴平伯刘泽清为东平伯刘良佐为广昌伯与得功开藩淮扬为四镇而上流之任专以委左诏书到楚而良

玉贺表亦至时李自成败于關門楚西境稍可乘良玉得以其间复荆州德安承天承天献皇帝弓剑地诏以收复陵园为左功责所司速补给十六年楚餉缺额四十万而何腾蛟为楚抚袁继咸为江督腾蛟共良玉收拾武昌为同心固守继咸系李邦华所推许邦华死北都难其客李犹龙辈又在左幕中继咸用忠义相勉故两人交颇合左兵无虑八十万号百万前五营为亲军后五营为降军每春秋肄兵结队武昌诸山以一山职志为一色左建大将旗鼓于射堂周麾一呼旆而立者山谷为满其阅军法用两人夹马而驰名曰过对马足动地殷如雷声闻数十里南中所恃者四镇东平广昌弱黄靖南独以其身敢战高士马十倍三镇视左军皆遠莫及故当时推宁南为强然朱仙镇之战左精銳已尽其后归者多乌合廝役扈养之人居大半稍黠有力者率什一以自掠楼船偶泊即有质库屠宰百商为军市法令总不相掇识者知其不足用左家室尽于许州在武昌诸营娼优歌舞达旦元帅独块然一榻无姬人侍侧者既老而被病南中杨生者善医柳生者善谈笑左大欢乐之奏杨为武昌同知掇守事而柳生不愿官以客将出入卧内最亲信尝月夜饮僚佐李犹龙等召某将官营妓十余人行酒杯纵横履舄交错少焉左顾而歎命以次引出賓客肃然左右莫敢仰视其将百万军正已率众为下所服皆此类也懷宁阮光祿大鍼者负纵横才以阉党故废归德侯方域尝偕其友移书骂之方域侍郎恂次子也当左兵南溃方域侨寓陪都大鍼颂言良玉为贼而目侯以同反左具知其情恨之比大鍼附马士英起用举朝力争时四镇防预国是左无一言阮既柄用谩语因其客为修好实陰鸷而猜忌李邦华侯恂故东林党魁而良玉其所荐异时必有借左以难已者陰结黄靖南为樁柱左武人初不知所为朋党既见板矶筑城为西防叹曰西今复何所防直防我耳不免有沿流之计矣防朝事日愆错而楚餉不至御史黄澍请入朝观之澍面奏触柄臣既返而金吾逮治【澍数士英十罪且言得张献忠伪官周文江银八千两题授防将罪可斩志孔助澍言甚力韩赞周叱之始退】左留澍不遣隙遂开诸将日以清君侧为请左自念所将皆乱人降卒幸天子在下流假其声号相縻系若纵之东下且择利散走是属宁复可制乎嘿勿应无何王之明事起中外皆譟哗楚西陲之报日急左亦心动黄澍乃召三十六营大将与之盟方登楼密画左沉吟未有所定中一将拂衣竟起曰疑事无成若主帅必不动者某等请自行不能郁郁久居此矣左不得已从之左初画楚疆为各镇自惠登相驻汉阳外诸将咸有分地楚人多苦之王之纲者在武昌县尤残忍好以人为粮裸而悬之于牴灌沸汤以荡尽其肠腑而后烹之之纲别号擯子百姓闻其名皆夺魂魄楚绅士之不能去者出子女财帛所以奉镇将者百端冀得免濒行乃悉取而棚考于营中或夹以两门俾健儿行其上以索贿贿未尽入其人已折胁拉骼祝世英樊维城诸君于其地皆死旧江抚刘宗祥与之纲约为兄弟军既发掠其赀十余万杀之不能得其尸云左以乙酉三月二十六日传檄讨马士英空国行自汉口达蕪州火光接天者二百余里至九江袁继咸过相见于舟中坐未定俄见岸上火起报云城已破左右曰袁兵烧营自破其城左骂曰此是我兵耳大悔恨椎胸浩叹曰我负临侯临侯者袁字也呕血数升病遂革召诸将谓曰吾不能报效朝廷诸君又不甚用吾法制故愤急以至于此自念二十年来辛苦戮力成就此军吾没之后出死力以捍封疆上也守一地以自效次也若散而各走不惟负国且羞吾军良玉死不瞑目矣诸将皆哭请刑牲誓后营总兵惠登相当防拔佩刀横膝上曰我公百年后有不服副元帅号令者齿此剑诸将皆曰诺副元帅谓梦庚也登相固降寇所谓过天星者感左再造力有忠实心左歿后七日军东下惠率其黑旗军殿舟行不近岸有纪畧而前锋中军大乱自彭泽以下皆陷梦庚不能制兵至池州东风急黄得功遏其锋诸将饱掠独遗池州不破贻书登相曰留此以待后军登

相得书大诟曰若此则不如我前日为流贼其如先帅未命何撤其军返梦庚见黑旗船往往西上疑之问而得其故索轻舸往追之登相相见大恟以梦庚不足事引其兵绝江而去初邱磊者坐斩系刑部狱十三年良玉捐万金救之得不死侯恂之再为督师也奏以为山东总兵与刘泽清不相得构以罪马阮杀之于淮南或以为良玉东下盖亦因磊死故云

外史氏曰予观思陵末造天下之势在于良玉中原糜溃朝廷之法令不可复行唯自成能号召饥民以为难于我唯良玉能招诱降寇以致死于贼为国家计者宜举河南以委之而无责其速战敛天下之兵以守河守江汉守關餽良玉以屯种之粟俾且畊且鬪而与之持久彼视自成力均势敌又窃天子之宠灵而继之餽饷以收李际遇刘洪起沈万程之徒其势宜日强自成草窃乌合罗汝才袁时中不能相下羣心必携不出二年其众将折而归于左矣功成之后分一州为节使彼能北向而争天下乎今计不出此而区区于救汴之一战以至于败此谋国者不知驾驭之过也若夫兵败之后退于襄阳溃于湖口归于武昌向之猛气实力渐灭殆尽身已落于降兵叛卒之手而谈者谓其专制上流忧必为变嗟乎良玉兵非昔日之兵将非昔日之将天子用爵赏以羁縻我而我即用以羁縻其军彼岂不知清君侧制国柄足以得行其志势不可耳唐末藩镇皆父子兄弟之兵故用以专制一方长戈指阙彼将百万之众出门一步涣然崩散此岂可与作贼者哉迹其生平识机变饶方畧可以谓之智将顾用其私意揣摩主指翕集军心张形势以便身图而逃国法主亡身病而下亦叛之九江舟中自审不济而后发负恩之叹晚矣曹文诏黄得功忠而能勇苦不长于谋良玉能谋矣而无忘身殉国之心坐长祸乱以视两公真有余愧然若以刘泽清之侵权牟利者比类同观则宁南固一时之杰未可槩而弃之也

附纪

豫抚陈益吾与同年许霞城书云豫事之壤由于吏部为人择地不为地择人巧者钻营闽粤浙直美缺以去一种闾茸无能之人不谙趋避者则坐名填缺以功令驱之到官久之列城皆然一片暮气地方全无料理寇来避之山寨寇去依旧入城甚至有如鄢陵舞阳之开门迎贼者中原重地拱手付贼职此之故至于督抚身临贼场偏裨佐贰宜听其随才选用势成臂指年来该部揽权营私即守巡标下中军无一不从部授何况督抚一切部内走差侦探久惯积猾乞恩进奉题授管事名曰酬劳此辈非中官厮养即市井游食既乏智勇之能又熟躲闪之技见贼辄遁事败弥缝恃有部王平日情面少加呵谴即布流言至于领兵大将官非功授气以势盈墙壁既牢去来由己如往歲左良玉移催数十次始为一行甫望贼而掉臂去之者弟所以有调兵如请客驭将如骄子之疏又如李重镇一贼不杀而旧枢婪其重贿屡疏代为铺张左良玉譌报躲贼畧加抨弹便为瞠目攘臂朝堂之上曰如何难为我将官弟所以有将官不杀贼则罪巡抚巡抚防将官之不肯杀贼则又罪巡抚之疏诸如此类未易悉数朱仙镇之败良玉以七千之众率先倡逃致十八万人马一齐溃散而中原之事遂不可复问呜呼谁为之哉忆弟入豫即过旧镇臣刘超见其不堪弃去又物色旧镇臣许定国见其尤不堪弃去而其后枢部俱用之封疆今许逮刘叛矣甚者旧司农本非将才而举为保督曰能驾驭左良玉驱策刘超也及檄良玉而良玉付之一晒超且显然为难至于保督扬兵河北秦督驻兵潼關两军自为表里以一为正以一为奇乃保兵未渡河一步而秦兵先撩虎须甫出函谷一败涂

地用兵之效竟何如哉

南都之诏至武昌也楚抚何腾蛟以剑自随曰社稷之安危在此若不开读此身有付三尺剑耳防良玉腹心卢鼎者力劝其拜诏事乃定及良玉从黄澍之谋东下也以腾蛟不从谋刼取其印腾蛟急解付家人令速出城毋为所得良玉令四将守之逼与偕行腾蛟至汉阳门乘闲投江顺流十里许至竹牌门遇一渔舟救之起登岸视之则關帝庙而懷印出走之仆亦在相视大惊喜亟覓渔舟不知所之說者以为神救也

绥寇纪畧卷十一

钦定四库全书

绥寇纪畧卷十二

国子监祭酒吴伟业撰

虞渊沉

传曰天道不僭视人主之修德与否而降之祸福此自然之符也今以十七年已事观之成汤之责六事箕子之陈五行未显有失德或致厥罚况于三风十愆之必戒可得而知也齐庄中正以禋祀鬼神恐惧修省以禳塞灾咎虽董仲舒刘向之徒执经义推陰阳无得而讥焉然则彗孛凌犯何自而生水旱札瘥曷为而作岂上帝之监观或爽而政事感召其理不可信欤夫天道遠人事迩以武宗之戏渝驰驱保有大业乃思陵忧勤恭俭不免于亡者前人之余殃处其极敝臣下之众愿集于厥躬岂不然欤彼曲学小儒因成败傳防其说此目睫之见何足道哉何足道哉于戏遭时乱亡灵台太史之所纪蓋阙如也姑掇拾遗闻着于篇

荧惑 太白 彗

崇禎三年荧惑入东井退舍复嬴居数月

案万曆九年二月辛酉火星逆行犯井宿北第一星十年八月戊申月入井宿与火星相犯二十五年十月戊寅火星逆行入井井者秦分兵将起于秦也秦地在嘉靖以前西陲多警朝廷以三边为重调兵食修政治故秦可无忧万曆中专意封赏秦兵缺额饷每镇以数十万又以调援怨咨挺为亡命秦督抚虐用其民匿寇盜不以上闻荧惑者火也火必蕴隆而后发万曆九年逆行犯井二十五年逆行入井火繇微以至着也崇禎三年退舍复嬴居数月火燎于原不可向迺矣云中定襄雁门代郡太原皆入东井躔度故秦寇而晋受之从神木过河三晋名城蹂躪殆遍其验也

崇禎三年庚午二月荧惑入鬼宿犯积尸气杨鹤刘广生主抚

四年四月太白昼见荧惑再入鬼宿犯积尸气杨鹤受神一魁降

万曆中荧惑四十二凌犯二年二月十七年七月三十四年五月犯房二年五月十七年二月二十年十一月三十七年十一月犯氐十二年十二月十三年二月犯张十三年二月自张歷柳四十二年十月犯柳十五年二月四月四十四年十二月四十七年二月三月丙戌甲午庚子犯翼十七年四月歷亢入角三十二年二月犯角十七年九月十九年七月犯南斗十九年四月六月犯箕二十一年七月九月犯室三十六年六月八月犯女三十八年八月犯娄四十七年正月二月犯軫二十五年七月三十四年十一月犯歲十三年正月犯軒轅余犯太微者四犯井二事见前其犯輿鬼在二十八年二月与崇禎三四两年之变相合自东井十六度过鬼入柳为鶉首秦之分野輿鬼主斩杀明秦寇宜杀而不杀将反为所害张为周翼軫为楚先

是荧惑犯张自张歷柳犯翼犯轸豫楚亦将有寇灾 又万歷中太白昼见者五其二十一年八月见井度二十四年四月犯井宿占专主于秦十一年六月独书太白犯荧惑火与金并见与是年相类

兵法五火止于燔爇礮则因机发石以投人者也自永乐中得西洋大小火礮之法而弓矢戈矛之技废不讲将吏狃于不复见敌一不中弃之以走反委诸羣盗之手故其初用之威天下而后以亡国天事恒象荧惑之数十见者殆为是乎三代车战其法可胜而不至于大败秦献公十八年栢阳雨金始尽改古法尚首功而楚赵之战伏尸百万二世时太白再经天胜广起秦以瓦解使车战法在则千乘万乘耰锄棘矜何自而胜之哉此金失其性者也自秦以下民之蹈白刃者不可胜算然火器未入中国尚有坚城可守今献闯纵横名都隳突者皆以寇得我火器虽孟贲之勇墨翟之智无所复施生民之刼数弥深五行之害气毕究糜烂其民比诸锋刃千百过之故荧惑犯积尸而寇祸燎原暴骨如莽此火失其性者也况金火合曰烁其为兵丧尚忍言哉

八年乙亥九月荧惑犯太微

占在次辅时何吾驺文震孟为相温所劾免

九年十二月荧惑如炬在太微东南

十年五月荧惑昼见

十一年四月十六日己酉夜荧惑逆行尾八度为月所掩

五月初五日丁卯退至尾初度渐至心

十二年十月荧惑逆行太微犯上相

十六年正月荧惑逆行失其处

十七年二月荧惑怒角

次年五六月荧惑犯房心

荧惑自犯鬼宿后其凌犯失度者凡有八莫甚于十一年从尾度渐至于心心太子之象郅萌曰犯太子太子忧犯庶子庶子忧按万歷三十四年四月丙午荧惑入心其年二月皇太子第一子生是时郑贵妃在帝旁太子将有动摇之议其后光庙虽立祚不长熹庙国統再絕思陵十年太子加元服出阁讲学其明年荧惑入心太子二王后以国变遇害占曰王者絕嗣是其应也 杨嗣昌时为兵尚书奏为占主中宫后妃今熹庙成妃发引所谓白衣之防也又歷举汉

光武明帝唐宪宗宋太宗时皆月食火星不为灾其论明帝永平则云是年立皇后马氏德冠后宫嗣昌主献諛以宽帝意此语尤援引不伦科臣何楷驳之曰臣不知嗣昌何所指斥且心为明堂前后星皆太子之属恐奸人踵邪说以危东宫宜以为戒是时田贵妃擅宠幸其父遇数犯法交结朝臣谋倾中宫渐有萌芽巫咸所占妃妾有谋后者天道信可畏何楷精于内学恐嗣昌险诈将结椒亲以固权免祸故先事折之嗣昌寻入相举朝争之按万历五年九月晦张居正闻父丧十月朔彗星见吴中行赵用贤艾穆沈思孝邹元标以争夺情廷杖诏狱其后党锢异同纠结不可解者数十年以至亡国杨嗣昌父母两丧从兵尚书入阁适防荧惑入心范景文黄道周成勇刘同升赵士春何楷亦以争夺情免官道周廷杖诏狱勇遣戍党锢之事居正起之嗣昌终之皆楚人入相皆以夺情遇星变天道信不诬也

十年春太白昼见

六月太白经天

十月太白昼见怒赤

是年李自成等分五队以踞关中老 占郢襄合曹操闯塌天诸贼以直窥江淮陪京大震杨嗣昌措兵十二万饷二百八十万荐熊文灿为总理寇祸遂至不收太白经天此其应也

十二年十月初一日彗星见【帝于初四日修省免刑罚】

彗星在万历中十有二见二十一年七月乙卯见于井至乙亥逆行紫微垣犯华盖微垣者帝庭也三十五年八月辛酉彗见井度长二尺渐往西北壬午遂歴于心心者太子宫子孙危亡之象先是三十四年李自成张献忠生于秦而自成以八月生彗之犯秦分也在其周月春秋传曰美恶之复必周昔梁简文之生其年与侯景相近僧宝志预知之思陵以三十八年诞于宫中为天地神人之主岂知飞廉恶来出于米脂肤施间者已三四年哉彗星自万历五年起讫于四十六年中间凌犯惟此两年最大五年见西南长数丈而四十六年先以九月甲寅长星见东南形如疋布广尺长二丈九日而灭所谓蚩尤旗也十月乙丑彗再出于氐自东南转指西北扫太阳守星入于亢又渐往西北扫北斗天璇天玑文昌五车逼紫微垣次月十九而灭天意初以谴告人主而不悟其末载蚩尤旗竟天斗极微垣天子之宫庭而皆扫灭以见祸患已成消复亦不可为也已其至崇祯十二年十月复见者杨嗣昌以是年八月晦受命督师十月朔至襄阳大誓三军而彗星即于其时见又帝以十月命王绍禹为河南总兵后绍禹兵叛失陷雒阳嗣昌开县丧师襄阳继破两藩遇害京师之祸实基于此天意若曰彗之扫北斗紫微今害徵至矣于戏可不畏哉

紫微 帝座 轩辕 前星 太阶 文昌

十七年正月司天奏帝座下移

是年十月紫防无光

十七年五月轩辕絶续不常大小失次至九十月间乃复

十七年十月前星下移四五度至次年八月乃复十三年六月太阶坼

十七年文昌坼

按帝座有五北枢紫防太防天市大角心中央皆王者所居之处当八年九月荧惑犯太微占者以太防天子之宫庭流寇以八年春犯凤阳祖陵烧享殿天垂象以陵寝不守贼将入天子之宫庭及乎帝座下移则其兆已成不可为矣轩辕者后妃之舍主内政以弼太微万厯四十四年十一月四十七年九月月再犯轩辕其时王皇后崩当至尊偕周后同殉社稷而轩辕絶续不常者上天亦为之惨动也太子抚军监国不离其位下移者为主器已亡藩王入继之象太阶坼大臣多戮死者文昌主国之上将十三年后武陵韩城宜兴三相皆不以令终宁南兴平靖南三将先后死国家之祸君后及将相并受之天道洵可畏哉

歳星 填星 觜觿 参 井 亢

九年歳星犯南斗

十一年四月歳星昼见

十五年夏歳星逆行

十二年十月填星暈

十七年二月填失光道

十二年五月觜宿下移

十三年十月参足突出玉井

乙酉四月月入井暈

是年亢宿坼

占曰君令逆则歳星逆行郗萌曰歳星逆行社稷亡天下兵起民去其乡又歳星主齐鲁东吴之国故梁武天监四年歳星昼见其后致侯景之祸思陵时李青山乱山东吴大饥海寇大作是其应也填星主豫州梁宋失次者进则失地退则为丧又占曰歳大风五谷不实有火灾中

原糜烂天象应之梁宋实受其咎参伐七星为虎尾觜为首共为白虎主西方攷古法二十八舍觜宿列在参前但觜止半度形小而近参易于缩入参度崇祯中西人汤若望仰观推测适防其时觜宿入参故以觜居参后非谬也若下移则又其未缩之时从参左肩以移之于右其占为虎狼食人又参足突出玉井其占亦曰虎狼暴害参觜既主西方闯猷恣睢秦蜀其为防獠豺虎肉视斯民之应乎月犯井兵起人主忧又曰大臣诛有破军杀将亢主宗庙其星变主王者絶嗣将致宗庙不守斯非其最验者欤

五车 河鼓 天津 摇光

十三年九月五车中隱三柱不见

十七年二月河鼓坼

次年天津坼

十七年摇光坼芒角黑青

五车天子之兵车舍也三柱动则车骑发崇祯中朝士劝上修车战之法而孙傳庭郟县之败竟以火车致溃其三柱不见之效欤巫咸曰河鼓金官也主金鼓河鼓坼则金鼓不震天津主河梁石氏曰天津覆洪水滔天自汴梁没后河再决于山东摇光者北斗之第七星其名为应主兵又曰应星色黑有水眚有徙民攷之皆验

狼 天弧 王良 驷房

十七年十月狼怒跃至次年四月

次年天弧引满

是年策置王良前驷房动徙

荊州占曰狼为盜賊巫咸曰狼星易处天下大饥兵满野又曰天弧引满天下兵石氏曰王良策马则天下大乱兵大起

营头 天狗 枉矢 流星

十七年三月营头昼陨声如雷

五月天狗下尾长白竟天

乙酉正月枉矢东流冲太陰

九年六月丙子夜有星大如斗色赤芒耀数十丈自西南流东声如雷

十四年高邮湖陨星大如屋

十五年夏星流如织

十七年二月星陨如雨

六月后四川日月无光赤如血人仰视北斗不复见有大星出西方芒焰闪烁摇漾不定是时献忠屠蜀贼灭后其星乃隱

营头所坠有破军杀将流血三千里

天狗下则四方相射其君失地兵大起

枉矢所触天下所伐灭亡之象

流星在万曆中凡五见其三十四年五月丁丑有星自西北流东北大如盂赤色有光是为李自成生于米脂之歲自西北流东北者繇秦以入于燕齐之象也自九年以前贼中以高迎祥为闯王自成特其部曲将卢象升祖寬白沙朱龙桥之战贼势已衰防祖寬兵哗东归象升召入京功垂成而中废未几迎祥死余众推自成为主乘总理无人横行无忌徇约青赤者兵起此其应也

天赤如血

崇禎元年三月二十五日五鼓全陝天赤如血巳时渐黄日始出

占曰此赤眚也主大旱有急兵

是年白水贼王二反

日变

崇禎十年丁丑春正月辛丑朔日食免朝贺

是年春白虹赤气贯日

十一年二月朔日光摩荡竟日

是年十一月五日日中黑子黑气或青白气日入光摩荡如两日

十二年元旦日白无光

三日日光摩荡若镜袋喷花自旦及暮

五日日旁青黑气若防东南有白虹

是年二月十二日宁远日变辰时日两傍各一白丸俄日上有白气申时有黑气掩日忽侵日中忽从日内坠出摩荡数次巡抚方一藻以闻

十三年九月望两日出没

十六年十二月朔日无光星昼见

日食不为灾唯正月朔为三朝之防汉惠帝七年正月辛丑朔日食哀帝元寿元年正月辛丑朔日食至崇祯十年正月为三辛丑朔日食矣惠帝失政禄产乱朝哀帝夭折王氏篡窃在明季则有樊并苏令奋臂之祸昔汉臣有封事曰小民正月朔日尚畏毁器物而况天子日月之眚乎若白虹贯日日中黑子两日竝出皆亡徵也

天鼓鸣

崇祯十年三月陝西天鼓鸣

十二年二月四川保宁府天鼓鸣

同时二月十七日易州白石口南城天声自北起至南次日从东北起至西南皆晴日无云风亦甚缓其响如雷又似桴鼓声

十四年二月山西偏头關天鼓鸣

万曆中天鼓鸣凡五十一见在京师者一南京者三凤阳祖陵者二它郡国者四十有四畿辅则景州高邑遵化易州紫荆關辽左则松山蓋州宁远山东则费县登州馆陶青城山西则代州宣大阳和左云衛临汾猗氏蒲州陝西则平凉凉州固原甘肃西宁金州西安洮州南直则扬州泰州镇江四川则华阳豫则河南府江西则袁州内西宁见者三甘肃见者三易州遵化馆陶临汾宁夏皆见者二京房占人主忧神宗多歷年所海内无事左氏曰以乐愒忧其是之谓乎

崇祯十一年贼入蜀破州县三十有八今十二年保宁天鼓鸣明寇将再入蜀蜀人屠灭之徵也易州畿辅要地偏头關燕晋阨塞十四年后贼由晋入于畿辅偏头宁武正其所从入之处故天鼓鸣以譴告之也

大雨雹 木冰

崇祯四年五月大同雨雹襄垣县雨雹大如伏牛如丈石小如拳杀人畜甚众

八年四月初八日漂阳福贤等乡雷雨冰雹竝作昼晦飞石扬沙平地盈尺植物与屋瓦俱尽

十一年六月二十三日宣府干石河山场骤雨怪风大雹打死马骡四十八匹

九月顺抚陈祖苞奏境内冰雹为灾

十二年五月初九日未刻抚宁县自灵沟起东至沙河长不老口西至榆關大雨雹田禾尽死

八月白水同官雒南陇西大雨雹秦抚丁启睿以闻十四年八月宣府冰雹为灾

是年六月湖广大风雹巡按汪承诏以闻

十六年十月十五日汝宁光州雨绵如絮飞田野者殆遍干州冰雹大如斛毀民屋伤人

元年十一月陝西木冰压树枝尽折其后大河以北歲有此异

万厯中京师雹灾凡八见它郡国二十崇祯时雨雹止此乎杀人畜田禾甚者书之举重也刘向曰雹者陰胁阳也君子以小人为陰外臣以内官为陰四年温体仁方用事正类排斥殆尽张彝宪以奄宦总三部晏然受朝覲诸臣之庭謁十二年杨嗣昌在内阁黄道周成勇被譴呵熊文灿谄事禁旅太监刘元斌等其下大纵掠陰胁阳者此其应也

刘歆曰上阳施不下通下陰施不上达故雨而木为之冰天启中朱童防乔应甲皆以贪邪抚秦元年秦抚为胡廷晏愤眊不治事故陰阳上下不能通达以兆木冰为甲兵之象也

风霾 雾 昼晦

崇祯四年六月临颖县雷风大霾倾楼拔木砖瓦磁器坠地无恙铜铁者碎

六年癸酉春正月朔大风霾日出两珥

九年七月二十日沔阳州长夏门外居民刘勅甫白日黑风揭一屋去柱壁囊橐未动四隣如

故

十年三月十四日真定昼晦大风霾发屋拔木巡按李模以闻

十三年二月二十一日大名府濬县等处东北见有黑黄云气一道忽分往西南二方倾刻四塞狂风昼晦黄埃中有青白气及赤光隱隱时开时暗巡按韩文铨以闻

是年冬河南府大风新安县都御史吕孔学墓上石碣吹入云中去四五里方墮

十四年辛巳春正月壬寅黄雾四塞日眚无光

十二月福建巡抚萧奕辅奏异风

十五年七月保抚杨文岳奏怪风

十六年正月二日大风昼晦五凤楼前门拴风断三截又风吹建极殿庑檐榱桷俱折殿瓦皆碎

三月二十四日风霾昼晦大学士周延儒请急图防弥十七年甲申正月朔大雨雾有占风从干起主暴兵破城城未破之前十余日风霾大作自辰至未止拔去關帝庙前旗杆琉璃廠大树

按万厯中京师风霾二十二见最甚者四十六年三月庚午空中有声如波涛黄尘蔽天日色晦防将昏东方电流如火赤光照地少顷西亦如之又雨蒙蒙如雾霰土气袭人人主五事皆失不得其中则不能立万事失在眊悖故恒风陰以应之洪范传曰厥咎凶短折厥极弱时则有下人伐上光熹二庙皆短祚凶短折也极弱者贵而无位高而无民有南面之尊而无一人之助宰相如宜兴井研皆不为国尽力大将如左宁南跋扈不用命是极弱也下人伐上则寇入京师之徵也

雷震

崇禎九年丙子春正月孝陵雷火

十二年七月天雷击破城铺楼墙七丈有余木炮击破密云巡抚赵光抃以闻

十三年秋七月雷震襄府门树树有盐数斗

三月初十日夜三更去孝陵宝城十里长【阙】头枫香树松树各一被雷火霹烧南兵尚书汪庆百以闻

十四年闰四月初八日雷火起蓟州城西北烧至赵家谷延二十余里

六月初二日雷震宣府西门城楼火药冲发楼遂糜碎十五年壬午五月雷震孝陵树

十六年仲夏大雨沾衣如血雷霆越夕不止次日见太庙神主或横或倒诸铜器为雷火所击融而成灰六月二十三夜雷震奉先殿庙脊鸱吻碎中有剑削拔去不知落在何所庙门玲珑雕刻处皆损壤有龙爪痕太监苏允宁换鸱吻比前减小帝不悦降允宁级万厯中雷击建极殿端门承天门郊坛斋宫祖陵西华门太庙槐树长陵明楼圜丘朝日坛正阳门社稷坛门凡十三见自二十年后郊社宗庙以公侯伯代行礼故天数出变异以告誡之思陵亲郊者再宗庙之礼必防常以孝陵地脉侵毁使成国公朱纯臣礼尚书林欲楫行视山陵然则孝陵曷为乎震司礼监王体干内殿藏主陈设一不敬大受譴罚帝自以少失父母大具仪仗集百官迎孝纯皇太后御容入奉内殿事死如事生孝之至也然则奉先殿曷为乎震曰前此矣前此则此何以书曰天变已成虽甚盛德不足以除祸患故震之也

地震

崇祯七年三月初二日黄州昼晦明日地震声如雷九月应天地震

九年五月江西临江府南门城墙陷地二十余丈十年闰四月初四日雅州地震

十四日新镇地震者二十六日又震者二

同时十六日马湖四土司地震者二又叙州府震建武所震泸州震越嶲衛震皆同日

是月二十九日荣县黄时太家地鸣声闻半里

十二月太监陈奏地震

十一年正月蓟镇总兵王奏地震

九月辽东地震巡抚方一藻以闻

冬雒阳地震

十二年六月宣府地震总督陈新甲以闻

九月福建地震巡抚萧奕辅以闻

粤西地震巡按御史左永图以闻

十三年二月初十日钜鹿县地震十二日又震

六月二十四日浑源地震八月初九日复震

十二月宣府地震总督张福臻以闻

是年汝宁上蔡地裂

十四年正月湖广地震巡抚宋一鹤以闻

二月福建地震巡抚萧奕辅以闻

四月天津地震巡抚李继贞以闻

七月二十六日大同地震者三

八月陝西地震茶马御史陈羽白以闻

九月四川巡按陈奏龙安府地震

是月应天巡抚黄希宪奏地震

十五年四月十五日山西巡抚蔡懋德奏地震七月复奏地震

七月十六日莱州府地震

十五六七年凤阳地震连歲不止其初宝顶中有声如雷东西动荡者数十昼夜而震乃发凤阳巡抚田仰以闻

泰州两大山因地震合为一其民居两山间者数百万家皆被压掩没不见

案万历四十八年中京师及郡国地震者二百五十有九自元年至十年四月相当之地臣道也京房曰臣事虽正专必震荆州居正所居地也元年荆州连震七日方止恶其专且戒以不终也十一年后帝召之京师十一震凤阳二祖陵二举其重则余可推也是时郑妃谋夺嫡内臣则矿使税使为厉于民思陵之御相也常山华亭謫戍韩城宜兴赐死虽以蒲州之定逆案一取决于御前红本而高阳当關武陵视师咸奉诏书进止则无所谓专也后宫无戚姬如意之嫌外家无博陆重合之势近臣无 恭石显之宠然即位之后反者如猬起如黔蜀土司河南北土寇闽广江南海寇广东九连山山寇山东莲教曹南武城王沙诸寨江右密教之属无虑数十反而国从之周之亡也山川震伯阳甫以为国必依山川山崩川竭亡之徵也十三四

年黄河水竭国家本起于淮泗今祖陵震而河淮几于涸流不亡何待

旱蝗 人相食

崇祯元年陝西自四月不雨至于七月八月霪雨不止歲大饥

七年河南大旱

山西自六年八月至七年四月不雨永宁民苏倚哥食父母

南阳郭廷玉妻霍氏以母而食女山西闻喜广盈里杨雷以父而食男又张河图等十三名杀人母子而并食史亡其地云

九年山西饥人相食

十二年北京山东河南山西大饥民掘坑塹然火以驱蝗须防填满

四月十八日防宁县降旱霜自春徂夏不雨

十三年两京山东河南山西陝浙旱蝗河南北数千里白骨纵横民父子相食

京房易传曰上下皆蔽兹谓隔其旱天赤思陵有治天下之心相如乌程韩城壅闭阻遏俾贤材摧抑德泽不能下流此所谓隔也它占雨少陰之气金也金为兵为刑刑不辜兵不戢金气毁则不雨思陵持法太深秦豫楚山城小邑被寇失守为法受诛者其不辜为多易曰亢龙有悔思陵愤中外之失职盗贼未平尝内结于心心者火也火胜则外彊中干水不润下故旱

京房易传曰臣安禄兹谓贪厥灾蛊易飞 曰食禄不益圣化天视以虫虫无益于人而食万物刘向曰鲁哀公十二年春用田赋冬而蠹虐取于民之效也崇祯中如杨嗣昌议增练饷者六百万是以田赋虐取于民也史 薛国观吴昌时先后以贿败谢秉谦按秦秦寇已急而秉谦大以贿闻是皆无益于人而食物故虫灾应之

火灾

崇祯八年冬至帝以寇祸再郊天费十万金威仪视初郊尤肃先一日驾幸斋宫而后端冕入祀乃内瑯之炽炭于地室者太甚火延及于茵蓐御座为文皇帝盘龙椅皆焚从官有忧色曰天不享矣

十年正月太监孙奏石块生火延烧仓场等屋

十一年四月新局火药灾石板平起空中民家酱瓿移至屋极酱不动乘驴过者人驴飞至半空驴肠腹溃而人堕地无损

六月初二日安民廐灾贴廐太监王甫局官张之秀俱毙八月又灾

十二年九月二十日京师草场失火

案万历火灾凡三十五见最大者如慈宁宫灾无逸殿灾乾清坤宁宫灾三殿灾孝陵灾御苑龙舟灾大光明东配殿灾朝日坛房灾正阳门楼灾隆德殿灾易传曰上不俭下不节孽火烧其室东汉中平二年南宫灵台灾未几黄巾乱流寇之作即三殿两宫火灾之应也安民廐者以天启六年王恭廐灾而改焉者也逆珰施炮烙以锻链杨左诸君子【天启六年五月朔人见都城隍庙唱名后宰门火神庙红毯滚出次前门城楼角有数千萤火忽并合如车轮至初六日巳时王恭廐灾震初作乾清宫御案皆碎建极殿飞瓦杀人御史何廷枢潘云翌被震死全家覆入土中自顺城门大街北至刑部街尽为齏粉有女人衣饰尽而身存有同伴头去比肩无恙有从空坠人头及须髮耳鼻大木遽落密云石狮掷出城外衣服挂于西山树杪银钱器皿飘至昌平阅武场中】若思陵则何为乎灾曰内操之未罢也缉事衙门如董琨等则犹许显纯之余焰也故火之也且安民廐所以修守备其后寇逼京师炮不置铅丸贼不伤而城已陷天意若曰火不炎上徒以自毙也

火异

崇祯元年五月西安有火大如礪如斗色青光焰尺许数十碗入人家用羊豕禳之尝留数日乃去不分昼夜亦不为民害至七月中而止占曰秦为德水水火牡也火出而妖火入秦鹑首先灾害及鸟帑豫楚亦将有咎九年泰山神庙中青龙神口吐火

是年丹徒田野火光烛天

十五年蕲州树杪火发焚其木殆尽

十六年正月初五日大内诸殿脊及各门楼烟起阁臣皆出疑有火灾视之冉冉若炊烟而微淡久而乃息齐武帝永明十一年先是魏地謠言赤火南流丧南国是歲有沙门从北赍此火至火赤于常火而微以疗疾多验都下名曰圣火此与今之烟草相类熹庙时童謠曰天下兵起遍地皆烟未几闽人有此种名曰烟酒云可以已寒疗疾此亦火异也

刀稍旗竿上火

崇祯十年太湖县枫香店官兵营刀鎗上火光闪烁炮空鸣鬼夜哭时讨寇郑潘陆诸将全军覆没

十一年孙傅庭奏西安风霾大作黑气冲天兵刃火焰出现听之有声

十三年八月西门旗竿上出火大如斗飞落城河十四年三月初二日天津游擊张国安巡河至赵家场刀鎗上火星灼灼有光黑夜列防如星巡抚李继贞以闻

晋成都王穎与长沙王相攻随尧君素守蒲州唐刘武周据并州反其兵器皆夜有火光万厯中各边台竿有火凡十五见其墙子路有火时风雷大作绥静边堡军执棍扑之棍亦生火孤山堡亦如之山东抚治令箭及刀鎗头皆出火魏书曰轻民命好攻战则金失其性而为变神宗非好战之主而思陵用兵亦有所不得已也然则火何为乎作哉

水灾

十年河南汝水变味甚恶饮者多病

十三年华陰县渭水赤

十五年四川达州城濠水变为血城中井鸣

十年蜀剑州大水先未水一日沿滩巨石数百皆反而覆水至民登州堂以避者免余皆漂没黄腸凶具架在民屋檀者累累

水灾莫甚于汴梁以其详在寇志故不书

鼓妖

天启七年丁卯八月御朝即帝位南面正位将就宝座而大声发于殿之西若天崩地塌然仗马皆惊百僚震恐帝亦为之悚动识者曰西方其有事乎此鼓妖也崇祯七年七月叙州母猪龙洞铜鼓声闻一日夜是年萧县北山鸣明年又鸣者再十一年十一月山又鸣十二年十二月十三日夜西山复鸣如雷如风如涛连日夜不止

九年十二月镇江金鸡岭土山崩闻有神言

十年钟山鸣似虎哮吼

三月防稽山石言声如钟

十二年己卯二月初一日蕪州州署有石铙十一门自震堂瓦崩頽署州事李色鲜将火药倾出移出堂前空地复于三月初一日自震烟火冲天堂柱亦自起火十三年杭州城门夜鸣

三月十五日蕲州城隍庙古钟不击自鸣

十五年铁礮自鸣

十六年冬建极殿鸱吻中有声似鹑鸪曰苦苦其声渐大后作犬吠声三日夜不止

十七年二月大学士魏藻德夜闻刀兵之声入其寝三月初举家闻哭泣

晋文公殡于曲沃柩有声如牛刘向以为怒象也将有急怒之谋以生兵革之祸汉相朱博受策有声如钟扬雄以为听失之象也李寻以为人君不聪为众所惑空名得进有声无形不知所从生思陵性彊毅多权谋数有亟疾之怒即位之后宰相周延儒杨嗣昌等以空名得进后皆不终此鼓妖之应也春秋传曰怨讟勤于民则有非言之物言山鸣近石言也宋灾先有呌于太庙者曰譔譔出出今殿檠龙尾间如鸟鸣苦苦帝位不安宫室将空之象京房易传曰令不修本下不安金母故自动若有音天宝十年大同殿钟自鸣占曰庶雄为乱思陵发号施令未循其本下有怨叛之心起而为乱此物自鸣之应也

言妖

万厯末年有道士歌于市曰委鬼当头坐茄花遍地生北人读客为楷茄又转音魏客之兆也

崇祯元年五凤楼前获一黄袱内袭小函一卷题云天启七崇祯十七还有福王一清晨内侍得之奏御帝命巡视皇城各官推究科臣奏以此必奸人所为一加推究必有造讹立异簧鼓圣听者帝可其奏立命火之十年帝过宫中一秘殿老阉以此先朝所封戒勿动帝命启之得古画数幅有十人带进贤冠者七曰官多法乱有数十人隔河对泣曰军民号泣妄男子得传闻形之章奏帝亦弗诘人乃以为信

帝好察迯言有人诣通政司投疏谓年号宜用古字作密蓋以山压宗故不安从古文则宗庙安于泰山也人以为妖言

十七年正月沅州铜仁连界处掘出一古碑上有字二行云东也流西也流流到天南有尽头张也败李也败败出一个好世界

成都东门外沿江十里有锁江桥桥畔有回澜塔万厯中布政余一龙所修张献忠破蜀后登塔见成都城池宫殿曰此不利于城命毁之修筑将台穿地取砖至四五丈得一古碑上有篆书云修塔余一龙拆塔张献忠歲逢甲乙丙此地血流红妖运终川北毒气播川东吹箫不用竹一箭贯当胷汉炎兴元年丞相诸葛孔明记后献忠以一箭死乃知箫不用竹乃肃字也

明初有十八子之防成化中有李龙子者结一中官入宫中谋不轨事发伏诛识者以宋太祖取淳风旧本乱其次第李继朱者乃李亚子继朱梁之防也流言讹伪宋献策李岩以此鼓惑

中原复倡为开城门迎闯王迎仔闯王不纳粮令军中传歌之故河北逐其长吏以迎贼

河北之謡曰邺台复邺台曹操再出来贼罗汝才自号曹操而天下大乱

武昌未破前一月有异人呼于市曰一羣猪屠伯至矣楚宗最横遇乱亦最酷

万厯末年民间好叶子戏图赵宋时山东羣盗姓名于牌而鬪之至崇禎时大盛其法以百贯灭活为胜负有曰闯有曰献曰大顺初不知所自起后皆验

传曰言之不从厥咎僭时则有诗妖讹言自陈启新以淮安武生骤用口舌得官而张汉儒陆文声希相温微防告密以起党人之狱易曰以讼受服相温有焉书曰谗説震惊朕师汉儒文声有焉诗曰如蜩如螗如沸如羹公卿台谏无通经术持大体者故妖书起之于前阁讼继之于后四方奸人亡命争上书阙下而言之僭差夫亦甚矣此言妖所自起也

草妖

崇禎四五年河南草生战鬪状有人马形皆若被甲持矛驰驱纠结乱乃大作

七年河南孟县民孙光显祖墓在河阳驿之东有葡卜草夏抽新条条列万状有美人者达官者为龙凤为 麟为雀鱼蛇防为蝉为孔雀鹦鹉道臣曹应秋取得三美人一凤一鹦鹉美人黄衣白裳面施粉黛凤苞羽五采鹦鹉栖于架架上有盏盏中有粒防染生动善画不及也其连陌王氏党氏莹所产皆同有一草而枝蔓出二莹外者即与凡草无异盖妖徵云

十六年有商人自山东载花荳渡淮及出卖如人首然耳目口鼻咸具

十七年太仓邑绅知临川张采家李生黄 采叹曰古语云李生黄 民皆无家乱其至矣既而采亦几及于难

占曰王德将衰下人将起则有木生为人状草亦木类也汉安帝中平元年夏东郡陈留济阳长垣济陰冤句县界有草茎累肿如手指为防雀龙蛇鸟兽之形五色各如其状毛羽头目足翅皆具是歳黄巾贼始起夫草民象也盗贼则恶草之宜除今以去恶之弗尽枝蔓为妖其验为李自成之伪署置百官犹草之面目衣裳如人状也伪号改年犹草之 麟龙凤自以为祥也天意若曰彼虽眴然人面哉何草不黄将失其溃茂以无烦寻斧此狂花妖木之不若者也神祖好用商人采办每进黄封御厢内有八宝嵌成虾蟇蚱蜢等物厢开则藏机发跳踉满地帝大笑赏赉不赀此虫妖也闽师好以宝树饷督抚按诸臣以金为枝干花叶用异宝缉成五色备具视之如真一株以数万计熊文灿得之以貽京师权要此木妖也服妖

崇禎中朝臣好以纱縠竹箴为带取其便易诗曰匪伊垂之带则有余传曰带其褊矣金银贵而重纱箴贱而轻改而从之贱将乘贵重者为轻带其褊而将尽之象也

帝饒李建泰于正阳门建泰顿首拜谢印绶花怒张如斗同官谬贺此取金印如斗象也识者以为不祥百官冬朝戴貂暖耳陈启新诡示其贫以布作栢君子曰暖耳中下者无甚价且礼亦可以弗着启新近臣亏班联之体以羞朝望且近于诈非礼也北方小民制帻低侧其檐自掩眉目名曰不认亲其后寇乱民散途遇亲戚有饮泣而不敢认有掉臂而不欲认一以畏人避罪一以自为寡恩先见之于首服焉

京师妇女宴防出游好赁蟒服于质库乘车去弗不避呵殿视其衣交龙灿然乱上下之序溷淆无别台谏以为言然终莫能禁

松江士大夫好着缣巾屋其上而广之前后施幅武垂于肩杂以组紃而紃其旁缘其下此武士巾也其有期功之丧别缀白绦于其上有兵丧之象常熟妇女裳下齐杀为襞积者百而縹之与衰服无异人皆以为凶徵无锡一孝廉尝衣短衣不蔽膝巾紫色而朱带双垂自首以属于要金坛一公子跛而陋好施粉黛弓其足为妇人装昼必寝其见客也常以夜后此两人皆以凶终曹风之诗曰蜉蝣之羽衣裳楚楚百年以来世室豪家侈汰已甚饮酒则载号载呶歌舞则擾杂子女其风始于江汉宛雒而被于吴越帝屡下诏以寇盗灾荒士大夫狃承平余俗欲身率天下以俭而终不改于戏有葛屨履霜之心而不能变羔裘逍遥之习诗人刺共公之好奢而谓不称其服者其咎在上也春秋戒子臧之身灾而谓服之不衷者其咎在下也濫音【附见】

兵未起时中州诸王府中乐府造弦索渐流江南其音繁促凄 听之哀荡士大夫雅尚之又江南人多唱挂枝儿而大河以北所谓夸调者其言尤鄙大抵男女相愁离别之音靡细难辨自此以后政事日蹙情态纖迫兵满天下夫妇此离者不可胜计也

物异

思陵御乾清宫空中坠一鸛颈穿一箭至地犹飞鸣俄而鸛死

又乾清宫后庑有青霞居游艺斋皆陈设宝玉重器于御几物竟自移彼此互易其处或颠倒杂乱失而复得守者惧得罪伺之见御榻重茵中有溺而旋者狐毛零落其气尚温乃知向者狐怪也

崇祯六年二月建昌民家生豕一首二身八蹄二尾十五年七月聊城县民马中杰家生豕一首二尾七蹄五行传曰听之不聪时则有豕祸万厯中豕祸七天启秦楚皆豕妖有长喙人足而一目者是年悞用陈奇瑜为总督因抚失贼听不聪之效也

六年冬十月莎鸡数万集于襄城山西河北贼南渡河澠池陷十五年冬团风鸭蛋洲有飞雀万余投蕲州南城濠后张献忠破武昌从鸭蛋洲渡此比之鸛鸽来巢为羽虫之孽近黑眚也黑色义主急有飞鸟之象焉六年十月汝宁有鸟鸠身猴足昼飞有声时流寇渡河犯汝至十年此鸟复见于上蔡【按本草此鸟名曰寇雉出主兵乱】六七两年凤阳出恶鸟数万兔头

鸡身鼠足人取供饌甚肥但犯其骨立死

七年大同牛疫号噉以数千十三年襄陽春山乡获牛犊两头二目京房易传曰牛生子二首一身天下将分之象又曰牛少者谷不成万曆中牛祸五皆二首或作人状天启间沅陵牛犊二首一目三尾并乱徵也闻是年李自成从车箱峡佚去寇祸以不解山西河南大饥七年宁夏鼠害稼衔尾食苗者十余万十二年黄州鼠食禾渡江五六日不絕传曰鼠盗窃小虫昼伏夜匿害稼者贪邪小人窃禄位而寇盜以滋生也万曆四十四年后应天鼠渡江者三皆衔尾万余天启陝西鼠怪状若狸长广尺余无足两肉翅足在翅中剖之腹有升黍妖在秦者秦将有鼠盜宁夏延绥鼠害稼者皆秦分也渡江而以黄州者张献忠破武昌之应也又闻内殿奏章房多鼠盜食与人相触而不畏

十七年元旦后鼠忽屏迹寇入奏章尽焚易飞 曰鼠羣居不穴君死国亡它占曰鼠无故夜去邑有兵近黄祥也

秦州關山中老鼠化为鹌鹑者以数千计

九年十月朔淮安新城东门民家牝鸡振羽啼跃而化为雄

十年京师宣武门外斜街民家白鸡羽毛鲜好喙距纯赤重四十觔慈谿孝廉应廷吉见之愀然曰此鷺也所见之处国亡万曆三十六年靖边营军人家鸡雌化为雄五行传曰不鸣不将无距者事不成今鷺则鸣将有距矣盖是年寇患已大成故鸡祸也

十年三四月钱塘江木柿化为鱼渔人网获中有首尾未变者木如故

十三年德安府天雨鱼

十四年楚府猫犬流泪有哭泣声

十四年太仓衛指挥姜周辅家鸡伏子两头四翼八足挥使亦勲旧也衛将废厥灾见于其家

十五年二月羣鼠渡江昼夜不絕

十五年金县田鼠殘食夏秋禾苗巡按李悦心奏又陇西县田鼠灰黄白色咬伤麦穗

十五年八月延绥定边堡妖鼠产于虾蟇腹中一产数十遍二三百里食禾稼皆尽

门牡自开

崇禎七年太康县门牡自开者三知县事许某集邑绅议其事屋梁坠知县死

妖辞曰闕动牡飞辟为无道臣为非厥咎乱臣谋篡汉成帝元延元年门牡飞谷永以为郡国伤灾黎庶穷困而有司奏请加赋城闕守国之固固将去焉故牡为之飞今太康古夏阳也为楚汉相距地巩雒汝颍之通衢是年寇既渡河郡国日亟军兴而灾害并至牡飞邑屋自壞明汴雒皆失其固而栋折榱崩民将压焉之应

疫

崇祯十六年春京营巡捕军夜宿碁盘街之西更初定一老人嘱曰夜半子分有妇人缟素涕泣自西至东勿令过过者厄不浅鸡鸣则免矣吾乃土神故以告也夜半妇果至军如所戒不听前五鼓偶熟睡妇折而东旋返蹴遯者醒之曰我丧门神也上帝命我行罚此方若何听老人言阻我灾首及汝言毕不见遯者惧奔归告家人言未终仆地死大疫乃作【七月二十九日从驸马巩永固请发御前银一千两合药施病者再发二万两令五城掩埋】

十六年举场左右人鬼错杂薄暮人屏不行一时贸易多得纸钱乃置水投之有声则钱无声则纸大疫定后乃已

江南自京口起江陰无锡止民晓起或以黑圈记其门或釜底画一梅一夜殆遍

先是河北传一小儿见人白而毛逐之入废棺中发则白毛飞空几满俄而疫大作名曰羊毛瘟江南渐传染民相戒曰无食茄食者必病既而验之以手折茄中分之辄有一羊毛断之以刀则无有此白眚也

公羊传曰大灾者何太瘠也何休曰邪乱之气所生先王设疾医掌万民之疾病又索鬼神而祭祭之以其时埋骹掩骼无弗蓋藏故民得考终厥命今两河暴骨弗收恶气蕴崇而为疫羊金也金气伤故羊祸转入于疾病此其徵也其时又有书□□□三字于门者相传亦系釜底朱书故民争效之是书也道藏中固以解疫生民短折人主不能救而天救之非其彰彰者乎

人鬼之异

崇祯二年己巳松江莫翁无子有一女嫁于李氏夫妇初相得后其夫渐不内御有隣女学刺绣于莫氏而同寝俄有孕诘问得其情讼之太守按验果有之乃命莫氏归而娶此女为妻守断词曰莫翁无子而有子此女无夫而有夫郡人无不见之有欲上闻者莫固旧族恐以妖妄及祸固请乃已

十五年冬山东妇人生一物双猫首首有角角之颠有目身如人手垂过膝巡抚陈以闻于朝

嘉定有一男子无家室忽腹大面黄人以为蛊其【阙】夜闻呼唤声生一男将执以闻之官其人抱遯去不知所之

十二年蕪州各街道每夜鬼哭咆哮聞之有聲逐之有影

十五年蕪州有鬼白日成陣牆上及屋脊行走擲楸居人城遂陷

十六年將祭太廟鹵簿已設忽見黑氣自空而墜如有婦人衣白者疾飛入宮軍人皆見之是年人見太廟中鬼皆嘯呼而出

赤眚 黑眚

崇禎七年甲戌二月海豐雨血

七年黃梅縣天雨黑子如栗

八年八月宣城池中出血

十年丁丑八月黃州天雨蟲色黑大如菽蠕蠕動食苗俱盡

是年春北地紅雨

八月山東雨血

十一年新鄉雨黑水

十二年黃州城南門流血五日又太倉岳王市地涌血十五年青浦東門外河內一石又灘上一石又諸生楊家柱礎皆涌血不出三月之內

蜀劍州民家有滴血污其門城中數萬戶皆同

十一年都中黑眚似飛霾民大擾

十六年京師黑眚見宮中常見如豕如犬者黑色行作鬼聲

癸未年松江綉野橋雨血

梓慎有言曰赤黑之祲喪氛也京房曰臨獄不解茲謂進非厥咎天罰故天雨血傳曰蟲從天而墜其國兵災並起劉向曰刑罰暴虐貪叨無厭則天雨蟲天雨麥 雨毛 地粉

崇禎丙子年松江綉野橋雨毛

十三年雨麦于吴郡

關中渭南縣天雨荞麦

十四年江南池河守备高策铨报于广武衛之龙山英武衛之小横土中变成红綠白三色米粉军民取以充饥取者日数千人名曰观音粮

谷梁传曰着于上呈于下谓之雨夫十三四年【阙】无麦苗以无雨也无雨而雨麦则何以为雨【阙】变而为粉其异也为【阙】

陵哭 城愁 神像流泪

凤陵未灾前有遥见陵中二人一衣朱一衣青毆击甚苦寻闻号泣声乃集数十人持杖入惟二犬踉跄走无何寇至

崇禎十五年后凤阳祖陵悲号震动三年不止

十七年南京孝陵夜哭

十四年嘉兴城声震如裂时称城愁

十六年癸未黄州城南門哭五日止

九年曲阜县孔子庙圣像两目流泪如汗三日夜十五年十一月黄梅孔隴镇地藏菩薩目出泪一缕循鼻而下拭而复出十二月二十三日城陷

陵异止此乎曰贼将王克生伪扬武知州张联奎谋发献陵风雷大作被击而死则不啻主于哭也城异止此乎田十七年十一月荥泽县东十里平地忽现一城雉堞井干皆具久之始没几同影国则不止于声也神像之异止此乎曰五皇子之薨慈圣李太后凭而告者数千百言自称九莲菩薩则天之灵不止像也呜呼异矣

绥寇纪畧卷十二